

Le₂la₂ ca₂jmo₃ dsa₂ i₂chen₄ quián₅ Jesús

Jág₁ a₂cué₄ a₂chen₃ Diú₄ Jme₂dsí₂ Jñi₃ó₅

1 ¹ Ne₄ si₂ a₂ca₂jmo₃ jniá₂ le₂'uig₅₄, gui₅₄ Teófilo,^a ca₂juá'₃ jniá₂ ca₂le₃jé₃ a₂ca₂jmo₃ Jesús ca₂le₃ ca₂jme₃lióg₃ ca₂jme₃tag₂₃, ² ca₂lia'₂ ca₂té₂ jmig₄ a₂ca₂ñái'₃ guei'₅₄ i₂juíg₃. Né'₃ a₂dsáin'₃ guei'₅₄ i₂juíg₃, ca₂quióin'₂ dsi₂guia₃-tín₂ i₂chen₄^b quiáin₅, ca₂chei₃ dsi₂'é₂ jág₁. Jaun₂ ca₂cué₃ jág₁ të₂le₃ quian'₅₄ Jme₂dsí₂ Jñi₃ó₅, ca₂le₃jé₃ 'e₂ 'nió'₅ jmo₃ chi'₂ dsi₂guia₃-tín₂ 'éi₂. ³ Cang₂ jme₁ca₂join₃, jme₁ma₂jein'₅₄ táng₃, ca₂ñi₃ të₂láu₃ jmig₄ qui₂jme₂jñiai₂₃ qui₂cué'₅ jág₁ dsau₅ chi'₂ dsi₂guia₃-tín₂ a₂të₃dsón'₂ bá₄ chain₂ ma₂jein'₅₄ táng₃; jaun₂ qui₂ca₂dsia₃ jág₁ quiain'₅₄ 'éi₂ jui₁lia'₂ 'a₂ lia'₂ lë₅ ja₁gon₂ Diú₄.

⁴ Jme₁'en₅₄ gué₄ Jesús quiain'₅₄ chi'₂ dsi₂guia₃-tín₂ quiáin₅, jaun₂ ca₂juá'₂ ca₂tsí'₃ 'éi₂ a₂tsá₃ dsi₃lein₃ dsi₂jui₅ juig₂ Jerusalén. Jaun₂ ca₂juá'₂:

—Jñia₄ 'nia'₂, jui₁le₂ti₃ de'₂ jág₁ quió'₅ Ñe'₃ a₂ma₂juíg₂ 'nia'₂. ⁵ Dsau₅ bá₄ ca₂tióg₃ Juan₅₄ ca₂tiáin₂ jmig₂ dsa₂, la₁ 'nia'₂ gué'₂ në₃ tióg₂ Diú₄ Jme₂dsí₂ Jñi₃ó₅, të₃jë₄ la₂.

Ca₂ñá'₃ Jesús guei'₅₄ i₂juíg₃

(Marcos 16:19; Lucas 24:50-53)

⁶ Co₂ráun₂ tion'₅₄ chi'₂ dsi₂guia₃-tín₂ le₁ñi'₂ ja₁'en₅₄ Jesús, jaun₂ ca₂ñí'₃ Jesús:

—Te₁gui'₅₄, ¿ma₂té₂ ja₁jmo'₂ 'ne₂ a₂lión₂ dsa₂ juig₂ Israel?

⁷ Jaun₂ ca₂ñag₃ Jesús:

—Tsá₃ ca₂tín'₂ 'nia'₂ le₃ñi'₅₄ 'a₂ lia'₂ jmo₃ Diú₄ Jmei₂ 'éi'₃ ca₂le₃jé₃ 'e₂ 'ió'₄, 'e₂ jmig₄ në₃. 'Ñiog₅ bá₄ Diú₄ Jmei₂ ñi₅ a₂jaun₂. ⁸ Jë₁ma₂ca₂guen'₅₄ 'nia'₂ Jme₂dsí₂ quián₅ Diú₄, guéi'₁ 'nia'₂ jui₅bí₂, jaun₂ qui₂o₁nóg'₅ qui₂o₁'é'₃ jág₁ dsau₅ quió₃ juig₂ Jerusalén, le₂tan₅₄ juig₂ 'uë₃ Judea, 'uë₃ Samaria, ca₂le₃jé₃ juig₂ ta₁caun₂ mi₂güig₃ në₃.

⁹ Jme₁ma₂dsan₃ juá'₂ Jesús le₂në₅, ca₂uíg₂ jui₅ guei'₅₄ i₂juíg₃, ca₂ñái'₃ ca₂lioin₂ jnei₅. ¹⁰ Të₃tión₂ jaun₂ chi'₂ dsi₂guia₃-tín₂ jág₅ guei'₅₄ jme₁ñá'₃ Jesús, con'₂ tsá₃ jáin₅ jme₁ca₂jñin₂ on₃ dsa₂ le₁qui'₂ 'mi'₂ tiog₂ jau₂, tión₂ cau₅ quió'₅. ¹¹ Jaun₂ ca₂juá'₂ dsa₂ on₃ 'éi₂:

—'Nia'₂ dsa₂ chan₂ Galilea, tsá₃ ma₃ta₁ jmo₃ tión'₂ gué₄ 'nia'₂ ué₂ jág'₂ guei'₅₄. 'Ñiog₅ Jesús në₅ i₂ñá'₅ guei'₅₄ i₂juíg₃ të₃jñin'₄ 'nia'₂, le₂në₅ bá₄ jiá₃ táng₃ jë₁ma₂té₂ rë₁jiá₃, jui₁lia'₂ në₂jñin'₅₄ 'nia'₂ ñái'₅ në₅.

^a1 Teófilo: o₃, “'ne₂ i₂'nióg'₃ Diú₄.”

^b2 griego: apóstolous.

Ca₂quión'₂ dsa₂ Matías a₂jmo₃ ta₁ a₂jme₁lín₄ Judas

¹² Jaun₂ né₃ ca₂'uün₂ má'₂ ja₁chei₂ Olivos, ca₂o₃lein₃ táng₃ juig₂
Jerusalén, a₂nio₅ uíng₂ con'₂ ja₁'i₄ 'éi'₃ i₃nio₄ dsa₂ jme₁jmi₄ sa₅₄.^c

¹³ Jme₁ca₂o₃lein₃ Jerusalén jaun₂, ca₂uíg₂ cuarto guei'₅₄ ja₁ca₂jñia₃. Dsa₂
'éi₂ jme₁chein₂ Pe₄, Jacobo, Juan₅₄, Dré₄, Fe₂li₄, To₁má₄, Bartolomé,
Të₅₄, Jacobo ja₁ñi'₅₄ Alfeo, Si₂mu₅₄ i₂lín₅ cananista,^d quian'₅₄ Judas rin'₅₄
Jacobo. ¹⁴ Ca₂le₃jín₃ le₂jaun₂ jme₁ñii'₂ i₂gú'₃ co₂lë₅ quian'₅₄ o₁rin'₅₄
Jesús, María chog₅₄ Jesús, ca₂le₃jín₃ gué₄ 'io₅₄ sián'₂ né₃, a₂jme₁tsí'₅
Diú₄.

¹⁵ Co₂ráun₂ jme₁lé₂ con'₂ caun₂ 'ñiá₂-lón₂ rë₂dsí₂ guión₂ (120) dsa₂ 'én₂
i₂jme₁le₁ñi'₂. Jaun₂ ca₂nau₂ Pe₄ të₃jë₄ jaun₂, jaun₂ ca₂juá'₂ ca₂tsí'₃ dsa₂:

¹⁶ —Rin'₅₄ jniog₄, co₂në₅ lé₅ Si₂, tion₅₄ ca₂rë₃ti₃ jág₁ a₂ma₂'é₂ Jme₂dsí₂
quián₅ Diú₄ të₂le₃ quian'₅₄ 'lag₄ David, a₂ca₂'iin₃ Judas i₂ca₂jñia₃ dsa₂
i₂ca₂i₁te₂ Jesús chi₁'ñei'₂. ¹⁷ I₂jme₁quian'₅₄ bá₄ jniog₄ 'éi₂, jme₁lé₄ rin'₅₄
jniog₄, i₂jme₁jmo₅ ta₁ le₂la₂ bá₄ 'éi₂ ján₃. ¹⁸ La₁ quian'₅₄ cu₄ 'lig'₅₄
a₂ca₂lí'₃ Judas a₂ca₂'nii₃ Jesús, ca₂lá₃ 'uë₃. 'Uë₃ jaun₂ ca₂jmo₃ ca₂táin'₂
të₃ chi₁jín₂, qui₂ca₂'uë₂ ca₂le₃jé₃ a₂jme₁tio'₅₄ tú'₅. ¹⁹ Jme₁ca₂rë₃ñi₅ dsa₂
juig₂ Jerusalén, ca₂té'₃ 'uë₃ jaun₂ Acéldama, co₂'nió'₄ a₂juá'₂: 'Uë₃ Jmi₂,
quian'₅₄ jág₁ jmei₅ quió'₅. ²⁰ Ia₁ le₂la₂ juá'₂ ne₄ Si₂ Salmos:

Jui₁të₂tsi'₅₄ 'ñiog₅ 'né₅ quió'₅,

ia₁ 'i₁jan₂ tsá₃ 'ein₂ le₃tian'₃.^e

Ján₃ guë'₂ juá'₂ táng₃:

Dsa₂ sián'₂ jui₁jmo₅₄ ta₁ a₂jme₁lín₄.^f

²¹ 'Chan₂ bá₄ dsa₂ jë₄ la₂ quián₂ jniog₄ dsa₂ i₂ma₂ca₂jme₃quiong'₅₄
ca₂le₃jé₃ jmi₄ lia'₂ con'₂ jme₁quian'₅₄ jniog₄ Te₁gui'₅₄ Jesús, ²² ca₂le₃
ca₂jñó₂ Jesús jmi₄ a₂ca₂cho₃ Juan₅₄, ca₂lia'₂ jme₁ca₂uíg₂ Jesús guei'₅₄
i₂juíg₃. Jaun₂ tion₅₄ 'nió'₅ dsa₂ 'éi₂, jme₃quiong'₅₄ jniog₄, jaun₂ jáng'₃ jág₁
dsau₅ a₂ca₂jen'₅₄ táng₃ Jesús.

²³ Jaun₂ ca₂jmo₃ jág₁ ca₂'iin₃ jan₂ i₂chen₂ José i₂té'₂ Barsabás i₂té'₂
Justo né₃, quian'₅₄ jan₂ i₂chen₂ Matías. ²⁴ Jaun₂ ca₂tsí'₃ Diú₄ ca₂le₃jín₃,
ca₂juá'₂ le₂la₂:

—Te₁gui'₅₄, 'ne₂ bá₄ i₂cuíng'₂ të₂dsí₅ ca₂le₃jín₃ dsa₂, 'in₅₄ jnia'₅₄ 'ein₂
dsa₂ on₃ la₂ i₂ma₂quion'₅₄ 'ne₂, ²⁵ ia₁jaun₂ jmo₃ ta₁ léin₂ chi'₂ dsi₂guia₃-
tín₂ quiáng'₂ a₂jme₁lín₄ Judas, 'uíg₅₄ dsáu₁ ca₂i₃'éin₂, ca₂ñái'₃ ja₁ca₂tín₂.

²⁶ Jaun₂ ca₂tóin'₂ ca₂co₃, ca₂dsi₂ jág₁. Jaun₂ i₂chen₂ Matías bá₄ ca₂tín₂
ta₁ jaun₂. Dsi₂jui₅ le₂jaun₂ bá₄ ca₂jme₃quian'₅₄ dsa₂ guia₃-ján₃ i₂jme₁lé₂
gué₄ dsi₂guia₃-tín₂ i₂chen₄ quián₅ Jesús.

^c12 Con'₂ tí₅ caun₂ kilómetro.

^d13 griego: celotes, co₂'nió'₄ dsa₂ i₂nau₂ quen₅; jan₂ i₂'nio₃ táun₂ 'uë₃ 'éi'₃ quió'₅ Roma.

Jma₃quén₅ ca₂quoin₃ le₃on₃ Si₂mu₅₄ 'éi₂, ia₁ ñí₄ lë₃ mei'₂ tsá₃ ca₂ne₅₄ a₂chein₂.

^e20 Salmo 69:25.

^f20 Salmo 109:8.

Jme₁guan₃ Jme₂dsí₂ quián₅ Diú₄

2 ¹ Jme₁ca₂té₂ Jmig₄ Të₂láu₃-guiá₂, caun₂ bá₄ ja₁jme₁tion'₅₄ le₁ñi'₂ ca₂le₃jín₃ dsa₂ i₂'én₂. ² Con'₂ tsá₃ jáin₅ jme₁ca₂nág₂, ca₂lë₃ gau₂ ca₂jan₃ guei'₅₄ lia'₂ lé₅ jë₁'ei₅ dsí₂ tiá₂ lín₃ ca₂lë₃, ca₂né'₂ ta₁caun₂ dsi₂néi₂ ja₁jme₁tion'₅₄ dsa₂. ³ Jaun₂ co₂tan₅₄ dsi₂jui₅ le₂jaun₂ qui₂ca₂séi'₂ tsi'₄ si₂ qui₂të₁tsi'₅₄ ne₄ quió'₅ dsa₂ 'éi₂, le₂jain₂ le₂jain₂. ⁴ Jaun₂ ca₂le₃jín₃ qui₂ca₂cain'₂ quian'₅₄ Jme₂dsí₂ Jñi₅. Jaun₂ ca₂jme₃lióg₃ dsa₂ qui₂ca₂dsia₃ jág₁ jmei₅ siá'₂, lia'₂ con'₂ lé₅ ca₂cuë₃ Jme₂dsí₂ a₂juá'₂ dsa₂. ⁵ Jmig₄ jaun₂ jme₁tion'₅₄ dsa₂ judíos juig₂ Jerusalén, i₂ja₂lén₂ ta₁caun₂ mi₂güí₃, a₂jme₂ti₃ con'₂ tag₄ chí'₅ quió'₅. ⁶ Jme₁ca₂nág₂ mi'₅₄ a₂ca₂lë₃ jaun₂, qui₂ca₂ñi'₂ dsa₂, tsá₃ caun₂ ca₂i₃jio₅ dsí₅, ia₁ ca₂le₃jín₃ bá₄ dsa₂ 'éi₂ jma₃quén₅ qui₂ca₂nág₂ jág₁ jmei₅ quió'₅ a₂qui₂ca₂dsia₃ dsa₂ i₂tion'₅₄ 'éi₂. ⁷ Jaun₂ dsi₃gó'₃ dsí₅ 'ñio₅ lín₃, qui₂ca₂dsia₃ jág₁ guioin₅₄ quiaín'₅₄ riín'₅₄, ca₂juá'₂:

—¿On₁jua'₅₄ dsa₂ chan₂ Galilea ca₂le₃jín₃ dsa₂ i₂dsia₅ jág₁ në₅? ⁸ ¿A₂ bá₄ lia'₂ né'₂ dsia₂₃ jág₁ jmei₅ quió'₅ juig₂ go₄ jniog₄ le₂jau₂ le₂jau₂? ⁹ Dsa₂ i₂tion'₅₄ ja₁lá₃ i₂chan₂ juig₂ Partia, dsa₂ chan₂ Media, dsa₂ chan₂ Elam, dsa₂ chan₂ Mesopotamia, i₂chan₂ Judea, i₂chan₂ Capadocia, dsa₂ chan₂ Ponto, dsa₂ chan₂ 'uë₃ Asia, ¹⁰ dsa₂ chan₂ Frigia quian'₅₄ Panfilia, dsa₂ ja₂lén₂ 'uë₃ Egipto quian'₅₄ juig₂ 'uë₃ Africa⁸ a₂nio₅ uíng₂ con'₂ gué₄ Cirene. Ján₃ bá₄ tion'₅₄ dsa₂ chan₂ Roma i₂ma₂tián'₅ ja₁lá₃. I₂lín₅₄ 'éi₂ jme₁ma₂lín₅ judíos; i₂lín₅₄ guë'₂ ma₂gue₃ juá'₅ quió'₅ dsa₂ judíos. ¹¹ Ján₃ bá₄ tion'₅₄ dsa₂ chan₂ 'uë₃ Creta, dsa₂ chan₂ Arabia në₃. La₁ ca₂le₃jág₃ bá₄ jniog₄ néi₁ quian'₅₄ jág₁ jmei₅ quián₂ a₂dsia₅ dsa₂ në₅ ca₂le₃jé₃ a₂jlá'₁ a₂'io'₂ a₂jmo₅ Diú₄.

¹² Jaun₂ 'ñio₅ dsi₂gó'₃ dsí₅ dsa₂, tsá₃ caun₂ qui₂ca₂'ág₂ dsí₅. Jñia'₅₄ qui₂ñí'₅ riín'₅₄:

—¿E₂ 'nió'₄ juá'₂ ca₂le₃jé₃ a₂në₅?

¹³ I₂lín₅₄ guë'₂ tsá₃ 'éin₂, jñia'₅₄ qui₂jmóg'₂ burlas, jaun₂ ca₂juá'₂:

—I₂le₁'en₅ bá₄ i₂në₅.

Jág₁ a₂ca₂juá'₂ Pe₄ ca₂tsí'₃ dsa₂

¹⁴ Jaun₂ ca₂nau₂ Pe₄ jë₄ jme₁guá₄ quiaín'₅₄ gué₄ guía₃-ján₃ chí'₂ dsi₂guia₃-tín₂ riín'₅₄. Jaun₂ ca₂juá'₂ tiá₂ ca₂tsí'₃ dsa₂:

—'Nia'₂ dsa₂ chan₂ Judea quian'₅₄ ca₂le₃jíng'₃ i₂tián'₅ Jerusalén në₃, jui₁le₂ñi'₅₄ 'nia'₂ jág₁ la₂. Nei₂ 'nia'₂ dse₃ a₂juá'₄ jniá₂ la₂. ¹⁵ Tsá₃ le₁'en₅ dsa₂ la₂ jui₁lia'₂ lín'₂ 'nia'₂, ia₁ con'₂ hora ní₁ ñi₃ të₂ o₃'iog₂^h bá₄ gué₄ la₂. ¹⁶ Të₂le₃ a₂rë₂ti₃ con'₂ lé₅ jág₁ a₂ca₂'é₂ Joel ma₂líg'₂, lia'₂ con'₂ jme₁ca₂juá'₂:

⁸10 griego: Libia.

^h15 lit. “hora 'ni₅,” 'Nio'₂ ja₁ton₅ Apéndice B.

- ¹⁷ Jë₁ca₂tó'₂ jmig₄, juá'₂ Diú₄,
tsing₅₄ Jme₂dsí₂ quiáng₃ jaun₂ sióin₃
ne₄ quió'₅ ca₂le₃jín₃ dsa₂ mi₂güí₃.
Ja₂ñí'₂ 'nia'₂, ja₁míg'₄ né₃
qui₃dsia₃ o₄quió₃ jniá₂.
Dsó₂ chi'₂ quián'₂ 'nia'₂ né₃
a₂lë₁qui₃jág₃ 'e₂ qui₃jág₃,
dsi₂gui'₅₄ can'₅₄ guë'₂ qui₃qui₃.
¹⁸ Jmig₄ jaun₂, qui₁'íng₄ Jme₂dsí₂ quiáng₃
ne₄ quió'₅ dsa₂ ñe'₂, dsa₂ mí₂ né₃
i₂jme₂ti₃ ta₁ ne₃,
jaun₂ gué₄ qui₃dsia₃ o₄quió₃ jniá₂.
¹⁹ Dsi₁ guei'₅₄ guë'₂ qui₁'é₄ jniá₂ dsa₂
cosas a₂dsi₃gó'₃ dsí₅.
Ne₄ gua'₅₄ 'uë₃ guë'₂
jmo₅₄ jniá₂ lé₂ léi₄,
jui₁lia'₂ jmi₂, si₂, jnei₅ lé₅ jme₁ñi₁ né₃.
²⁰ 'Iog₂ guë'₂ co₂dsia₅ le₃lia'₂.
Tsi'₂ guë'₂ lé₂ guéin₂ lia'₂ lé₅ jmi₂.
Ca₂le₃jé₃ a₂në₅ lé₂ né'₃ gué₄
a₂guá₂ jmig₄ quió'₅ Te₁gui'₅₄.
Jmig₄ jaun₂ lé₂ caun₂ jmig₄ juë'₂ a₂gau₂.
²¹ Jaun₂ ca₂le₃jín₃ dsa₂ i₂mi₅ chi₂lén'₂ Te₁gui'₅₄,
lióin₂ bá₄.ⁱ
²² 'Nia'₂ dsa₂ chan₂ Israel, nei₂ 'nia'₂ ca₂le₃jé₃ a₂juá'₄ jniá₂ la₂. Jesús
chan₂ Nazaret dsa₂ dsen₃ quián₅ Diú₄, i₂ca₂cué'₃ 'éi'₃ ca₂chein₃ jin'₄
'nia'₂. Ca₂jmo₃ Diú₄ ca₂le₃jé₃ léi₄ juë'₂, ca₂le₃jé₃ 'e₂ dsi₂gó'₃ dsí₅ dsa₂,
qui₂ca₂jmo₃ të₂le₃ quian'₅₄ Jesús jin'₄ 'nia'₂. A₂ñi'₅₄ rë₂ bá₄ 'nia'₂ jaun₂.
²³ La₁ jme₁ca₂jáng'₂ dsa₂ o₄gog'₂ 'nia'₂ con'₂ jme₁ma₂lë₅ jág₁ quió'₅ Diú₄
a₂ma₂ñi₅ le₂jniá₅, 'nia'₂ né₃ ca₂chang'₂ i₂'éi₂, ca₂te'₅₄ chi₁'ñei₂₃,
ca₂i₁jin'₅₄ 'nia'₂ o₄gú₃ dsa₂ 'lin'₅₄ i₂tsá₃ néi₂ dsí₅. Jaun₂ ca₂jñag'₃ ca₂tion₃
cróg₄. ²⁴ La₁ Diú₄ ca₂jme₃jein'₅₄ táng₃, ca₂lió₂ ne₄ 'mú₃. Ia₁ tsá₃ lé₂ jua'₅₄
a₂të₃roin₅₄ a₂rë₃join₅ co₂tan₅₄ jin₄ 'lag₄. ²⁵ Ia₁ ca₂juá'₂ 'lag₄ Rag₅₄ David
a₂'iin₂₃ Jesús, ca₂juá'₂:
Ia₁ jin₄ bá₄ jniá₂ tián₂ Te₁gui'₅₄
cau₅ quió₃.
'Éi₂ bá₄ guá₅ të₂le₃ gu₃ ne₁,
ia₁jaun₂ 'i₁jan₂ tsá₃ 'ein₂ lé₂ jmóg'₂ jleng₃,
'i₅ dsi₃.
²⁶ Jaun₂ lë₃, 'ñio₅ lin₃ ca₂jmo₃ jniá₂ 'io'₂,
jaun₂ ca₂juá'₃ quian'₅₄ le₁tsi'₃

ⁱ17-21: Joel 2:28-32.

- jág₁ a₂jéin₅ lián'₂.
 Jaun₂ lë₃ tsá₃ 'i₅ dsi₃ jë₁ma₂ca₂jon₃ ni₁ñi₃.
²⁷ Ia₁ tsá₃ cué'₁ jmig₄ a₂jñia₃ jme₂dsí₂ quiáng₃
 ja₁tion'₅₄ 'lag₄,b
 on₃ guë'₂ cué'₁ jmig₄ a₂siá'₃ ni₁ñi₃ jniá'₂,
 dsa₂jñió₅ quiáng'₂ i₂'nióg'₃.
²⁸ Ca₂'ë'₅₄ ca₂jme₁tag'₂ jui₅ ja₁tín'₄ jme₂dsí₂ quiáng₃.
 Jaun₂ jmó'₂ jéin₄ lián'₂ jë₁ma₂'eng₅₄ ja₁cong'₂.^j
²⁹ 'Rin'₅₄ jniog₄, léi₄ dsón'₂ bá₄ ca₂jon₃ tsi₁jon₂ jmei₂ jniog₄ David,
 jaun₂ ca₂'oin₃. Në₅ bá₄ chí'₅ guë'₂ tau₂ 'ñio₅ quió'₅ quian'₅₄ jniog₄ rë₂në₃.
³⁰ La₁ David 'éi₂ jme₁lín₄ jan₂ i₂jme₁'ë₂ jág₁ quián₅ Diú₄, jaun₂ jme₁ñi₅ rë₂
 a₂ca₂cuë₃ Diú₄ jág₁ 'iin₂₃ 'ñiog₅, a₂le₃chan₂ jë₄ quió'₅ ja₁ñi'₅₄ chí'₂ dsio₅₄,
 jan₂ i₂lín₅ I₂rë₂'ín₁ quián₅ Diú₄. Jaun₂ i₂'éi₂ guá₃ goin₃ ne₄ ne₄ta₁
 ja₁jme₁guá₄ 'ñiog₅ David. ³¹ Co₂'nió'₄ a₂ma₂jág₂ bá₄ David le₂jñiá₅,
 ca₂juá'₂ a₂jen'₅₄ I₂rë₂'ín₁ quián₅ Diú₄. Jaun₂ ca₂juá'₂ ján₃ a₂tsá₃ jñia₃
 jme₂dsí₂ quió'₅ jin₄ 'lag₄,^k on₃ guë'₂ dsi₃'én₂ ni₁ñi₁₂ jua'₅₄ a₂siá'₃. ³² Ia₁
 Diú₄ bá₄ ca₂jmo₃ ca₂jen'₅₄ táng₃ 'ñiog₅ Jesús 'éi₂. Ca₂le₃jág₃ bá₄ jnia'₅₄
 ca₂të₂ ne₄, jaun₂ lë₃ cuë'₂ jág₁ dsau₅. ³³ Jaun₂ ca₂chó'₂ Diú₄ quian'₅₄ gu₂
 ne₁, ca₂jme₃juag'₂. Jaun₂ Diú₄ Jmei₂ ca₂cuin₃ Jme₂dsí₂ quiáin₅ ca₂cuin₃
 Jesús, lia'₂ con'₂ lë₅ jág₁ quió'₅ ma₂cuë₃. Jaun₂ ca₂le₃jë₃ a₂në₅ a₂ma₂jag'₅₄
 a₂ma₂nei'₂ 'nia'₂, já₅ ne₄ 'éi₂ bá₄. ³⁴ Ia₁ on₃jua'₅₄ David ca₂uíg₂ guei'₅₄
 i₂juíg₃, ia₁ 'ñiog₅ David ca₂juá'₃:
 Ca₂juá'₂ Diú₄ ca₂tsí'₃ Te₁gui'₅₄ quiáng₃:
 “Né₂ con₂ jniá'₂ të₂le₃ gu₃ ne₁,
³⁵ ca₂lia'₂ ca₂të₂ jmig₄
 a₂tón'₁ jniá'₂ dsa₂ i₂'iog₅₄ o₄tag'₄”.^l
³⁶ 'Jui₁le₂ñi₅ rë₂ ca₂le₃jín₃ dsa₂ chan₂ juig₂ Israel, jaun₂ tsá₃ jui₁'ei₅₄
 caun₂-tín₃ dsi₅, ia₁ 'ñiog₅ Jesús 'éi₂ bá₄, i₂ca₂tión'₃ 'nia'₂ cróg₄, Diú₄ në₃
 ma₂jmo₃ ma₂lín₅ lia'₂ Te₁gui'₅₄ lia'₂ rë'₂ I₂rë₂'ín₁ quiáin₅.
³⁷ Jme₁ca₂nág₂ dsa₂ le₂në₅ tioen'₅₄, qui₂ca₂tá'₂ 'lia'₂ dsí₅ 'ñio₅ lín₃.
 Jaun₂ ca₂ñí'₃ Pe₄ quiaín'₅₄ chí'₂ dsi₂guia₃-tín₂ riin'₅₄ ca₂juá'₂:
 —Rin'₅₄ jniog₄, é'e₂ 'nió'₅ jmó₁ jnia'₅₄?
³⁸ Jaun₂ ca₂ñag₃ Pe₄:
 —Jme₁tsín₄ 'nia'₂ 'au'₂, jen'₄ 'nia'₂ të₂le₃ quió'₅ Diú₄, chon₅₄ 'nia'₂
 jmig₂ le₂jang'₂ le₂jang'₂ lia'₂ con'₂ lë₅ 'éi'₃ quió'₅ Jesús, cuë'₅₄ léi₄
 a₂qui₂ma₂'én₂ dsáu'₂ 'nia'₂. Jaun₂ gué₄ cuin₃ Diú₄ Jme₂dsí₂ Jñió₅ quiáin₅.
³⁹ Jág₁ në₅ ca₂cuë₃ Diú₄ quián'₂ 'nia'₂ ca₂le₃jíng'₃, ca₂le₃jín₃ chí'₂-guein₂
 quián'₂ 'nia'₂ në₃, quian'₅₄ ca₂le₃jín₃ gué₄ dsa₂ i₂chan₂ uíng₂. Jág₁ në₅
 quió'₅ ca₂le₃jín₃ dsa₂ i₂'nio₃ Te₁gui'₅₄ Diú₄ quián₂ jniog₄ të₂.

^j28 Salmo 16:18-11.

^k27,31 griego: hades, co₂'nió'₄ a₂juá'₂, ja₁quió'₄ 'lag₄.

^l35 Salmo 110:1.

⁴⁰ Quian'₅₄ jág₁ la₂, quian'₅₄ 'lióng₂ gué₄ jág₁ siá'₂, ca₂juá'₂ Pe₄ tion₅₄ ca₂tsí'₃ dsa₂:

—Lion₄ 'nia'₂ jin₄ dsa₂ i₂ma₂i₂cón'₅ rē₂nē₃.

⁴¹ Jaun₂ ca₂le₃jín₃ i₂ca₂tón'₃ jui₅ ca₂nág₂ jág₁ dse₃ ca₂juá'₂ Pe₄, qui₂ca₂jñó₂ jmi₂g₂. Jmi₂g₄ jaun₂ con'₂ 'ni₅ mei₅ dsa₂ i₃ton'₅₄ tē₂le₃ jin₄ dsa₂ i₂ma₂'én₂ tē₂le₃ quió'₅ Jesucristo. ⁴² Ca₂le₃jín₃ dsa₂ ca₂jña'₃ tiá₂ ca₂le₃jé₃ jág₁ a₂jme₂tag₅ chi'₂ dsi₂guia₃-tín₂. Caun₂ bá₄ jág₁ quió'₅ ca₂jmo₃ ca₂le₃jín₃, chi₂lén'₂ Diú₄, qui₂tóin'₅ co₂lē₅, jmo₂₃ dsóg₁ i₁ñí'₄.

'A₂ lia'₂ jme₁chan₂ dsa₂ le₂'uig₅₄ i₂'én₂ jág₁ dse₃

⁴³ 'Nio₅ i₂gó'₃ dsí₅ dsa₂ ca₂le₃jé₃ léi₄ a₂qui₂ca₂jmo₃ Diú₄ tē₂le₃ quian'₅₄ dsi₂guia₃-tín₂ i₂chen₄^m quiáin₅. ⁴⁴ Ca₂le₃jín₃ dsa₂ i₂ma₂'én₂, caun₂ bá₄ jág₁ 'ei₅ quió'₅, jaun₂ ca₂le₃jé₃ a₂jme₁cha₂ quió'₅, jme₁lé₄ quió'₅ ca₂le₃jín₃ riin'₅₄. ⁴⁵ Ca₂le₃jé₃ 'e₂ cosa cha₂ quió'₅, qui₂ca₂'nag₃, jaun₂ jme₁qui₂dsi₂ó'₅ cu₄ jaun₂ 'ein₂ riin'₅₄ 'nió'₅ quió'₅. ⁴⁶ Ca₂le₃jé₃ jmi₂g₄ jme₁ñi'₂ i₁dsi₅ guá'₅ templo. Dsi₂néi₂ quió'₅ né₃, jme₁dsi₂ó'₅ i₁ñí'₄ jme₁gué'₅ co₂dsia₅, ca₂le₃jín₃ jmo₂₃ 'io'₂, caun₂ bá₄ 'ei₅ dsí₅. ⁴⁷ Ca₂le₃jín₃ jme₁cué'₅ ti₁'mag'₄ Diú₄, jaun₂ ca₂le₃jín₃ dsa₂ sián'₂ jme₁'nioi₃ dsa₂ 'éi₂. Jaun₂ ca₂le₃jé₃ jmi₂g₄ bá₄ jmo₅ Te₁gui'₅₄ caun₂ dsi₂juín₂ dsa₂ i₂lón₂.

Ca₂'lón₂ jan₂ dsa₂ 'lian'₂

3 ¹ Co₂ráun₂ dsi₂óg₃ Pe₄ quiaín'₅₄ Juan₅₄ guá'₅ templo con'₂ hora ñí₁ 'ni₅ tē₂le₃ ca₂'láu₂,ⁿ ia₁ hora jaun₂ jme₁ñi'₂ dsa₂ tián₂ chi₂lén'₂ Diú₄. ² Ca₂le₃jé₃ jmi₂g₄ jme₁dsi₂jña₃ dsa₂ jan₂ dsa₂ 'lian'₂ i₂tsá₃ lé₂ ñi₃, le₂jaun₂ jme₁ma₂lín₅ lia'₂ con'₂ jme₁ca₂rē₃cháin₃, jme₁dsi₃jio₃ dsa₂ o₄'né₄ i₁dsi₅ guá'₅, ja₁té'₂ dsa₂ O₄'né₄ Jlá'₁. Ja₁jaun₂ jme₁qui₂mi₅ dsa₂ 'lian'₂ 'éi₂ cu₄ quió'₅ dsa₂ i₂dsi₂lén₂ guá'₅. ³ Jme₁ca₂jág₃ dsa₂ dso'₅₄ 'éi₂ ca₂ñó₃ Pe₄ quiaín'₅₄ Juan₅₄ a₂dsi₃toin'₅₄ i₁dsi₅ guá'₅, jaun₂ ca₂mi₃ cu₄ quió'₅ dsa₂ on₃ 'éi₂. ⁴ Jaun₂ ca₂nau₂ Pe₄, Juan₅₄ né₃, ca₂jín₂ dsa₂ 'éi₂. Jaun₂ ca₂juá'₂ Pe₄:

—Dse₃ jag₄ jnia'₅₄.

⁵ Jaun₂ guá'₅ dsa₂ 'éi₂ qui₂jín₂ Pe₄ quian'₅₄ Juan₅₄, ia₁ lín₂ cuē₃ dsa₂ ca₂la₂ cu₄. ⁶ La₁ jaun₂ ca₂juá'₂ Pe₄:

—Tsá₃ cu₄tio₂g₂, on₃ guē'₂ cu₄nió₂g₄ cha₂ quió'₃ cuē₅₄. La₁ con'₂ a₂cha₂ quió'₃, cuē₅₄. Quian'₅₄ 'éi'₃ quió'₅ Jesucristo chan₂ Nazaret, nau₂, ñi₄.

⁷ Jaun₂ ca₂jña'₃ Pe₄ mi₂gu₂ ne₁ dsa₂ 'éi₂, ca₂jme₃'o₅₄ ca₂chó'₂. Dsi₂jui₅ le₂jaun₂ ca₂rē₃bén₂ mi₂tag₄ dsa₂ 'éi₂. ⁸ Jaun₂ ca₂ráun₂ ca₂nau₂ jaun₂ ca₂jme₃lió₃ ca₂ñi₃. Jaun₂ ca₂'í₃ i₁dsi₅ guá'₅ quiaín'₅₄ dsa₂ on₃ 'éi₂, qui₂ca₂ñi₃ qui₂ca₂ráun₂ qui₂ca₂cué'₃ ti₁'mag'₄ Diú₄. ⁹ Ca₂le₃jín₃ dsa₂ i₂tion'₅₄ ja₁jaun₂, ca₂jín₂ dsa₂ 'éi₂ ñi₂₃ cué'₅ ti₁'mag'₄ Diú₄. ¹⁰ Jaun₂

^m43 griego: apóstolous.

ⁿ1 lit. “hora ñi₃.” 'Nio'₂ ja₁ton₅ Apéndice B.

dsi₂gó'₃ dsí₅ 'ñio₅ lin₃, ia₁ ma₂ñi₂₃. Ma₂cuin₂₃ bá₄ dsa₂ 'éi₂ i₂gua₂ tián₂
o₄'né₄ chei₂ Jlá'₁ qui₂mi₂₃ cu₄.

Jág₁ ca₂ton₃ Pe₄ corredor ja₁té'₂ dsa₂ quió'₅ Salomón

¹¹ Caun₂ 'en₅₄ le₂jaun₂ bá₄ dsa₂ i₂jme₁'lian'₂ 'éi₂ quiaín'₅₄ tsá₃ téin₂
Pe₄, Juan₅₄ né₃. Jaun₂ ca₂i₃lén₂ co₂chi'₅₄ juín₅ dsa₂ dsi₂gó'₃ dsí₅ ca₂ton₂
guá'₅ ja₁chei₂ Corredor quió'₅ Salomón, ja₁jme₁'en₅₄ Pe₄ quiaín'₅₄ Juan₅₄
né₃. ¹² Jme₁ca₂jág₃ Pe₄ le₁ñi'₂ dsa₂ juín₅, jaun₂ ca₂juá'₂ ca₂tsí'₃ dsa₂ 'éi₂:
—'Nia'₂ dsa₂ juig₂ chan₂ Israel, ¿'E₂ lë₃ ñí₄ dsi₂gó'₃ 'au'₂ 'nia'₂? ¿'E₂ lë₃
jag'₅₄ 'nia'₂ jnia'₅₄ le₂në₅? On₃jua'₅₄ bí₂ a₂tag₂ jnia'₅₄ guio₅₄ a₂ca₂'lón₂
dsa₂ në₅ a₂ma₂lé₂ ñi₃, jua'₅₄ a₂lág₅ jnia'₅₄ dsa₂ o₂dsan₂. ¹³ La₁ia₁ Diú₄
quiaín₅ tsi₁jon₂ jmei₂ jniog₄ Abraham, Isaac, Jacob né₃, Diú₄ 'éi₂
ca₂jme₃juín'₂ 'ñio₅ lin₃ Jesús ja₁ñi'₅₄, i₂ca₂jín'₅₄ 'nia'₂ ne₄ dsi₂tan₅₄.
Jme₁'nio₃ gué₄ Dsi₄má'₂ Pilato jme₁lió₂, la₁ tsá₃ ca₂gue'₅₄ 'nia'₂. ¹⁴ 'Nió'₄
jme₁lon'₄ 'nia'₂ dsa₂ jñi₅ i₂tsá₃ 'e₂ dso₄ rin₂ 'éi₂, jë₂ bá₄ dsa₂ i₂ma₂jñi'₃
dsa₂ ca₂mi'₅₄ 'nia'₂ líón₂. ¹⁵ Jaun₂ le₂në₅ ca₂jñí'₃ 'nia'₂ dsa₂ i₂cuë₅
jme₂dsí₂. La₁ Diú₄ ca₂jme₃jeín'₅₄ táng₃ jin₄ 'lag₄, jaun₂ ca₂le₃jé₃ a₂në₅
ca₂té₂ ne₄ jnia'₅₄. ¹⁶ Quian'₅₄ bí₂ quió'₅ 'ñiog₅ Jesús 'éi₂ ca₂'lión₂ dsa₂
i₂cuín'₂ 'nia'₂ i₂jín'₄ 'nia'₂ në₅, ia₁ a₂'éin₂ jnia'₅₄ të₂le₃ quió'₅ Jesús. 'Éi₂
bá₄ në₂cuë₃ bí₂ quió'₅ dsa₂ në₅, jaun₂ ca₂'lón₂, co₂ñei'₅₄, jui₁lia'₂ jín'₅₄
'nia'₂ në₅.

¹⁷ 'Guion₄ bá₄ jniá₂ dse₃, rin'₅₄ jniog₄, a₂ca₂jmo'₅₄ 'nia'₂ caun₂ jág₁
quian'₅₄ dsa₂ can'₅₄ quiaín'₂ 'nia'₂, a₂ca₂jñí'₃ 'nia'₂ Jesús, ca₂jmo'₅₄ 'nia'₂
le₂jaun₂ ia₁ a₂tsá₃ ñi'₅₄ bá₄ 'nia'₂ 'e₂ jmo'₂. ¹⁸ La₁ ca₂rë₃ti₃ jág₁ a₂ma₂'é₂
Diú₄ le₂jñiá₅ të₂le₃ quian'₅₄ dsa₂ i₂jme₁'é₂ jág₁ quiaín₅, a₂tion₅₄ ñág₃ uig₅
dsa₂ I₂rë₂'ín₁ quiaín₅. ¹⁹ Jaun₂ né₃, jme₁tsín₄ 'nia'₂ 'au'₂, jen'₅₄ 'nia'₂ të₂le₃
quió'₅ Diú₄, ia₁jaun₂ 'én₂ dsáu'₂ 'nia'₂. Jaun₂ bá₄ jiá₃ jmi₄ cuë₃ Te₁gui'₅₄
a₂le₃güín'₂ jme₂dsí₂ quiaín'₂ 'nia'₂, ²⁰ a₂chein₃ táng₃ Jesús i₂lín₅ I₂rë₂'ín₁
quiaín₅ Diú₄, i₂ma₂lé₅ jág₁ le₂jñiá₅ jiá₃ quiaín'₂ 'nia'₂, ²¹ o₁jñia'₅₄ la₂ rë₂në₃
tion₅₄ 'nió'₅ guá₃ Jesús guei'₅₄ i₂juíg₃ ca₂lia'₂ ca₂jmo₃ Diú₄ rë₂ ca₂le₃jé₃
lia'₂ con'₂ lé₅ jág₁ ma₂'é₂ dsa₂ jñi₅ quiaín₅ ma₂líg'₂. ²² Le₂la₂ ca₂juá'₂
'lag₄ Moisés ca₂tsí'₃ dsa₂ quiaín₂ jniog₄ ma₂dsi₃jo₃: “A₂chen₃ Te₁gui'₅₄
Diú₄ jan₂ dsa₂ i₂'é₂ jág₁ quiaín₅, i₂lín₅ dsa₂ go'₄ 'nia'₂ guiong'₅₄, jui₁lia'₂
ca₂chei₃ jniá₂. Jaun₂ tón'₂ 'nia'₂ jui₅ jme₁ti'₄ 'nia'₂ ca₂le₃jé₃ con'₂ 'éi'₃
a₂jmo₃ 'éi₂. ²³ Ia₁ ca₂le₃jín₃ i₂tsá₃ jui₅ tón'₂ jág₁ quió'₅ dsa₂ i₂chen₄
quiaín₅ 'éi₂, dsi₃'éin₂, 'uíin₃ juig₂ Israel.” ²⁴ Jaun₂ le₂në₅ ca₂'é₂ Samuel
jág₁ le₂'uig₅₄, ca₂le₃jín₃ gué₄ dsa₂ i₂jme₁'é₂ jág₁ quiaín₅ Diú₄ i₂ca₂o₃lén₂
cang₂ gué₄ jaun₂, qui₂ca₂juá'₂ lia'₂ lé₂ jmi₄ në₃. ²⁵ Jág₁ a₂ca₂cuë₃ Diú₄
të₂le₃ quian'₅₄ dsa₂ i₂jme₁'é₂ jág₁ quiaín₅, ca₂cuë'₃ 'nia'₂ bá₄. A₂dse₃
quiaín'₂ 'nia'₂ bá₄ ca₂jmo₃ Diú₄ caun₂ jág₁ quian'₅₄ dsa₂ can'₅₄ quiaín₂
jniog₄ ma₂líg'₂, jui₁lia'₂ ca₂tsí'₃ Abraham: “Ca₂le₃jín₃ chi'₂-guein₂ dsa₂

^o23 Deuteronomio 18:15,18-19.

mi₂güig₃ le₃chain₂ dse₃ tē₂le₃ quian'₅₄ chi'₂ dsió'₂.^{p 26} Lia'₂ con'₂
 jme₁ca₂chón'₂^q Diú₄ Ja₁ñi'₅₄ ca₂chein₃ le₂'uig₅₄ jñi'₄ 'nia'₂, ia₁jaun₂
 jme₃gu'₅₄, ia₁jaun₂ tí'₄ 'nia'₂ le₂jang'₂ le₂jang'₂ ca₂le₃jé₃ dso₄ qui₂'nau'₂
 'nia'₂.

Pe₄ quian'₅₄ Juan₅₄ tióin₂ ne₄ dsi₂tan₅₄

4 ¹Pe₄ quian'₅₄ Juan₅₄ tsá₃ ma₂dsan₃ bá₄ gué₄ tsí'₅ dsa₂ jág₁,
 jme₁ca₂dsi₃lén₂ jme₂dsa₂ quian'₅₄ juig₅₄ chi'₂ 'i'₅₄ quián₅ guá'₅,
 dsa₂ saduceos né₃. ²Le₁'néi₃ 'ñio₅ lin₃, ia₁ jme₂tin₅ 'éi₂ dsa₂ a₂jen'₅₄ dsa₂
 jin₄ 'lag₄ jui₁lia'₂ ca₂lë₃ léi₄ ca₂jen'₅₄ Jesús. ³Jaun₂ ca₂jñau'₃ chi'₂ 'i'₅₄
 ca₂tág₃ ca₂i₁tio'₂ né₃ 'má₃ ca₂tē₂ jme₁jñia₃, ia₁ ca₂'láu₂ bá₄ jmi₄g₄ jaun₂.
⁴La₁ juin₅ bá₄ dsa₂ i₂ca₂nág₂ ca₂rë₃'éin₂ jág₁. Con'₂ 'ñiá₂ mei₅ dsa₂
 i₂ca₂rë₃'én₂ 'éi₂, jme₁ca₂cáun₂ dsa₂ 'í₁ jmá'₃ dsa₂ ñe'₂.
⁵Jme₁jñia₃ jaun₂, ca₂ñi'₂ ca₂le₃jín₃ dsa₂ dsen₅₄ i₂jmo₅ 'éi'₃ quián₅ dsa₂
 judíos, dsi₂gui'₅₄ can'₅₄, tē₅juá'₅ né₃. ⁶Ján₃ bá₄ jaun₂ jme₁'en₅₄ Anás i₂lín₅
 jme₂dsa₂ dsen₅₄, Caifás, Juan₅₄, Alejandro né₃, ca₂le₃jín₃ gué₄ i₂lín₅
 o₁rín'₅₄ jme₂dsa₂ dsen₅₄. ⁷Jme₁ma₂le₁ñi'₂ jñin₂, jaun₂ gué₄ ca₂i₁dsein₂₃
 Pe₄ quian'₅₄ Juan₅₄, jaun₂ ca₂chei'₃ dsi₂jio₂ ja₁le₁ñi'₂ jaun₂. Jaun₂
 ca₂ñag₃:

—'Éin₂ ca₂cuë₃ 'éi'₃, o₃ 'ein₂ ca₂cuë₃ jág₁ a₂i₂nio'₄ 'nia'₂ jme₂tíng'₁
 dsa₂, a₂jmo'₂ 'nia'₂ 'e₂ jmo'₂ i₂nio₅g'₅₄?

⁸Jaun₂ ca₂juá'₂ Pe₄, rē₂rín₅ Jme₂dsí₂ Jñio₅ tē₂dsí₅, ca₂tsí'₃ dsa₂ i₂le₁ñi'₂
 'éi₂:

—'Nia'₂ dsa₂ dsen₅₄ quián₅ juig₂, 'nia'₂ dsa₂ can'₅₄ quián₅ juig₂ Israel
 né₃: ⁹Chi₂juá'₂ a₂jaun₂ ñag'₅₄ 'nia'₂ ia₁ ca₂jmo₁ jñia'₅₄ caun₂ a₂dse₃ quió'₅
 jan₂ dsa₂ dso'₅₄ i₂tsá₃ lé₂ jme₁ñi₃, chi₂juá'₂ 'niog'₂ 'nia'₂ le₃ñi'₅₄ 'a₂ lia'₂
 ca₂lë₃ a₂ca₂'lóin₂, ¹⁰jui₁le₃ñi'₅₄ bá₄ 'nia'₂, jui₁le₃ñi₅ bá₄ ca₂le₃jín₃ dsa₂
 juig₂ Israel né₃, a₂chén'₅ dsa₂ nē₅ jin'₄ 'nia'₂ ca₂'lóin₂ quian'₅₄ bí₂ quió'₅
 Jesucristo chan₂ Nazaret i₂ca₂tióin₃ 'nia'₂ cróg₄, i₂ca₂jme₁jen'₅₄ táng₃
 Diú₄ jin₄ 'lag₄. ¹¹Jesús 'éi₂:

lín₅ ni₁cang₁ a₂tsá₃ jen'₅₄ 'nia'₂,

i₂lín₅g'₅ tē₅ i₂chi'₅ tsi₁'né₅,

la₁ ca₂dsióg₃ ca₂lë₃ ni₁cang₁ a₂dsen₅₄ gué₄.^r

¹²Ia₁ 'i₁jan₂ i₂sián'₂ tsá₃ chan₂ i₂le₃lión₂ dsa₂. Ia₁ 'i₁jan₂ i₂sián'₂ tsá₃
 ca₂cuin₃ Diú₄ ne₄ gua'₅₄ 'uë₃ la₂, a₂lé₂ 'íin₄ jniog₄ a₂mí₁ ne₄ Diú₄ ia₁jaun₂
 tág'₄ guei'₅₄ i₂juig₃, jñia'₅₄ lia'₂ jan₂ Jesús bá₄.

¹³Jme₁ca₂jág₃ dsa₂ can'₅₄ dsi₂gó'₃ dsí₅ ca₂jñin₂ Pe₄ quian'₅₄ Juan₅₄ 'a₂
 lia'₂ tiá₂ dsí₅ 'éi₂ ñag₂₃ ne₅₄ le₂jaun₂, jaun₂ ca₂rë₃lí'₄ a₂lín₅ 'éi₂ dsa₂ tsá₃
 lín₄ quen₅, i₂tsá₃ lín₄ si₂ cuí'₅ né₃, jaun₂ gué₄ ca₂rë₃cuin₂₃ a₂lín₅ 'éi₂ dsa₂

^p25 Génesis 22:18; 26:4.

^q26 o₃, "jme₁ca₂jme₃jen'₅₄."

^r11 Salmo 118:22.

i₂jme₁i₂nio₄ quian'₅₄ Jesús. ¹⁴ Ia₁ jaun₂ bá₄ jme₁chén'₄ dsa₂ i₂ca₂'lón₂ 'éi₂ jë₄ jaun₂, jaun₂ lë₃ tsá₃ cuin₅ jmig₄ jua'₅₄ a₂juá'₂ dsa₂ can'₅₄ a₂tsá₃ dsau₅.

¹⁵ Jaun₂ ca₂'uín'₂ bá₄ Pe₄ quian'₅₄ Juan₅₄ jë₄ jaun₂, jaun₂ ca₂jmo₃ jág₁ guioin₅₄ 'a₂ lia'₂ jmo₃. ¹⁶ Ca₂dsia₃ jág₁, juá'₂:

—¿'A₂ lia'₂ jmó₁ quian'₅₄ dsa₂ në₅ jaun₂? Ia₁ ca₂le₃jín₃ bá₄ dsa₂ juig₂ Jerusalén ma₂le₁ñi₅ a₂jmo₅ i₂në₅ léi₄ jué'₂, jaun₂ tsá₃ lé₂ jua'₅₄ a₂jua'₅₄ jniog₄ a₂tsá₃ dsau₅. ¹⁷ La₁ ia₁jaun₂ tsá₃ ma₃caun₂ qui₃dsi₃'ag₅ jág₁ jin₄ dsa₂ juig₂, 'nió'₅ quian₅₄ jniog₄ jué'₅ ia₁jaun₂ tsá₃ ma₃i₃nioi₅₄ qui₃'iin₃ gué₄ Jesús a₂tsí'₃ dsa₂ le₃ne₄ jui₅ ja₁dsau₅₄ në₅.

¹⁸ Jaun₂ ca₂të₃ dsa₂ i₂le₁ñi'₂ 'éi₂ ca₂té'₃ táng₃ Pe₄ quian'₅₄ Juan₅₄, jaun₂ ca₂jmo₃ 'éi'₃ ca₂tsí'₃ dsa₂ on₃ 'éi₂, a₂tsá₃ ma₃dsia₃ co₂ñei'₅₄ on₃ gué'₂ jme₃tiin₂₃ dsa₂ a₂'iin₂₃ Jesús. ¹⁹ La₁ jaun₂ ca₂ñag₃ Pe₄ quian'₅₄ Juan₅₄ ca₂juá'₂:

—'Nio'₄ 'nia'₂ 'au'₂ chi₂jua'₂ 'ñio₅ gué₄ dse₃ jniá₂ ne₄ Diú₄, a₂néi₁ jnia'₅₄ gau₂ jág₁ quián'₂ 'nia'₂, 'nió'₄ a₂jme₁néi₁ jnia'₅₄ gau₂ jág₁ quió'₅ Diú₄. ²⁰ La₁ jnia'₅₄ në₃ tsá₃ lé₂ tí₄ a₂dsiá₁ ca₂le₃jé₃ a₂ma₂jag₅₄, a₂ma₂néi₁ në₃.

²¹ Jaun₂ ca₂quiong₃ dsi₂tan₅₄ jué'₅, la₁ ca₂lió₂ bá₄ jaun₂ në₃. Ia₁ tsá₃ ca₂dsó'₂ 'a₂ lia'₂ 'é₂ uig₅, ia₁ ca₂le₃jín₃ bá₄ dsa₂ ma₂qui₂cué'₃ ti₁'mag'₄ Diú₄ a₂ca₂té₂ ne₅₄ a₂ca₂lë₃ jaun₂. ²² Jaun₂ dsa₂ ñe'₂ i₂ca₂'lón₂ 'éi₂ quian'₅₄ léi₄ a₂dsi₂gó'₃ dsi₅, jme₁'ein₅₄ lé₅ gué₄ të₂láu₃ ñi₂.

Ca₂mi₃ dsa₂ 'én₂ a₂cuë₃ gué₄ Diú₄ bí₂ quió'₅

²³ Jme₁ma₂lón₂ Pe₄ quian'₅₄ Juan₅₄, ca₂i₃lén₂ ja₁tion'₅₄ riin'₅₄, jaun₂ ca₂dsia₃ ca₂le₃jé₃ 'e₂ ca₂juá'₂ juig₅₄ jme₂dsa₂ quian'₅₄ dsi₂gui'₅₄ can'₅₄ a₂ca₂tsí'₃ 'éi₂. ²⁴ Jme₁ca₂nág₂ jág₁ jaun₂, ca₂le₃jín₃ ca₂mi₃ co₂lë₅ ca₂tsí'₃ Diú₄ ca₂juá'₂:

—Te₁gui'₅₄ quián₂ jniog₄, 'ne₂ bá₄ líng'₅ Diú₄ i₂ca₂jmo'₅₄ guei'₅₄ i₂juí₃, quian'₅₄ gua'₅₄ 'uë₃, jmi₁ñí'₄ në₃, ca₂le₃jé₃ gué₄ 'e₂ a₂cha₂. ²⁵ 'Ne₂ bá₄ ca₂jua'₅₄ quian'₅₄ Jme₂dsí₂ Jñió₅ quiáng'₂, jme₁ca₂juá'₂ 'lag₄ David dsa₂ quiáng'₂:

¿'E₂ lë₃ tion'₅₄ dsi₂nau₂ co₂mi'₅₄?

¿'E₂ lë₃ dsi₂jio₅ dsí₅ dsa₂ chan₂ mi₂güí₃

ca₂le₃jé₃ ne₅₄ a₂'lig'₅₄ a₂tsá₃ ta₁ tí₄?

²⁶ Ca₂le₃jín₃ rag₅₄ ne₄ gua'₅₄ 'uë₃

qui₂ca₂quiin'₂ jág₁;

Ca₂le₃jín₃ dsi₂tan₅₄ quián₅ juig₂

qui₂ca₂nau₂ 'nei₂ ja₁con₂ Te₁gui'₅₄,

ja₁con₂ I₂rë₂'ín₁ quiáin₅ në₃.^s

²⁷ 'Dsau₅ dsón'₂ bá₄ ca₂jmo₃ caun₂ jág₁ Rag₅₄ Herodes quian'₅₄ Dsi₄má'₂ Poncio Pilato juig₂ la₂ quian'₅₄ dsi₂nau₂, dsa₂ israelitas në₃.

^s25-26 Salmo 2:1-2.

Ca₂quiin'₃ jág₁ ca₂jme₃ñiai₅₄ Jesús Ja₂ñí'₂ jñiós₅ i₂rë₂'ín₁ quiáng'₂.
²⁸ Quian'₅₄ a₂në₅, ca₂jme₃ti₃ dsa₂ can'₅₄ 'éi₂ ca₂le₃jé₃ a₂'i₄ 'éi'₃ niog₅ lé₂.
²⁹ Jaun₂ né₃ Te₁gui'₅₄, jag₄ a₂quiong₅ dsa₂ jué'₅ jnia'₅₄. Cuë₄ bí₂ jnia'₅₄
 dsa₂ quiáng'₂ ia₁jaun₂ tián₂ qui₂jme₁tín₅ gué₄ jnia'₅₄ dsa₂ jág₁ quiáng'₂,
 tsá₃ jui₁le₂go₃. ³⁰ Cuë₄ bí₂ quiáng'₂ a₂lé₂ jme₁'lion₅₄ jnia'₅₄ dsa₂ dso'₅₄,
 a₂lé₂ jmó₁ léi₄ dsi₂gó'₃ dsi₅ quian'₅₄ bí₂ 'éi'₃ quió'₅ Jesús, dsa₂ jñiós₅
 i₂jme₂ti₃ quiáng'₂.
³¹ Jme₁ca₂dsan₃ chi₂léin'₂ Diú₄ le₂në₅, ca₂i₁bi₅₄ ja₁tioin'₅₄, jaun₂
 ca₂le₃jín₃ qui₂ca₂cain'₂ Jme₂dsí₂ Jñiós₅. Jaun₂ tsá₃ ma₃jué'₅ 'i₄ dsí₅
 qui₂ca₂'é₂ jág₁ dse₃ quió'₅ Diú₄.

Ca₂le₃jé₃ 'e₂ cha₂ jme₁lé₄ quió'₅ ca₂le₃jín₃

³² Ca₂le₃jín₃ dsa₂ i₂ma₂'én₂, caun₂ bá₄ a₂dsi₂jio₅ dsí₅, caun₂ bá₄ 'ei₅
 jme₂dsí₂ quió'₅ ca₂le₃jín₃. 'I₁jan₂ tsá₃ jua'₅₄ a₂jmo₂₃ quió'₅ 'ñiog₅ 'e₂
 caun₂ a₂cha₂ quió'₅. Jmo₂₃ bá₄ dsí₅ a₂quió'₅ co₂dsia₅ quiain'₅₄ riin'₅₄
 ca₂le₃jé₃ 'e₂ a₂cha₂ quió'₅. ³³ Caun₂ ca₂'ág₂ tiá₂ dsí₅ qui₂ca₂cuë₃ jág₁ dsau₅
 dsi₂guia₃-tín₂ i₂chen₄^t quián₅ Diú₄ 'éi₂, 'a₂ lia'₂ ca₂jen'₅₄ Te₁gui'₅₄ Jesús.
 Jaun₂ caun₂ qui₂ca₂cuë₃ Diú₄ bí₂ 'ñio₅ lín₃ quió'₅ ca₂le₃jín₃ dsa₂ i₂'én₂.
³⁴ 'I₁jan₂ tsá₃ 'ein₂ jua'₅₄ cha₂ qui₂ca₂rë₃'nió'₅ quió'₅, ia₁ dsa₂ i₂cha₂ 'uë₃,
 o₃ i₂tióng₂ 'né₅ quió'₅ né₃, qui₂ca₂'nag₃. ³⁵ Jaun₂ ca₂o₃can₅ cu₄ jaun₂,
 ca₂jín₃ dsa₂ guia₃-tín₂ i₂chen₄ quián₅ Jesús 'éi₂, jaun₂ ca₂dsi₂o'₃ ca₂cué'₃
 le₂jan₂ le₂jan₂ 'a₂ con'₂ 'nió'₅ quió'₅. ³⁶ Jme₁chan₂ jin₄ dsa₂ 'éi₂ jan₂ dsa₂
 levita i₂jme₁chen₂ José i₂chan₂ Chipre. Dsa₂ i₂chen₄ né₃ ca₂quiain₃ Sé₄
 'éi₂ Bernabé, co₂'nió'₄ a₂juá'₂ dsa₂ i₂jmo₅ lián'₂, i₂jme₂'o₅₄.^u ³⁷ Bernabé
 'éi₂ ca₂'nag₃ caun₂ 'uë₃ quió'₅ a₂jme₁cha₂. Ca₂le₃jé₃ cu₄ jaun₂ ca₂o₃can₅
 ca₂cué'₃ dsa₂ guia₃-tín₂.

Dso₄ a₂ca₂'núu₂ Ananías quiain'₅₄ Safira

5 ¹ La₁ jan₂ dsa₂ sián'₂ i₂jme₁chen₂ Ananías quiain'₅₄ Safira 'io₅₄
 quiáin₅, ca₂'nag₃ caun₂ 'uë₃ quió'₅. ² Dsa₂ ñe'₂ 'éi₂ ca₂'ma₃ ca₂dsio₄
 cu₄ jaun₂ 'ñiog₅, jaun₂ ca₂dsio₄ bá₄ ca₂i₁cuë'₂ dsa₂ guia₃-tín₂ i₂chen₄^v
 quián₅ Jesús, lia'₂ jag₄ bá₄ a₂i₁can₅ ta₁jë₂. Ján₃ bá₄ ñi₅ 'io₅₄ quiáin₅.
³ Jaun₂ ca₂juá'₂ Pe₄ ca₂tsí'₃ Ananías:
 —¿'E₂ lë₃ ca₂'í₃ Satanás tē₂'au'₂ jaun₂ jmo'₂ jág₁ tē₂jág₁ ne₄ Jme₂dsí₂
 Jñiós₅, a₂ca₂'ma'₅₄ ca₂dsio₄ cu₄ a₂ca₂quí₃ dsa₂ 'lia'₅₄ 'uë₃ quiáng'₂?
⁴ ¿On₁jua'₅₄ quiáng'₂ 'uë₃ a₂në₂'nag'₅₄? ¿On₁jua'₅₄ quiáng'₂ cu₄ jaun₂ né₃?
 ¿'E₂ lë₃ ca₂i₃jio₅ 'au'₂ jmó'₂ le₂në₅? Diú₄ bá₄ nē₂chei'₅₄ 'ne₂ jág₁ tē₂jág₁,
 on₃jua'₅₄ dsa₂ mi₂güí₃.

^t33 griego: apóstolous.

^u36 lit. "jaun₅ lián'."

^v2 griego: apóstolous.

⁵ Dsi₂jui₅ jme₁në₂néi₂ Ananías le₂në₅, ca₂quín₃ ca₂join₃. Jaun₂ ca₂le₃jín₃ dsa₂ i₂ca₂rë₃ñi₅ a₂ca₂lë₃ le₂jaun₂ ca₂rë₃gó₅ 'ñio₅ lín₃. ⁶ Jaun₂ ca₂o₃lén₂ on₃-ún₂ chi₂' dsa₂ ñe₂, ca₂lio₃ 'mi₂ ni₁ñi₁₂, jaun₂ ca₂i₁'ó₄.

⁷ Tsá₃ jaun₂ ñi₅ 'io₅₄ quián₅ Ananías a₂ca₂lë₃ le₂jaun₂, jaun₂ ca₂dsióg₃ con₂' 'ni₅ hora cang₂ jaun₂. ⁸ Jaun₂ ca₂ñag₃ Pe₄ ca₂ñí₃ 'io₅₄:

—Jua₅₄ dsón₂. 'Ma₅₄ jaun₂ në₂'nag₅₄ 'nia₂ 'uë₃ con₂ lë₅ jág₁ juá₂ 'nia₂?

Jaun₂ ca₂ñag₃ 'io₅₄:

—Ján₅. 'Ma₅₄ jaun₂ dsón₂ bá₄ i₂'nag₄.

⁹ Jaun₂ ca₂juá₂ táng₃ Pe₄:

—'E₂ lë₃ në₂jmo₅₄ 'nia₂ caun₂ jág₁ a₂cáng₄ táu₂ Jme₂dsí₂ quián₅ Te₁gui₅₄? Ca₁'né₄ në₅ ma₂ja₂len₃ táng₃ dsa₂ i₂ma₃i₁'ón₄ dsi₂i₂gog₂. Në₃ gué₄ tē₂ táng₃ 'ne₂.

¹⁰ Dsi₂jui₅ le₂jaun₂ ca₂quín₃ 'io₅₄ ca₂join₃ ja₁chén₄ Pe₄ jaun₂. Jme₁ca₂i₃ton₅₄ chi₂' dsa₂ ñe₂ 'éi₂, ma₂jon₅ bá₄ 'io₅₄, jaun₂ ca₂tág₃ táng₃ jaun₂ ca₂i₁'ó₄ cau₅ ja₁rë₂'on₅ dsi₂i₂gu₂. ¹¹ Jaun₂ ca₂rë₃gó₅ 'ñio₅ lín₃ ca₂le₃jín₃ dsa₂ 'én₂ i₂lín₅ guá₅, ca₂le₃jín₃ gué₄ dsa₂ sián₂ i₂ca₂rë₃ñi₅ a₂ca₂lë₃ jaun₂.

'Lióng₂ léi₄ jué₂ a₂dsi₂gó₃ dsi₅ né₃, ca₂lë₃

¹² Quian₅₄ bí₂ quió₅ Diú₄ ca₂jmo₃ dsa₂ i₂chen₄ quián₅ Jesús 'lióng₂ léi₄ jué₂ a₂dsi₂gó₃ dsi₅ jín₄ dsa₂. Jaun₂ jme₁ñi₂ dsa₂ i₁dsi₅ guá₅ templo ja₁lë₄ corredor ja₁té₂ dsa₂ quió₅ Salomón. ¹³ 'I₁jan₂ tsá₃ ca₂tiá₂ dsí₅ jme₃quian₅₄ dsa₂ i₂'én₂ 'éi₂, la₁ jme₁jme₂go₃ bá₄. ¹⁴ La₁ juin₅ bá₄ dsa₂ ñe₂, lia₂ dsa₂ mí₂ né₃, ca₂rë₃'én₂ tē₂le₃ quió₅ Te₁gui₅₄. ¹⁵ Ca₂lia₂ jme₁dsi₂ñiai₃ jë₄ calle dsa₂ dso₅₄ tián₅ ne₄ cama, ne₄ tsi₁jein₁ në₃, ia₁jaun₂ tsá₃ a₂nag₅₄ ñia₅₄ 'én₁ quió₅ bá₄ Pe₄ tē₅₄ quió₅ i₂lín₅₄ dsa₂ dso₅₄ 'éi₂. ¹⁶ Ján₃ bá₄ ca₂o₃lén₂ juin₅ dsa₂ chan₂ juig₂ ma₂quian₅ Jerusalén, le₁ñiai₂₃ dsa₂ le₁dso₅₄, dsa₂ i₂tion₅₄ jme₂dsí₂ 'lín₅₄ tē₂dsí₅ né₃, ca₂o₃lén₂. Jaun₂ ca₂le₃jín₃ dsa₂ 'éi₂ qui₂ca₂'lón₂.

Ca₂co₃'ein₃ dsa₂ quió₅ Pe₄ quian₅₄ Juan₅₄

¹⁷ Jaun₂ ca₂rë₃'iog₅₄ 'ñio₅ lín₃ jme₂dsa₂ dsen₅₄, quian₅₄ riin₅₄ i₂jme₁lín₄ saduceos. ¹⁸ Jaun₂ ca₂ñai₃ dsa₂ i₂chen₄ quián₅ Jesús, ca₂i₁tio₂ 'né₅ 'má₃. ¹⁹ La₁ a₂'uë₂ jaun₂, ca₂ñe₄ jan₂ ángel quián₅ Te₁gui₅₄ ca₂niá₃ 'né₅ 'má₃, ca₂'uín₂ dsa₂ i₂chen₄ 'éi₂, ca₂juá₂:

²⁰ —O₂nó₅ 'nia₂ i₁dsi₅ guá₅ templo, o₂nau₂ o₂chei₅₄ 'nia₂ dsa₂ jág₁ dse₃ quió₅ Jui₅ 'mí₂ la₂.

²¹ Jme₁ca₂nág₂ jág₁ në₅, tē₃ o₃'iog₂ jme₁ñia₃ jaun₂ ca₂i₁lein₅₄ guá₅ ca₂i₁jme₁tiin₂₃ dsa₂.

Jmig₄ jaun₂ ca₂tē₃ jme₂dsa₂ dsen₅₄ ca₂ñí₂ dsi₂tan₅₄ quián₅ guá₅, jaun₂ ca₂jmo₃ 'éi₃ i₁tē₂ dsa₂ i₂chen₄ quián₅ Jesús i₂tion₅₄ 'né₅ 'má₃ 'éi₂. ²² La₁

jme₁ca₂dsi₃lén₂ 'lióg₂^w 'né₅ 'má₃, tsá₃ ma₃dsa₂ i₂jme₁tion'₅₄ chan₂. Jaun₂ ca₂i₃lein₃ táng₃ i₁con₂ jág₁, ²³ juá'₂:

—Jme₁chi₁jnág₅ dse₃ bá₄ o₄'né₄ 'né₅ 'má₃, jme₁tión₂ bá₄ guè'₂ 'lióg₂ jmo₂₃ 'í₁ cau₅ o₄'né₄ né₃. La₁ jme₁ně₂tió'₄ jnia'₅₄ dsi₂néi₂, tsá₃ ma₃dsa₂ i₂jme₁tion'₅₄ chan₂ 'i₁jan₂.

²⁴ Jme₁ca₂nág₂ juig₅₄ jme₂dsa₂, juig₅₄ chi'₂ 'i'₅₄ quián₅ guá'₅ né₃, jaun₂ dsi₂gó'₃ dsí₅ qui₂ca₂ñí'₃ riin'₅₄ 'a₂ dsi₁quén'₅ ca₂le₃jé₃ a₂ně₅. ²⁵ Jaun₂ ca₂dsióg₃ jan₂ dsa₂ quian₅ jág₁, jaun₂ ca₂juá'₂:

—Dsa₂ i₂ca₂jne'₅₄ 'nia'₂ 'né₅ 'má₃, ó₃ bá₄ ma₂tióin₂ i₁dsi₅ guá'₅ jme₂tiin₂₃ dsa₂.

²⁶ Jaun₂ né₃ ca₂i₃lén₂ chi'₂ 'i'₅₄ quian'₅₄ juig₅₄ quián₅, jaun₂ ca₂i₁chong'₅₄ táng₃ lia'₂ 'i₄ rě₂ jág₁. Tsá₃ uig₅ ca₂jmóg'₂, ia₁ gó'₅ qui₃ináu'₂ cang₄ dsa₂ i₂le₁ñi'₂ ja₁jaun₂. ²⁷ Jme₁ca₂dsi₃lein₃ le₁te₂ dsa₂ 'éi₂, jaun₂ ca₂chei'₃ dsi₂jo₂ ja₁le₁ñi'₂ dsi₂tan₅₄ quián₅ guá'₅. Jaun₂ ca₂juá'₂ jme₂dsa₂ dsen₅₄ ca₂tsí'₃ dsa₂ 'éi₂:

²⁸ —Ca₂jne₅₄ jnia'₅₄ co₂ñei'₅₄ a₂tsá₃ ma₃jme₁tin'₅ 'nia'₂ dsa₂, jua'₅₄ a₂'ín'₄ gué'₄ 'nia'₂ Jesús 'éi₂. 'E₂ ma₂jmo'₅₄ guè'₂ 'nia'₂? Caun₂ qui₂jme₂tín'₁ 'nia'₂ dsa₂, tsá₃ jág₁ cán'₁, ca₂lia'₂ ta₁caun₂ juig₂ Jerusalén ma₂rě₂rin₅ quian'₅₄ jág₁ a₂jme₂tín'₁ 'nia'₂. A₂'niog'₂ 'nia'₂ bog'₅₄ jnia'₅₄ dso₄ a₂ca₂jon₃ dsa₂ 'éi₂.

²⁹ Jaun₂ ca₂ñag₃ Pe₄ quian'₅₄ dsa₂ i₂chen₄ riin'₅₄:

—'Nio₅ gué'₄ dsen₅₄ ta₁ jme₁ti₁ jnia'₅₄ 'éi'₃ quió'₅ Diú₄, con'₂ gué'₄ 'éi'₃ quió'₅ dsa₂ mi₂güí₃. ³⁰ Diú₄ quián₅ dsa₂ can'₅₄ quián₂ jniog₄ ma₂líg'₂, Diú₄ 'éi₂ bá₄ ca₂jme₃jen'₅₄ Jesús i₂ca₂ñí'₃ 'nia'₂ ca₂tióin'₃ cróg₄. ³¹ Diú₄ né₃ ma₂ca₂chó'₂ guei'₅₄, jaun₂ ma₂guá₅ cau₅ quió'₅ tē₂le₃ gu₂ ne₁, jaun₂ ma₂dsiog₃ a₂lén₂ juig₅₄ jniog₄ i₂lió₂, ia₁jaun₂ cuin₃ jmig₄ jme₃tsín₃ dsí₅ dsa₂ juig₂ Israel ia₁jaun₂ 'én₂ dsáu₁. ³² Ca₂le₃jág₃ bá₄ jnia'₅₄ ca₂tē₂ ne₄ a₂ně₅, ján₃ bá₄ jáng'₅ jág₁ dsau₅ Jme₂dsí₂ Jñiós i₂ma₂cuin₃ Diú₄ quió'₅ dsa₂ i₂nag₅ gau₂ jme₂ti₃ jág₁ quió'₅.

³³ Ca₂rě₃'né₃ 'ñio₅ lín₃ dsa₂ can'₅₄ jme₁ca₂nág₂ le₂ně₅, a₂'nio₃ jme₁jme₃dsiain₂₃ dsa₂ i₂chen₄ quián₅ Jesús 'éi₂. ³⁴ La₁ jē₄ quió'₅ dsi₂tan₅₄ jaun₂, jme₁'en₅₄ jan₂ dsa₂ fariseo i₂jme₁chen₂ Gamaliel, dsa₂ i₂lín₅ tē₅juá'₅, jaun₂ jme₁jme₂go₃ dsa₂ 'ñio₅ lín₃. Jaun₂ ca₂nau₂ dsa₂ 'éi₂ jē₄ quió'₅ dsi₂tan₅₄, ca₂mi₃ a₂'uín'₂ ca₂tiá₂ dsa₂ i₂chen₄ 'éi₂. ³⁵ Jme₁ca₂'uin₂ 'éi₂, jaun₂ ca₂juá'₂ Gamaliel ca₂tsí'₃ dsi₂tan₅₄:

—'Nia'₂ dsa₂ chan₂ juig₂ Israel, jmo₄ 'nia'₂ 'í₁ a₂jma'₅₄ 'nia'₂ dsa₂ ně₅.

³⁶ Dsá₂ 'au'₂ 'nia'₂ jmo₄ a₂ca₂lě₃, ma₂ñó₃ ca₂la₂ 'lióng₂ ñi₂, ca₂nau₂ Teudas a₂juá'₂ a₂lín₅ dsa₂ 'uan'₂ dsa₂ dsen₅₄. Jaun₂ ca₂jme₃quiong'₅₄ con'₂ quén₂ 'ñiá₂-lón₂ dsa₂ ñe'₂. La₁ jme₁ca₂jñag'₃ dsa₂, ca₂le₃jín₃ dsa₂ i₂jme₁quian'₅₄ né₃ ca₂i₃lén₂ jma₃quén₅. ³⁷ Cang₂ jaun₂, jmig₄ jme₁ca₂tion₃ dsa₂ si₂, ca₂nau₂ Judas i₂chan₂ Galilea. Ján₃ bá₄ le₂jaun₂

^w22 o₃, chi'₂ 'i'₅₄ quián₅ guá'₅.

juin₅ dsa₂ ca₂jme₃quiong'₅₄ quió'₅. La₁ ján₃ bá₄ ca₂jñag'₃ dsa₂. Ca₂le₃jín₃ bá₄ dsa₂ i₂jme₁quian'₅₄ ně₃ ca₂i₃lén₂ tsi₁rě₂jain₅₄ táng₃ jme₁ma₂jon₅ 'éi₂.
³⁸ Jaun₂ lě₃, tsá₃ 'e₂ jmag'₅₄ dsa₂ ně₅, tsá₃ lě₁tón'₂ 'nia'₂ mi'₅₄ quian'₅₄.
 Ia₁ ně₁jua'₂ jág₁ ně₅ lě₅ cosa quió'₅ dsa₂ mi₂güí₃, a₂lě₁dsi₃'én₂ bá₄ ně₅.
³⁹ La₁ia₁ ně₁jua'₂ lě₅ cosa quió'₅ Diú₄, tsá₃ a₁jaun₂ le₃qui'₅₄ 'nia'₂ jmi₃g₄ a₂'éng'₄. Jaun₂ 'í₁ jmo₄ ia₁ con'₂ tsá₃ ñó₅ ně₁jua'₂ quian'₅₄ Diú₄ quín'₂ 'nia'₂.

⁴⁰ Jaun₂ ca₂nág₂ jág₁ jaun₂ ca₂le₃jín₃. Jaun₂ ca₂tě'₃ táng₃ dsa₂ i₂chen₄ quián₅ Jesús 'éi₂. Jaun₂ ca₂jmo₃ dsi₂tan₅₄ 'éi'₃ a₂bóg₂ dsa₂. Jaun₂ ca₂jné₃ táng₃ tsá₃ cuě₂₃ jmi₃g₄ jua'₅₄ a₂'ě₂ guě₄ dsa₂ 'éi₂ jág₁ a₂'iin₂₃ Jesús. Jaun₂ ca₂lió₂ bá₄ jaun₂ ně₃.
⁴¹ Jme₁ca₂'uin₂ dsa₂ i₂chen₄ quián₅ Jesús 'éi₂, jin₄ dsi₂tan₅₄, jmo₂₃ 'io'₂, ia₁ ca₂cuě₃ Diú₄ jmi₃g₄ ca₂i₃ñí₂ o₂guí'₃ o₄quió'₄ Jesús.
⁴² Jaun₂ caun₂ ca₂i₁noi₁₂ bá₄ jme₂tiin₂₃ dsa₂ jág₁ dse₃ quió'₅ Jesucristo ca₂le₃jě₃ jmi₃g₄, lia'₂ i₁dsi₅ guá'₅ templo, lia'₂ dsi₂néi₂ quió'₅ dsa₂ ně₃.

Ca₂'nai'₂ guion₃ dsa₂ i₂jme₃'o₅₄^x

6 ¹ Jmi₃g₄ jaun₂ caun₂ dsi₂juín₂ bá₄ dsa₂ i₂'én₂. Jaun₂ dsa₂ i₂dsia₅ jág₁ jmei₅ griego ca₂jí₂ ca₂tsí'₃ dsa₂ i₂dsia₅ jág₁ jmei₅ arameo. Ca₂juá'₂ 'iin₂₃ 'io₅₄ 'nág₂ chan₂ quián₅ tsá₃ lin₄ dse₃ jme₁cuě'₅ dsa₂ jui₁lia'₂ 'e₂ má₃ dsió'₅ ca₂le₃jě₃ jmi₃g₄.
² Jaun₂ ta₁guia₃-tín₂ dsa₂ i₂chen₄^y quián₅ Jesús ca₂ñí'₂ ca₂le₃jín₃ dsa₂ i₂'én₂, jaun₂ ca₂juá'₂:

—Tsá₃ dse₃ jua'₅₄ a₂tí₅ jnia'₅₄ a₂'ě₄ jnia'₅₄ jág₁ quió'₅ Diú₄ a₂jme₁ti₁ jnia'₅₄ ne₄ mesas a₂dsio'₅₄ jnia'₅₄ má₃.
³ Jaun₂ lě₃ rin'₅₄ jniog₄, 'in₅₄ 'nia'₂ guion₃ dsa₂ tě₃jín'₄ 'nia'₂, i₂'ei₅ jág₁ a₂'en₅₄ dsí₅, a₂rě₂rin₅ Jme₂dsí₂ Jñiós₅ tě₂dsí₅, jaun₂ cuě'₅₄ 'nia'₂ ta₁ ně₅.
⁴ Jnia'₅₄ guě'₂ caun₂ qui₁chei₅₄ Diú₄, caun₂ qui₂jme₁tin₅ jnia'₅₄ dsa₂ jág₁ quió'₅ Diú₄.

⁵ Jaun₂ ca₂le₃jín₃ dsa₂ ca₂tě₂ dsí₅ a₂ně₅, jaun₂ ca₂quióin'₂ dsa₂ i₂chen₂ Esteban i₂'én₂ 'ñio₅ lin₃, i₂rě₂rin₅ Jme₂dsí₂ Jñiós₅ tě₂dsí₅; Fe₂li₄ ně₃, Prócoro, Nicanor, Timón, Parmenas, Nicolás ně₃ i₂lín₅ jan₂ dsa₂ chan₂ Antioquía i₂jme₁ma₂gue₃ le₂jñiá₅ 'Éi'₃ Juá'₅ quió'₅ dsa₂ judíos.
⁶ Jaun₂ ca₂o₃jñia₃ dsa₂ dsa₂ guion₃ i₂ca₂'iin₃ 'éi₂ ja₁tió₂ dsa₂ guia₃-tín₂, jaun₂ qui₂ca₂quiog₂ gu₂ ne₄ quió'₅ dsa₂ guion₃ 'éi₂, ca₂chi₃lén'₂ Diú₄.

⁷ Jaun₂ caun₂ ca₂i₃ág₃ jág₁ quió'₅ Te₁gui'₅₄ jě₄ juig₂ Jerusalén, jaun₂ caun₂ ca₂i₃juín₂ bá₄ dsa₂ i₂ca₂rě₃'én₂, ca₂tě₂ i₂jme₁lín₄ jme₂dsa₂ quián₅ dsa₂ judíos ca₂guein₃ jág₁, ca₂rě₃'én₂ juin₅.

Ca₂jña'₃ dsa₂ Esteban

⁸ Esteban, dsa₂ i₂'ñio₅ lin₃ ma₂cuě₃ Diú₄ jui₅bí₂, ma₂jme₂'o₅₄ ně₃, i₂'éi₂ jme₁jmo₂₃ 'lióng₂ léi₄ dsi₂gó'₃ dsi₅ jin₄ dsa₂ juig₂.
⁹ Jaun₂ i₂lín₅₄ dsa₂

^x1 o₃, diáconos. 'Nio'₂ ja₁ton₅ Hechos 21:8; Filipenses 1:1.

^y2 griego: apóstolous.

quián₅ guá'₅ sinagoga i₂jme₁té'₂ dsa₂ Libertinos, quian'₅₄ i₂lin₅₄ dsa₂ chan₂ Cirene, i₂lin₅₄ i₂chan₂ Alejandría, i₂chan₂ Cilicia, i₂chan₂ juig₂ ja₁tén₄ 'uë₃ Asia né₃, ca₂jme₃lióg₃ ca₂tsín₂ quian'₅₄ Té₂.¹⁰ La₁ tsá₃ ca₂tio₃, ia₁ a₂niog₅ dsi₄ 'éi₂, tiin₂ 'a₂ lia'₂ ηag₃, ia₁ Jme₂dsí₂ Jñi₅ bá₄ cuë₅ bí₂.¹¹ Jaun₂ ca₂lái₂ dsa₂ i₂jáng'₃ jág₁ të₂jág₁, a₂juá'₂ a₂ma₂nág₂ juá'₂ Té₂ 'iin₂₃ 'lig'₅₄ Moisés, 'iin₂₃ 'lig'₅₄ Diú₄ né₃.¹² Jaun₂ le₂jaun₂ ca₂tóin'₂ co₂mi'₅₄ jin₄ dsa₂ juig₂ quian'₅₄ dsi₂gui'₅₄ can'₅₄, të₅juá'₅ né₃, ca₂jmaí'₂ mi'₅₄ Té₂, ca₂jηau'₃, ca₂i₁jo₅₄ ne₄ dsi₂tan₅₄ quián₅ guá'₅.¹³ Jaun₂ ca₂'nai'₂ ján₃ dsa₂ i₂jmo₃ jág₁ të₂jág₁ a₂'nii₃ Té₂. Jaun₂ ca₂juá'₂:

—Dsa₂ në₅ caun₂ qui₂juá'₂ 'lig'₅₄ 'ë₂₃ guá'₅ jñi₅, 'ë₂₃ 'Éi'₃ Juá'₅ né₃.

¹⁴ Ján₃ bá₄ ma₂ca₂néi₁ jnia'₅₄ juá'₂ i₂në₅ a₂'én₂ Jesús chan₂ Nazaret guá'₅ a₂jme₃tsín₃ tag₄ chí'₅ ca₂quiog₂ Moisés.

¹⁵ Jaun₂ dsi₂tan₅₄ quian'₅₄ ca₂le₃jín₃ gué'₄ dsa₂ i₂jme₁tion'₅₄ le₁ñi'₂ ja₁jaun₂, ca₂jín₂ Té₂, a₂ma₂jniá₂ dsi₂ne₄ 'éi₂ lia'₂ jniá₂ jan₂ ángel.

Jág₁ ca₂ton₃ Esteban

7 ¹ Jaun₂ ca₂ηag₃ jme₂dsa₂ dsen₅₄ ca₂ñí'₃ Té₂:
—¿Dsón'₂ dsau₅ ca₂le₃jé₃ a₂juá'₂ dsa₂ në₅?

² Jaun₂ ca₂ηag₃ 'éi₂:

—Rin'₅₄ jniog₄, 'nia'₂ dsa₂ can'₅₄ quián₂ né₃, nei₂ 'nia'₂ a₂juá'₄ jniá₂ la₂. Diú₄ 'uan'₂ quián₂ jniog₄ ca₂jme₃jñiai₂₃ ne₄ jmei₂ jniog₄ Abraham lia'₂ con'₂ jme₁'ein₅₄ 'uë₃ Mesopotamia né'₃ a₂dsi₃guá₃ juig₂ Harán. ³ Jaun₂ ca₂juá'₂ Diú₄: “Tí₃ 'uë₃ quiáng'₂, tén₃ ca₂le₃jín₃ o₁ring'₂, gua₂ jui₅ 'uë₃ ja₁i₁ 'ë₃ jniá₂.”^z

⁴ Jaun₂ ca₂ηó₃ Abraham ca₂o₃'íin₃ 'uë₃ Caldea jaun₂, ca₂i₁gua₂ juig₂ Harán. Cang₂ jaun₂ ca₂jon₃ bá₄ jmei₂. Jaun₂ Diú₄ bá₄ ca₂o₃jñia₃ Abraham 'uë₃ la₂ ja₁tián'₄ 'nia'₂ rë₂né₃. ⁵ La₁ tsá₃ jua'₅₄ 'e₂ ca₂cuë₃ Diú₄ 'uë₃ la₂, on₃ guë'₂ ja₁chi'₃ caun₂ tag₅₄ jua'₅₄ ca₂cuë₃. La₁ ca₂cuë₃ bá₄ Diú₄ jág₁ quió'₅ a₂cuë₃ 'uë₃ la₂, a₂jmo₃ le₃cha₂ quió'₅ chi'₂ quián₅ bá₄ Abraham jë₁ma₂join₂₃, o₁jñia'₅₄ guë'₂ jmig₄ jaun₂ tsá₃ chi'₂ quián₅ Abraham jme₁chan₂ 'i₁jan₂. ⁶ Jaun₂ ca₂juá'₂ Diú₄ ján₃, ca₂le₃jín₃ chi'₂ dsio₄ Abraham tiain'₃ jui₁lia'₂ ja₁tián'₄ dsi₂nau₂ caun₂ 'uë₃ a₂tsá₃ cuí'₅, qui₃ηág₃ uig₅ con'₂ quén₂ 'ñiá₂-láu₂ ηi₂ a₂lë₁jmo₃ ta₁ jme₂ti₃ ta₁ ne₄ dsa₂.

⁷ La₁ ján₃ bá₄ ca₂juá'₂ Diú₄ ca₂tsí'₃ Abraham: “Jniá₂ bá₄ 'é₄ uig₅ ne₄ juig₂ i₂jma'₂ dsa₂ quiáng₃ i₂tion'₅₄ i₂lë₁jme₂ti₃ ta₁ ne₅₄. Cang₂ jaun₂ guion₅₄ dsa₂ juig₂ quiáng₃ 'uíin₃ juig₂ jaun₂, jaun₂ ja₃lén₂ jme₃ti₃ ta₁ ne₃ ja₁lá₃.”^a

⁸ Ján₃ bá₄ ca₂jmo₃ Diú₄ caun₂ jág₁ quian'₅₄ Abraham, a₂ti₃ ni₁lo₁ ta₁jñi₂ chi'₂ dsa₂ ηe'₂ tsi₁jon₂ quiáin₅, a₂li'₅₄ jág₁ a₂të₃ron₅₄. 'Uig₅₄ jaun₂, jme₁ca₂rë₃chán₃ ja₁ñi'₅₄ i₂ca₂rë₃chén₃ Isaac, ca₂ti₃ Abraham ni₁lo₁ Isaac jme₁ma₂'ein₅₄ jñia₃ jmig₄. Ján₃ bá₄ le₂jaun₂ ca₂jmo₃ Isaac quian'₅₄ Jacob

^z3 Génesis 12:1.

^a7 Génesis 15:13-14.

ja₁ñi'₅₄. Ján₃ bá₄ le₂jaun₂ ca₂jmo₃ Jacob quian'₅₄ ta₁guia₃-tín₂ ja₁ñi'₅₄
i₂ca₂lin₃ jmei₂ ta₁guia₃-tín₂ juig₂ ja₁tén₄ Israel.

⁹ 'Ca₂le₃jín₃ chi'₂ ja₁ñi'₅₄ Jacob i₂jme₁lín₄ jmei₂ jniog₄ ma₂líg'₂ 'éi₂,
ca₂i₃uig₅₄ dsí₅ jín₂ Sé₄ riin'₅₄. Jaun₂ ca₂'nii₃ 'éi₂ jaun₂ ca₂tág₃ dsa₂ ca₂të₂
'uë₃ Egipto. La₁ Diú₄ bá₄ ca₂jmo₃ 'í₁ quió'₅ Sé₄, ¹⁰ qui₂ca₂lió₂ ca₂le₃jé₃ 'e₂
ca₂i₃ñí₂ ca₂jmo₃ ca₂rë₃ñí'₂ dsí₅ 'ñio₅ lin₃. Ján₃ bá₄ ca₂jmo₃ Diú₄ a₂chéin'₅
dse₃ quian'₅₄ i₂té'₂ dsa₂ Faraón, i₂lín₅ rag₅₄ quián₅ 'uë₃ Egipto. Rag₅₄ 'éi₂
ca₂'iin₃ Sé₄ a₂léin₂ dsi₄má'₂ 'uë₃ Egipto. Ján₃ bá₄ ca₂jmo₃ a₂nio₃ ne₄ 'éi₂
dsi₂néi₂ quió'₅.

¹¹ 'Cang₂ jaun₂ ca₂gua₃ ñi₂ a₂ca₂ñág₃ uig₅ 'ñio₅ lin₃ a₂ca₂rë₃lín₃ a₂gué'₃
dsa₂ ta₁caun₂ 'uë₃ Egipto quian'₅₄ 'uë₃ Cana'án. Jaun₂ ca₂le₃jín₃ jmei₂
jniog₄ ma₂líg'₂ tsá₃ ma₃'e₂ jnio'₂ a₂gué'₃. ¹² Jme₁ca₂rë₃ñi₅ Jacob a₂cha₂
trigo 'uë₃ Egipto, jaun₂ ca₂chein₃ chi'₂ ja₁ñi'₅₄ ja₁jaun₂, i₂ca₂lin₃ jmei₂
jniog₄ ma₂líg'₂. A₂jaun₂ gué'₄ le₂'uig₅₄ ca₂i₁lein₅₄. ¹³ Jme₁ca₂té₂ tin₃ ráun₂
i₁len₅₄ rin'₅₄ Sé₄ 'uë₃ Egipto, jaun₂ ca₂jmo₃ Sé₄ a₂ca₂rë₃ñi₅ a₂lé₅ riin'₅₄
dsa₂ 'éi₂. Jaun₂ gué'₄ ca₂rë₃ñi₅ rag₅₄ quián₅ Egipto 'e₂ tsi₁jon₂ lín₅ Sé₄.
¹⁴ Jaun₂ gué'₄ ca₂tsí'₃ Sé₄ dsó₂ riin'₅₄ a₂dsi₃quián₂ gui'₅₄ Jacob jmei₂,
quian'₅₄ ca₂le₃jín₃ o₁riin'₅₄ i₂jme₁lé₂ 'nag'₂ ne₂guióg₂ rë₂dsí₂ guia₃-ñiá₂
(75) dsa₂. ¹⁵ Le₂jaun₂ ca₂lë₃ a₂ca₂ñó₃ Jacob ca₂i₁gua₂ 'uë₃ Egipto.
Ja₁jaun₂ ca₂join₃ cang₂ jaun₂. Jaun₂ ja₁jaun₂ bá₄ qui₂ca₂dsan₃ chi'₂
quián₅ i₂'nió'₄ jmei₂ jniog₄ ma₂líg'₂. ¹⁶ Ni₁mu₁₂ ca₂o₃con₃ dsa₂ cang₂
jaun₂ ja₁chei₂ Siquem. Ca₂o₃'ó₃ tau₂ 'ñio₅ a₂ca₂lá₃ Abraham quió'₅
tsi₁jon₂ chi'₂ quián₅ Hamor ja₁chei₂ Siquem jaun₂, quian'₅₄ caun₂ 'ma'₅₄
a₂ca₂lí'₃.

¹⁷ 'Jme₁ja₂quián₃ jmig₄ le₃ti₃ jág₁ ca₂cuë₃ Diú₄ 'iin₂₃ 'ñiog₅ ca₂cué'₃
Abraham, ca₂i₃juín₂ 'ñio₅ lin₃ dsa₂ israelitas 'uë₃ Egipto. ¹⁸ Jaun₂ ca₂guá₂
jan₂ rag₅₄ i₂tsá₃ cuín₅ Sé₄, ca₂jme₃lióg₃ jmo₂₃ 'éi'₃ 'uë₃ Egipto. ¹⁹ Rag₅₄
'éi₂ ca₂jme₃gain₂₃ dsa₂ go₄ jniog₄, ca₂jmái'₂ dsa₂ can'₅₄ quián₂ jniog₄
ca₂jmo₃ 'éi₂ tion₅₄ a₂téin₂ guein₂ dsa₂ ñe'₂ i₂të₂ca₂rë₃chán₃, ia₁jaun₂
dsián₃.

²⁰ 'Jmig₄ jaun₂ ca₂rë₃chán₃ Moisés. Guein₂ 'éi₂ ca₂té₂ dsí₅ Diú₄, jaun₂
ca₂jme₃juag'₂ chog₅₄-jmei₂ 'ni₅ tsi'₂ dsi₂néi₂ quió'₅. ²¹ Jme₁ca₂té₂ jmig₄
a₂tóin₂ guein₂ 'éi₂, jaun₂ ja₁míg₄ 'ñiog₅ rag₅₄ quián₅ Egipto ca₂tág₃
ca₂jme₃juag'₂ co₂'nió'₄ ja₁ñi'₅₄ 'ñiog₅. ²² 'Uig₅₄ jaun₂, ca₂rë₃tín₃ Moisés
ca₂le₃jé₃ a₂ñi₅ dsa₂ chan₂ Egipto, jaun₂ ca₂rë₃'uáin'₃, 'ñio₅ lin₃ ñi₅ 'e₂ jág₁
dsia₃, ñi₅ a₂ca₂jmo₃ né₃.

²³ 'Jme₁ma₂'ein₅₄ të₂láu₃ ñi₂, jaun₂ ca₂ñe₄ Moisés ca₂i₁jiin₁₂ dsa₂ go₅₄
dsa₂ israelitas. ²⁴ Ja₁jaun₂ ca₂jín₂ jan₂ dsa₂ chan₂ Egipto jmái'₂ uig₅ cué'₅
jan₂ dsa₂ go₅₄. Jaun₂ ca₂nau₂ Moisés 'nei₂ quian'₅₄ i₂cué'₅ riin'₅₄,
ca₂jñi₃ dsa₂ 'éi₂, ca₂lióin₂ dsa₂ go₅₄. ²⁵ Ia₁ ca₂i₃jio₅ dsí₅ jaun₂ le₃lí'₄ dsa₂
israelitas riin'₅₄, a₂jmo₃ Diú₄ lió₂ të₂le₃ quian'₅₄ 'éi₂. La₁ tsá₃ ca₂rë₃lí'₄
gué'₂ dsa₂. ²⁶ Jme₁jnia₃ jaun₂, ca₂jen'₂ Moisés on₃ dsa₂ israelitas i₁tion'₅₄

quín'₂. Jaun₂ jme'₁nio₃ Moisés dsi₂oin₃ mi'₅₄. Jaun₂ ca₂juá'₂: “Rín'₂ bá₄ 'nia'₂. ¿'E₂ lë₃ qui₂jma'₅₄ 'nia'₂ uig₅ le₂jang'₂ le₂jang'₂?”

²⁷ 'Jaun₂ i₂jme'₁en₅₄ cué'₅ rin'₅₄ ca₂'liain'₃ Moisés cau₅, jaun₂ ca₂juá'₂: “¿'Ein₂ ca₂cué'₃ 'ne₂ ta₁ líng'₅ dsi₂tan₅₄ i₂qui₂dsi₅ 'éi'₃ ja₁con₂ jnia'₅₄? ²⁸ ¿'Niog'₂ jnág'₄ jniá₂ ján₃ jui₁lia'₂ ca₂jnág'₃ dsióg₂ dsa₂ chan₂ Egipto 'éi₂?”^b ²⁹ Jme'₁ca₂nág₂ Moisés le₂në₅, co₂tan₅₄ ca₂cuíng₃ ca₂ngó₃ jui₅ 'uë₃ ja₁chei₂ Madián. Ja₁jaun₂ ca₂i₁gua₂ co₂'nió'₄ a₂lín₅ dsi₂nau₂. Ja₁jaun₂ ca₂rë₃chán₃ on₃ chi'₂ quiáin₅.

³⁰ 'Të₂láu₃ nì₂ cang₂ jaun₂, caun₂ ja₁lé₄ 'uë₃ quein₂ quián₅ má'₂ ja₁chei₂ Sinaí, ja₁jaun₂ ca₂jme₃jnia₅ jan₂ ángel jë₄ si₂ chi₁guí'₂ caun₂ nì₁'ma₂ taun₅ a₂cau₂. ³¹ Jaun₂ ca₂i₃gó'₃ dsí₅ Moisés jme'₁ca₂jág₃ a₂në₅, jaun₂ jme'₁ca₂jme₃quiáin₃ gué₄ ia₁ 'nio₃ jme'₁jág₃ gué₄ dse₃. Të₃jë₄ ngó₃ jaun₂ jme'₁ca₂nág₂ jág₁ quió'₅ Te₁gui'₅₄ a₂ca₂juá'₂: ³² “Jniá₂ bá₄ líng₅ Diú₄ quián₅ dsa₂ quiáng'₂ ma₂líg'₂, Diú₄ quián₅ Abraham, quián₅ Isaac, quián₅ Jacob né₃.”^c Jaun₂ ca₂jme₃lióg₃ ca₂jlen₃ Moisés ca₂rë₃gó'₅ 'ngio₅ lín₃, tsá₃ ma₃tiá₂ dsí₅ jág₃.

³³ 'Jaun₂ ca₂juá'₂ táng₃ Te₁gui'₅₄: “Jniá'₃ lau₂ ton₅ tag'₅₄, ia₁ 'uë₃ jnió₅ bá₄ ja₁chéng'₄ në₅. ³⁴ Jág₅ bá₄ jniá₂ a₂chan₂ uig₅ dsa₂ quiáng₃ 'uë₃ Egipto, qui₂nag₅ bá₄ jniá₂ a₂qui'₂-o₂₃. Jaun₂ lë₃ ca₂síong₃ ia₁ a₂loin₅₄. Nja₅, ia₁jaun₂ tsag₅₄ jniá₂ guang'₅₄ jui₅ Egipto”.^d

³⁵ 'O₁jnia'₅₄ la₂ tsá₃ jme'₁nio₃ dsa₂ go₄ Moisés le₂jniá₅, ia₁ ca₂juá'₂: “¿'Ein₂ ca₂lín₃ 'ne₂ a₂lín'₅ dsi₂tan₅₄ i₂qui₂dsi₅ 'éi'₃ ja₁con₂ jnia'₅₄?” la₁ Diú₄ né₃ ca₂chein₃ Moisés a₂lín₅ co₂'nió'₄ dsi₂tan₅₄ i₂lió₂, të₂le₃ quian'₅₄ ángel i₂ca₂jme₃jnia₅ jë₄ nì₁'ma₂ taun₅ jaun₂. ³⁶ Moisés bá₄ dsa₂ i₂ca₂'uín'₂ dsa₂ can'₅₄ quián₂ jniog₄ ma₂líg'₂ 'uë₃ Egipto i₂qui₂ca₂jmo₃ ján₃ 'lióng₂ léi₄ juë'₂ a₂dsi₂gó'₃ dsi₅ né₃. Léi₄ jaun₂ ca₂jmo₃ Moisés 'uë₃ jaun₂, quian'₅₄ ne₄ Jmì₁ní'₄ Guéin₂,^e quian'₅₄ 'uë₃ quein₂ co₂'ngiog₅ ja₁ca₂i₁nioi₁₂ të₂láu₃ nì₂. ³⁷ Jaun₂ 'ngiog₅ Moisés 'éi₂ bá₄ ca₂tsí'₃ dsa₂ israelitas: “A₂chen₃ Diú₄ jan₂ dsa₂ i₂'é₂ jág₁ quiáin₅, i₂lín₅ dsa₂ go'₄ 'nia'₂ guiong'₅₄, jui₁lia'₂ ca₂chei₃ jniá₂. Jaun₂ tón'₂ 'nia'₂ jui₅ jág₁ quió'₅ 'éi₂.”^f ³⁸ Ján₃ bá₄ Moisés 'éi₂ jme'₁en₅₄ quian'₅₄ dsa₂ juig₂ 'uë₃ quein₂ co₂'ngiog₅ jaun₂. Jme'₁ein₅₄ quian'₅₄ ángel i₂ca₂juá'₂ jág₁ má'₂ Sinaí. Ján₃ bá₄ jme'₁ein₅₄ quian'₅₄ 'lag₄ tsi₁jon₂ jmei₂ jniog₄. Moisés 'éi₂ bá₄ ján₃ i₂ca₂gue₃ jág₁ ca'₅₄, jaun₂ gué₄ ca₂jág₃ të₂le₃ quián₂ jniog₄ táng₃.

³⁹ 'La₁ dsa₂ quián₂ jniog₄ ma₂líg'₂ né₃, tsá₃ ma₃ca₂jme₃ti₃, tsá₃ ma₃ca₂nág₂ gau₂ jág₁ quió'₅ Moisés. Ca₂chei'₃ cau₅, jme'₁nio₃

^b27-28 Éxodo 2:14.

^c32 Éxodo 3:6.

^d33-34 Éxodo 3:5,7,8,10.

^e36 Ján₃ bá₄ chei₂ Jmì₁ní'₄ 'Ma₂ta₅.

^f37 Deuteronomio 18:15.

jme₁dsi₃lein₃ táng₃ jui₅ 'uë₃ Egipto. ⁴⁰ Jaun₂ né₃ ca₂tsí'₃ Aarón^g ca₂juá'₂:
 “'Niog₂ jnia'₅₄ jmog'₅₄ diú₄ dsa₂ lag₄ i₂dsi₃lén₂ ne₄ jui₅ quián₂ jniog₄. Ia₁
 tsá₃ ne₄ 'e₂ ca₂jén'₃ Moisés 'éi₂ i₂ca₂'uág'₂ jniog₄ 'uë₃ Egipto.”^h ⁴¹ Jaun₂
 ca₂jmoí'₂ jan₂ guein₂ ca₁jui₅ co₂'nió'₄ i₂lín₅ diú₄, qui₂ca₂jme₃dsiain₂₃ já'₂
 quiáin₅ qui₂ca₂cuin₃ diú₄ lag₄ 'éi₂. Jaun₂ ca₂jmo₃ 'io'₂ quian'₅₄ a₂ca₂jmo₃
 quian'₅₄ gu₂ guioin₅₄. ⁴² Jaun₂ co₂nei'₅₄ ca₂jmo₃ Diú₄ cau₅, tsá₃
 ma₃ca₂jme₃quian'₅₄ dsa₂ 'éi₂, jui₁jmo₁₂ bá₄ con'₂ tiin₂ guioin₅₄. Jaun₂
 ca₂jme₃lióg₃ dsa₂ 'éi₂ ca₂chi₂ca₂lén'₂ nei₅ a₂le₁ 'ág₄ iⁱ guei'₅₄. Ia₁ le₂në₅
 rë₂ton₅ ne₄ Si₂ a₂ca₂jmo₃ dsa₂ i₂jme₁ 'é₂ jág₁ quián₅ Diú₄ ma₂líg'₂:

'Nia'₂ dsa₂ chan₂ Israel, ¿'e₂ lín'₂ 'nia'₂?

¿Ca₂jme₁dsian'₅ 'nia'₂ já'₂

ca₂dsia'₅₄ ca₂jen'₅₄ 'nia'₂ ne₃ jniá₂

lia'₂ con'₂ jme₁quian'₅₄ jniá₂ 'nia'₂

të₂láu₃ ñi₂ 'uë₃ quein₂ co₂'niog₅ jaun₂?

⁴³ On₃jua'₅₄ le₂jaun₂.

Ia₁ guá'₅ chéi₂ quió'₅ diú₄ Moloc bá₄ ca₂quian'₂ 'nia'₂

quian'₅₄ nei₅ diú₄ Renfán,^j

nió'₄ a₂qui₂ca₂jmo'₅₄ 'nia'₂ guiong'₅₄,

a₂jaun₂ bá₄ ca₂chi₂ca₂len'₄ 'nia'₂.

'Uig₅₄ jaun₂, 'uín'₄ jniá₂ 'nia'₂ 'uë₃ quiáng'₂,

tsag₅₄ jniá₂ të₂le₃ ó₃ gué₄ ja₁niog₅ 'uë₃ Babilonia.^k

⁴⁴ 'Uë₃ quein₂ jaun₂, dsa₂ can'₅₄ quián₂ jniog₄ ma₂líg'₂ jme₁quian₅
 guá'₅ tabernáculo ja₁jme₁rë₂'ma₄ ni₁cang₁ a₂le₁ton₅ ta₁guia₃ 'Éi'₃ Juá'₅.
 Guá'₅ tabernáculo jaun₂ ca₂lë₃ con'₂ lé₅ jág₁ ca₂cuë₃ Diú₄ ca₂cué'₃
 Moisés, jme₁ca₂'ë₃ Diú₄ nió'₄ le₂ñiá₅ 'a₂ lia'₂ lé₂. ⁴⁵ Dsa₂ quián₂ jniog₄
 ma₂líg'₂ ca₂gue₃ guá'₅ jaun₂ co₂'nió'₄ ca₂ñág₃ dsa₂ can'₅₄ quiáin₅. Jaun₂
 dsa₂ i₂jme₁quian'₅₄ Josué né₃ ca₂caun₃ lia'₂ con'₂ jme₁ca₂lí'₃ 'uë₃ quió'₅
 dsa₂ juig₂ siá'₂, i₂ca₂'uín'₂ Diú₄ ia₁jaun₂ cha₂ ja₁tian'₃ 'éi₂. Le₂jaun₂ ca₂lë₃
 ca₂lia'₂ ca₂të₂ jmig₄ a₂ca₂rë₃chán₃ David. ⁴⁶ Ca₂jmo₃ Diú₄ dse₃ dsí₅
 ja₁con₂ Rag₅₄ David, jaun₂ 'éi₂ né₃ jme₁'nio₃ jmóg'₃ caun₂ ja₁guá₃ Diú₄
 quián₅ Jacob. ⁴⁷ La₁ Salomón bá₄ i₂ca₂chi'₃ 'né₅ quió'₅ Diú₄.

⁴⁸ 'La₁ Diú₄ i₂juin'₂ gué₄ lín₃ tsá₃ guá₅ dsi₂néi₂ guá'₅ a₂jmóg'₅ dsa₂
 mi₂güí₃. Jui₁lia'₂ ca₂juá'₂ Diú₄ të₂le₃ quian'₅₄ dsa₂ i₂jme₁ 'é₂ jág₁ quiáin₅
 ma₂líg'₂:

⁴⁹ Guei'₅₄ i₂juíg₃ bá₄ ja₁gua₁₂

ja₁lé₄ ne₄ta₁ quió₃,

gua'₅₄ 'uë₃ né₃ jui₁lia'₂ ja₁tióng₂ tag₃.

^g40 Jme₁lín₄ Aarón rin'₅₄ Moisés. 'Nio'₂ ja₁ton₅ Éxodo 4:14.

^h40 Éxodo 32:1.

ⁱ42 nei₅: Lia'₂ chi₁ton₅ ne₄ Si₂ quió'₅ Diú₄, lé₅ caun₂ cosa a₂tsá₃ 'i₄ jme₂dsí₂.

^j43 Renfán: co₂'nió'₄ a₂jme₁të'₂ dsa₂ egipcios planeta Saturno, ca₂jme₃juag'₂ dsa₂.

^k42-43 Amós 5:25-27.

¿E₂ bá₄ 'né₅ jmó'₂ 'nia'₂ quió₃? juá'₂ Te₁gui'₅₄,
 ¿O₃ já'₄ bá₄ lé₂ le₃jan₄ jniá'₂?
⁵⁰ ¿On₁ jniá'₂ bá₄ ca₂jmo₃ quian'₅₄ gu₃-tag₃
 ca₂le₃jé₃ 'e₂ a₂cha₂?^l
⁵¹ (Jaun₂ caun₂ ca₂juá'₂ bá₄ Té₂ tsí'₅ dsa₂):
 —'Nia'₂ né₃, lia'₂ ma₂ja₂nó'₅ jaun₂ bá₄ 'nia'₂ cang₄ dsei'₂, jaun₂ lé₅
 rē₂guá'₄ 'nia'₂ quian'₅₄ tē₂'au'₂ jui₁lia'₂ dsa₂ i₂tsá₃ cuin₅ Diú₄.^m Caun₂
 'ñia'₅₄ co₂tan₅₄ bá₄ 'nia'₂ Jme₂dsí₂ Jñi₅. I₂co₂rin'₂ bá₄ 'nia'₂ quiang'₅₄
 dsa₂ can'₅₄ quiáng'₂ ma₂líg'₂.⁵² ¿Ein₂ dsa₂ i₂jme₁'é₂ jág₁ quián₅ Diú₄
 jua'₅₄ i₂tsá₃ ca₂jma'₂ dsa₂ can'₅₄ quián'₂ 'nia'₂ ma₂líg'₂?
 Qui₂ca₂jme₃dsiain₂₃ bá₄ dsa₂ i₂qui₂ca₂'é₂ jág₁ le₂jñiá₅ ca₂'iin₃ jan₂ i₂dsen₃
 lín₃, i₂jíá₃. La₁ jme₁guan₃ i₂'éi₂ né₃, ca₂jñin'₅₄ 'nia'₂ jaun₂ ca₂jñí'₃.
⁵³ 'Nia'₂ guē'₂ i₂ca₂gue'₅₄ 'Éi'₃ Juá'₅ tē₂le₃ quian'₅₄ ángeles, tsá₃ jme₂tí'₁
 guē'₂ 'nia'₂ 'Éi'₃ jaun₂.

Ca₂jon₃ Té₂

⁵⁴ Jme₁ca₂nág₂ jág₁ a₂ca₂juá'₂ Té₂ jaun₂, ca₂rē₃'néi₃ 'ñio₅ lín₃ ca₂lia'₂
 qui₂ca₂quig'₂ mi₂jan₅₄ a₂'ñiai₅₄ Té₂.⁵⁵ La₁ Té₂ né₃, rē₂rin₅ Jme₂dsí₂ Jñi₅
 tē₂dsí₅, ca₂chóg'₃ ne₅₄ guei'₅₄ i₂juíg₃ jaun₂ ca₂jág₃ a₂co₂tág₅ co₂'né'₅
 quió'₅ Diú₄, jaun₂ ca₂jñin₂ Jesús chéin'₅ tē₂le₃ gu₂ ne₁ quió'₅ Diú₄ Jmei₂.
⁵⁶ Jaun₂ ca₂juá'₂ táng₃ Té₂:
 —iJag₄! —juá'₂—. Jág₅ jniá'₂ rē₂na₄ guei'₅₄ i₂juíg₃. Jin₄ jniá'₂ Jaun₅
 dsa₂ mi₂güí₃ 'ein₅₄ tē₂le₃ gu₂ ne₁ quió'₅ Diú₄.
⁵⁷ La₁ dsa₂ 'éi₂ qui₂ca₂jne₃ rē₂gua₅₄, tsá₃ 'nio₃ nag₃, qui₂ca₂tóin'₂
 co₂mi'₅₄ ca₂guió'₃ jmái'₂ Té₂.⁵⁸ Jaun₂ ca₂dsei₂₃ 'ni'₂ juíg₂. Jaun₂ ja₁jaun₂
 ca₂jñag'₃ quian'₅₄ cang₄. Jaun₂ dsa₂ i₂qui₂ca₂jñáu'₂ cang₄ né₃ ca₂dsia₃
 ni₁tsin'₅₄ o₄gú₃ jan₂ dsó₂ chí'₂ i₂jme₁chen₂ Saulo.
⁵⁹ Tē₁lia'₂ tñoin'₅₄ qui₂cué'₅ Té₂ cang₄, jaun₂ ca₂mi₃ Té₂ ca₂tsí'₃ Diú₄
 ca₂juá'₂:
 —Te₁gui'₅₄ Jesús, guen'₅₄ jme₂dsí₂ quió₃.
⁶⁰ Jaun₂ gué₄ ca₂chi₃jné₃, jaun₂ ca₂guió'₃ tiá₂ ca₂juá'₂:
 —Te₁gui'₅₄, tsá₃ jme₁cain'₅₄ dso₄ la₂.
 Jme₁ca₂lě₃ juá'₂ le₂ně₅, ca₂join₃ jaun₂ ně₃.

Co₂'en₅ Saulo dsa₂ i₂ma₂'én₂

8 ¹ Jaun₂ caun₂ bá₄ 'ei₅ jág₁ quió'₅ Saulo a₂ca₂jñi'₃ dsa₂ Té₂. Dsi₂jui₅
 jmig₄ jaun₂ bá₄, ca₂jme₃lióg₃ dsa₂ qui₂co₂'ein₃ 'ñio₅ lín₃ ta₁caun₂
 nió'₃ dsa₂ i₂lín₅ guá'₅ jē₄ juíg₂ Jerusalén. Ca₂le₃jín₃ dsa₂ 'éi₂ ca₂i₃lén₂
 tsi₁rē₂jain₅₄ le₂tan₅₄ 'uē₃ Judea quian'₅₄ Samaria. Jñia'₅₄ lia'₂ dsa₂ guia₃-
 tñin₂ i₂chen₄ quián₅ Jesús bá₄ ca₂jñia₃ gué₄ juíg₂ Jerusalén. ² I₂lín₅₄ dsa₂

^l49-50 Isaías 66:1-2.

^m51 lit. "jui₁lia'₂ dsa₂ i₂tsá₃ lo₄ rē₂uín₄."

dsen₃ i₂'nio₃ Diú₄ ca₂'óin₂ Té₂, qui₂ca₂'o₃ 'ñio₅ lin₃ o₄quió'₄ 'éi₂. ³ Të₁lia'₂ jaun₂, i₂ñi₅₄ Saulo quiain'₅₄ riin'₅₄ qui₂co₂'ein₂₃ dsa₂ i₂'én₂, qui₂dsi₂toin'₅₄ të₂ dsi₂néi₂ qui₂'uñin'₂ dsa₂ tsi₁cuñin'₂, lia'₂ dsa₂ ñe'₂ lia'₂ dsa₂ mí₂, qui₂të₂ a₂to'₂ 'né₅ 'má₃.

Ca₂'é₂ dsa₂ jág₁ dse₃ juig₂ Samaria

⁴ La₁ ca₂le₃jín₃ dsa₂ i₂ca₂'uin₂ juig₂ Jerusalén, ca₂le₃jé₃ ja₁ca₂i₁lein₅₄ qui₂ca₂'é₂ jág₁ dse₃. ⁵ Jan₂ 'éi₂, i₂chen₂ Fe₂li₄, ca₂ñó₃ caun₂ juig₂ ja₁tén₄ 'uë₃ Samaria ca₂dsia₃ jág₁ tsí'₅ dsa₂ ja₁jaun₂, 'iin₂₃ Cristo.ⁿ ⁶ Jaun₂ jme₁ñi'₂ dsa₂ jmo₂₃ tei₄ ca₂le₃jín₃, të₅ dsí₅ nag₂₃ jág₁ a₂juá'₂ Fe₂li₄, ia₁ ján₃ bá₄ ca₂jág₃ dsa₂ léi₄ dsi₂gó'₃ dsi₅ a₂jme₁jmo₅ 'éi₂. ⁷ Ia₁ juin₅ i₂tion'₅₄ jme₂dsí₂ 'lin'₅₄ të₂dsí₅ qui₂ca₂'lóin₂. Ca₂le₃jín₃ jme₂dsí₂ 'lin'₅₄ 'éi₂ qui₂ca₂'uñin₂ qui₂guió'₅. Ján₃ bá₄ juin₅ dsa₂ 'lian'₂, dsa₂ guian'₅₄ né₃, qui₂ca₂'lóin₂. ⁸ 'Uig₅₄ jaun₂ 'ñio₅ 'io'₂ ca₂jmo₃ dsa₂ juig₂ jaun₂.

⁹ Juig₂ jaun₂ jme₁chan₂ jan₂ dsa₂ i₂jme₁chen₂ Si₂mu₅₄, i₂jme₁jmo₅ ta₁ a₂chan₂ dsí₅ le₂ñiá₅, jme₁jme₂gain₂₃ dsa₂ juig₂ Samaria, a₂juá'₂ a₂lín₅ dsa₂ dsen₅₄.

¹⁰ Ca₂le₃jín₃ dsa₂, lia'₂ dsa₂ can'₅₄ lia'₂ chi'₂ né₃, jme₁nag₂₃ të₅ dsí₅ jág₁ quió'₅, qui₂dsia₂₃:

—Dsa₂ në₅ tiin₂ quian'₅₄ jui₅bí₂ quió'₅ Diú₄.

¹¹ Jme₁tón'₂ dsa₂ jui₅ jág₁ quió'₅ gui'₅₄ 'éi₂, ia₁ ma₂líg'₂ bá₄ ma₂já₅ qui₂jme₂gain₂₃ dsa₂ quian'₅₄ bí₂ a₂chan₂ dsí₅.

¹² La₁ dsi₂jui₅ jme₁ca₂rë₃'én₂ dsa₂ jág₁ dse₃ quió'₅ Jesucristo a₂ca₂'é₂ Fe₂li₄ jui₁lia'₂ ja₁gon₂ Diú₄, jaun₂ qui₂ca₂jñó₂ dsa₂ jmig₂ lia'₂ dsa₂ ñe'₂ lia'₂ dsa₂ mí₂. ¹³ Ján₃ bá₄ ca₂rë₃'én₂ 'ñiog₅ Si₂mu₅₄ 'éi₂, ca₂jñó₂ jmig₂ ján₃. Jaun₂ gué₄ ca₂jme₃lióg₃ ca₂jme₃quiain'₅₄ Fe₂li₄, qui₂jág₅ dsi₂gó'₃ dsí₅ léi₄ juë'₂ a₂jmo₅ 'éi₂.

¹⁴ Jme₁ca₂rë₃ñi₅ dsa₂ i₂chen₄ quián₅ Jesús i₂tion'₅₄ Jerusalén, a₂ma₂'én₂ dsa₂ chan₂ 'uë₃ Samaria jág₁ quió'₅ Diú₄, jaun₂ ca₂chein₃ ja₁jaun₂ Pe₄ quian'₅₄ Juan₅₄. ¹⁵ Jme₁ca₂dsi₃lén₂ 'éi₂ 'uë₃ Samaria, jaun₂ ca₂mi₃ ca₂tsí'₃ Diú₄ o₄quió'₄ dsa₂ i₂ma₂'én₂ ja₁jaun₂, ia₁jaun₂ guen₃ dsa₂ 'éi₂ Jme₂dsí₂ Jñi₅ján₃. ¹⁶ Ia₁ 'i₁jan₂ dsa₂ 'éi₂ tsá₃ Jme₂dsí₂ Jñi₅ ma₂guan₅ gué₄ ne₄ quió'₅. Jñia'₅₄ con'₂ ma₂jñó₂ jmig₂ bá₄ lia'₂ con'₂ lé₅ 'éi'₃ quió'₅ Te₁gui'₅₄ Jesús. ¹⁷ Jaun₂ né₃ Pe₄ quiain'₅₄ Juan₅₄ qui₂ca₂quiog₂ gu₂ ne₄ quió'₅ dsa₂ 'éi₂, jaun₂ gué₄ ca₂guein₃ Jme₂dsí₂ Jñi₅.

¹⁸ Jme₁ca₂jág₃ Si₂mu₅₄ a₂ca₂sión₃ Jme₂dsí₂ Jñi₅ jme₁ca₂quiog₂ dsa₂ i₂chen₄ 'éi₂ gu₂ ne₄ quió'₅ dsa₂, jaun₂ ca₂jen'₂ cu₄, ¹⁹ ca₂juá'₂:

—Cuë₄ jniá₂ ján₃ jui₁lia'₂ bí₂ a₂tín'₂ 'nia'₂ në₅, ia₁jaun₂ lé₂ le₃jmo₅₄ jniá₂ ján₃ a₂guen₃ dsa₂ Jme₂dsí₂ Jñi₅ jë₁ma₂ca₂co₃ gu₃ ne₄ quió'₅ chi₂jua'₂ 'ein₂.

ⁿ5 o₃, i₂rë₂'ín₁ quián₅ Diú₄.

²⁰ Jaun₂ ca₂ɲag₃ Pe₄ ca₂tsí'₃ dsa₂ 'éi₂:

—Jui₁ dsi₂ 'éng'₂ co₂dsia₅ quian'₅₄ cú'₂ ia₁ 'e₂ lë₃ dsi₂jio₅ 'au'₂ le₂në₅, a₂lín'₂ a₂lé₂ lá₃ dsa₂ quian'₅₄ cu₄ bí₂ a₂cuë₅ Diú₄. ²¹ Tsá₃ ca₂tín'₂ 'ne₂ a₂në₅, ia₁ tsá₃ dse₃ 'ei₅ 'au'₂ ne₄ Diú₄. ²² Co₂dsia₅ tí₃ ca₂le₃jé₃ a₂'lig'₅₄ a₂dsi₂jio₅ 'au'₂ në₅. Mi₄ ne₄ Te₁gui'₅₄ chi₂jua'₂ 'éin₂ dsáu'₂ 'e₂ lë₃ dsi₂jio₅ 'au'₂ le₂në₅. ²³ Ia₁ léi₄ jniá₂ rë₂rín₅ cosa 'lig'₅₄ tē₂'au'₂; quian'₅₄ dsáu'₂ në₅ jmo₅ chi₁ 'ɲeg'₂.

²⁴ Jaun₂ né₃, ca₂ɲag₃ Si₂mu₅₄:

—Mi₄ 'nia'₂ chei'₅₄ Te₁gui'₅₄ o₄quió₃, ia₁jaun₂ tsá₃ jui₁ dsi₂ɲíg₂ a₂ma₂në₂jua'₅₄ 'nia'₂ në₅.

²⁵ Jme₁ca₂dsan₃ jáng'₅ Pe₄ quian'₅₄ Juan₅₄ jág₁ dsau₅ a₂dsia₂₃ jág₁ quió'₅ Diú₄, jaun₂ gué₄ ca₂i₃lein₃ jui₅ Jerusalén. Le₂'i₄ jui₅ ja₁i₃lein₃ jaun₂, qui₂ca₂'é₂ gué₄ jág₁ dse₃ a₂lión₂ dsa₂ le₂tan₅₄ juig₂ ja₁tén₄ 'uë₃ Samaria.

Fe₂li₄ quiain'₅₄ dsa₂ chan₂ Etiopía

²⁶ Cang₂ jaun₂, ca₂juá'₂ jan₂ ángel quián₅ Te₁gui'₅₄ ca₂tsí'₃ Fe₂li₄:

—Nau₂, gua₂ jui₅ ja₁'uin₂ dsa₂ Jerusalén a₂dsióg₄ 'uë₃ Gaza.

Jui₅ jaun₂ dsó₅ jë₄ 'uë₃ quein₂. ²⁷ Jaun₂ ca₂nau₂ Fe₂li₄ ca₂ɲó₃. Le₂'i₄ jui₅ ja₁ɲó₃ jaun₂, ca₂jein'₂ jan₂ dsa₂ chan₂ Etiopía, i₂jme₁lín₄ jan₂ dsa₂ eunuco, dsa₂ dsen₅₄ i₂niog₅ gu₂ cu₄ quió'₅ 'io₅₄ Candace i₂gon₂ 'uë₃ Etiopía. Dsa₂ 'éi₂ ɲei₅₄ i₁chi₂i₁lein₄ Diú₄ juig₂ Jerusalén. ²⁸ Ma₂'ein₅₄ jui₅ ɲái'₄ juig₂ go₅₄ guá₅ ne₄ carroza quió'₅, 'i₂₃ Si₂ quió'₅ Isaías i₂jme₁'é₂ jág₁ quió'₅ Diú₄ ma₂líg'₂. ²⁹ Jaun₂ ca₂juá'₂ Jme₂dsí₂ quián₅ Diú₄ ca₂tsí'₃ Fe₂li₄:

—Gua₂ le₃jén'₃ cau₅ carro në₅.

³⁰ Ca₂dsióg₃ Fe₂li₄ cau₅, jaun₂ ca₂nág₂ i₁'i₅ dsa₂ 'éi₂ Si₂ quió'₅ Isaías. Jaun₂ ca₂ɲag₃ Fe₂li₄:

—¿'Níg'₂ 'e₂ juá'₂ si₂ a₂'i'₂?

³¹ Jaun₂ ca₂ɲag₃ táng₃ dsa₂ 'éi₂:

—¿'A₂ bá₄ lia'₂ le₃ɲí'₂ jniá₂? Tsá₃ guë'₂ 'ein₂ chan₂ i₂juá'₂ 'e₂ jein₅ jág₁ a₂juá'₂ si₂ la₂.

Jaun₂ ca₂tsí'₃ Fe₂li₄ a₂uíg₂ 'éi₂ guei'₅₄ a₂guá₃ co₂lë₅ quiong'₅₄.

³² Jme₁'i₅ dsa₂ 'éi₂ Si₂ quió'₅ Diú₄ ja₁juá'₂ le₂la₂:

Ca₂jio₃ dsa₂ i₁ɲag'₂ jui₁lia'₂ jɲi'₅ dsa₂ já'₂ cha'₂.

Ján₃ guë'₂ jui₁lia'₂ tsá₃ guió'₅ guein₂ já'₂ cha'₂

të₁lia'₂ chéi₅ dsa₂ jɲí₁,

ján₃ bá₄ le₂jaun₂ tsá₃ 'e₂ ca₂juá'₂ i₂'éi₂.

³³ Ca₂cuë₃ dsa₂ o₂guí'₃,

tsá₃ 'éi'₃ rë₂ ca₂të₁dsi₅₄ quió'₅;

chi'₂ tsi₁jon₂ quiáin₅ guë'₂ né₃,

¿'ein₂ bá₄ lé₂ le₃dsia₃ 'iin₃ chi'₂ dsio₅₄?

ton'₂ ca₂jñióg'₂ bá₄ guë'₂ dsa₂
 ne₄ gua'₅₄ 'uë₃ la₂.^o
³⁴ Jaun₂ ca₂juá'₂ dsa₂ dsen₅₄ 'éi₂ ca₂tsí'₃ Fe₂li₄:
 —Jmo₄ dse₃ 'au'₂, jua'₅₄ 'e₂ jein₅ jág₁ a₂juá'₂ si₂ la₂. ¿'Ein₂ 'in₅ dsa₂
 quián₅ Diú₄ i₂ca₂jmo₃ si₂ la₂? ¿A₂'iin₂₃ 'ñiog₅, o₃ a₂'iin₂₃ i₂sián'₂ 'e₂?
³⁵ Jaun₂ ca₂jme₃lióg₃ Fe₂li₄ ca₂juá'₂ 'e₂ juá'₂ ne₄ Si₂ ja₁jme₁'i₅ dsa₂
 dsen₅₄ 'éi₂, qui₂ca₂cuë₃ jág₁ dse₃ 'iin₂₃ Jesús. ³⁶ Jme₁ca₂dsi₃lén₂ caun₂
 ja₁cha₂ jmi₂g₂, jaun₂ ca₂juá'₂ dsa₂ dsen₅₄ 'éi₂ ca₂tsí'₃ Fe₂li₄:
 —Cha₂ jmi₂g₂ ja₁lá₃. ¿Cha₁ 'e₂ lë₃ jua'₅₄ tsá₃ lé₂ tsón₄ jniá₂ jmi₂g₂?
³⁷ Jaun₂ ca₂juá'₂ Fe₂li₄:
 —Chi₂jua'₂ 'éng'₂ dsón'₂ ca₂le₃jë₃ 'au'₂, lé₂ bá₄.
 Jaun₂ ca₂ñag₃ táng₃ dsa₂:
 —'Én₂ bá₄ jniá₂ a₂lín₅ Jesucristo Ja₁ñi'₅₄ Diú₄.^p
³⁸ Jaun₂ ca₂jmo₃ 'éi'₃ ca₂jñia₃ carroza quió'₅. Jaun₂ ca₂sióin₃ le₂oin₃
 chei'₅₄ jmi₂g₂, jaun₂ ca₂cho₃ Fe₂li₄ jmi₂g₂^q quió'₅ dsa₂ 'éi₂. ³⁹ Jme₁ca₂'uiin₂
 jmi₂g₂, jaun₂ Jme₂dsí₂ quián₅ Te₁gui'₅₄ ca₂tág₃ Fe₂li₄, jaun₂ dsi₂tan₅₄ 'éi₂
 tsá₃ ma₃ca₂jág₂ mei'₂. La₁ 'io'₂ bá₄ jmo₂₃ le₂'i₄ jui₅ ja₁ñái'₄. ⁴⁰ Fe₂li₄ né₃
 ma₂'ein₅₄ caun₂ jui₂g₂ ja₁chei₂ Azoto, jaun₂ le₂tan₅₄ gué₄ jui₂g₂ te₁'i₁
 ja₁jaun₂ ca₂ñei₅₄ qui₂ca₂'é₂ jág₁ dse₃ a₂lión₂ dsa₂, ca₂lia'₂ ca₂dsióg₃ ca₂të₂
 jui₂g₂ Cesarea.

Ca₂jme₃tsín₃ Saulo dsí₅
(Hechos 22:6-16; 26:12-18)

9 ¹ Të₁lia'₂ jaun₂, dsa₂ i₂chen₂ Saulo caun₂ qui₂quiain₂₃ jué'₅ a₂'nio₃
 jme₃dsiáin₃ dsa₂ i₂'én₂ jág₁ quió'₅ Te₁gui'₅₄. Jaun₂ lë₃, ca₂ñei₅₄
 i₁jñin₂₃ jme₂dsa₂ dsen₅₄. ² Ca₂mí₃ ne₄ 'éi₂ caun₂ si₂ a₂cuë₃ bí₂ a₂dsó₃ guá'₅
 sinagogas quió'₅ dsa₂ jui₂g₂ Damasco a₂dsi₃'niai'₂ dsa₂ i₂tion'₅₄ tē₂le₃
 quió'₅ Jui₅ quió'₅ Te₁gui'₅₄. Jme₁'nio₃ Saulo dsi₃te₅₄ dsa₂ chi₁'nei'₂ ca₂të₂
 Jerusalén, lia'₂ dsa₂ ñe'₂ lia'₂ dsa₂ mí₂. ³ La₁ jme₁ja₂quián₃ dsióg₄ jui₂g₂
 Damasco, con'₂ tsá₃ jáin₅ jme₁ca₂tág₃ caun₂ si₂ tág₅ jmá'₅ ne₄ quió'₅. Si₂
 jaun₂ a₂já₃ jui₅ guei'₅₄ i₂juíg₃. ⁴ Co₂tan₅₄ ca₂quin'₃ Saulo, jaun₂ ca₂ñág₂
 juá'₂ jág₁ jë₄ si₂ jaun₂:
 —Saulo, Saulo, ¿'e₂ lë₃ co₂'éin'₅ jniá₂?
⁵ Jaun₂ ca₂ñag₃ Saulo:
 —¿'Ein₂ 'ne₂, gui'₅₄?
 Jaun₂ ca₂ñag₃ táng₃ jág₁ né'₂ jë₄ si₂:
 —Jesús bá₄ jniá₂ i₂co₂'én'₅ 'ne₂ ñi'₂. Jñia'₅₄ jmag'₅₄ uig₅ 'ñiag'₂ bá₄
 jmo'₂ jui₁lia'₂ jmo₅ ca₁jui₅ jë₁ma₂jñáu₃ ni₁'ma₂ chen'₂.
⁶ Jaun₂ ca₂jlen₃ Saulo, ca₂rë₃gó'₅, ca₂juá'₂:

^o32-33 Isaías 53:7-8.

^p37 A₂lin₅₄ chog₅₄ si₂ tsá₃ chi₁ton₅ versículo 37.

^q38 lit. “ca₂tióg₃ Fe₂li₄ jmi₂g₂.”

- Te₁gui'₅₄, 'e₂ 'niog'₂ 'ne₂ jmo₅₄ jniá'₂?
 Jaun₂ ca₂ṇag₃ táng₃ Te₁gui'₅₄:
 —Nau₂, 'ú₅ juig₂ Damasco. Jë₁ma₂dsióg'₃, ja₁jaun₂ bá₄ juá'₂ dsa₂ 'e₂ jmó'₂.
⁷ Dsa₂ i₂jme₁quian'₅₄ Saulo né₃, 'ṇio₅ lín₃ ca₂rë₃gó'₅, ia₁ ca₂nág₂ jág₁ a₂juá'₂ jë₄ si₂ jaun₂, ton'₂ 'i₁jan₂ guë'₂ tsá₃ 'ein₂ ca₂jín₂. ⁸ Jaun₂ ca₂nau₂ Saulo, la₁ jme₁ca₂nau₂ jaun₂, tsá₃ ma₃lé₂ jág₃, tsá₃ ma₃jniá₂ mi₂ne₅₄. Dsa₂ i₂jme₁quian'₅₄ bá₄ ca₂tág₃ le₁chan'₂ gu₂, ca₂jio₃ tē₂ juig₂ Damasco.
⁹ Ja₁jaun₂ ca₂'í₃ tein₅₄ 'ni₅ jmi₄g, tsá₃ 'e₂ ca₂guë'₃, on₃ guë'₂ 'e₂ ca₂'in'₃ 'i₁caun₂.
¹⁰ Juig₂ Damasco jaun₂, jme₁guá₄ jan₂ dsa₂ i₂'én₂ i₂jme₁chen₂ Ananías. I₂'éi₂ ca₂jén'₃ ca₂jín₂ Te₁gui'₅₄ i₂ca₂juá'₂:
 —iAnanías!
 Jaun₂ ca₂ṇag₃ 'éi₂:
 —Ja₁lá₃ bá₄ 'eng₅₄, Te₁gui'₅₄.
¹¹ Jaun₂ ca₂juá'₂ táng₃ Te₁gui'₅₄:
 —Nau₂, gua₂ calle chei₂ Co₂dsau₅ ja₁quió'₄ dsa₂ chen₂ Judas. Ja₁jaun₂ o₂'nia'₂ jan₂ dsa₂ chan₂ Tarso i₂chen₂ Saulo, i₂'en₅₄ chi₂lén'₂ Diú₄ con'₂ lé₅ la₂. ¹² Ia₁ ma₂qui₃ a₂ma₂jín₂ jan₂ dsa₂ i₂chen₂ Ananías ca₂'í₃ ca₂quiog₂ gu₂ ne₄ quió'₅ ia₁jaun₂ jnia₃ táng₃ mi₂ne₅₄.
¹³ Jme₁ca₂nág₂ Ananías le₂në₅, jaun₂ ca₂juá'₂:
 —Te₁gui'₅₄, juin₅ dsa₂ ma₂tság₃ jniá₂ ca₂le₃jé₃ 'e₂ 'lig'₅₄ a₂jmo₅ dsa₂ 'éi₂ a₂jmái'₂ dsa₂ chan₂ Jerusalén i₂'én₂ jág₁ quiáng'₂. ¹⁴ Ta₁ jaun₂ já₅ 'éi₂ ja₁lá₃ quian'₅₄ 'éi'₃ quió'₅ juig₅₄ jme₂dsa₂ ia₁jaun₂ tē₂ le₁'ṇe₅ ca₂le₃jín₃ dsa₂ quiáng'₂ i₂'in₅ 'ne₂.
¹⁵ La₁ jaun₂ ca₂juá'₂ táng₃ Te₁gui'₅₄:
 —La₁ gua₂, ia₁ i₂ma₂quion'₄ jniá₂ 'éi₂ ia₁ 'nio₃ jniá₂ dsó₃ qui₂dsi₃'ag₃ jniá₂ lia'₂ jin₄ dsi₂nau₂ lia'₂ ne₄ rag₅₄ quiáin₅, jin₄ dsa₂ israelitas né₃.
¹⁶ Ia₁ jniá₂ bá₄ 'é₄ 'a₂ lia'₂ tion₅₄ niog₅ ṇág₃ uig₅ 'ṇio₅ lín₃ o₄quió₃ jniá₂.
¹⁷ Jaun₂ guë₄ ṇó₃ Ananías ja₁chí'₄ tsi₁'né₅ ja₁jme₁'en₅₄ Saulo. Ca₂'í₃ dsi₂néi₂, ca₂quiog₂ gu₂ ne₄ quió'₅ Saulo, jaun₂ ca₂juá'₂:
 —Saulo rin'₅₄ jniog₄, Te₁gui'₅₄ Jesús i₂ca₂jeng'₂ le₂'i₄ jui₅ lia'₂ con'₂ ṇe'₃, nē₂chei₃ jniá₂ ia₁jaun₂ jnia₅₄ táng₃ mi₂ne'₅₄, jaun₂ guéng'₄ Jme₂dsí₂ Jṇi₅ né₃.
¹⁸ Co₂tan₅₄ dsi₂jui₅ jaun₂ qui₂ca₂séi'₂ jui₁lia'₂ tsi₁ mi₂ne₄ Saulo, co₂tan₅₄ ca₂jág₃ táng₃. Jaun₂ guë₄ ca₂nau₂ Saulo, ca₂i₁choin₃ jmi₄g. ¹⁹ Jaun₂ ca₂guë'₃, ca₂tín'₃ táng₃ bí₂. Jaun₂ ca₂'í₃ bá₄ guë₄ tìn₃-ni₅ jmi₄g quian'₅₄ dsa₂ 'én₂ i₂jme₁tián'₄ juig₂ Damasco jaun₂.

Ca₂'é₂ Saulo jág₁ dse₃ juig₂ Damasco

- ²⁰ Dsi₂jui₅ bá₄ ca₂jme₃lióg₃ Saulo ca₂nei₅₄ guá'₅ sinagogas ca₂i₁jme₁tiin₂₃ dsa₂ a₂juá'₂ a₂lín₅ Jesús Ja₁ṇi'₅₄ Diú₄. ²¹ Ca₂le₃jín₃ dsa₂ i₂ca₂nág₂ ca₂i₃gó'₃ dsí₅, qui₂ca₂dsia₃:

—¿On₃jua'₅₄ dsa₂ nē₅ i₂ñí₄ lē₃ jme₁ñi₅ juig₂ Jerusalén qui₂co₂'ein₂₃ dsa₂ i₂'én₂ le₃quió'₅ Jesús? ¿On₃jua'₅₄ i₂nē₅ 'ñiog₅ i₂ma₂guan₅ ja₁lá₃ a₂qui₂tē₂ le₁'ñe₅ dsa₂ jaun₂ qui₂dsi₂jang'₅₄ o₄gú₃ juig₅₄ jme₂dsa₂?

²² La₁ tē₂le₃ lē₅ gué₄ ca₂'ág₂ tiá₂ dsí₅ Saulo, qui₂ca₂'é₂ jág₁ a₂lín₅ dsón'₂ Jesús I₂rē₂'ín₁ quián₅ Diú₄. Ca₂lia'₂ ca₂i₃cón'₅ dsí₅ dsa₂ judíos i₂jme₁tián'₄ juig₂ Damasco ia₁ ca₂'é₂ Saulo jág₁ le₂jaun₂.

Ca₂lón₂ Saulo o₄gú₃ dsa₂ judíos

²³ 'Lióng₂ jmig₄ cang₂ jaun₂, ca₂jmo₃ dsa₂ judíos caun₂ jág₁ a₂jme₁jñii'₃ Saulo. ²⁴ A₂jmi₂ a₂'uē₂ qui₂ca₂jñiai₃ Saulo o₄'né₄ o₄jui₅ juig₂ jaun₂, ia₁jaun₂ jñag'₃. La₁ ca₂rē₃ñi₅ bá₄ Saulo. ²⁵ Jaun₂ dsa₂ 'én₂ riin'₅₄ né₃, ca₂to'₂ 'ñió'₃ caun₂ tsi₁mi'₂ pa₁, jaun₂ a₂'uē₂ ca₂sióin₂ 'éi₂ jui₅ ne₄ ni₁'ia'₂ a₂jme₁lé₄ le₃lág'₃ juig₂. Jaun₂ le₂nē₅ ca₂lón₂.

Ma₂'en₅₄ táng₃ Saulo juig₂ Jerusalén

²⁶ Jme₁dsián'₃ Saulo Jerusalén, jme₁'nio₃ jme₃quiain'₅₄ dsi₂jui₅ dsa₂ 'én₂ ja₁jaun₂. La₁ ca₂le₃jín₃ dsa₂ 'éi₂ né₃ ca₂rē₃gain₃ 'éi₂, ia₁ tsá₃ jaun₂ lín₂ a₂ma₂'én₂ Saulo jág₁ dse₃. ²⁷ La₁ia₁ dsa₂ i₂chen₂ Bernabé ca₂jio₃ ne₄ dsa₂ guia₃-tín₂ i₂chen₄ 'éi₂. Jaun₂ ca₂dsia₃ 'a₂ lia'₂ ca₂lē₃ a₂ca₂jme₃jein'₂ Te₁gui'₅₄ le₂'i₄ jui₅, 'e₂ jág₁ a₂ca₂juá'₂ né₃, 'a₂ lia'₂ ca₂dsia₃ Saulo ján₃ tiá₂ dsí₅ juig₂ Damasco ca₂'é₂ jág₁ 'iin₂₃ Jesús. ²⁸ Jaun₂ bá₄ ca₂'í₃ Saulo juig₂ Jerusalén ca₂jme₃quiain'₅₄ dsa₂ 'éi₂. ²⁹ Caun₂ ca₂dsia₃ tiá₂ dsí₅ bá₄ qui₂ca₂'é₂ jág₁ 'iin₂₃ Te₁gui'₅₄ qui₂ca₂dsia₃ jág₁ qui₂ca₂tsín₂ quian'₅₄ dsa₂ judíos i₂dsia₅ jág₁ jmei₅ griego. La₁ dsa₂ 'éi₂ né₃ caun₂ 'nio₃ jme₁jñii'₃ bá₄ Saulo. ³⁰ Jme₁ca₂rē₃lí'₄ rin'₅₄ Saulo a₂jaun₂, jaun₂ ca₂jio₃ jui₅ juig₂ Cesarea. A₂'ein₅₄ gué₄ ja₁jaun₂ ca₂dsióg'₂ riin'₅₄ juig₂ go₅₄ ja₁chei₂ Tarso.

³¹ Jaun₂ ca₂le₃jín₃ guá'₅, dsa₂ i₂'én₂, le₂tan₅₄ ja₁tén₄ 'uē₃ Judea, Galilea, Samaria né₃, tei₄ bá₄ 'ei₅ tion'₅₄ dsa₂, caun₂ ca₂rē₃béin₂ ján₃. Jme₁jme₂gain₃ bá₄ Te₁gui'₅₄ tioen'₅₄. Quian'₅₄ bí₂ quió'₅ Jme₂dsí₂ Jñió₅, caun₂ qui₂ca₂juín₂ bá₄ dsa₂ i₂'én₂.

Ca₂'lón₂ dsa₂ chen₂ Eneas

³² Lia'₂ con'₂ ñi₅ Pe₄ qui₂dsi₂jñi₅₄ riin'₅₄, ca₂i₁jñi₁₂ ján₃ dsa₂ i₂ma₂'én₂ jág₁ dse₃ i₂jme₁tián'₄ juig₂ ja₁chei₂ Lida. ³³ Ja₁jaun₂ ca₂jñi₂ jan₂ dsa₂ 'lian'₂ i₂jme₁chen₂ Eneas i₂ma₂tē₂ jñia₃ ñi₂ ron₅, ia₁ tsá₃ lé₂ ñi₃. ³⁴ Jaun₂ ca₂juá'₂ Pe₄ ca₂tsí'₃ dsa₂ 'éi₂:

—Eneas, Jesucristo jme₂'lió₂. Nau₂, jmo₄ dse₃ tsi₁cama quiáng'₂.

Jaun₂ dsi₂jui₅ le₂jaun₂ ca₂nau₂ Eneas. ³⁵ Jaun₂ ca₂le₃jín₃ dsa₂ i₂tián'₅ Lida quian'₅₄ juig₂ Sarón ca₂jág₃ a₂ca₂'lón₂ 'éi₂, jaun₂ ca₂jéin'₃ le₃quió'₅ Te₁gui'₅₄.

Ca₂jen' ₅₄ 'io₅₄ Dorcas

³⁶ Jmig₄ jaun₂ jme₁chan₂ jan₂ 'io₅₄ i₂'én₂ jë₄ juig₂ Jo_{pe} i₂jme₁chen₂ Tabita. Quian' ₅₄ jág₁ jmei₅ griego jme₁té' ₂ dsa₂ Dorcas. 'Io₅₄ 'éi₂ lia' ₂ con' ₂ chain₂ jme₁jmo₂₃ dse₃ jme₂'oin₅₄ dsa₂ te₂ηé₂. ³⁷ Të₃jë₄ jmig₄ jaun₂, ca₂rë₃dso' ₅₄ Dorcas, ca₂join₃ bá₄ jaun₂ né₃. Cang₂ jme₁ca₂lë₃ sei₅ dsa₂, jaun₂ ca₂i₁quio₂₃ caun₂ dsi₂néi₂ jë₁ca₂të₂ tin₃ juín₃. ³⁸ Juig₂ Jo_{pe} ma₂quián₅ bá₄ ja₁nio₅ juig₂ Lida ja₁'en₅₄ Pe₄. Jaun₂ jme₁ca₂rë₃ni₅ dsa₂ 'én₂ a₂'en₅₄ Pe₄ ja₁jaun₂, jaun₂ ca₂chein₃ on₃ riin' ₅₄ ca₂i₁te' ₂ 'éi₂:

—Nia₅ të₂në₃ cón' ₅ jui₅ Jo_{pe}.

³⁹ Jaun₂ ηó₃ Pe₄ co₂lë₅ quian' ₅₄ dsa₂ 'éi₂. Jme₁ca₂dsióg₃, ca₂i₁jio₃ dsa₂ ja₁rë₂quian₅ 'lag₄. Ja₁jaun₂ tion' ₅₄ le₁ηi' ₂ ca₂le₃jín₃ 'io₅₄ 'nág₂ qui' ₂-o₂₃, qui₂ca₂'é' ₃ Pe₄ 'mi' ₂ tsin' ₅₄ dsa₂, ta₁ a₂jme₁jmo₅ Dorcas lia' ₂ con' ₂ chain₂.

⁴⁰ Jaun₂ ca₂jmo₃ Pe₄ 'éi' ₃ ca₂'uin₂ dsa₂ dsi₂néi₂ ja₁rë₂quian₅ 'lag₄. Jaun₂ ca₂chi₃jné₃ ca₂chi₃lén' ₂ Diú₄. Jaun₂ gué₄ ca₂jín₂ 'lag₄, ca₂juá' ₂:

—Tabita, nau₂.

Dsi₂jui₅ jaun₂ ca₂ján₃ 'io₅₄ jme₁ne₁₂. Jme₁ca₂jín₂ Pe₄, ca₂guá₂ 'io₅₄ jaun₂ né₃. ⁴¹ Jaun₂ ca₂ηa' ₃ Pe₄ mi₂gu₂ 'io₅₄, ca₂chó' ₂. Jaun₂ ca₂té' ₃ táng₃ Pe₄ riin' ₅₄, 'io₅₄ 'nág₂ né₃, jaun₂ ca₂jín' ₂ 'io₅₄ 'éi₂, la₁ ma₂jein' ₅₄ bá₄.

⁴² Ta₁caun₂ juig₂ Jo_{pe} ca₂i₃'ág₃ jág₁ a₂ca₂lë₃ le₂jaun₂. Jaun₂ juín₅ lín₃ dsa₂ ca₂rë₃'én₂ jág₁ quió' ₅ Te₁gui' ₅₄. ⁴³ Ca₂'í₃ bá₄ gué₄ Pe₄ 'lióng₂ jmig₄ jaun₂ ja₁quió' ₄ jan₂ dsa₂ i₂chen₂ Si₂mu₅₄ i₂jme₂dse₃ lo₄ já' ₂.

Pe₄ quian' ₅₄ Cornelio

10 ¹ Juig₂ Cesarea jme₁chan₂ jan₂ dsa₂ i₂jme₁chen₂ Cornelio, i₂jme₁lín₄ juig₅₄ co₂nió' ₃ 'lióg₂ i₂té' ₂ dsa₂ i₂chan₂ Italia. ² Juig₅₄ 'lióg₂ 'éi₂ jme₁jme₂gain₃ Diú₄ co₂lë₅ quian' ₅₄ dsa₂ dsi₂néi₂ quió' ₅. Ján₃ bá₄ jme₁dsió' ₅ cu₄ jme₁jme₂'oin₅₄ dsa₂ judíos. Ca₂le₃jé₃ jmig₄ né₃, jme₁chi₁lén' ₂ Diú₄. ³ Co₂ráun₂ con' ₂ hora ηí₁ 'ni₅ le₃ca₂'láu₂,^r a₂lë₁ca₂jén' ₃ ca₂jág₃ ca₂jín₂ jan₂ ángel quián₅ Diú₄ ca₂'í₃ dsi₂néi₂ ja₁'ein₅₄. Jaun₂ ca₂juá' ₂ ángel:

—iCornelio!

⁴ Jaun₂ ca₂jág₃ Cornelio gó' ₅ 'nio₅ lín₃ ca₂jín₂ ángel. Jaun₂ ca₂ηag₃ ca₂juá' ₂:

—¿'E₂ lë₅, gui' ₅₄?

Jaun₂ gué₄ ca₂juá' ₂ ángel:

—A₂nag₅ bá₄ Diú₄ a₂juig' ₂ a₂chi₂lein' ₅₄. Já₅ bá₄ a₂jmo' ₂ dse₃ 'au' ₂ jme₂'ong' ₅₄ dsa₂ te₂ηé₂. ⁵ Jaun₂ lë₃ chen₅ dsa₂ juig₂ Jo_{pe} dsi₃quián₂ dsa₂ i₂chen₂ Si₂mu₅₄ i₂té' ₂ dsa₂ Pe₄ ján₃. ⁶ I₂'en₅₄ ja₁quió' ₄ Si₂mu₅₄ sián' ₂ i₂jmo₅ dse₃ lo₄ já' ₂, i₂chí' ₅ 'ne₄ chei' ₅₄ jmi₁ηí' ₄.

^r3 lit. “hora ηi₃.” 'Nio' ₂ ja₁ton₅ Apéndice B.

⁷ Jme₁ma₂ñá'₅ ángel, jaun₂ ca₂té'₃ Cornelio on₃ dsa₂ mozo quiáin₅, jan₂ gué'₂ 'lióg₂, dsa₂ jme₂ti₃ i₂jme₂gan₃ Diú₄ ján₃. ⁸ Jaun₂ ca₂dsia₃ Cornelio ca₂tsí'₃ dsa₂ a₂ca₂jén'₃, jaun₂ ca₂chein₃ dsa₂ jui₅ juig₂ Joje.

⁹ Jme₁jnia₃ jaun₂, ca₂i₃lén₂ dsa₂ 'éi₂. Pe₄ né₃ ca₂uíg₂ le₃co'₅₄ tsi₁'né₅ con'₂ dsi₃ñí'₃ ^s a₂chi₃lén'₂ Diú₄. ¹⁰ I₁cón'₅ 'ñio₅ lín₃. Të₁lia'₂ jmo₅ dsa₂ má₃ né₃, jaun₂ a₂lë₁ca₂jén'₃ ca₂jág₃ Pe₄. ¹¹ ca₂niá₃ guei'₅₄ i₂juíg₃. Jaun₂ ca₂sió₃ jui₁lia'₂ caun₂ tsi₁'mi'₂ pa₁ a₂rë₂quein₅ ta₁quén₂ qui'₅₄. ¹² 'Ñió'₃ jaun₂, jme₁tion'₅₄ ca₂le₃jín₃ ne₅₄ já'₂: já'₂ cha₂ quén₂ mi₂tag₄, já'₂ i₂tsé'₅ quió'₅, já'₂ i₂'in₅ guei'₅₄ né₃. ¹³ Jaun₂ ca₂nág₂ Pe₄ jág₁ ca₂juá'₂:

—Nau₂ Pe₄, jme₁dsian₅ já'₂, quíng'₄.

¹⁴ Jaun₂ ca₂ñag₃ Pe₄:

—Jan₂'ón₄, Te₁gui'₅₄. Ia₁ 'i₁co₂ráun₂ tsá₃ ma₂ca₂gué'₃ jniá₂ ni₁ñi₁ já'₂ a₂jmo₅ a₂rë₂'ñio₅ dsa₂.

¹⁵ Jaun₂ ca₂ñag₃ táng₃ jág₁ a₂juá'₂:

—Tsá₃ lë₁juá'₂ 'ne₂ 'lig'₅₄ cosa a₂ma₂jmo₃ Diú₄ le₁jé₃.

¹⁶ 'Ni₅ ráun₂ ca₂lë₃ le₂jaun₂, jaun₂ gué'₄ ca₂ñáu'₃ táng₃ tsi₁'mi'₂ jui₅ guei'₅₄. ¹⁷ Të₁lia'₂ guá'₅ Pe₄ 'no'₂ dsí₅ 'e₂ léi₄ jáng'₅ a₂ca₂jág₃ jaun₂, jme₁ca₂dsi₃lén₂ dsa₂ i₂chen₄ quián₅ Cornelio o₄'né₄ quió'₅ Si₂mu₅₄, a₂ñag₂₃ a₂já'₄ chí'₅ 'ne₄ Si₂mu₅₄. ¹⁸ Jme₁ca₂dsi₃lén₂ dsa₂ 'éi₂, ca₂ñag₃ juá'₂ tiá₂ chi₂jua'₂ 'en₅₄ ja₁jaun₂ jan₂ dsa₂ i₂chen₂ Si₂mu₅₄ i₂té'₂ dsa₂ Pe₄ ján₃.

¹⁹ Të₁lia'₂ jaun₂ caun₂ qui₂'no'₂ dsí₅ Pe₄ a₂ca₂jág₃, jaun₂ ca₂juá'₂ Jme₂dsí₂ Jñió₅:

—Jag₄; ún₂ dsa₂ o₂lén₂ 'nau'₂. ²⁰ Nau₂, sión₅, gua₂ quaiain'₅₄, tsá₃ lë₁jmo₂ 'i₅ 'au'₂ jua'₅₄ líng'₂ a₂tsá₃ tí₅ jág₁, ia₁ jniá₂ bá₄ në₂tsín₂.

²¹ Jaun₂ ca₂sión₃ Pe₄ ca₂i₁jñin₁₂ dsa₂ i₂chen₄ quián₅ Cornelio, jaun₂ ca₂juá'₂ Pe₄:

—Jniá₂ bá₄ 'éi₂ i₂'na'₂ 'nia'₂. ¿Cha₁ ta₁ ja₂nó'₅ 'nia'₂?

²² Jaun₂ ca₂ñag₃ táng₃ dsa₂:

—Gui'₅₄ juig₅₄ 'lióg₂ Cornelio bá₄ ca₂chei₃ jnia'₅₄ ja₂náu₅. Dsa₂ dsen₃ bá₄ 'éi₂, i₂jme₂gan₃ Diú₄; 'nio₃ dsa₂ judíos 'ñio₅ lín₃, jme₂go₃ né₃. Jan₂ ángel i₂chen₄ quián₅ Diú₄ ca₂juá'₂ a₂té'₂ 'ne₂ ja₁quió'₄ jaun₂ nag₃ 'e₂ jág₁ cué'₅₄.

²³ Jaun₂ ca₂juá'₂ Pe₄ tón'₃ dsa₂ 'éi₂ dsi₂néi₂, jaun₂ ja₁jaun₂ ca₂jñia₃ dsa₂ 'éi₂ quaiain'₅₄ Pe₄ a₂'uë₂ jaun₂. Jme₁jnia₃ jaun₂ gué'₄ ca₂ñó₃ Pe₄ quaiain'₅₄ dsa₂ 'éi₂. Ca₂jme₃quiong'₅₄ gué'₄ i₂lín₅₄ dsa₂ riin'₅₄ i₂jme₁'én₂ i₂jme₁tián'₄ juig₂ Joje.

²⁴ Jme₁jnia₃ jaun₂ gué'₄ táng₃, ca₂dsi₃lén₂ juig₂ Cesarea ja₁guá₄ Cornelio. 'Éi₂ gué'₂ né₃ jme₁ma₂chi₁jñiog₂₃ quaiain'₅₄ co₂nió'₃ o₁riin'₅₄ a₂mei₅₄ quiáin₅ i₂jein'₂ 'ñio₅ lín₃ quaiain'₅₄ né₃, i₂ca₂té'₃.

²⁵ Jme₁ca₂dsióg₃ Pe₄ o₄'né₄, co₂tan₅₄ ca₂o₃'ín₃ Cornelio ca₂guei₃, ca₂chi₃jné₃ ne₄ 'éi₂, ca₂jme₃juag'₂. ²⁶ La₁ Pe₄ né₃ ca₂chó'₂, ca₂juá'₂:

^s9 lit. “hora jñéi₂.”

—Nau₂, ia₁ dsa₂ mi₂güí₃ bá₄ jniá₂, jui₁lia'₂ 'ne₂ ján₃.

²⁷ Të₃ dsia₅ já₁ Pe₄ quiong'₅₄, ca₂'í₃ dsi₂néi₂, jaun₂ ca₂jág₃ juin₅ bá₄ dsa₂ ma₂le₁ñi'₂ dsi₂néi₂. ²⁸ Jaun₂ ca₂juá'₂ Pe₄ ca₂tsí'₃ dsa₂:

—Ñi'₅₄ bá₄ 'nia'₂ jaun₂ tsá₃ cuë₅ jmi₄g₄ 'Éi'₃ Juá'₅ quió'₅ dsa₂ judíos jua'₅₄ a₂ñii'₂ quian'₅₄ dsi₂nau₂, on₃ gué'₂ lé₂ ñí₃ dsi₂néi₂ quió'₅. La₁ Diú₄ ma₂'ë₃ a₂tsá₃ té₄ jniá₂ 'i₁jan₂ dsa₂ tsá₃ le₁jín₃. ²⁹ Jaun₂ lë₃ dsi₂jui₅ bá₄ guio₃ jme₁ca₂dsi₃lén₂ dsa₂ quiáng'₂, té₂. Tsá₃ në₂jan₅₄ ué₂. Jaun₂ jme₁'nio₃ le₃guion₅₄ 'e₂ lë₃, 'e₂ ta₁ në₂të'₂.

³⁰ Jaun₂ ca₂ñag₃ Cornelio:

—Ma₂quén₂ jmi₄g₄, con'₂ hora la₂ jme₁'eng₅₄ dsi₂néi₂ la₂ quió'₃, jme₁jme₂'ing₅₄, tsá₃ ca₂gué'₃. Jme₁'eng₅₄ chi₁leng'₄ Diú₄ të₂le₃ ca₂'láu₂. Jaun₂ a₂lë₁ca₂jéin₃ ca₂jing₅₄ jan₂ dsa₂ qui'₂ 'mi'₂ tiog₂ jau₂. ³¹ Jaun₂ ca₂juá'₂ ca₂tság₃ jniá₂: “Cornelio, a₂nág₅ bá₄ Diú₄ a₂juig'₂. Já₅ bá₄ a₂jmo'₂ dse₃ 'au'₂ jme₂'ong'₅₄ dsa₂ te₂ñé₂. ³² Jaun₂ lë₃, chen₅ dsa₂ juig₂ Jope dsi₃quiáin₂ dsa₂ i₂chen₂ Si₂mu₅₄ i₂té'₂ dsa₂ Pe₄ ján₃. I₂'en₅₄ ja₁quió'₄ Si₂mu₅₄ sián'₂ i₂jmo₅ dse₃ lo₄ já'₂, i₂chí'₅ 'ne₄ chei'₅₄ jmi₁ñí'₄. Jë₁ma₂guain₂₃, dsia₃ já₁ quian'₅₄ 'ne₂.” ³³ Jaun₂ bá₄ lë₃ ca₂tsíng₂ dsa₂ dsi₂jui₅ a₂i₁'niai'₂ 'ne₂ né₃. Dse₃ bá₄ lia'₂ në₂jmo'₅₄ ñe'₃. Jaun₂ lë₃ tio'₅₄ jnia'₅₄ ca₂le₃jág₃ le₁ñag'₂ ne₄ Diú₄ ia₁ 'niog₂ jnia'₅₄ néi₁ já₁ a₂ma₂cuë₃ Te₁gui'₅₄ a₂juig'₅₄ jnia'₅₄.

Já₁ a₂ca₂ton₃ Pe₄ dsi₂néi₂ quió'₅ Cornelio

³⁴ Jaun₂ ca₂jme₃lióg₃ Pe₄ ca₂juá'₂ ca₂tsí'₃ dsa₂:

—Në₃ gué'₄ dsón'₂ ma₂ñí'₂ jniá₂, tsá₃ jma₃quén₅ jín₂ Diú₄ dsa₂ mi₂güí₃. ³⁵ Ia₁ ca₂le₃jé₃ juig₂ ja₁jme₂gan₃ dsa₂ Diú₄, nag₅ dsa₂ gau₂ já₁ quió'₅, jmo₂₃ dse₃ né₃, dsa₂ le₂'éi₂ bá₄ guén'₂ Diú₄. ³⁶ Ca₂juá'₂ Diú₄ ca₂tsí'₃ tsi₁jon₂ quián₅ Israel, ca₂'é₂ já₁ a₂tian'₃ dsa₂ tei₄ të₂le₃ quian'₅₄ Jesucristo i₂lín₅ Te₁gui'₅₄ quián₅ ca₂le₃jín₃. ³⁷ Ñi'₅₄ rë₂ bá₄ 'nia'₂ 'e₂ ca₂lë₃ ta₁caun₂ juig₂ go₄ dsa₂ judíos, a₂ca₂jme₃lióg₃ 'uë₃ Galilea, cang₂ jme₁ma₂'é₂ Juan₅₄ já₁, ca₂choin₃ dsa₂ jmi₄g₂ né₃. ³⁸ Ñi'₅₄ bá₄ 'nia'₂ 'a₂ lia'₂ ca₂cuë₃ Diú₄ ca₂cué'₃ Jesús chan₂ Nazaret jui₅bí₂ quió'₅ Jme₂dsí₂ Jñió₅; 'a₂ lia'₂ ca₂ñi₃ jmo₂₃ dse₃, jme₂'lióin₂ ca₂le₃jín₃ dsa₂ i₂jme₁chan₂ jmi₁uig₅ jmóg'₂ i₂së₃dsen₃. Ca₂le₃jé₃ a₂në₅ ca₂jmo₃ ia₁ jme₁quiain'₅₄ Diú₄. ³⁹ Ca₂të₂ ne₄ jnia'₅₄ ca₂le₃jé₃ a₂në₅ a₂ca₂jmo₃ Jesús, lia'₂ jë₄ juig₂ Jerusalén, lia'₂ le₂tan₅₄ ja₁tián'₄ dsa₂ chan₂ Judea. Cang₂ jaun₂ ca₂ñag₃ dsa₂ ca₂tion₃ cróg₄. ⁴⁰ La₁ jë₁ca₂té₂ 'ni₅ jmi₄g₄, ca₂jme₃jein'₅₄ táng₃ Diú₄ Jmei₂, ca₂jmo₃ ca₂jme₃jnia₅ 'éi₂ jín₄ jnia'₅₄. ⁴¹ Tsá₃ ca₂jme₃jniai₂₃ jín₄ ca₂le₃jín₃ dsa₂. Jmá'₃ lia'₂ jë₄ quián₂ jnia'₅₄ bá₄ con'₂ dsa₂ i₂ca₂quióin'₂ le₂jñiá₅ i₁të₃ ne₄. Ca₂que₅₄ gué'₄ jnia'₅₄ co₂lë₅ quiain'₅₄ jme₁ma₂jein'₅₄ táng₃ jín₄ 'lag₄. ⁴² Jaun₂ ca₂jmo₃ 'éi'₃ a₂qui₂dsi₁'é₄ jnia'₅₄ já₁, a₂dsi₁jang'₅₄ já₁ dsau₅ jín₄ dsa₂: Diú₄ ma₂dsiain₃ Jesús a₂qui₃dsi₅ 'éi'₃ quió'₅ dsa₂ i₂chan₂, quió'₅ i₂ma₂dsan₃ né₃. ⁴³ Ján₃ bá₄ le₂në₅ jáng'₅ já₁

dsau₅ ca₂le₃jín₃ dsa₂ i₂jme₁'é₂ jág₁ quiáin₅, a₂qui₃'én₂ Diú₄ dsáu₁
ca₂le₃jín₃ dsa₂ i₂'én₂ jág₁ quió'₅.

Ca₂guei₃ dsi₂nau₂ ca₂guein₃ Jme₂dsí₂ Jñi₃ó₅

⁴⁴ Të₃jë₄ 'é₂ gué₄ Pe₄ jág₁, jme₁ca₂si₃ón₃ Jme₂dsí₂ Jñi₃ó₅ ne₄ quió'₅
ca₂le₃jín₃ dsa₂ i₂tion'₅₄ nag₅ jág₁. ⁴⁵ Dsa₂ judíos^t i₂jme₁'én₂ i₂ca₂o₃lén₂
quian'₅₄ Pe₄, tióin₂ jág₅ dsi₂gó'₃ dsí₅, ia₁ ján₃ gué'₂ ca₂guen₃ dsi₂nau₂
Jme₂dsí₂ Jñi₃ó₅. ⁴⁶ Ia₁ nag₂₃ dsia₅ dsa₂ jág₁ jmei₅ siá'₂, jme₂juiin'₂ Diú₄.
⁴⁷ Jaun₂ ca₂juá'₂ Pe₄:

—¿Lé₂ le₃jua'₅₄ tsá₃ jmi₂g₂ lé₂ tsón₃ dsa₂ në₅, ton'₂ ma₂në₂guein₃ bá₄
gué'₂ Jme₂dsí₂ Jñi₃ó₅, co₂rë₂ bá₄ jui₁lia'₂ jniog₄?

⁴⁸ Jaun₂ ca₂jmo₃ 'éi'₃ a₂tsón₃ dsa₂ 'éi₂ jmi₂g₂, lia'₂ con'₂ lé₅ 'éi'₃ quió'₅
Jesucristo. Jme₁co₂lág₂ jaun₂, ca₂mi₃ dsa₂ ca₂tsí'₃ Pe₄ a₂jñia₃ gué₄ tin₃-
'ni₅ jmi₂g₄ quiong'₅₄.

Jág₁ ca₂'é₂ Pe₄ jin₄ dsa₂ 'én₂ juig₂ Jerusalén

11 ¹ Ca₂rë₃ñi₅ jág₁ dsa₂ i₂chen₄ quián₅ Jesús, quiaín₅₄ riin'₅₄
i₂tion'₅₄ Judea, a₂ma₂ca₂rë₃'én₂ dsi₂nau₂ jág₁ quió'₅ Diú₄ ján₃.
² Jme₁ca₂dsián'₃ táng₃ Pe₄ juig₂ Jerusalén, jaun₂ ca₂le₃jín₃ dsa₂ judíos
i₂'én₂ ca₂jí₂ quió'₅ ³ ca₂juá'₂:

—¿E₂ lë₃ ñeg'₅₄ ja₁con₂ dsi₂nau₂ i₁que'₅₄ quiaín₅₄ né₃?

⁴ Jaun₂ ca₂juá'₂ Pe₄ ca₂tsí'₃ dsa₂ ca₂le₃jé₃ 'a₂ lia'₂ ca₂lë₃, ca₂juá'₂:

⁵ —Juig₂ Joep bá₄ jme₁'eng₅₄, chi₁leng'₄ Diú₄. Të₃jë₄ jaun₂, ca₂jéin₃
ca₂jág₃ jui₁lia'₂ caun₂ tsi₁'mi'₂ tióg₃ pa₁ a₂rë₂quein₅ le₃quén₂ qui'₅₄,
ca₂sió₃ jui₅ guei'₅₄, ca₂të₂ cau₅ quió₃. ⁶ Jme₁ca₂jág₃ jniá₂ dse₃ 'e₂ tio'₅₄
'ñi₃ó₃, jua'₂ ca₂le₃jín₃ ne₄ já'₂ bá₄ tion'₅₄: já'₂ cha₂ quén₂ mi₂tag₄, já'₂
tsáu₂ dsí₅, já'₂ i₂tsé'₅ quió'₅, já'₂ i₂'in₅ guei'₅₄ né₃. ⁷ Jaun₂ ca₂nag₃ jág₁
a₂ca₂juá'₂ ca₂tság₃ jniá₂: “Nau₂ Pe₄, jme₁dsian₅ já'₂, quíng'₄.” ⁸ Jaun₂
ca₂ñag₄ jniá₂: “Jan₂'ón₄, Te₁gui'₅₄. Ia₁ 'i₁co₂ráun₂ tsá₃ ma₂'í₅ 'o₃ 'i₁caun₂
a₂'lig'₅₄ a₂jmo₅ a₂rë₂'ñio₅ dsa₂.” ⁹ Jaun₂ ca₂ñag₃ táng₃ jág₁ a₂já₅ guei'₅₄,
ca₂juá'₂: “Jui₁lia'₂ a₂ma₂jmo₃ Diú₄ le₁jé₃, tsá₃ lë₁juá'₂ 'ne₂ 'lig'₅₄.” ¹⁰ 'Ni₅
ráun₂ ca₂lë₃ le₂jaun₂, jaun₂ gué₄ ca₂ñáu'₃ táng₃ ca₂le₃jé₃ jui₅ guei'₅₄.
¹¹ Të₃jë₄ jaun₂ ca₂dsi₃lén₂ ún₂ dsa₂ 'né₅ ja₁jme₁'eng₅₄, i₂chen₄ quián₅ dsa₂
chan₂ Cesarea a₂'nau'₂ jniá₂. ¹² Jaun₂ Jme₂dsí₂ quián₅ bá₄ Diú₄ ca₂chei₃
ca₂ñó₃ quiang'₅₄ dsa₂ 'éi₂, caun₂ bá₄ 'ei₅ dsi₃ ñó₃. Ján₃ bá₄ i₁len₅₄ jñé₂
rin'₅₄ jniog₄ la₂ quiong'₅₄ jniá₂. Jaun₂ ca₂tió'₄ jnia'₅₄ ca₂le₃jág₃ dsi₂néi₂
quió'₅ dsa₂ chan₂ Cesarea 'éi₂. ¹³ Dsa₂ 'éi₂ ca₂dsia₃ ca₂tság₃ jnia'₅₄ 'a₂ lia'₂
ca₂jíin₂ jan₂ ángel jme₁chén'₄ dsi₂néi₂ quió'₅ i₂ca₂juá'₂: “Chen₅ dsa₂ juig₂
Joep a₂dsi₃quiaín₂ Si₂mu₅₄ i₂té'₂ dsa₂ Pe₄ ján₃. ¹⁴ Dsa₂ 'éi₂ juá'₂ 'a₂ lia'₂
jmó'₂, ia₁jaun₂ líong'₂, quiang'₅₄ dsa₂ dsi₂néi₂ quiáng'₂.

^t45 lit. “dsa₂ i₂rë₂uing₄ lo₄.”

^u3 lit. “ja₁con₂ dsa₂ i₂tsá₃ lo₄ rë₂uing₄.”

¹⁵ Jme₁ca₂jme₁lióg₄ jniá₂ juíg₂ jág₁, jaun₂ ca₂sión₃ Jme₂dsí₂ Jñiós₅ ne₄ quió'₅ dsa₂ 'éi₂, jui₁lia'₂ ca₂guain₃ ne₄ quián₂ jniog₄ le₂'uig₅₄. ¹⁶ Jaun₂ gué₄ ca₂dsáu'₃ dsi₃ a₂ma₂ca₂juá'₂ Te₁gui'₅₄ le₂jñiá₅: “Dsau₅ bá₄ ca₂tióg₃ Juan₅₄ ca₂tiáin₂ jmig₂ dsa₂, la₁ 'nia'₂ gué'₂ né₃ tióg₂ Diú₄ Jme₂dsí₂ Jñiós₅.”^v ¹⁷ Jaun₂ chi₂jua'₂ co₂rë₂ bá₄ ca₂cuë₃ Diú₄ ca₂cué'₃ dsa₂ 'éi₂ jui₁lia'₂ a₂ma₂cuë₃ jniog₄ i₂ma₂'én₂ të₂le₃ quió'₅ Te₁gui'₅₄ Jesucristo, ñi₂'ein₂ bá₄ jniá₂ jua'₅₄ jniá₂ jnig₅₄ 'éi'₃ quió'₅ Diú₄?

¹⁸ Jme₁ca₂nág₂ dsa₂ jág₁ në₅, tei₄ bá₄ ca₂jmo₃. Jaun₂ ca₂jme₃juin'₂ Diú₄, ca₂tsí'₃ riin'₅₄:

—iJán₃ gué₄ ma₂cuë₃ Diú₄ jmig₄ quió'₅ dsi₂nau₂, a₂jme₂tsín₃ dsí₅ ia₁jaun₂ tñin'₄ le₃chain₂ co₂tan₅₄!

Dsa₂ 'én₂ i₂chan₂ juig₂ Antioquía

¹⁹ Lia'₂ con'₂ jme₁ca₂jñi'₃ dsa₂ Esteban, caun₂ qui₂ca₂co₃'ein₃ bá₄ dsa₂ quió'₅ ca₂le₃jín₃ dsa₂ i₂'én₂. Jaun₂ tion₅₄ bá₄ ca₂cuing₃ ca₂i₃léin₂ ca₂të₂ Fenicia, Chipre, Antioquía né₃. La₁ jmá'₃ dsa₂ judíos bá₄ ca₂cué'₃ jág₁ dse₃. ²⁰ La₁ i₂lin₅₄ dsa₂ 'én₂ i₂chan₂ Chipre quian'₅₄ Cirene ca₂dsi₃léin₂ juig₂ Antioquía ca₂dsia₃ jág₁ quian'₅₄ dsa₂ chan₂ Grecia, ca₂'é₂ jág₁ dse₃ ca₂'iin₃ Te₁gui'₅₄ Jesús. ²¹ Ca₂jme₃'on₅₄ Te₁gui'₅₄ dsa₂ 'éi₂ ja₁jaun₂ quian'₅₄ bí₂ quió'₅, jaun₂ lë₃ juin₅ lin₃ dsa₂ ca₂jén'₃ le₃quió'₅ Te₁gui'₅₄.

²² Jme₁ca₂rë₃jñi₅ dsa₂ 'én₂ i₂tion'₅₄ Jerusalén, jaun₂ ca₂chein₃ Bernabé ca₂të₂ Antioquía. ²³ Jme₁ca₂dsióg₃ Bernabé ja₁jaun₂, jaun₂ ca₂jág₃ a₂dse₃ dsí₅ Diú₄ a₂ca₂jmo₃ ja₁con₂ dsa₂ 'éi₂, jaun₂ lë₃ ca₂jmo₃ 'io'₂. Jaun₂ ca₂toin'₂ dsa₂ jág₁ dsia₃ tiá₂ dsí₅, tsán'₂ tiá₂ jág₁ 'ein₃ Te₁gui'₅₄. ²⁴ Ia₁ dsa₂ dsen₃ bá₄ jme₁lín₄ Bernabé, jme₁rë₂rin₅ Jme₂dsí₂ Jñiós₅ të₂dsí₅, jme₁'éin₂ 'ñio₅ lin₃. Jaun₂ le₂në₅ juin₅ dsa₂ ca₂jén'₃ të₂le₃ ja₁con₂ Te₁gui'₅₄.

²⁵ Cang₂ jaun₂ ca₂ñó₃ Bernabé juig₂ Tarso a₂ca₂i₁'niai'₂ Saulo. Jme₁ca₂dsáin'₂ 'éi₂, jaun₂ ca₂tág₃ juig₂ Antioquía. ²⁶ Ja₁jaun₂ ca₂tóin'₂ caun₂ ñi₂ quiaín'₅₄ dsa₂ i₂'én₂ ja₁jaun₂, qui₂ca₂jme₃tñin₂₃ juin₅ lin₃ dsa₂. Juig₂ Antioquía jaun₂ bá₄ ja₁le₂'uig₅₄ ca₂quiong₃ dsa₂ ca₂quiaín₃ dsa₂ i₂'én₂ “cristianos”.

²⁷ Jmig₄ jaun₂, i₂lin₅₄ dsa₂ i₂jme₁cuë₅ jág₁ dse₃ a₂ma₂gue₃ quió'₅ Diú₄ ca₂'uñin₂ juig₂ Jerusalén ca₂i₁lein₅₄ Antioquía. ²⁸ Jan₂ i₂chen₂ Agabo ca₂nau₂ jin₄ riin'₅₄. Jaun₂ quian'₅₄ bí₂ quió'₅ Jme₂dsí₂ Jñiós₅, ca₂'é₂ jág₁ a₂le₃'in₂ a₂gué'₃ dsa₂ ta₁caun₂ mi₂güí₃. Jaun₂ le₂jaun₂ ca₂rë₃ti₃ né₃ jmig₄ lia'₂ con'₂ jme₁guá₄ gui'₅₄ emperador Claudio. ²⁹ Jaun₂ ca₂le₃jín₃ dsa₂ 'én₂ i₂chan₂ Antioquía ca₂jmo₃ caun₂ jág₁ ca₂jme₃'oin₅₄ riin'₅₄ i₂jme₁tián'₄ Judea, 'a₂ con'₂ jñia'₅₄ qui'₅₄ jmig₄ cuë₃ le₂jain₂ le₂jain₂. ³⁰ Jaun₂ le₂në₅ ca₂jmo₃. Ca₂chein₃ cu₄ ne₄ dsa₂ can'₅₄^w quián₅ dsa₂ 'én₂, ca₂i₁can₅ Bernabé quian'₅₄ Saulo.

^v16 Hechos 1:5.

^w30 griego: presbíteros.

Ca₂jon₃ Jacobo, Pe₄ guë'₂ ca₂jné₂ dsa₂ 'né₅ 'má₃

12 ¹ Jmig₄ jaun₂ ca₂jme₃lióg₃ Rag₅₄ Herodes qui₂ca₂jmaí'₂ dsa₂ i₂'én₂. ² Ca₂jmo₃ 'éi'₃ ca₂jñi'₃ dsa₂ Jacobo rin'₅₄ Juan₅₄, quian'₅₄ ñi₁tág₂. ³ Jme₁ca₂jág₃ Herodes a₂ca₂té₂ dsí₅ dsa₂ judíos, jaun₂ ca₂jmo₃ táng₃ 'éi'₃ ca₂jña'₃ dsa₂ Pe₄ ján₃. Ca₂le₃jé₃ a₂në₅ ca₂lë₃ lia'₂ con'₂ jmo₅ dsa₂ jmig₄ a₂gué'₅ dsa₂ i₁ñí'₄ 'ua'₂ a₂tsá₃ levadura quian'₅₄. ⁴ Jme₁ma₂në₂chán'₂ dsa₂ Pe₄, jaun₂ ca₂jmo₃ Herodes 'éi'₃ ca₂to'₂ 'né₅ 'má₃, jaun₂ ca₂tón'₂ quén₂ nió'₃ 'lióg₂ i₂lé₂ jma₃quén₂ le₂caun₂ nió'₃, qui₂ca₂jmo₃ 'í₁ Pe₄. Jme₁dsi₂jio₅ dsí₅ Herodes jme₁dsei₂₃ të₃jín₄ dsa₂ juig₂ jë₁ma₂ca₂ñí₂ Jmig₄ Të₂'lín₅₄. ⁵ Jaun₂ le₂në₅ 'en₅₄ Pe₄ né'₃ 'má₃, lë₅ 'í₁ dse₃ lín₃. La₁ dsa₂ riin'₅₄ né₃ caun₂ chi₂lén'₂ Diú₄ bá₄ tioen'₅₄ mi₂₃ 'ñio₅ lín₃ o₄quió'₄ 'éi₂.

Ca₂lión₂ Diú₄ Pe₄ 'né₅ 'má₃

⁶ Caun₂ 'uë₂, jui₁lia'₂ 'ióg₃ jme₁ma₂lë₅ jág₁ jme₁dsei₅ Herodes jin₄ dsa₂ juig₂, a₂'uë₂ jaun₂ jme₁rë₂quian₅ Pe₄ rë₂güín₃ rë₂'ñei₂₃ dse₃ lín₃ quian'₅₄ tin₃ cadenas jë₄ quió'₅ on₃ 'lióg₂. 'Lióg₂ sián'₂ guë'₂ jme₁tion'₅₄ o₄'né₄ jmo₂₃ 'í₁ 'né₅ 'má₃. ⁷ Të₃jë₄ jaun₂, ca₂jme₃jnia₅ jan₂ ángel quián₅ Te₁gui'₅₄, jaun₂ ca₂tág₃ si₂ ta₁caun₂ dsi₂néi₂ 'né₅ 'má₃. Jaun₂ ca₂quén'₃ ángel dsi₂con₂ Pe₄ a₂ca₂ñei₃. Jaun₂ ca₂juá'₂:

—Nau₂ të₂në₃ cón'₅.

Jaun₂ ca₂séi'₂ 'uë₃ ni₁ñí₁ cadenas a₂jme₁tio'₅₄ gu₂ Pe₄. ⁸ Jaun₂ ca₂juá'₂ táng₃ ángel:

—Dse₃ 'ñéi₂ tog'₂, tio'₂ lau₂ tag'₅₄.

Jme₁ca₂lë₃ jmo₅ Pe₄ a₂jaun₂, jaun₂ ca₂juá'₂ táng₃ ángel:

—Qui'₂ 'mi'₂ dsio₂ quiáng'₂, 'éin₃ jniá₂.

⁹ Jaun₂ ca₂o₃'ín₃ Pe₄ chi₁co'₅₄ quió'₅ ángel. Tsá₃ jaun₂ ñi₅ chi₂jua'₂ dsón'₂ dsi₂jó'₃ a₂ca₂jmo₃ ángel le₂jaun₂, ia₁ a₂lë₁ca₂jág₃ bá₄ lín₂. ¹⁰ Jaun₂ ca₂ñii₅ ja₁le₂'uig₅₄ tion'₅₄ 'lióg₂, ja₁ca₂té₂ táng₃ né₃. Jme₁ca₂dsi₃lén₂ o₄'né₄ a₂lë₅ quian'₅₄ ni₁ñí₁, ja₁'uin₂ dsa₂ jë₄ calle, a₂lë₁ca₂niá₃ 'ñiog₅ bá₄ o₄'né₄. Ca₂'uiin₂ bá₄ jaun₂ né₃. Jme₁ma₂i₂nioi₅₄ caun₂ calle, jaun₂ ca₂ñá'₃ ángel 'éi₂, ca₂téin₂ Pe₄. ¹¹ Jaun₂ guë'₄ ca₂rë₃lí'₄ Pe₄, ca₂juá'₂:

—Në₃ guë'₄ dsón'₂ guion₄ jniá₂ a₂në₂chen₃ Te₁gui'₅₄ ángel quián₅ a₂në₂lió₂ ja₁con₂ Herodes, ca₂le₃jé₃ guë'₄ 'e₂ jme₁'nio₃ dsa₂ judíos jmóg'₂.

¹² Të₃ dsi₂jio₅ dsí₅ le₂jaun₂ Pe₄, ca₂ñó₃ jui₅ ja₁quió'₄ María chog₅₄ Juan₅₄ i₂chen₂ Marcos ján₃. Ja₁jaun₂ jme₁tion'₅₄ dsa₂ le₁ñii'₂ chi₂lén'₂ Diú₄. ¹³ Jme₁ca₂quein₃ Pe₄ o₄'né₄ i₁dsi₅, jaun₂ ca₂o₃'ín₃ jan₂ 'io₅₄ bë'₅₄ i₂chen₂ Rode i₃jág₂ 'ein₂ të₂. ¹⁴ La₁ jme₁ca₂nág₂, ca₂rë₃cuí'₅ jág₁ quió'₅ Pe₄ né₃, jaun₂ tsá₃ ca₂niá₃ dsi₂jui₅, ia₁ ñí₄ lë₃ ca₂jmo₃ 'io'₂. Jaun₂ ca₂ñái'₃ bá₄ táng₃ dsi₂néi₂ i₁con₂ jág₁, Pe₄ bá₄ 'éi₂ ca₂dsióg₃. ¹⁵ Jaun₂ ca₂juá'₂ dsa₂ ca₂tsí'₃ 'io₅₄ bë'₅₄ 'éi₂:

—iA₂lë₁të₂'i'₂ bá₄ 'ne₂!

La₁ caun₂ ca₂juá'₂ bá₄ 'io₅₄, a₂dsón'₂ bá₄ 'éi₂. Jaun₂ ca₂ɲag₃ táng₃ dsa₂, ca₂juá'₂:

—¿A₂ bá₄ lia'₂ jaun₂? On₃jua'₅₄ 'éi₂ nē₅. 'In₁ ángel quiáin₅ bá₄ nē₅.

¹⁶ Tē₁lia'₂ jaun₂, caun₂ i₁tē₅₄ bá₄ Pe₄ o₄'né₄ i₁chéin'₄. Jme₁ca₂niá₃, ca₂jín₂ Pe₄, jaun₂ ca₂i₃gó'₃ dsí₅. ¹⁷ La₁ jaun₂ ca₂jmo₃ 'éi₂ léi₄ quian'₅₄ mi₂gu₂ a₂ca₂juá'₂ a₂jmo₃ dsa₂ tei₄. Jaun₂ ca₂dsia₃ 'a₂ lia'₂ ca₂lě₃ ca₂jmo₃ Te₁gui'₅₄ a₂ca₂i₁dsei₂₃ 'né₅ 'má₃. Jaun₂ ca₂juá'₂:

—O₂dsia₄ 'nia'₂ o₂chei'₅₄ Jacobo,^x ca₂le₃jín₃ gué₄ rin'₅₄ jniog₄.

Jaun₂ ca₂o₃'ín₃ táng₃, ca₂ɲó₃ ja₁siá'₂.

¹⁸ Jme₁jnia₃ jaun₂, ca₂tón'₂ 'lióg₂ go₂'i₃, ia₁ tsá₃ ɲi₅ 'e₂ ca₂lě₃ quian'₅₄ Pe₄. ¹⁹ Jaun₂ Herodes ca₂chein₃ dsa₂ dsi₃'niog'₂. La₁ia₁ tsá₃ ma₃ca₂dsáu'₂. Jaun₂ jme₁ca₂cáun₂ jág₁ dsau₅ quió'₅ 'lióg₂ i₂jme₁jmo₅ 'í₁ 'éi₂, ca₂jmo₃ 'éi'₃ ca₂jme₃dsiog₅ dsa₂. Cang₂ jaun₂, ca₂o₃'ín₃ Herodes 'uē₃ Judea, jaun₂ ca₂ɲó₃ ca₂i₁gua₂ Cesarea.

Ca₂jón₃ Herodes

²⁰ Jme₁'ne₂ Herodes quian'₅₄ dsa₂ i₂jme₁tián'₄ Tiro quian'₅₄ Sidón. La₁ dsa₂ 'éi₂ nē₃ ca₂jmo₃ caun₂ jág₁ ca₂i₁lein₅₄ ca₂jme₁jniai₂₃ ne₅₄. Ca₂jme₃'uáin₂ dsí₅ jan₂ i₂chen₂ Blasto a₂jmo₃ dse₃ dsí₅. Jme₁lín₄ Blasto jan₂ dsi₂tan₅₄ juin'₂ quián₅ Rag₅₄ Herodes. Ca₂nau₂ ne₄ jág₁, ca₂mi₃ dsian₅ mi'₅₄. Ia₁ juig₂ go₄ rag₅₄ bá₄ jme₁rau₂ a₂gué'₅ dsa₂ chan₂ Tiro quian'₅₄ Sidón. ²¹ Herodes nē₃ ca₂tě₃, ca₂tióng₃ caun₂ jmig₄ a₂chi₁jniog₂₃ dsi₁lén₂ dsa₂. Jme₁ca₂tě₂ jmig₄ jaun₂, ca₂quí'₂ Herodes tsin'₅₄ a₂rě₂liin₅₄ a₂lín₅ rag₅₄, jaun₂ ca₂i₁gua₂ ne₄ ne₄ta₁ quió'₅, jaun₂ ca₂ton₃ jág₁. ²² Jaun₂ ca₂jme₃lióg₃ dsa₂ juig₂ qui₂ca₂guió'₃ ca₂juá'₂:

—i₂juá'₂ nē₅, on₃jua'₅₄ dsa₂ mi₂güí₃! Jan₂ diú₄ bá₄ nē₅.

²³ Co₂tan₅₄ dsi₂juí₅ le₂jaun₂ ca₂jmo₃ ángel i₂chen₄ quián₅ Te₁gui'₅₄ a₂ca₂rě₃dso'₅₄ Herodes, ia₁ ca₂cuē₃ jmig₄ a₂jme₃juag'₂ dsa₂ 'ɲiog₅, 'nió'₄ a₂jme₁jme₃juin'₂ Diú₄. Ca₂join₃ bá₄ jaun₂ nē₃, ca₂dsó'₃ i₁ja'₅₄ quió'₅.

²⁴ La₁ jág₁ dse₃ quió'₅ Te₁gui'₅₄ nē₃ caun₂ ca₂i₃'ág₃ bá₄, qui₂ca₂'ě₂ dsa₂ 'lióng₂ juig₂.

²⁵ Jme₁ca₂lě₃ ta₁ jaun₂ quió'₅ Bernabé quian'₅₄ Saulo, jaun₂ ca₂'uiin₂ Jerusalén ca₂i₃lein₃^y jñiai₂₃ i₂jme₁chen₂ Juan₅₄ i₂jme₁tě'₂ dsa₂ Marcos ján₃.

Ca₂jme₃lióg₃ Bernabé quian'₅₄ Saulo ca₂jmo₃ ta₁ a₂'ě₂ jág₁ dse₃

13 ¹ Co₂nió'₃ dsa₂ i₂'én₂ jág₁ quió'₅ Jesús, i₂jme₁tián'₄ juig₂ Antioquía, jme₁chan₂ dsa₂ i₂jme₁'ě₂ jág₁ quiáin₅, tē₅ nē₃, juí₁lia'₂ Bernabé quian'₅₄ Si₂mu₅₄ (i₂tě'₂ dsa₂ dsa₂ lia'₂); Lucio i₂chan₂

^x17 o₃, Santiago. Rin'₅₄ Jesús. I₂sián'₂ bá₄ Jacobo rin'₅₄ Juan₅₄ (ja₁ɲi'₅₄ Zebedeo) i₂ca₂ɲag₃ Herodes, Hechos 12:1.

^y25 A₂lin₅₄ chog₅₄ si₂: “jaun₂ ca₂i₃lein₃ Jerusalén.”

Cirene; Manaén né₃ (i₂co₂lë₅ ca₂can'₅₄ quian'₅₄ Herodes i₂lín₅ dsi₄má'₂ 'uë₃ Galilea);^z quian'₅₄ Saulo né₃. ² Co₂ráun₂ tíoín'₅₄ le₁ñii'₂ jme₂juíin'₂ Te₁gui'₅₄, a₂jme₂'iin₅₄, jaun₂ ca₂juá'₂ Jme₂dsí₂ Jñió₅:

—Con'₂ chén'₂ 'nia'₂ Bernabé quian'₅₄ Saulo, ia₁jaun₂ dsi₃jmó₂ ta₁ a₂ma₂të₃ jniá₂ jmo₃.

³ Jaun₂ jme₁ca₂lë₃ chi₂lén'₂ Diú₄, a₂jme₂'iin₅₄ né₃, qui₂ca₂quiog₂ gu₂ ne₄ quió'₅ dsa₂ 'éi₂, jaun₂ gué₄ qui₂ca₂'ág'₃ jág₁ riin'₅₄.

Dsa₂ i₂chen₄ quián₅ Jesús 'é₂ jág₁ të₂ Chipre

⁴ Jaun₂ ca₂chei₃ Jme₂dsí₂ Jñió₅ ca₂chein₃ Bernabé quian'₅₄ Saulo a₂ca₂i₃lén₂ jui₅ Seleucia. Ja₁jaun₂ ca₂tóin'₂ ni₁barco a₂ca₂i₃lén₂ caun₂ 'uë₃ a₂nio₅ jë₄ jmi₁ñí'₄, ja₁chei₂ Chipre. ⁵ Jme₁ca₂dsi₃lén₂ ja₁jaun₂, caun₂ juig₂ a₂nio₅ chei'₅₄ jmi₁ñí'₄ ja₁té'₂ dsa₂ Salamina, ja₁jaun₂ ca₂jme₃lióg₃ qui₂ca₂'é'₃ dsa₂ jág₁ dse₃ quió'₅ Te₁gui'₅₄ dsi₂néi₂ guá'₅ sinagogas quió'₅ dsa₂ judíos. Jme₁quiain'₅₄ bá₄ Juan₅₄ ján₃ i₂lín₅ dsa₂ i₂jme₂'o₅₄ quió'₅.

⁶ Ca₂i₁nioi₂ ta₁caun₂ 'uë₃ jaun₂, ca₂dsi₃lén₂ caun₂ juig₂ ja₁té'₂ dsa₂ Pafos. Ja₁jaun₂ ca₂jein'₂ jan₂ dsa₂ judío, jan₂ dsa₂ i₂chan₂ dsí₅, i₂tin₂ jág₁ të₂jág₁, a₂jme₁jme₂gain₂₃ dsa₂ a₂juá'₂ a₂lín₅ jan₂ i₂'é₂ jág₁ quián₅ Diú₄. Dsa₂ 'éi₂ jme₁té'₂ dsa₂ Barjesús.^a ⁷ Jme₁quiain'₅₄ dsi₄má'₂ i₂chen₂ Sergio Paulo. Dsi₄má'₂ 'éi₂ jme₁lín₄ jan₂ dsa₂ i₂nio₅ dsi₄ 'ñio₅ lín₃. Co₂ráun₂ ca₂té'₃ Bernabé quian'₅₄ Saulo, ia₁ a₂'nio₃ nag₃ jág₁ dse₃ quió'₅ Diú₄. ⁸ La₁ Barjesús 'éi₂ né₃, i₂té'₂ dsa₂ Elimas ján₃, tsá₃ jme₁'nio₃ a₂le₃'én₂ dsi₄má'₂. Jaun₂ jme₁jné₅ jui₅. ⁹ Jaun₂ Saulo, i₂té'₂ dsa₂ Pablo ján₃, rë₂rin₅ Jme₂dsí₂ Jñió₅ të₂dsí₅, ca₂jíin₂ tiá₂ dsa₂ 'éi₂, ¹⁰ jaun₂ ca₂juá'₂:

—i'Ne₂ dsa₂ të₂jág₁, dsa₂ quián₅ i₂së₃dsen₃, i₂'io'₅₄ ca₂le₃jé₃ cosa dse₃! ¿'E₂ lë₃ qui₁jñig'₄ jui₅ co₂dsau₅ quió'₅ Te₁gui'₅₄? ¹¹ Të₂në₃ cón'₅ 'é₂ Te₁gui'₅₄ jmi₁uig₅ quiáng'₂, co₂dsia₅ téng'₂, co₂'na₂ tsá₃ ma₃lé₂ jag'₅₄ si₂ quió'₅ 'iog₂.

Dsi₂jui₅ jaun₂ ca₂téin₂ co₂dsia₅, qui₁né'₃ ca₂jén'₃. Jaun₂ jme₁'nai'₂ jan₂ i₂të₂ tsán'₂ gu₂. ¹² Jme₁ca₂jág₃ gui'₅₄ dsi₄má'₂ a₂ca₂lë₃ jaun₂, ca₂rë₃'éin₂ ca₂nág₂ dsi₂gó'₃ dsí₅ jág₁ dse₃ quió'₅ Te₁gui'₅₄.

Pablo quian'₅₄ Bernabé tíoín'₅₄ Antioquía ja₁tén₄ Pisidia

¹³ Ca₂'í₃ Pablo quian'₅₄ riin'₅₄ 'ñió₃ ni₁barco juig₂ Pafos, ca₂i₃lén₂ jui₅ Perge, juig₂ tén₅ 'uë₃ Panfilia. Ca₂tén₂ Juan₅₄ riin'₅₄ ja₁jaun₂, jaun₂ ca₂ñái'₃ jui₅ Jerusalén. ¹⁴ Ca₂'uin₂ riin'₅₄ Perge ca₂dsi₃lén₂ táng₃ Antioquía, juig₂ tén₅ 'uë₃ Pisidia. Jaun₂ ca₂i₃toin'₅₄ guá'₅ sinagoga caun₂ jmi₄g₄ sa₅₄, jaun₂ ca₂tiáin'₂ dsi₂néi₂. ¹⁵ Jme₁ma₂ca₂lë₃ 'i₅ dsa₂ Si₂ 'Éi'₃

^z1 griego: Herodes tetrarca.

^a6 Barjesús: a₂jein₅ jág₁ “ja₁ñi'₅₄ Jesús” quian'₅₄ jág₁ jmei₅ arameo.

quíó⁵ Diú⁴ quian⁵⁴ Si² a²ca²jmo³ dsa² i²jme¹'é² jág¹ ma²líg² né³, jaun² ca²chen³ jág¹ dsa² can⁵⁴ quián⁵ guá⁵ sinagoga, ca²juá²:

—Rin⁵⁴ jniog⁴, chi²jua² cha² jág¹ dse³ quián² 'nia² a²cuë⁵⁴ dsa², lé² bá⁴ jua⁵⁴ 'nia².

¹⁶ Jaun² ca²nau² Pa⁴ ca²jmo³ léi⁴ quian⁵⁴ gu² a²mi²³ a²jmo³ dsa² tei⁴, jaun² ca²juá²:

—Nei² 'nia² dsa² israelitas, 'nia² gué⁴ dsa² sián² i²gan³ Diú⁴: ¹⁷ Diú⁴ quián² jniog⁴ dsa² lág⁵ juig² Israel ca²quíóin² dsa² can⁵⁴ quián² jniog⁴ ma²líg². Ca²jmo³ Diú⁴ ca²i³juín² dsa² 'éi² lia² con² jme¹tián⁴ 'uë³ Egipto a²lín⁵ dsi²nau². Cang² jaun² ca²lë³ caun² juig² pa¹. Diú⁴ né³ ca²lió² quian⁵⁴ bí² quió⁵, ca²'uág² 'uë³ jaun². ¹⁸ Ca²jme³juín² Diú⁴ dsí⁵ quiong⁵⁴ ^b të²láu³ ñi² të¹lia² jme¹i²nioi⁵⁴ gua⁵⁴ quein², ¹⁹ ca²'éin² guio³ juig² go⁴ dsa² i²jme¹tián⁴ 'uë³ Cana²án, 'uë³ jaun² né³ ca²cué³ dsa² can⁵⁴ quián² jniog⁴ i²jme¹chan² ma²líg².

²⁰ 'Cang² jaun² ca²dsin³ con² quén² 'ñiá²-láu² rë²dsí² të²láu³-guiá² (450) ñi², ca²qui³dsi⁵ Diú⁴ 'éi³ jin⁴ dsa² 'éi² të²le³ quian⁵⁴ jué⁴ ca²lia² ca²të² jmi⁴ a²ca²rë³chán³ Samuel i²qui²ca²'é² jág¹ quió⁵ Diú⁴ cang² jaun². ²¹ Jaun² ca²mii³ jan² rag⁵⁴. Jaun² Diú⁴ né³ ca²cuin³ Saúl ja¹ñi⁵⁴ Cis, tsi¹jon² Benjamín; ca²jmo³ 'éi³ con² të²láu³ ñi². ²² Cang² jaun² ca²jñiá² Diú⁴ ta¹ quió⁵ Saúl a²jme¹lín⁴. Jaun² David bá⁴ ca²chein³ ca²liin³ rag⁵⁴. Jaun² ca²juá² Diú⁴ 'iin²³ Rag⁵⁴ David: “Ca²dsó² jniá² ja¹con² David ja¹ñi⁵⁴ Isaí, a²lín⁵ jan² dsa² i²lé⁵ dsí⁵ lia² lé⁵ dsi³ jniá², jan² dsa² i²jmo³ a²'ñio² dsi³.”

²³ 'Jaun² né³ rin⁵⁴ jniog⁴, jan² chi² dsio⁴ David 'éi² bá⁴ lín⁵ Jesús i²ca²chen³ Diú⁴ a²lióin² dsa² juig² Israel lia² con² lé⁵ jág¹ quió⁵ ma²cuë³ le²jñiá⁵. ²⁴ Né³ a²guán² Jesús, ca²'é² Juan⁵⁴ jág¹ ca²tsí³ ca²le³jín³ dsa² Israel a²'nió⁵ qui³choin³ jmi⁴, dsi³quén⁵ dsí⁵ né³. ²⁵ Jaun² ca²juá² Juan⁵⁴ jme¹ja²quián³ jóin²: “On³jua⁵⁴ 'éi² jniá² jui¹lia² dsi²jio⁵ 'au² 'nia² lín⁵ jniá². La¹ i²já⁵ chi¹co⁵⁴ quió³ né³, 'éi² bá⁴ i²'uan² gué⁴ lia² con² gué⁴ jniá², ca²lia² jñia⁵⁴ lau² ton⁵ tag⁵⁴ bá⁴ tsá³ ca²tíng² tsi⁵⁴ quió⁵.”^c

²⁶ 'Rin⁵⁴ jniog⁴, ca²le³jín³ gué⁴ 'nia² i²lín⁵ chi² dsio⁴ Abraham, quian⁵⁴ ca²le³jín³ gué⁴ 'ein² chan² quián² 'nia² i²jme²gan³ Diú⁴: a²quián² 'nia² bá⁴ jág¹ dse³ la² a²ca²'é² Diú⁴ a²lión² dsa². ²⁷ Dsa² i²jme¹tián⁴ Jerusalén quian⁵⁴ dsa² can⁵⁴ quián⁵, tsá³ ca²rë³ñi⁵ 'ein² 'éi² jme¹chen² Jesús, on³ gué⁴ ca²rë³ñi² jág¹ a²qui²ca²'é² dsa² i²chen⁴ quián⁵ Diú⁴ le²jñiá⁵. Jaun² lë³, jág¹ jaun² a²i²³ ne⁴ Si² ca²le³jé³ jmi⁴ sa⁵⁴ ca²jme³ti³ guioin⁵⁴ jme¹ca²jmo³ 'éi³ a²jñii³ Jesús. ²⁸ 'I¹caun² dsáu¹ Jesús tsá³ 'e² ca²dsó² dsa² jua⁵⁴ a²i⁴ 'éi³ a²jñag³, la¹ tion⁵⁴ bá⁴ ca²mi³ dsa² jág¹ ne⁴ Pilato a²jmo³ 'éi² 'éi³ a²jñag³. ²⁹ Jaun² né³ jme¹ma²lë⁵ 'a² con²

^b18 A²lín⁵⁴ chog⁵⁴ si² juá²: “ca²jmo³ Diú⁴ 'í¹ quió⁵.”

^c25 Mateo 3:11.

lé₅ juá'₂ ne₄ Si₂ quió'₅ Diú₄ a₂'iin₂₃ Jesús, jaun₂ ca₂sió₂ dsa₂ ne₄ cróg₄,
jaun₂ ca₂i₁'ó₄.³⁰ La₁ Diú₄ né₃, ca₂jme₃jein'₅₄ táng₃ jin₄ 'lag₄.³¹ 'Lióng₂
jmig₄ bá₄ qui₂ca₂jme₃jnia₅ Jesús ne₄ dsa₂ i₂jme₁quiain'₅₄ lia'₂ con'₂
jme₁ca₂ηó₃ të₂ Galilea ca₂dsióg₃ të₂ Jerusalén. Jaun₂ né₃ dsa₂ 'éi₂ bá₄
i₂jáng'₅ jág₁ dsau₅ tsí'₅ dsa₂ rē₂né₃.

³² 'Jaun₂ le₂nē₅ bá₄ a₂cuē₂ jnia'₅₄ jág₁ dse₃ 'nia'₂, jág₁ a₂ca₂cuē₃ Diú₄
ca₂cuē'₃ dsa₂ quián₂ jniog₄ ma₂líg'₂ jaun₂,³³ ma₂ca₂rē₃ti'₅₄ Diú₄ ja₁con₂
jniog₄ i₂lág₅ chi'₂-guein₂ quián₅ dsa₂ 'éi₂, jme₁ca₂jme₃jein'₅₄ Jesús con'₂
lé₅ jág₁ tio'₅₄ jē₁ca₂tē₂ tin₃ Salmo, a₂juá'₂:

'Ne₂ líng'₅ jón₃ quiáng₃;

jmig₄ nē₃, ca₂lín₃ jniá₂ ηéi'₅ 'ne₂.^d

³⁴ 'Ca₂juá'₂ Diú₄ le₂jniá₅ a₂jme₃jein'₅₄ jin₄ 'lag₄ ia₁jaun₂ tsá₃ dsi₃'én₂
quió'₅. Jui₁lia'₂ juá'₂ ne₄ Si₂ quió'₅ Diú₄:

Ján₃ bá₄ cuē₄ jniá₂ 'nia'₂

ca₂le₃jé₃ 'e₂ cosa dse₃

a₂jme₁ti₁ jág₁ quió₃ a₂ca₂cuē₃ David.^e

³⁵ 'Jaun₂ lē₃, ján₃ guē'₂ juá'₂ ne₄ Si₂ Salmos ja₁siá'₂ táng₃:

Tsá₃ cuē'₁ jmig₄

a₂dsi₃guí'₂ quió'₅ dsa₂ jnió₅ 'éi₂ quiáng'₂

i₂jme₂ti₃ ta₁ ne'₅₄.^f

³⁶ 'David né₃ ca₂jme₃ti₃ bá₄ jág₁ ne₄ dsa₂ quiáin₅ të₁lia'₂ ca₂rē₃cháin₃
jmig₄ jaun₂, jui₁lia'₂ 'éi'₃ ca₂juá'₂ Diú₄. La₁ ca₂jon₃ bá₄ David né₃, jaun₂
ca₂i₁'ó₄ dsa₂ ja₁le₁'on₅ dsa₂ can'₅₄ quiáin₅, ca₂siá'₃ bá₄ ni₁ηi₁ 'éi₂ né₃.

³⁷ La₁ ni₁ηi₁ Jesús né₃, i₂ca₂jme₃jen'₅₄ Diú₄, tsá₃ 'e₂ ca₂'en₃.

³⁸ 'Jaun₂ né₃ rin'₅₄ jniog₄, tion₅₄ 'nió'₅ le₃ηi'₅₄ 'nia'₂ jág₁ a₂'é₅ jniá₂:
tē₂le₃ quian'₅₄ Jesús bá₄ dsón'₂ 'én₂ dsáu'₂ 'nia'₂.³⁹ Tē₂le₃ quian'₅₄ 'éi₂,
ca₂le₃jín₃ i₂'én₂ të₂le₃ quió'₅, rē₂'én₄ ca₂le₃jé₃ dsáu₁ a₂tsá₃ o₂'én₂ dso₄
cha₂ quián'₂ 'nia'₂ të₂le₃ quian'₅₄ 'Éi'₃ quió'₅ Moisés.⁴⁰ 'Í₁ jmo₄ 'nia'₂,
ia₁jaun₂ tsá₃ dsi₃ηí'₂ 'nia'₂ jui₁lia'₂ juá'₂ dsa₂ i₂jme₁'é₂ jág₁ quián₅ Diú₄,
jme₁ca₂juá'₂ ne₄ Si₂:

⁴¹ Jag₄ 'nia'₂ dsa₂ i₂táun₂ 'lig'₅₄,

jui₁dsi₂gó'₃ 'au'₂, jui₁dsian'₂ 'nia'₂.

Ia₁ jniá₂ i₂líng₅ Diú₄ jmo₅₄ léi₄ juē'₂

jmig₄ të₁lia'₂ chan'₂ 'nia'₂.

La₁ léi₄ jaun₂, 'i₁jan'₂ 'nia'₂ tsá₃ le₃'én₂,

o₁jnia'₅₄ 'a₂ guē'₂ lia'₂ chan₂ i₂dsia₃.^g

⁴² Jme₁ca₂o₃'ín₃ Pa₄ quiain'₅₄ riin'₅₄ guá'₅ sinagoga quió'₅ dsa₂ judíos,
jaun₂ ca₂mi₃ dsa₂^h a₂ja₃lén₂ táng₃ 'éi₂ jmig₄ sa₅₄ caun₂ a₂ja₃'é₂ jág₁ jaun₂.

^d33 Salmo 2:7.

^e34 Isaías 55:3.

^f35 Salmo 16:10.

^g41 Habacuc 1:5.

⁴³ Jme₁ca₂dsan₃ le₁ñi'₂ dsa₂ dsi₂néi₂ guá'₅, jaun₂ juin₅ lin₃ dsa₂ judíos quian'₅₄ dsa₂ i₂ma₂gue₃ i₂ma₂tion₂ tiá₂ juá'₅ quió'₅ dsa₂ judíos, ca₂'ein₃ Pa₄ quiaín'₅₄ Bernabé, ca₂jme₃quiong'₅₄. Jaun₂ ca₂juá'₂ dsa₂ i₂chen₄ quián₅ Jesús 'éi₂ ca₂tsí'₃ dsa₂ ca₂cué'₃ bí₂ a₂tion₅₄ 'nió'₅ tsán'₂ tiá₂ jág₁ dse₃ quió'₅ Diú₄ i₂'ua₁ dsí₅.

⁴⁴ Caun₂ semana cang₂ jaun₂, jme₁ca₂té₂ táng₃ jmig₄ sa₅₄, jaun₂ qui₂ca₂ñi'₂ mei'₂ tsá₃ ca₂le₃jín₃ dsa₂ juig₂ a₂ca₂o₃néi₃ jág₁ quió'₅ Diú₄.

⁴⁵ La₁ jme₁ca₂jág₃ dsa₂ judíos juin₅ lin₃ dsa₂ tion'₅₄, jaun₂ ca₂rë₃'néi₃ a₂dsí'₅ 'ñio₅ lin₃, të₂le₃ jen₅ bá₄ qui₂ca₂ñag₃ jág₁ a₂juá'₂ Pa₄, qui₂ca₂ñáu'₂ jág₁ uig₅ në₃.

⁴⁶ Jaun₂ ca₂juá'₂ Pa₄ quian'₅₄ Bernabé, ca₂dsia₃ tiá₂ dsí₅ ca₂tsí'₃ dsa₂: —Tion₅₄ 'nió'₅ jñiá₅ de'₂ jin'₄ 'nia'₂ con'₂ dsa₂ i₂lín₅ judíos, ca₂tág₂ jnia'₅₄ 'é₄ jág₁ dse₃ quió'₅ Diú₄. La₁ tsá₃ guë'₂ 'niog'₂ 'nia'₂ guéi'₁, jaun₂ ma₂léi₄ bá₄ a₂tsá₃ lé₂ tín'₄ 'nia'₂ guei'₅₄ i₂juíg₃. Jaun₂ lë₃, dsi₁náu₄ jnia'₅₄ ja₁con₂ dsi₂nau₂. ⁴⁷ Ia₁ le₂në₅ bá₄ 'éi'₃ ca₂cuë₃ Te₁gui'₅₄ jme₁ca₂juá'₂:

Jui₁lia'₂ si₂ bá₄ lín'₅ 'ne₂

i₂ca₂dsiáng₃ quió'₅ dsi₂nau₂,

ia₁jaun₂ 'ë'₅₄ dsa₂ chan₂ ta₁caun₂ mi₂güíg₃

jui₅ ja₁tín'₄ dsa₂.ⁱ

⁴⁸ Jme₁ca₂nág₂ dsi₂nau₂ jág₁ në₅, qui₂ca₂jmo₃ 'io'₂, qui₂ca₂dsia₃, dsón'₂ bá₄ dse₃ jág₁ quió'₅ Te₁gui'₅₄. Jaun₂ ca₂rë₃'én₂ ca₂le₃jín₃ i₂con'₂ 'i₄ 'éi'₃ tín'₄ ja₁le₃chain₂ co₂tan₅₄. ⁴⁹ Jaun₂ le₂në₅ ca₂i₃'ág₃ jág₁ dse₃ quió'₅ Te₁gui'₅₄ ta₁caun₂ 'uë₃ jaun₂. ⁵⁰ La₁ dsa₂ judíos në₃ ca₂jmo₃ jág₁ quian'₅₄ i₂lín₅₄ 'io₅₄ dsen₃ i₂jme₂go₃ dsa₂ juig₂, quian'₅₄ i₂lín₅₄ dsa₂ can'₅₄ në₃, ia₁jaun₂ jme₃'iog₅₄ jme₃'ñiai₅₄ Pa₄ quiaín'₅₄ Bernabé. Jaun₂ le₂në₅ bá₄ ca₂jme₃lióg₃ ca₂jmo₃ jág₁ a₂qui₂ca₂co₃'ein₃ Pa₄ quiaín'₅₄ Bernabé ca₂lia'₂ ca₂'uin₂ 'éi₂ juig₂ jaun₂. ⁵¹ Jaun₂ 'éi₂ në₃ qui₂ca₂séi'₂ 'liog₂ mi₂tag₅₄.^j Ca₂'uiin₂ bá₄ jaun₂, ca₂i₃lén₂ jui₅ Iconio. ⁵² La₁ ca₂le₃jín₃ dsa₂ i₂ca₂rë₃'én₂ në₃, 'io'₂ jmo₂₃, rë₂rin₅ Jme₂dsí₂ Jñiós të₂dsí₅.

Pablo quian'₅₄ Bernabé tioin'₅₄ juig₂ Iconio

14 ¹ Ca₂'í₃ Pablo co₂lë₅ quian'₅₄ Bernabé dsi₂néi₂ guá'₅ sinagoga quió'₅ dsa₂ judíos juig₂ Iconio. Ja₁jaun₂ ca₂jme₃tñin₂₃ táng₃ dsa₂ jág₁ dse₃ quió'₅ Diú₄. Juin₅ bá₄ dsa₂ ca₂rë₃'én₂, lia'₂ dsa₂ judíos lia'₂ dsi₂nau₂ në₃. ² La₁ dsa₂ judíos i₂tsá₃ 'én₂ në₃, ca₂tsí'₃ dsi₂nau₂ a₂chi₃'iin₃ 'lig'₅₄ dsa₂ i₂'én₂. ³ Jaun₂ lë₃, uë₂ bá₄ ca₂'í₃ Pa₄ quiaín'₅₄ Bernabé. Ca₂dsia₃ tiá₂ dsí₅ quian'₅₄ bí₂ quió'₅ Te₁gui'₅₄, qui₂ca₂'ë₂ jág₁; jaun₂ Diú₄

^h42 A₂lin₅₄ chog₅₄ si₂: “ca₂mi₃ dsi₂nau₂.”

ⁱ47 Isaías 49:6.

^j51 Co₂'nió'₄ a₂ca₂jmo₃ léi₄, guion₅₄ bá₄ dsa₂ juig₂ ma₂rë₂cáin'₄ ia₁ tsá₃ ca₂gue₃ jág₁ quió'₅ Diú₄. 'Nio'₂ ja₁ton₅ Marcos 6:11, Lucas 9:5, 10:11, Hechos 18:6.

né₃ ca₂cuë₃ bí₂ ca₂jmo₃ 'éi₂ léi₄ juë'₂ a₂dsi₃gó'₃ dsi₅, ia₁jaun₂ le₃lí'₄ dsa₂,
jág₁ dsau₅ a₂dse₃ dsí₅ Diú₄ bá₄ 'é₂ 'éi₂. ⁴ La₁ dsa₂ juig₂ 'éi₂ jme₁lé₄
le₁dson'₅₄ i₂jme₁tión₂ le₃quió'₅ dsa₂ judíos, i₂jme₁tión₂ le₃quió'₅ dsa₂
i₂chen₄ quián₅ Jesús 'éi₂ né₃.

⁵ Jaun₂ ca₂jmo₃ caun₂ jág₁ dsa₂ judíos quiain'₅₄ dsi₂nau₂, quian'₅₄
dsi₂tan₅₄, a₂tsí'₃ jág₁ uig₅ dsa₂ 'éi₂, a₂qui₃ináu'₂ cang₄ né₃. ⁶ La₁
jme₁ca₂rë₃ñi₅ Pa₄ quian'₅₄ Bernabé, ca₂cuing₃ jui₅ Listra, jui₅ Derbe né₃,
tin₃ juig₂ ja₁tén₄ Licaonia, ca₂i₁nioi₁₂ le₂tan₅₄ 'uë₃ jaun₂, ⁷ qui₂jme₂tiin₂₃
dsa₂ jág₁ dse₃ a₂lión₂ dsa₂.

Ca₂cuë₃ dsa₂ cang₄ ca₂cué'₃ Pablo juig₂ Listra

⁸ Juig₂ Listra jme₁chan₂ jan₂ dsa₂ i₂tsá₃ lé₂ ñi₃. Lia'₂ jaun₂ lín₅, lia'₂
con'₂ jme₁ca₂rë₃cháin₃, guá₅ ja₁jaun₂, 'i₁cón'₂ tsá₃ ma₂ca₂ñi₃ ca₂le₃jé₃
jmig₄ a₂chain₂. ⁹ Ca₂nág₂ dsa₂ 'éi₂ jág₁ a₂ca₂dsia₃ Pa₄. Jaun₂ Pa₄ né₃
ca₂jág₃ tiá₂ ca₂jín₂ dsa₂ 'éi₂, jaun₂ ca₂rë₃lí'₄ Pa₄ a₂'én₂ dsa₂ 'éi₂ a₂lé₂
'lióin₂. ¹⁰ Jaun₂ ca₂juá'₂ tiá₂ ca₂tsí'₃ dsa₂ 'éi₂:

—Rë₂ nau₂. Co₂dsau₅ chí'₂ mi₂tag'₅₄.

Jaun₂ dsi₂jui₅ ca₂ráun₂ ca₂nau₂ dsa₂ 'éi₂, ca₂jme₃lióg₃ ca₂ñi₃.

¹¹ Jme₁ca₂jág₃ dsa₂ a₂ca₂jmo₃ Pa₄ jaun₂, ca₂tóin'₂ co₂mi'₅₄, ca₂guió'₃
quian'₅₄ jág₁ jmei₅ quió'₅ dsa₂ chan₂ Licaonia, ca₂juá'₂:

—iDiú₄ i₂lín₅ dsa₂ ca₂sión₃ jë₄ quián₂ jniog₄!

¹² Juá'₂ dsa₂ a₂lín₅ Bernabé diú₄ Júpiter, Pa₄ guë'₂ lín₅ diú₄ Mercurio^k
ia₁ 'éi₂ bá₄ i₂juá'₂ guë'₄ jág₁. ¹³ Jaun₂ jme₁chí'₄ guá'₅ quió'₅ diú₄ Júpiter
ja₁dsi₁lén₂ dsa₂ juig₂ jaun₂. Dsa₂ i₂lín₅ jme₂dsa₂ quián₅ Júpiter ca₂dsióg₃
quiain'₅₄ juin₅ dsa₂ le₁jñiai₂₃ ca₁jui₅ le₁quian₅ lí₁ né₃, a₂jme₁'nio₃
jme₃dsiain₂₃ ca₁jui₅ a₂jme₁jéin'₂ ne₄ Pa₄ quian'₅₄ Bernabé. ¹⁴ La₁
jme₁ca₂rë₃lí'₄ Pa₄ quian'₅₄ Bernabé i₂chen₄ quián₅ Jesús, a₂ma₂tion'₅₄
dsa₂ jmo₂₃ le₂jaun₂, jaun₂ ca₂jme₃lióg₃ ca₂gág₃ tsin'₅₄. ^l Jaun₂ ca₂tóin'₂
jin₄ dsa₂ ca₂guió'₃ ca₂juá'₂:

¹⁵ —iNei₂ 'nia'₂! ¿'E₂ lë₃ jmo'₂ 'nia'₂ le₂në₅? Dsa₂ mi₂güig₃ bá₄ jnia'₅₄,
jui₁lia'₂ 'nia'₂. A₂le₁quian₁ jág₁ dse₃ bá₄ jnia'₅₄ ja₂náu₅, a₂chei₅₄ 'nia'₂
a₂jñiá'₄ 'nia'₂ ca₂le₃jé₃ a₂në₅ a₂tsá₃ 'e₂ ta₁ tí₄, a₂jen'₅₄ 'nia'₂ të₂le₃ quió'₅
Diú₄ jén'₃ i₂ca₂jmo₃ guei'₅₄ i₂juíg₃, gua'₅₄ 'uë₃, jmi₁ñi'₄ né₃, ca₂le₃jé₃ guë'₄
'e₂ a₂cha₂ ja₁jaun₂. ¹⁶ 'Niog₅ Diú₄ ca₂cuë₃ jmig₄ ma₂líg'₂ ca₂cué'₃
ca₂le₃jín₃ dsa₂ chan₂ gua'₅₄ 'uë₃ a₂jmo₃ con'₂ lé₂ dsí₅ guioin₅₄. ¹⁷ La₁ Diú₄
ca₂'é'₃ dsa₂ 'ein₂ lín₅, ca₂jmo₃ bá₄ léi₄ të₂le₃ quian'₅₄ ca₂le₃jé₃ a₂dse₃
a₂qui₂ca₂jmo₃. 'Éi₂ bá₄ jmo₅ a₂tang₂ jmí₅ ia₁jaun₂ qui₃ráu₃ ca₂le₃jé₃
a₂qui₂guë'₃ dsa₂. 'Éi₂ bá₄ jmo₅ a₂le₁'ág₄ dse₃ dsí₅ dsa₂.

¹⁸ Ja₂lag₃ le₂jaun₂ bá₄ ca₂tió'₃ ca₂jme₃'uáin₂ dsí₅ dsa₂, a₂tsá₃
ma₃qui₃jéin'₂ já'₂ ne₅₄.

^k12 griego: Hermes.

^l14 ca₂gág₃ tsin'₅₄: le₂jaun₂ jme₁jmo₅ dsa₂ léi₄ chi₂jua'₂ 'e₂ tsá₃ të₅ dsí₅.

¹⁹ Jaun₂ ca₂dsi₃lén₂ i₂lin₅₄ dsa₂ judíos i₂chan₂ Antioquía, quian'₅₄ i₂chan₂ Iconio, qui₂ca₂toin'₂ jág₁ dsa₂, ca₂jmo₃ jág₁. Jaun₂ ca₂cué'₃ cang₄ Pa₄, ca₂tsi₂cuang'₂ të₂'ni'₂ juig₂, a₂ma₂në₂jag'₃ bá₄ lín₂. ²⁰ La₁ jme₁ca₂ñi'₂ dsa₂ i₂'én₂ riin'₅₄ ja₁rë₂quian₂₃, ca₂nau₂ Pa₄, ca₂ñó₃ táng₃ jui₅ jë₄ juig₂. Jme₁nia₃ jaun₂ gué₄, ca₂o₃'ín₃ juig₂ jaun₂ quian'₅₄ Bernabé, ca₂i₃lén₂ jui₅ Derbe.

²¹ Juin₅ dsa₂ chan₂ juig₂ Derbe ca₂rë₃'éin₂ jme₁ca₂nág₂ ca₂'é₂ dsa₂ 'éi₂ jág₁ dse₃ a₂tín'₄ dsa₂. Jaun₂ ca₂'uiin₂ ja₁jaun₂, ca₂i₃lén₂ táng₃ jui₅ Listra, jui₅ Iconio né₃, a₂ca₂dsi₃lén₂ táng₃ Antioquía. ²² Le₂tan₅₄ juig₂ ja₁jaun₂ qui₂ca₂cué'₃ bí₂ dsa₂ i₂'én₂. Qui₂ca₂toin'₂ jág₁ dsa₂ a₂'nió'₅ tsán'₂ dsa₂ tiá₂ jág₁ dse₃. Ca₂juá'₂:

—Tion₅₄ 'nió'₅ ñag'₅₄ de'₂ 'nia'₂ jmi₁uig₅ mi₂güí₃ la₂, né'₃ gué₄ a₂dsi₁no'₃ 'nia'₂ ja₁gon₂ Diú₄.

²³ Ján₃ bá₄ ca₂'ín₃ dsa₂ dsa₂ can'₅₄^m lia'₂ caun₂ guá'₅. Jaun₂ cang₂ jme₁ca₂lë₃ chi₂lén'₂ dsa₂ Diú₄, a₂jme₂'iin₅₄ né₃, ca₂dsiain₃ riin'₅₄ i₂'én₂ 'éi₂ o₄gú₃ Te₁gui'₅₄, ia₁ të₂le₃ quió'₅ Te₁gui'₅₄ bá₄ ma₂'én₂ dsa₂.

Pa₄ quian'₅₄ Bernabé ca₂i₃lein₃ táng₃ Antioquía ja₁tén₄ Siria

²⁴ Cang₂ jaun₂ ca₂ñí₃ jui₅ 'uë₃ Pisidia, jaun₂ ca₂dsi₃lén₂ 'uë₃ Panfilia. ²⁵ Qui₂ca₂'é₂ jág₁ juig₂ Perge, jaun₂ ca₂i₃lén₂ juig₂ Atalia. ²⁶ Ja₁jaun₂ ca₂tóin'₂ ni₁barco a₂ca₂i₃lein₃ táng₃ Antioquía, juig₂ ja₁ca₂jáng'₂ dsa₂ riin'₅₄ o₄gú₃ Diú₄ le₂jñiá₅, a₂jmo₃ ta₁, co₂'nió'₄ ta₁ a₂ma₂ca₂lë₃ jmo₂₃. ²⁷ Jme₁ca₂dsi₃lein₃ Antioquía, ca₂ñí'₂ ca₂le₃jín₃ riin'₅₄. Jaun₂ ca₂dsia₃ ca₂le₃jé₃ 'e₂ ca₂jmo₃ Diú₄ quiong'₅₄, 'a₂ lia'₂ ca₂niá₃ Diú₄ jui₅ quió'₅ dsi₂nau₂, ia₁jaun₂ le₃'én₂ 'éi₂ ján₃. ²⁸ Jaun₂ ué₂ bá₄ ca₂'í₃ Pa₄ ja₁jaun₂, Bernabé né₃ quian'₅₄ dsa₂ i₂'én₂.

Ca₂ñi'₂ riin'₅₄ Jerusalén

15 ¹ Jmig₄ jaun₂ i₂lin₅₄ dsa₂ chan₂ Judea ca₂dsi₃lén₂ juig₂ Antioquía, ca₂jme₃lióg₃ ca₂jme₃tiin₂₃ riin'₅₄ ja₁jaun₂, në₁jua'₂ tsá₃ ti₅ dsa₂ ni₁lo₁ dsa₂ ñe'₂ lia'₂ con'₂ lé₅ Si₂ 'Éi'₃ quió'₅ Moisés, tsá₃ lé₂ tén'₄. ² Pablo quian'₅₄ Bernabé ca₂tsín₂ 'ñio₅ lín₃ quian'₅₄ dsa₂ 'éi₂. Jaun₂ ca₂'ín₃ dsa₂ Pa₄ quian'₅₄ Bernabé, quian'₅₄ i₂lin₅₄ gué₄ dsa₂ sián'₂ né₃, a₂dsi₃lén₂ Jerusalén a₂jme₃rë₃ jág₁ jaun₂ quian'₅₄ dsa₂ riin'₅₄ i₂chen₄ⁿ quián₅ Jesús quian'₅₄ dsa₂ can'₅₄^o quián₅ dsa₂ 'én₂.

³ Co₂nió'₃ dsa₂ i₂'én₂ juig₂ Antioquía ca₂'ág'₃ jág₁ riin'₅₄ i₂ca₂'iin₃ 'éi₂, jaun₂ 'éi₂ né₃ ca₂i₁nioi₁₂ 'uë₃ Fenicia quian'₅₄ 'uë₃ Samaria. Ja₁jaun₂ ca₂dsia₃ 'a₂ lia'₂ ca₂rë₃'én₂ dsi₂nau₂. Jaun₂ lë₃, 'ñio₅ lín₃ 'io'₂ ca₂jmo₃ dsa₂ riin'₅₄ jme₁ca₂rë₃ñi₅.

^m23 griego: presbíteros.

ⁿ2 griego: apóstolos.

^o2 griego: presbíteros.

⁴ Jme₁ca₂dsi₃óg₃ Pa₄ quiaín'₅₄ Bernabé juig₂ Jerusalén, ca₂guei₃ ca₂le₃jín₃ dsa₂ 'én₂ ja₁jaun₂, dsa₂ riín'₅₄ i₂chen₄ quián₅ Jesús, dsa₂ can'₅₄ quián₅ dsa₂ 'én₂ né₃. Jaun₂ ca₂dsia₃ Pa₄ quian'₅₄ Bernabé ca₂tsí'₃ riín'₅₄ 'a₂ lia'₂ ma₂jmo₃ Diú₄ quiong'₅₄.

⁵ La₁ qui₂ca₂nau₂ i₂lin₅₄ dsa₂ fariseos i₂ma₂'én₂, jaun₂ ca₂juá'₂:

—Ca₂tín₂ dsi₂nau₂ ti₃ dsa₂ ni₁lo₁₂, jaun₂ 'nió'₅ nag₃ a₂jme₃ti₃ Si₂ 'Éi'₃ quió'₅ Moisés.

⁶ Jaun₂ ca₂ñi'₂ dsa₂ i₂chen₄ quián₅ Jesús, quian'₅₄ dsa₂ can'₅₄ né₃, ia₁jaun₂ 'no'₂ dsí₅ 'a₂ lia'₂ jmo₃ jui₁lia'₂ jág₁ jaun₂. ⁷ Jme₁ma₂nē₂dsia₃ jág₁ 'ñio₅ lin₃, ca₂nau₂ Pedro jaun₂ ca₂juá'₂:

—Rin'₅₄ jniog₄, ñi'₅₄ bá₄ 'nia'₂ jaun₂, jniá₂ dsa₂ i₂ca₂quión'₂ Diú₄ jin'₄ 'nia'₂ ma₂i₁jaun₃, ia₁jaun₂ cué₄ jniá₂ jág₁ dse₃ dsi₂nau₂, ia₁jaun₂ le₃'éin₂.

⁸ Jaun₂ Diú₄ né₃, i₂cuí'₅ dsí₅ dsa₂, ca₂jmo₃ léi₄ a₂guei₃ bá₄, ca₂cuiin₃ Jme₂dsí₂ Jñio₅ quiaín₅, ca₂cuiin₃ dsa₂ 'éi₂ jui₁lia'₂ ma₂cuag₃ jniog₄. ⁹ Tsá₃ jma₃quén₅ 'nio₃ Diú₄ jniog₄ quian'₅₄ dsa₂ 'éi₂, ia₁ ján₃ bá₄ ca₂rang₃ jme₂dsí₂ quió'₅ dsa₂ 'éi₂ ia₁ ca₂rē₃'éin₂. ¹⁰ Jaun₂ né₃, ¿'e₂ lē₃ dsi₂jniog₅ 'au'₂ 'nia'₂ a₂tsá₃ dsau₅ a₂ma₂jmo₃ Diú₄? ¿'E₂ lē₃ lín'₂ 'nia'₂ a₂tion₅₄ 'nió'₅ jme₃ti₃ dsa₂ i₂'én₂ 'éi₂ Si₂ 'Éi'₃, ton'₂ ca₂lia'₂ jñia'₅₄ dsa₂ can'₅₄ quián₂ jniog₄ tsá₃ ca₂tió'₃ jme₃ti₃, on₃ gué'₂ jniog₄ tián₂ jme₁ti₁? ¹¹ La₁ ne₄ jniog₄, a₂dse₃ dsí₅ Te₁gui'₅₄ Jesús bá₄ a₂tág'₄, co₂rē₂ quian'₅₄ dsa₂ 'éi₂.

¹² Jaun₂ ca₂jmo₃ dsa₂ tei₄, jaun₂ ca₂nág₂ tē₁lia'₂ ca₂juá'₂ Bernabé quian'₅₄ Pablo ca₂le₃jé₃ léi₄ jué'₂ a₂ma₂jmo₃ Diú₄ tē₂le₃ quiong'₅₄, jin₄ dsi₂nau₂. ¹³ Jme₁ca₂dsan₃ juá'₂ 'éi₂, jaun₂ ca₂juá'₂ táng₃ Jacobo:

—Rin'₅₄ jniog₄, nei₂ 'nia'₂ a₂juá'₄ jniá₂: ¹⁴ Ma₂nē₂dsia₃ Si₂mu₅₄ Pe₄ 'a₂ lia'₂ ca₂jmo₃ Diú₄ dse₃ dsí₅ jē₁le₂'uig₅₄ tē₂le₃ quió'₅ dsi₂nau₂, 'a₂ lia'₂ ca₂quíoín'₂ ján₃ jin₄ dsa₂ 'éi₂, co₂nió'₃ dsa₂ i₂lén₂ dsa₂ quiaín₅ 'ñiog₅.

¹⁵ Le₂nē₅ bá₄ lē₅ jág₁ quió'₅ dsa₂ i₂jme₁ 'é₂ jág₁ quián₅ Diú₄, jui₁lia'₂ ca₂tión₃ ne₄ Si₂:

¹⁶ Guio₅₄ táng₃ cang₂, jaun₂ jmóg'₄ táng₃ ne₄ta₁ quió'₅ Rag₅₄ David a₂ma₂qui'₃;

tsi'₅₄ táng₃ ni₁cang₁ a₂ma₂gon₃ quió'₅,

¹⁷ ia₁jaun₂ ca₂le₃jín₃ dsi₂nau₂ 'nai'₂ Te₁gui'₅₄,

ca₂le₃jé₃ juig₂ né₃,

dsa₂ i₂chen₂ dsa₂ quián₅ Diú₄.

¹⁸ Le₂nē₅ bá₄ juá'₂ Te₁gui'₅₄

i₂jmo₅ ca₂le₃jé₃ a₂nē₅,

a₂ma₂cuí'₅ dsa₂ ca₃ma₂líg'₂.^p

¹⁹ 'Jaun₂ né₃ lín₂ jniá₂ —juá'₂ Jacobo—, tsá₃ dse₃ cue₅₄ jniog₄ o₂me'₅₄ dsi₅ dsi₂nau₂ i₂ma₂jén'₂ tē₂le₃ quió'₅ Diú₄. ²⁰ Tió'₅ me'₂ a₂jñia'₅₄ jmó₁ jniog₄ caun₂ si₂ a₂chei₅₄ jniog₄ a₂tsá₃ ma₃gué'₃ má₃ a₂tsá₃ dsi₂ten₅₄ gué'₃ jui₁lia'₂ a₂dsia₅ dsa₂ ne₄ ne₄chei₂ quió'₅ diú₄ lag₄. Dse₃ chei₅₄ jniog₄

^p18 Amós 9:11-12.

a₂tsá₃ nió'₃ jág₁ quian'₅₄ dsa₂ i₂tsá₃ lín₅ dsi₂i₂gu₂, on₃ gué'₂ gué'₃ má₃
a₂tsá₃ dsi₃ten₅₄ gué'₃ dsa₂ judíos, jui₁lia'₂ jág₁ i₂güí'₅ dsa₂ dsi₂lag₄, on₃
gué'₂ jmi₄ jág₁ né₃.²¹ Ia₁ ma₂líg'₂ bá₄ ma₂tu₁ja₂lén₂ dsa₂ qui₂'é₂ 'Éi'₃ Juá'₅
quíó'₅ Moisés le₂caun₂ le₂caun₂ juig₂, qui₂'i₂₃ dsi₂néi₂ guá'₅ sinagogas
ca₂le₃jé₃ jmig₄ sa₅₄.

²² Jaun₂ në₃, ca₂të₁gua₁ jág₁ quió'₅ dsa₂ i₂chen₄ quián₅ Jesús, quian'₅₄
dsa₂ can'₅₄, ca₂le₃jín₃ gué'₄ dsa₂ i₂lín₅ guá'₅ a₂'iin₃ i₂lín₅₄ jë₄ quió'₅ riin'₅₄,
i₂chein₃ quian'₅₄ Pablo, Bernabé né₃, jui₅ Antioquía. Jaun₂ ca₂'in₃ dsa₂
Judas i₂chen₂ Barsabás ján₃, quian'₅₄ i₂chen₂ Silas i₂lín₅ dsa₂ i₂quian₅ ne₄
jui₅ jë₄ quió'₅ dsa₂ i₂'én₂.²³ Jaun₂ quian'₅₄ 'éi₂ ca₂chein₃ si₂ carta a₂juá'₂
le₂la₂:

Jnia'₅₄ con'₂ lág₅ dsa₂ chen₄ quián₅ Jesús, quian'₅₄ dsa₂ can'₅₄ quián₂
jnia'₅₄, ca₂le₃jín₃ gué'₄ rin'₅₄ jnia'₅₄ i₂'én₂, chen₄ jnia'₅₄ si₂ la₂ ne'₅₄ 'nia'₂
dsi₂nau₂ rin'₅₄ jniog₄ i₂tián'₅ juig₂ Antioquía, quian'₅₄ i₂tián'₅ 'uë₃ Siria,
quian'₅₄ i₂tián'₅ 'uë₃ Cilicia né₃. Cuín₅ jnia'₅₄ Diú₄ 'nia'₂.

²⁴ Ma₂ca₂rë₃ne₄ jnia'₅₄ jág₁ a₂i₁len₅₄ i₂lín₅₄ dsa₂ chan₂ ja₁lá₃, on₃jua'₅₄
i₂chen₄ quián₂ jnia'₅₄. Ma₂dsi₃lén₂ cué'₅ o₂me'₅₄ dsi₅ 'nia'₂ quian'₅₄ jág₁
quíó'₅ a₂tsí'₅ 'nia'₂ a₂tion₅₄ 'nió'₅ ti₃ dsa₂ ni₁lo₁ dsa₂ ñe'₂, a₂jme₁ti'₄ 'nia'₂
'Éi'₃ quió'₅ Moisés né₃.²⁵ 'Uig₅₄ jaun₂, ca₂jmo₁ jnia'₅₄ caun₂ jág₁, ca₂'ín₄
jnia'₅₄ rin'₅₄ jë₄ quián₂ jnia'₅₄ a₂dsi₃lén₂ co₂lë₅ quiain'₅₄ Bernabé quian'₅₄
Pa₄ i₂'nio₄ lín₃ quián₂ jnia'₅₄, a₂dsi₃iin₅₄ 'nia'₂. Ia₁ le₂jaun₂ bá₄ dse₃, lág₂
jnia'₅₄.²⁶ Ma₂le₁'ág₄ caun₂ dsí₅ gue₃ 'mú₃ o₁quíó'₄ Te₁gui'₅₄ Jesucristo
quián₂ jniog₄.²⁷ Jaun₂ chen₄ jnia'₅₄ Judas quian'₅₄ Silas né₃, jaun₂ i₂në₅
bá₄ juá'₂ quian'₅₄ jág₁ tio'₅₄ 'o₅₄ ca₂le₃jé₃ a₂jua'₂ jnia'₅₄ la₂.²⁸ Jaun₂ né₃,
Jme₂dsí₂ Jñio₅ bá₄ ca₂jme₃'o₅₄ a₂'niog₅₄ jnia'₅₄ dsi₅, jaun₂ dse₃ bá₄ lág₂
jnia'₅₄ a₂tsá₃ cuë₅₄ jnia'₅₄ 'nia'₂ 'éi'₃ guei₂, jñia'₅₄ lia'₂ jmá'₃ lia'₂ a₂léi₄
'nió'₅ quián₂ 'nia'₂ la₂:²⁹ A₂tsá₃ quë'₅₄ 'nia'₂ ni₁ñí₅ a₂ma₂dsia₃ dsa₂ ne₄
ne₄chei₂ quió'₅ diú₄ lag₄; ján₃ bá₄ tsá₃ quë'₅₄ 'nia'₂ jmi₄ jág₁, on₃ gué'₂
ni₁ñí₁ jág₁ i₂dsan₂ i₂güí'₅ dsa₂ dsi₂lag₄. Tsá₃ nió'₄ 'nia'₂ jág₁ quian'₅₄ dsa₂
i₂tsá₃ lín₅ dsi₂i₂gog'₂. Në₁jua'₂ ca₂jme₁ti'₄ 'nia'₂ jág₁ la₂, dse₃ bá₄
le₃chan'₂ 'nia'₂.

Co₂në₅ bá₄ jág₁.

³⁰ Jaun₂ në₃, le₂në₅ bá₄ ca₂tón'₂ 'éi₂ jui₅, ca₂i₃lén₂ jui₅ Antioquía.
Jaun₂ ca₂ñí'₂ dsa₂ i₂'én₂ ja₁jaun₂. Jaun₂ ca₂jín₃ dsa₂ si₂ carta
a₂jme₁quian₅.³¹ Jme₁ca₂'í₂ riin'₅₄ si₂, qui₂ca₂jmo₃ 'io'₂ o₁quíó'₄ jág₁
a₂cuë₅ lián'₂ dsí₅ jaun₂.³² Ia₁ Judas quian'₅₄ Silas, i₂jme₁'é₂ jág₁ a₂cuë₅
Diú₄ ján₃, ca₂cuë₃ 'lióng₂ jág₁ dse₃ a₂ca₂jmo₃ ca₂'ág₂ dse₃ dsí₅ riin'₅₄,
'ñio₅ lín₃ ca₂cuë₃ bí₂ né₃, quian'₅₄ jág₁ quió'₅.³³ Jme₁ma₂të₂ 'lióng₂ jmig₄
tioin'₅₄ ja₁jaun₂, ca₂dsióg'₂ táng₃ dsa₂ caun₂ tei₄ ja₁con₂ riin'₅₄
i₂ca₂chei₃.^q ³⁵ La₁ ca₂jñia₃ Pa₄ quian'₅₄ Bernabé juig₂ Antioquía,

^q33 A₂lin₅₄ chog₅₄ si₂ chi₁ton₅ versículo 34: “La₁ Silas né₃, ca₂dsia₃ dsí₅ jñia₃.”

qui₂jme₂tiin₂₃ dsa₂, quia₂in₅₄ ju₂n₅ gué₄ i₂sián₂, qui₂'é₅ dsa₂ jág₁ dse₃
quió₅ Te₁gui₅₄.

Ca₂ñó₃ Pa₄ ca₂i₁'é₄ jág₁ jē₁ca₂té₂ tin₃ ráun₂

³⁶ Cang₂ jaun₂, ca₂juá₂ Pa₄ ca₂tsí₃ Bernabé:

—Dsau₅₄ táng₃ dsi₁jin₁ rin₅₄ ca₂le₃jé₃ juig₂ ja₁ma₂ca₂i₁'é₅₄ dsa₂ jág₁
dse₃ quió₅ Te₁gui₅₄, dsi₁jag₅₄ nē₁jua₂ 'a₂ lia₂ chain₂.

³⁷ Bernabé nē₃ jme₁'nio₃ jñiai₃ Juan₅₄, i₂chen₂ Marcos ján₃. ³⁸ La₁ Pa₄
gué₂ nē₃ tsá₃ ca₂gue₃ jiog₃, ia₁ ca₂téi₂ bá₄ 'éi₂ lia₂ con₂ jme₁i₁nioi₁₂ 'uē₃
Panfilia, ^r tsá₃ ma₃ca₂jme₃quiong₅₄ jua₅₄ a₂jme₃'o₅₄. ³⁹ Jaun₂ ca₂tsín₂
'ñio₅ lín₃, ca₂lia₂ ca₂i₃lén₂ jma₃quén₅. Jaun₂ Bernabé bá₄ ca₂jñia₃
Marcos, ca₂tóin₂ ni₁barco, ca₂i₃lén₂ jui₅ Chipre. ⁴⁰ Pa₄ gué₂ ca₂quióin₂
Silas. Jme₁ma₂nē₂jáng₂ riin₅₄ o₄gú₃ Te₁gui₅₄ i₂'nio₃, jaun₂ qui₂ca₂'ág₃
jág₁ riin₅₄, ca₂i₃lén₂. ⁴¹ Jaun₂ ca₂i₁ñii₁₂ le₂tan₅₄ 'uē₃ Siria quian₅₄
Cilicia, qui₂i₁cuē₂ bí₂ riin₅₄ i₂tián₅ ja₁jaun₂.

Ca₂jme₃quiong₅₄ Timoteo ca₂jme₃quia₂in₅₄ Pa₄ quian₅₄ Silas

16 ¹ Ca₂dsióg₃ Pa₄ quian₅₄ Silas juig₂ Derbe, juig₂ Listra nē₃.
Ja₁jaun₂ ca₂jein₂ jan₂ dsa₂ 'én₂ i₂chen₂ Timoteo. Chog₅₄

Timoteo 'éi₂ jme₁lín₄ 'io₅₄ judía i₂ma₂'én₂ jág₁ dse₃. Jmei₂ gué₂ jme₁lín₄
jan₂ griego. ² Jaun₂ dsa₂ i₂'én₂ i₂jme₁tián₄ Listra quian₅₄ Iconio, dse₃ bá₄
jme₁'ag₂₃. ³ Jaun₂ 'nio₃ Pa₄ jiog₃ quiong₅₄, jaun₂ ca₂ti₃ ni₁lo₁ 'éi₂,^s
ia₁jaun₂ tsá₃ jén₄ 'lig₅₄ dsa₂ judíos i₂tián₅ ja₁jaun₂. Ia₁ ma₂ñi₅ bá₄
ca₂le₃jín₃ dsa₂, a₂lín₅ griego jmei₂ 'éi₂. ⁴ Ca₂le₃jé₃ juig₂ ja₁ca₂ñí₃,
qui₂ca₂jme₃jein₂ riin₅₄ ca₂cuē₃ 'éi₃ con₂ lé₅ jág₁ quió₅ dsa₂ i₂chen₄
quián₅ Jesús, jág₁ quió₅ dsa₂ can₅₄ i₂tián₅ Jerusalén nē₃. ⁵ Jaun₂ nē₃,
ca₂le₃jín₃ dsa₂ i₂lín₅ guá₅, ca₂jña₃ tiá₂ jág₁ dse₃ a₂'éin₂, jaun₂ le₂o₃ jmig₄
bá₄ ca₂i₃juín₂.

Ca₂qui₃ Pablo a₂ca₂jín₂ jan₂ dsa₂ chan₂ Macedonia

⁶ Tsá₃ ca₂cuē₃ Jme₂dsí₂ Jñi₅ jmig₄ a₂'é₂ dsa₂ jág₁ dse₃ 'uē₃ Asia. Jaun₂
lē₃ ca₂i₁lein₅₄ ca₂i₁ñii₁₂ le₂tan₅₄ 'uē₃ Frigia quian₅₄ 'uē₃ Galacia. ⁷ Jaun₂
ca₂dsi₃lén₂ ja₁jén₂ 'uē₃ Misia. Ja₁jaun₂ jme₁'nio₃ jme₁dsi₃lén₂ 'uē₃
Bitinia. La₁ tsá₃ ca₂cuē₃ jmig₄ Jme₂dsí₂ quián₅ Jesús dsi₃lén₂ ja₁jaun₂.
⁸ Jaun₂ con₂ ca₂ñí₃ bá₄ 'uē₃ Misia, ca₂dsi₃lén₂ 'o₄ jmi₁ñí₄ ja₁chei₂
Troas. ⁹ Ja₁jaun₂ ca₂qui₃ Pa₄ a₂'uē₂ jaun₂ a₂ca₂jín₂ jan₂ dsa₂ chan₂ 'uē₃
Macedonia, a₂chéin₅ mi₂₃, a₂juá₂: “Ñi₅₄ jui₅ 'uē₃ Macedonia i₂jme₁'o₁
jnia₅₄.” ¹⁰ Dsi₂jui₅ jme₁ca₂qui₃ Pa₄ le₂nē₅, jaun₂ ca₂jmó₁ jnia₅₄ co₂jñia₅₄

^r38 'Nio₂ ja₁ton₅ Hechos 13:15.

^s3 o₃, “ca₂jmo₃ a₂ca₂ti₃ dsa₂ ni₁lo₁ 'éi₂.”

a₂dsi₁náu₄ jui₅ Macedonia. Ia₁ dsón'₂ lág₂ jnia'₅₄ a₂tě₂ Diú₄ ja₁jaun₂
a₂dsi₁'ě₄ jnia'₅₄ jág₁ dse₃.^t

Pa₄ quian'₅₄ Silas tioin'₅₄ juig₂ Filipos

¹¹ Ca₂tió'₄ jnia'₅₄ 'ñió'₃ ni₁ barco juig₂ Troas. Ca₂i₃náu₅ jnia'₅₄ co₂dsau₅ jui₅ 'uě₃ Samotracia a₂niog₅ jě₄ jmi₁ñí'₄. Jme₁nia₃ jaun₂, ca₂dsi₃náu₅ jnia'₅₄ Neápolis. ¹² Tio'₅₄ jnia'₅₄ ja₁jaun₂, i₂náu₅ táng₃ ja₁chei₂ Filipos. Ja₁jaun₂ lě₅ caun₂ colonia romana ja₁lě₄ juig₂ dsen₅₄ guě₄ quió'₅ dsa₂ chan₂ 'uě₃ Macedonia. Ja₁jaun₂ ca₂tió'₄ jnia'₅₄ tin₃-ni₅ jmi₄. ¹³ Caun₂ jmi₄ sa₅₄ ca₂i₁náu₄ jui₅ 'ni'₂ juig₂, cau₅ chei'₅₄ cuá₃, caun₂ ja₁jme₁lě₄ ja₁dsi₂lén₂ dsa₂ a₂chi₂lén'₂ Diú₄. Ja₁jaun₂ ca₂'io₄ jnia'₅₄, ca₂jme₁tin₅ jnia'₅₄ 'io₅₄ i₂ca₂ñi'₂, jág₁ dse₃ quió'₅ Diú₄. ¹⁴ Jan₂ 'io₅₄ i₂jme₁'en₅₄ jě₄ jaun₂ i₂chen₂ Lidia i₂chan₂ juig₂ Tiatira, jme₁lín₄ dsa₂ i₂'nag₅ 'mi'₂ 'ui'₃ jlá'₁. 'Io₅₄ 'éi₂, jme₁jme₂juin'₂ Diú₄. Jaun₂ ca₂jmo₃ Te₁gui'₅₄ ca₂lě₃ dsí₅ 'io₅₄ 'éi₂ a₂nag₃ a₂tón'₂ jui₅ a₂juá'₂ Pa₄. ¹⁵ Jaun₂ ca₂jñói₂ jmi₂ co₂dsia₅ quian'₅₄ ca₂le₃jín₃ dsa₂ dsi₂néi₂ quió'₅. Jme₁co₂lág₂ jaun₂, ca₂mi₃ tság₅ jnia'₅₄:

—Chi₂jua'₂ jmo'₂ 'nia'₂ 'au'₂ a₂lín₅ jniá₂ tē₃dsón'₂ dsa₂ i₂'én₂ jág₁ quió'₅ Te₁gui'₅₄, i₂nó'₅ 'nia'₂ ja₁quió₃ i₁jnia'₄.

Jaun₂ ca₂juá'₂ tion₅₄ a₂ca₂jnia₄ jnia'₅₄.

¹⁶ Co₂ráun₂ ca₂lě₃, lia'₂ con'₂ jme₁i₃náu₅ jnia'₅₄ ja₁chi₂lén'₂ dsa₂ Diú₄, ca₂jen'₂ jnia'₅₄ jan₂ 'io₅₄ chi'₂ i₂jme₁'en₅₄ jme₂dsí₂ 'lín'₅₄ tē₃dsí₅, i₂dsi₂ jág₁.^u 'Io₅₄ 'éi₂ a₂lě₁jmo₂₃ bá₄ ta₁, ia₁ juig₅₄ bá₄ jme₁cán₂ cu₄ a₂jme₁lí'₂ a₂dsi₂ jág₁. ¹⁷ 'Io₅₄ chi'₂ 'éi₂ ca₂'ein₃ Pa₄, ca₂'ein₃ jnia'₅₄ ně₃, ca₂guió'₃ ca₂tsí'₃ dsa₂ i₂jme₁tion'₅₄:

—Dsa₂ ně₅ i₂jme₂ti₃ ta₁ ne₄ Diú₄ juin'₂ guě₄. Jaun₂ 'ě₂ jág₁ tsí'₅ 'nia'₂ 'a₂ lia'₂ lě₂ líón'₂ 'nia'₂.

¹⁸ 'Lióng₂ jmi₄ ca₂jmo₃ le₂jaun₂. Ca₂lě₃ jme₁ca₂lě₃ ca₂i₃mé'₂ dsí₅ Pa₄. Jaun₂ ca₂jí₂, ca₂juá'₂ ca₂tsí'₃ jme₂dsí₂ 'lín'₅₄ i₂jme₁'en₅₄ quió'₅ 'io₅₄ 'éi₂:

—Quian'₅₄ bí₂ 'éi'₃ quió'₅ Jesucristo, jmo₅₄ jniá₂ 'éi'₃, jú₅ quió'₅ 'io₅₄ ně₅.

Jaun₂ co₂tan₅₄ dsi₂jui₅ jaun₂, ca₂o₃'ín₃ jme₂dsí₂ 'lín'₅₄ ca₂téin₂ 'io₅₄.

¹⁹ Jme₁ca₂rě₃lí'₄ dsa₂ juig₅₄ 'io₅₄ 'éi₂, a₂tsá₃ ma₃cuin₅ jmi₄ a₂lí'₂ guě₄ cu₄ quiaín'₅₄ 'éi₂, jaun₂ ca₂jñai'₃ Pa₄ quian'₅₄ Silas, ca₂tág₃ jui₅ 'ma'₅₄ ne₄ dsi₂tan₅₄. ²⁰ Jaun₂ ca₂i₁jo₅₄ ja₁tián'₄ juě₄, jaun₂ ca₂juá'₂:

—Dsa₂ la₂, i₂lín₅ judíos, i₂nioi₅₄ tsi₂jii₂₃ dsa₂ juig₂ go₄ jniog₄.

²¹ Qui₂'éi'₅ jme₂tiin₂₃ dsa₂ tag₄ a₂tsá₃ dsi₂ten₅₄ guéi₁ jniog₄, on₃ guě'₂ dsi₂ten₅₄ jua'₅₄ a₂jmó₁, ia₁ dsa₂ romanos bá₄ lág₅.

^t10 Ja₁lá₃ ca₂jme₃lióg₃ Lucas ca₂jme₃quiaín'₅₄ Pa₄ quian'₅₄ riín'₅₄ ja₁jme₁i₂nioi₅₄. Ja₁lá₃ ca₂jme₃lióg₃ juá'₂ "jnia'₅₄" lia'₂ con'₂ jme₁ca₂jmo₃ Si₂ Hechos la₂.

^u16 lit. "jan₂ 'io₅₄ chi'₂ i₂jme₁jio₅ jme₂dsí₂ quió'₅ dsi₂mi'₂ cua₁ pithón."

²² Jaun₂ ca₂nau₂ dsa₂ juig₂ 'nei₂ ca₂jmái'₂ Pa₄ quian'₅₄ Silas. Jaun₂ ca₂dsi₂ dsi₂tan₅₄ a₂dsi₂uig₅ ni₁tsin'₅₄, jaun₂ ca₂jmo₃ 'éi'₃ a₂bóg₂ né₃ quian'₅₄ ni₁'ma₂. ²³ Jme₁ma₂dsan₃ bóg₂ 'ñio₅ lin₃, jaun₂ gué₄ ca₂to'₂ né₃ 'má₃. Ca₂jmo₃ 'éi'₃ a₂jmo₃ dsa₂ i₂nio₅ gu₂ 'né₅ 'má₃ 'í₁ dse₃ lin₃. ²⁴ Dsa₂ 'éi₂ né₃, jme₁ca₂ñii₂ 'éi'₃ jaun₂, ca₂i₁tio'₂ ca₂të₂ quióng₄ tsi₁'né₅ 'má₃, le₁tia₃ mi₂tag₅₄ 'ñió'₃ tau₂ ni₁'ma₂.

²⁵ La₁ con'₂ dsi₃nei₅ jme₁ca₂'ë₃ Pa₄ alabanzas quian'₅₄ Silas qui₂ca₂tsí'₃ Diú₄, qui₂ca₂nág₂ bá₄ dsa₂ sián'₂ i₂tion'₅₄ 'né₅ 'má₃. ²⁶ Të₃jë₄ jaun₂, con'₂ tsá₃ ján₅ dsa₂, ca₂i₁bi₅₄ 'uë₃ tiá₂ lin₃, ca₂lia'₂ qui₂ca₂jé'₂ 'uig₅₄ ni₁'ia'₂ tsi₁'né₅ 'má₃, qui₂ca₂niá₃ ca₂le₃jé₃ o₄'né₄, qui₂ca₂gag₂ ñí₁ cadenas a₂jme₁le₁'ñe'₅₄ ca₂le₃jín₃ dsa₂ i₂jme₁tion'₅₄ 'ñió'₃. ²⁷ Jme₁ca₂ñé₃ dsa₂ i₂jmo₅ 'í₁, ca₂jág₃ ma₂le₁na₁ jë₂ o₄'né₄ 'né₅ 'má₃, jaun₂ ca₂dsi₂ ñi₁tág₂ quió'₅ a₂jme₁ñii₁'₃ 'ñiog₅. Ia₁ lín₂ ma₂ca₂lón₂ jin₂ bá₄ i₂le₁ñí₅ né₃ 'má₃.

²⁸ La₁ dsi₂juí₅ ca₂guió'₃ Pa₄ ca₂juá'₂:

—Tsá₃ lë₁jmag'₅₄ uig₅ 'ñiag'₂, ia₁ la₂ bá₄ tio'₅₄ jnia'₅₄ ca₂le₃jág₃.

²⁹ Jaun₂ ca₂mi₃ dsa₂ 'éi₂ si₂, jaun₂ ca₂'í₃ co₂chi'₅₄ dsi₂néi₂ të₃ gó'₅ jlein₂₃ ñó₃ ca₂chi₃ñé₃ ne₄ Pa₄ quian'₅₄ Silas. ³⁰ Jaun₂ ca₂'uág'₂ të₂ca₁'né₄, jaun₂ ca₂ñag₃:

—'Nia'₂ dsa₂, ¿'e₂ 'nió'₅ jmo₅₄ jniá₂ ia₁jaun₂ lión₂ jniá₂?

³¹ Jaun₂ ca₂juá'₂ 'éi₂:

—'Én₃ të₂le₃ quió'₅ Te₁gui'₅₄ Jesucristo, jaun₂ bá₄ títng'₄, quiang'₅₄ ca₂le₃jín₃ dsa₂ dsi₂néi₂ quiáng'₂.

³² Jaun₂ ca₂cuë₃ Pa₄ quian'₅₄ Silas jág₁ dse₃ quió'₅ Te₁gui'₅₄ ca₂cuë'₃ dsa₂ 'éi₂ quian'₅₄ ca₂le₃jín₃ dsa₂ i₂tián'₅ dsi₂néi₂ quió'₅. ³³ Hora jaun₂ a₂'uë₂, dsa₂ i₂nio₅ gu₂ 'né₅ 'má₃ 'éi₂ qui₂ca₂rín'₃ ja₁qui₂le₁cuí'₃ quió'₅ Pa₄ quian'₅₄ Silas. Jaun₂ 'éi₂ quian'₅₄ ca₂le₃jín₃ dsa₂ dsi₂néi₂ quió'₅, ca₂ñói₂ jmi₂g₂. ³⁴ Jme₁co₂lág₂ jaun₂, ca₂tág₃ ja₁quió'₄, ca₂i₁cuë₂ a₂gué'₃. Jaun₂ 'io'₂ jmo₂₃ ca₂le₃jín₃, ia₁ ca₂rë₃'éin₂ jág₁ quió'₅ Diú₄.

³⁵ Jme₁nia₃ jaun₂, ca₂chen₃ jué₄ chi'₂ 'i'₅₄ a₂ca₂i₁chi'₄ dsa₂ i₂nio₅ gu₂ 'né₅ 'má₃, a₂lióin₂ dsa₂ 'éi₂. ³⁶ Jaun₂ ca₂juá'₂ dsa₂ i₂nio₅ gu₂ 'né₅ 'má₃ ca₂tsí'₃ Pa₄:

—Ma₂ñig₂ 'éi'₃ quió'₅ jué₄ a₂long₅₄ 'nia'₂. Jaun₂ ma₂lé₂ o₁no'₄ 'nia'₂ tei₄ quiáng'₂.

³⁷ Jaun₂ ca₂juá'₂ Pa₄ ca₂tsí'₃ chi'₂ 'i'₅₄:

—Ca₂chóng'₂ dsa₂ jnia'₅₄, qui₂ca₂bóg₂ të₃jin₄ dsa₂ juin₅ të₃ tsá₃ ca₂cáun₃ de'₂ jág₁ dsau₅ quián₂ jnia'₅₄ i₂lág₅ dsa₂ tén₅ juig₂ Roma. Jaun₂ gué₄ ca₂to'₂ né₃ 'má₃. ¿Në₃ né₃ 'nio₃ lió₂ jnia'₅₄ con'₂ të₃co'₅₄? Tsá₃ le₂jaun₂. Jui₁ja₂léin₂ guioin₅₄ jui₁ja₂'uag'₅₄, jui₁lia'₂ ca₂to'₂.

³⁸ Jaun₂ gué₄ ca₂i₁con₂ chi'₂ 'i'₅₄ jág₁ jaun₂ ne₄ jué₄, jaun₂ ca₂rë₃gó'₅ jme₁ca₂rë₃ñi₅ a₂lín₅ Pa₄ quian'₅₄ Silas dsa₂ tén₅ Roma. ³⁹ Jaun₂ ca₂i₁len₅₄ dsi₂tan₅₄ ca₂i₁mi₂ o₂'én₂ dso₄ ne₄ Pa₄ quian'₅₄ Silas. Ca₂'uág'₂ bá₄ jaun₂ né₃, jaun₂ ca₂juá'₂ a₂'uín₃ 'éi₂ juig₂ jaun₂. ⁴⁰ Jme₁ma₂'uin₂ 'éi₂ 'né₅ 'má₃,

ca₂i₃lein₃ ja₁quió'₄ 'io₅₄ Lidia. Jme₁ca₂ñi'₂ quiaín'₅₄ riín'₅₄, qui₂ca₂cuë₃ bí₂ né₃, jaun₂ gué₄ ca₂'uiín₂ ja₁jaun₂, ca₂i₁lein₅₄ gué₄ juig₂ siá'₂.

Ca₂lë₃ mi'₅₄ juig₂ Tesalónica

17 ¹ Jui₅ ja₁ca₂ñe₄ Pa₄ quiaín'₅₄ Silas jaun₂, ca₂i₁ñi₁₂ juig₂ Anfípolis quiaín'₅₄ juig₂ Apolonia né₃. Jaun₂ ca₂dsi₃lëín₂ juig₂ chei₂ Tesalónica. Ja₁jaun₂ jme₁chí'₄ guá'₅ sinagoga quió'₅ dsa₂ judíos. ² Pa₄ né₃, ia₁ le₂jaun₂ tin₂ quió'₅, ca₂ñei₅₄ guá'₅. Të₁lia'₂ ca₂'í₃ tin₃-ni₅ semana ja₁jaun₂, qui₂ca₂dsia₃ jág₁ quiaín'₅₄ dsa₂ ca₂le₃jé₃ jmig₄ sa₅₄, jui₁lia'₂ jág₁ a₂juá'₂ ne₄ Si₂. ³ Qui₂ca₂cuë₃ jág₁ dsau₅ 'a₂ lia'₂ dsón'₂ 'i₄ 'éi'₃ ne₄ Si₂ quió'₅ Diú₄ a₂juá'₂ a₂tion₅₄ nág₃ uig₅ I₂rë₂'ín₁ quián₅ Diú₄, jaun₂ cang₂ jë₁ma₂join₂₃, a₂tion₅₄ niog₅ jein'₅₄ táng₃. Jaun₂ caun₂ ca₂juá'₂ bá₄:

—Jesús i₂'ín₅ jniá₂, jág₁ a₂'ë₅ juig₂ 'nia'₂, I₂rë₂'ín₁ quián₅ Diú₄ bá₄ 'éi₂.

⁴ Jaun₂ ca₂rë₃'én₂ i₂lin₅₄ dsa₂ judíos, ca₂jme₃quiaín'₅₄ Pa₄ quiaín'₅₄ Silas. Ján₃ bá₄ ca₂rë₃'én₂ juín₅ dsa₂ griegos i₂jme₁jme₂juín'₂ Diú₄, ca₂rë₃'én₂ juín₅ 'io₅₄ dsen₅₄ né₃. ⁵ La₁ dsa₂ judíos i₂tsá₃ 'én₂ né₃, ca₂rë₃'néi₃ a₂dsí'₅. Jaun₂ ca₂jme₃quiaín'₅₄ co₂nió'₃ dsa₂ juí'₅ i₂lë₁jme₁i₂nio₄ tsi₁jín₁ jë₄ calle. Ca₂quín'₃ jág₁ quió'₅, ca₂i₁nioi₁₂ ca₂tó'₂ mi'₅₄, tsi₂jín₂₃ dsa₂ juig₂. Jaun₂ ca₂i₁toin'₁ tion₅₄-jan₃ ja₁quió'₄ Jasón, a₂jme₁'nio₃ dsein₂₃ Pa₄ quiaín'₅₄ Silas, a₂jme₁të₂ 'éi₂ jín₄ dsa₂ juig₂. ⁶ Ia₁ tsá₃ ca₂dsáin'₂ 'éi₂ ja₁jaun₂, Jasón bá₄ qui₂ca₂tsi₃cuíin'₂ quiaín'₅₄ gué₄ riín'₅₄ i₂'én₂, jaun₂ ca₂tág₃ jui₅ ne₄ta₁, ca₂i₁jang'₂ ne₄ dsi₂tan₅₄, jaun₂ ca₂juá'₂ ca₂lia'₂ guió'₅ tioin'₅₄:

—I₂la₂ bá₄ dsa₂ i₂ñí₄ lë₃ ma₂jmo₃ tsá₃ ma₃caun₂ 'ei₅ jág₁, qui₂ma₂jéin'₂ dsa₂ ta₁caun₂ mi₂güí₃. Le₂jaun₂ bá₄ 'nio₃ jmo₃ ja₁lá₃ ján₃, ta₁ jaun₂ bá₄ ja₂lëín₂. ⁷ Jasón la₂ në₂cuë₃ jmig₄ në₂jñia₃ dsa₂ 'éi₂ ja₁quió'₄. Ca₂le₃jín₃ 'éi₂ jmo₂₃ a₂tsá₃ dsi₂ten₅₄ jmo₃ lia'₂ con'₂ lé₅ 'éi'₃ quió'₅ gui'₅₄ emperador. Ia₁ i₂nioi₅₄ tsí'₅ dsa₂ a₂chan₂ gué₄ jan₂ rag₅₄ sián'₂, jan₂ i₂chen₂ Jesús.

⁸ Jme₁ca₂nág₂ dsa₂ le₂në₅, ca₂tóin'₂ go₂'i₃ quiaín'₅₄ dsi₂tan₅₄. ⁹ La₁ Jasón quiaín'₅₄ riín'₅₄ ca₂quí₃ cu₄ ne₄ dsi₂tan₅₄, jaun₂ gué₄ ca₂lió₂ dsa₂.

Pablo quiaín'₅₄ Silas tioin'₅₄ juig₂ Berea

¹⁰ Dsi₂jui₅ le₂jaun₂ ca₂jmo₃ riín'₅₄ a₂ñó₃ Pa₄ quiaín'₅₄ Silas të₃ a₂'uë₂ jui₅ Berea. Jme₁ca₂dsi₃lëín₂ ja₁jaun₂, i₁lein₅₄ dsi₂jui₅ dsi₂néi₂ guá'₅ sinagoga quió'₅ dsa₂ judíos. ¹¹ Dsa₂ judíos i₂jme₁tián'₄ ja₁jaun₂ jme₁dsein₃ con'₂ gué₄ dsa₂ juig₂ Tesalónica. Lia'₂ 'i₄ rë₂ jág₁ bá₄ ca₂gue₃ jág₁ dse₃ quió'₅ Diú₄. Jaun₂ ca₂le₃jé₃ jmig₄ bá₄ jme₁'no'₂ ne₄ Si₂ quió'₅ Diú₄, ia₁ 'nio₃ le₃ñi₅ chi₂jua'₂ dsón'₂ bá₄ le₂jaun₂ lé₅ jág₁ a₂cuë₅ Pa₄ quiaín'₅₄ Silas. ¹² Juín₅ bá₄ dsa₂ judíos 'éi₂ ca₂rë₃'én₂. Ján₃ bá₄ le₂jaun₂ juín₅ dsa₂ griegos, lia'₂ dsa₂ ñe'₂ lia'₂ 'io₅₄ dsen₅₄ né₃. ¹³ La₁ jme₁ca₂rë₃ñi₅ dsa₂ chan₂ Tesalónica a₂'en₅₄ Pa₄ 'é'₅ dsa₂ jág₁ dse₃ quió'₅ Diú₄ juig₂ Berea ján₃, jaun₂ ca₂i₃lëín₂ ja₁jaun₂, ca₂chi₂ca₂jain₃ dsa₂. ¹⁴ La₁ co₂tan₅₄

ca₂chei₃ riin'₅₄ ca₂chein₃ Pa₄ chei'₅₄ jmi₁ñí'₄. Ca₂ñia₃ bá₄ Silas quian'₅₄ Timoteo juig₂ Berea. ¹⁵ Ca₂i₁jio₃ dsa₂ i₂jme₁quian'₅₄ Pa₄ ca₂i₁jñiai₃ 'éi₂ ca₂të₂ juig₂ Atenas. Jaun₂ ca₂i₃lein₃ táng₃ le₁quion₂ jág₁ quió'₅ Pa₄ a₂jiá₃ Silas quian'₅₄ Timoteo a₂dsi₃jme₃quiong'₅₄ dsi₂jui₅.

'En₅₄ Pablo juig₂ Atenas

¹⁶ Të₁lia'₂ 'en₅₄ Pa₄ chi₁jñiai₂₃ Silas quian'₅₄ Timoteo juig₂ Atenas, tsá₃ dse₃ 'ei₅ dsí₅, ia₁ ca₂jín₂ juin₅ lin₃ diú₄ lag₄ tión₂ le₂tan₅₄ jë₄ juig₂.

¹⁷ Jaun₂ ca₂i₁'é₄ jág₁ dse₃ dsi₂néi₂ guá'₅ sinagoga, ca₂tsí'₃ dsa₂ judíos, dsa₂ sián'₂ né₃ i₂jme₂juin'₂ Diú₄ të₃dsón'₂. Ca₂le₃jé₃ jmi₄ né₃, qui₂ca₂'é₂ Pa₄ jág₁ dse₃ jë₄ 'ma'₅₄ ca₂tsí'₃ ca₂le₃jín₃ dsa₂ i₂jme₁jein'₂ ja₁jaun₂.

¹⁸ I₂lin₅₄ dsa₂ i₂jme₁jme₂tag₅ si₂ quió'₅ dsa₂ i₂té'₂ dsa₂ epicúreos, i₂lin₅₄ guë'₂ i₂jme₁jme₂tag₅ si₂ quió'₅ i₂té'₂ dsa₂ estoicos, dsa₂ 'éi₂ ca₂jme₃lióg₃ ca₂dsia₃ jág₁ quian'₅₄ Pa₄. I₂lin₅₄ guë'₂ dsia₅ tsí'₅ riin'₅₄:

—Tsá₃ ne₄ 'e₂ bá₄ jág₁ quian'₅₄ i₁ten'₅₄ në₅ a₂juá'₂ tság₃ jniog₄.

I₂lin₅₄ guë'₂ juá'₂ táng₃:

—Mei'₂ tsá₃ i₂'é₂ jág₁ quió'₅ diú₄ sián'₂ i₂quián₅ dsi₂nau₂ bá₄ në₅.

Jaun₂ bá₄ juá'₂ le₂jaun₂, ia₁ 'en₅₄ Pa₄ 'é₂ jág₁ dse₃ quió'₅ Jesús, 'a₂ lia'₂ ca₂jein'₅₄ táng₃. ¹⁹ Jaun₂ ca₂jñiai₃ Pa₄ caun₂ ja₁chei₂ Areópago.

Jme₁ca₂dsi₃léin₂ ja₁jaun₂, ca₂ñí'₃ Pa₄ ca₂juá'₂:

—¿Lé₂ le₃ne₄ jnia'₅₄ 'e₂ jág₁ 'mí₂ dsia'₂ a₂jme₂tág'₂? ²⁰ 'Niog₂ jnia'₅₄ le₃ne₄ 'e₂ jein₅ jág₁ a₁juá'₂ 'ne₂ në₅. Ja₂lin₃ guë'₄ siá'₂ né'₂.

²¹ Ia₁ ca₂le₃jín₃ bá₄ dsa₂ chan₂ Atenas, quian'₅₄ dsi₂nau₂ i₂jme₁tián'₄ ja₁jaun₂, jmá'₃ a₂jaun₂ bá₄ jme₁tiin₂ qui₂jmo₂₃: qui₂nag₂₃, qui₂dsia₂₃ né₃, jmá'₃ ca₂ne₅₄ jág₁ 'mí₂ a₂cha₂.

²² Jaun₂ ca₂nau₂ Pa₄ dsi₂jo₂ ja₁le₁ñi'₂ dsa₂ jaun₂, jaun₂ ca₂juá'₂:

—'Nia'₂ dsa₂ chan₂ Atenas, jág₅ jniá₂ 'ñio₅ 'én'₂ 'nia'₂ të₂le₃ quió'₅ diú₄ lag₄ quián'₂ 'nia'₂. ²³ Ia₁ lia'₂ con'₂ ca₂ñi₅ jniá₂ ca₂jág₃ ja₁chi₁len'₄ 'nia'₂ diú₄ lag₄ quiáng'₂, ca₂jág₃ caun₂ ja₁lé₄ ne₄chei₂ le₁ton₅ letras la₂, a₂juá'₂: “QUIÓ'₅ DIÚ₄ I₂TSÁ₃ CUIN₅ DSA₂.” Ia₁ dse₃ bá₄ guë'₂ jaun₂. Diú₄ 'éi₂ i₂chi₁len'₄ 'nia'₂, Diú₄ i₂tsá₃ cuin'₂ 'nia'₂, i₂'éi₂ bá₄ 'ín₄ jniá₂, jág₁ quió'₅ 'éi₂ bá₄ 'é₅ jniá₂, juí₂ 'nia'₂.

²⁴ 'Diú₄ 'éi₂ i₂ca₂jmo₃ mi₂güí₃, ca₂jmo₃ ca₂le₃jé₃ 'e₂ a₂cha₂ ja₁jaun₂, 'éi₂ bá₄ quió'₅ guei'₅₄ mi₂güí₃ quian'₅₄ gua'₅₄ 'uë₃ né₃. La₁ tsá₃ guá₅ dsi₂néi₂ guá'₅ a₂jmo₅ dsa₂ mi₂güí₃, ²⁵ on₃ guë'₂ chi₁quian₁₂ jmi₄ jua'₅₄ a₂'nió'₅ jmo₃ dsa₂ 'e₂ jmo₃ quió'₅. Ia₁ 'ñiog₅ bá₄ Diú₄ jmo₂₃ cuë₂₃ jme₂dsí₂ quián₂ jniog₄, jmo₂₃ dsí₂ a₂quian₂ jniog₄, ca₂jmo₃ ca₂le₃jé₃ guë'₄ 'e₂ a₂cha₂.

²⁶ 'Quian'₅₄ ca₂cho'₅₄ dsa₂ bá₄ ca₂jmo₃ ca₂le₃jé₃ juig₂, ia₁jaun₂ tiain'₃ ta₁caun₂ mi₂güí₃. Jaun₂ ca₂jmo₃ Diú₄ 'éi'₃ ca₂'ë₃ ja₁tian'₃ dsa₂ né₃, 'a₂ con'₂ uë₂ 'io₃ bí₂ le₂caun₂ le₂caun₂ juig₂, ²⁷ ia₁jaun₂ 'nai'₂ Diú₄, a₂jñia'₅₄ chi₂lá'₂ quian'₅₄ gu₂, con'₂ tsá₃ ñó₅ në₁ca₂dsáu'₂, o₁jñia'₅₄ la₂ tsá₃ uíng₂ guá₅ Diú₄ ja₁con₂ jniog₄ le₂jau₂ le₂jau₂. ²⁸ Ia₁ a₂chan₂ Diú₄ bá₄ a₂chong₂

jniog₄ a₂i₂nio₄ jniog₄ né₃.^v Jui₁lia'₂ ma₂ca₂juá'₂ i₂lin₅₄ dsa₂ poetas quián'₂ 'nia'₂ ján₃, jme₁ca₂juá'₂: “Chi'₂-guein₂ quián₅ Diú₄ bá₄ lág₅ jniog₄.”

²⁹ Chi₂jua'₂ lág₅ jniog₄ chi'₂-guein₂ quián₅ Diú₄, jaun₂ tsá₃ dse₃ jua'₅₄ a₂jmo₁ jniog₄ dsi₅ a₂lín₅ Diú₄ jui₁lia'₂ lé₅ caun₂ nió'₄ dsa₂ lag₄ cu₄nióg₄, on₃ guè'₂ cu₄tiog₂, on₃ guè'₂ ni₁cang₁ a₂tin₂ dsa₂ jmo₂₃ con'₂ lé₅ dsi₂jio₅ dsi₅ guioin₅₄. ³⁰ Tsá₃ lín₄ ca₂tón'₃ Diú₄ jui₅ 'a₂ lia'₂ ca₂jmo₃ dsa₂ ma₂líg'₂, ia₁ tsá₃ 'e₂ ŋi₅ dsa₂. La₁ rē₂né₃ né₃, jmo₅ Diú₄ 'éi'₃ quió'₅ dsa₂ chan₂ ta₁caun₂ mi₂güí₃ a₂'nió'₅ dsi₃quén'₅ dsi₅. ³¹ Ia₁ ma₂lé₅ 'éi'₃ quió'₅ Diú₄ a₂já₅ caun₂ jmi₄ jē₁qui₃dsi₂₃ 'éi'₃ rē₂ con'₂ dsi₂ten₅₄ quió'₅ dsa₂ mi₂güí₃, tē₂le₃ quian'₅₄ jan₂ dsa₂ i₂ca₂quióin'₂ quián₅. Jaun₂ ma₂ca₂jmo₃ léi₄ lia'₂ con'₂ jme₁ca₂jme₃jein'₅₄ 'éi'₂ jin₄ 'lag₄.

³² Jme₁ca₂nág₂ dsa₂ ca₂juá'₂ Pa₄ a₂jen'₅₄ 'lag₄, i₂lin₅₄ dsa₂ jñia'₅₄ ca₂ñág₂ bá₄. I₂lin₅₄ guè'₂ ca₂juá'₂:

—Nē₅ néi₁ táng₃ jnia'₅₄ caun₂ jmi₄ siá'₂ quiáng'₂.

³³ Jaun₂ ca₂o₂'ín₃ bá₄ Pa₄ jē₄ jaun₂.

³⁴ La₁ i₂lin₅₄ dsa₂ ca₂rē₃'éin₂ bá₄, jaun₂ ca₂'ein₃ 'éi₂. Jē₄ jaun₂ jme₁'en₅₄ i₂chen₂ Dionisio i₂lín₅ rin'₅₄ dsi₂tan₅₄ quián₅ Areópago; jan₂ guè'₂ 'io₅₄ né₃ i₂chen₂ Dámaris; lé₂ bá₄ gué₄ dsa₂ i₂quiong'₅₄.

'En₅₄ Pablo juig₂ Corinto

18 ¹ Cang₂ jaun₂ ca₂o₃'ín₃ Pa₄ juig₂ Atenas, ca₂ñó₃ jui₅ Corinto. ² Ja₁jaun₂ ca₂jein'₂ jan₂ dsa₂ judío i₂chen₂ Aquila i₂chan₂ 'uē₃ Ponto. Jme₁guá₄ 'uē₃ Italia le₃jñiá₅, la₁ ca₂jmo₃ 'éi'₃ gui'₅₄ emperador Claudio a₂ca₂'uín'₂ ca₂le₃jín₃ dsa₂ judíos i₂jme₁tián'₄ juig₂ Roma. 'Uig₅₄ jaun₂ ca₂o₃'ín₃ quiaín'₅₄ Priscila 'io₅₄ quián₅, a₂ma₂tián'₅ juig₂ Corinto. Jme₁ca₂dsióg₃ Pa₄ ca₂i₁jñin₁₂ dsa₂ 'éi₂, ³ jaun₂ ca₂'í₃ ja₁quió'₄, ca₂jmo₃ ta₁ co₂lě₅ quiong'₅₄, ia₁ ján₃ bá₄ tiin₂ 'me₃ tsi₁'mi'₂ a₂jmo₅ dsa₂ tsi₁'né₅. ⁴ Jaun₂ ca₂le₃jē₃ jmi₄ sa₅₄, jme₁dsó₅ Pa₄ guá'₅ sinagoga a₂jme₂tiin₂₃ dsa₂ jág₁ dse₃, a₂jme₁jme₂'uáin₂ dsi₅ dsa₂, lia'₂ dsa₂ judíos lia'₂ dsi₂nau₂ né₃. ⁵ Jme₁dsióg₃ Timoteo quiaín'₅₄ Silas a₂ca₂'uiin₂ Macedonia, a₂dsi₃lén₂ tē₂ja₁'en₅₄ Pa₄, jaun₂ gué₄ ca₂'ē₂ Pa₄ dsen₅₄ dsi₅ jág₁ quió'₅ Diú₄. Jaun₂ gué₄ ca₂tsí'₃ dsa₂ judíos a₂lín₅ Jesús dsa₂ I₂rē₂'ín₁ quián₅ Diú₄. ⁶ La₁ dsa₂ né₃, 'io₅₄ ca₂tiin₂ jág₁ jaun₂, jaun₂ ca₂jme₃lióg₃ qui₂ca₂jñái'₂ jág₁ uig₅ Pa₄. 'Éi₂ né₃ qui₂ca₂séi'₂ 'liog₂ ni₁tsin'₅₄, jaun₂ ca₂tsí'₃ dsa₂:

—Guion'₅₄ bá₄ 'nia'₂ le₁cáng'₄ a₂dsián'₃ 'nia'₂ lia'₂ jma₃quian'₅₄ dsáu'₂. Tsá₃ ma₃'e₂ le₁cán'₄ jniá₂. Le₃ne₄ jui₅ né₃ nei₅₄ ja₁con₂ dsi₂nau₂.

⁷ Ca₂o₃'ín₃ bá₄ Pa₄ dsi₂néi₂ guá'₅ sinagoga jaun₂ né₃. Ca₂ñó₃ ja₁quió'₄ jan₂ dsa₂ i₂chen₂ Justo i₂jme₁jme₂juin'₂ Diú₄. Justo 'éi₂ né₃, jme₁guá₄ cau₅ guá'₅. ⁸ Dsa₂ i₂jme₁lín₄ dsa₂ dsen₅₄ quián₅ guá'₅, dsa₂ i₂chen₂ Crispo, ca₂rē₃'éin₂ tē₂le₃ quió'₅ Te₁gui'₅₄, co₂dsia₅ quian'₅₄ dsa₂ dsi₂néi₂ quió'₅. Juin₅ bá₄ dsa₂ chan₂ Corinto ca₂rē₃'én₂ jág₁ dse₃ jme₁ca₂nág₂, jaun₂

^v28 lit. “a₂chong₂, a₂i₂nio₄ jniog₄, a₂'i₄ jme₂dsi₂ jniog₄.”

qui₂ca₂choin₃ jmi₂.⁹ Caun₂ a₂'uë₂, a₂lë₁ca₂jén'₃ Pa₄ ca₂jín₂ Te₁gui'₅₄, a₂juá'₂:

—Tsá₃ lë₁jmo₂ gang'₃ a₂'é'₄ jág₁. Caun₂ dsia₄ bá₄, tsá₃ lë₁jmo₂ tei₄.

¹⁰ Ia₁ quian'₅₄ bá₄ jniá₂ 'ne₂; 'i₁jan₂ tsá₃ téi₂ gu₂ jua'₅₄ a₂jmo₂g'₂ uig₅. Ia₁ juin₅ dsa₂ chan₂ juig₂ la₂ i₂le₃'én₂ quiáng₃.

¹¹ Caun₂ nj₂ të₂ ca₂'nau₅₄ ca₂'í₃ Pa₄ juig₂ Corinto, qui₂ca₂jme₃tiin₂₃ dsa₂ jág₁ quió'₅ Diú₄.

¹² La₁ jmi₂g₄ jaun₂ ca₂lin₃ dsi₄má'₂ 'uë₃ Acaya jan₂ dsa₂ i₂chen₂ Galión. Jaun₂ ca₂nj'₂ dsa₂ judíos i₂'nja₅₄ Pa₄, ca₂tág₃ jui₅ ne₄ta₁. ¹³ Jaun₂ ca₂juá'₂ ca₂tsí'₃ dsi₄má'₂ 'éi₂:

—Le₂siá'₂ bá₄ jme₂tag₅ i₂në₅, toin'₂ jág₁ dsa₂, a₂jme₃juin'₂ Diú₄ on₃jua'₅₄ lia'₂ con'₂ lë₅ 'Éi'₃.

¹⁴ Jë₁jme₁ma₂nag₃ Pa₄, jme₁ca₂juá'₂ Dsi₄má'₂ Galión ca₂tsí'₃ dsa₂ judíos:

—Jua'₅₄ mei'₂ guë₃ dso₄ juë'₂ ca₂rë₃cán'₂ dsa₂ në₅, jme₁jmo₅₄ bá₄ jniá₂ juin'₂ dsi₃ a₂jme₁nag₅₄ jág₁ quián'₂ 'nia'₂. ¹⁵ La₁ tsá₃ le₂jaun₂. Chi₂jua'₂ 'uig₅₄ jág₁ 'éi'₃ juá'₅ siá'₂ quián'₂ 'nia'₂ guiong'₅₄, tsá₃ 'éi'₃ qui₁dsi₅ jniá₂. Jme₁rë₂ bá₄ 'nia'₂ guiong'₅₄ quiáng'₂.

¹⁶ Jaun₂ ca₂'uág'₂ ca₂'uín'₂ 'éi₂ ne₄ta₁ jaun₂. ¹⁷ Jaun₂ ca₂njau'₃ ca₂le₃jín₃ dsa₂ griegos ca₂njai'₃ Sóstenes i₂lín₅ juig₅₄ quián₅ guá'₅ sinagoga, qui₂ca₂bóg₂ të₃ jág₅ dsi₄má'₂. La₁ tsá₃ ma₃a₂jaun₂ dsan₂ dsí₅ gui'₅₄ Galión, 'i₁caun₂.

**Ca₂jón'₃ táng₃ Pablo juig₂ Antioquía, jaun₂ ca₂ñó₃
táng₃ ca₂i₁'é₄ jág₁ dse₃ jë₁ca₂té₂ 'nag'₂ ráun₂**

¹⁸ Uë₂ bá₄ guë₄ ca₂nja₃ Pa₄ jë₄ juig₂ Corinto. Cang₂ guë₄ jaun₂ ca₂'ág'₃ jág₁ riin'₅₄. Jme₁ma₂tioin'₅₄ juig₂ Cencrea në₃, ca₂chéi₃ Pa₄ dsi₅₄ ca₂jmo₃ léi₄ a₂ca₂jme₃ti₃ jág₁ a₂ma₂cuë'₃ Diú₄ le₂nja₅. Jaun₂ ca₂'í₃ ni₁barco ca₂ñó₃ jui₅ ja₁tén₄ Siria quian'₅₄ Priscila, Aquila në₃. ¹⁹ Jme₁ca₂dsi₃lëin₂ juig₂ Efeso, ca₂tén₂ Pa₄ Priscila quian'₅₄ Aquila, ca₂ñó₃ jui₅ guá'₅ sinagoga ca₂i₁dsia₂ jág₁ quian'₅₄ dsa₂ judíos i₂jme₁tion'₅₄ le₁nj'₂.

²⁰ Jme₁ca₂juá'₂ guë₄ dsa₂ ja₁jaun₂ a₂jme₁nja₃ guë₄ uë₂ Pa₄, la₁ tsá₃ ma₃ca₂gue₃ 'éi₂. ²¹ Jaun₂ ca₂'ág'₃ jág₁ jin₄ riin'₅₄, ca₂juá'₂:

—Tion₅₄ niog₅ nég'₄ Jerusalén i₁jmo₃ jmi₂g₄ a₂já₅. La₁ guáng₂ bá₄ táng₃ i₁jing₁₂ 'nia'₂ në₁jua'₂ 'nio₃ Diú₄.

Jaun₂ ca₂'í₃ ni₁barco ca₂o₃'íin₃ juig₂ Efeso. ²² Jme₁ca₂dsi₃óg₃ Cesarea, ca₂ne₄ Pa₄ i₁cuin₃ Diú₄ riin'₅₄ i₂tián₅ Jerusalén. Jaun₂ ca₂nái'₃ táng₃ jui₅ Antioquía. ²³ Jme₁ma₂ne₁ñó₄ jmi₂g₄ 'ein₅₄ ja₁jaun₂, ca₂nei₅₄ táng₃ ca₂i₁nj'₂ le₂caun₂ le₂caun₂ juig₂ ja₁tén₄ 'uë₃ Galacia quian'₅₄ Frigia, qui₂ca₂cuë'₃ bí₂ ca₂le₃jín₃ dsa₂ i₂'én₂ riin'₅₄.

Ca₂'é₂ Apolos jág₁ dse₃ juig₂ Efeso

²⁴ Jmig₄ jaun₂ ca₂dsióg₃ Efeso jan₂ dsa₂ judío i₂chen₂ Apolos, dsa₂ chan₂ juig₂ Alejandría. 'Nio₅ lin₃ jme₁tin₂ dsa₂ 'éi₂ 'é₂ jág₁ quió'₅ Diú₄, dse₃ jme₁cuí'₅ Si₂ quió'₅ Diú₄. ²⁵ Jme₁ma₂ñi₅ Apolos 'éi₂ 'a₂ lia'₂ lé₅ jui₅ quió'₅ Te₁gui'₅₄. Jaun₂ 'ñio₂ dsí₅ qui₂ca₂dsia₃ jág₁ qui₂ca₂jme₂tiin₂₃ dsa₂ co₂rë₂ jág₁ quió'₅ Jesús, ton'₂ jmá'₃ jñia'₅₄ a₂jaun₂ bá₄ jme₁ñi₅ Apolos 'a₂ lia'₂ jme₁jme₂tag₅ Juan₅₄ jui₁lia'₂ a₂choin₂₃ dsa₂ jmig₂. ²⁶ Ca₂jme₃lióg₃ Apolos ca₂juá'₂ dsi₂néi₂ guá'₅ sinagoga ca₂tsí'₃ dsa₂, ca₂dsia₃ tiá₂ dsí₅; la₁ jme₁ca₂nág₂ Priscila quian'₅₄ Aquila, ca₂té'₃ Apolos cau₅, ca₂jme₃tag₂₃ gué₄ rë₂ 'a₂ lia'₂ lé₅ jui₅ quió'₅ Diú₄. ²⁷ Jaun₂ né₃, lia'₂ con'₂ jme₁'nio₃ Apolos jme₁ñi₃ jui₅ Acaya, ca₂cuë₃ riin'₅₄ bí₂, ca₂chein₃ si₂ carta ne₄ dsa₂ 'én₂ i₂tián'₅ ja₁jaun₂, a₂guein₃ 'éi₂. Jme₁ca₂dsióg₃ Apolos 'uë₃ Acaya, ca₂jme₃'oin₅₄ 'ñio₅ dsa₂ 'én₂ i₂tián'₅ ja₁jaun₂. Ia₁ a₂dse₃ dsí₅ Diú₄ ca₂jmo₃ a₂ca₂rë₃'én₂ dsa₂ 'éi₂. ²⁸ Jaun₂ qui₂ca₂tsín₂ quian'₅₄ dsa₂ judíos, jaun₂ ca₂lí'₃ bá₄ Apolos ne₄ ja₁tsiin₂₃ jaun₂, tē₃ jág₅ ca₂le₃jín₃ dsa₂. Ia₁ lia'₂ con'₂ lé₅ Si₂ quió'₅ Diú₄ bá₄ ca₂'é'₃ dsa₂ 'éi₂, a₂dsón'₂ bá₄ lín₅ Jesús I₂rë₂'ín₁ quián₅ Diú₄.

'En₅₄ Pablo juig₂ Efeso

19 ¹ Tē₁lia'₂ 'en₅₄ Apolos juig₂ Corinto, Pa₄ guë'₂ ca₂ñi₃ le₂tan₅₄ jui₅ má'₂ a₂ca₂dsióg₃ Efeso. Ja₁jaun₂ ca₂jein'₂ i₂lin₅₄ dsa₂ 'én₂. ² Jaun₂ ca₂ñag₃ 'éi₂ ca₂ñi'₃ dsa₂ ca₂juá'₂:
—¿Ca₂guen'₅₄ 'nia'₂ Jme₂dsí₂ Jñiós₅ lia'₂ con'₂ jme₁ca₂rë₃'én'₂ 'nia'₂ jág₁ dse₃?
Jaun₂ ca₂ñag₃ dsa₂:
—Ca₂lia'₂ jñia'₅₄ tsá₃ ma₂ne₄ jnia'₅₄ jua'₅₄ chan₂ jan₂ Jme₂dsí₂ Jñiós₅. ³ Jaun₂ ca₂ñag₃ táng₃ Pa₄:
—¿A₂ guë'₂ lia'₂ ca₂jñó'₂ 'nia'₂ jmig₂?
Ca₂ñag₃ táng₃ dsa₂:
—Jui₁lia'₂ ca₂jme₃tag₅ Juan₅₄ bá₄. ⁴ Ca₂juá'₂ Pa₄:
—Jme₁chon₅ Juan₅₄ jmig₂ dsa₂ co₂'nió'₄ léi₄ a₂jme₃tsín₃ dsa₂ dsí₅. La₁ jme₁juá'₂ ján₃, a₂'nió'₅ le₃'én₂ dsa₂ le₃quió'₅ i₂jiá₃ chi₁quín₃, a₂'iin₂₃ Jesucristo. ⁵ Jme₁ma₂në₂néi₂ dsa₂ le₂në₅, qui₂ca₂choin₃ jmig₂ lia'₂ con'₂ lé₅ 'éi'₃ quió'₅ Te₁gui'₅₄ Jesús. ⁶ Jaun₂ jme₁ca₂quiog₂ Pa₄ gu₂ ne₄ quió'₅ dsa₂ 'éi₂, dsi₂jui₅ le₂jaun₂ ca₂guan₃ Jme₂dsí₂ Jñiós₅ ca₂'í₃ tē₂dsí₅ dsa₂. Jaun₂ qui₂ca₂dsia₃ dsa₂ jág₁ jmei₅ siá'₂, qui₂ca₂juá'₂ jág₁ a₂ca₂cuë₃ Diú₄ né₃. ⁷ Con'₂ guia₃-tín₂ dsa₂ jme₁lé₂ le₃jín₃. ⁸ Con'₂ 'ni₅ tsi'₂ ca₂dsin₃ a₂jme₁dsó₅ Pa₄ guá'₅ sinagoga ca₂dsia₃ tiá₂ dsí₅ ca₂jme₃tiin₂₃ dsa₂ qui₂co₂jéin'₂ dsa₂ tē₂le₃ ja₁gon₂ Diú₄. ⁹ La₁ i₂lin₅₄ dsa₂ ca₂jmo₃ 'ua'₂ dsí₅, tsá₃ ca₂rë₃'én₂. Jñia'₅₄ qui₂ca₂ton₃ 'lig'₅₄ bá₄ Jui₅

quió' ₅ Te₁gui' ₅₄ jin₄ dsa₂. Jaun₂ ca₂té' ₃ Pa₄ co₂nió' ₃ jmá' ₃ dsa₂ i₂'én₂
 ca₂'uín₂ ja₁jaun₂ ca₂i₃léin₂ caun₂ escuela ja₁té' ₂ quió' ₅ Tirano ja₁táun₂
 dsa₂ jág₁. Ja₁jaun₂ ca₂i₁jme₁tiin₂₃ dsa₂ ca₂le₃o₃ jmig₄. ¹⁰ Ca₂dsin₃ tin₃ nj₂
 ca₂'í₃ ja₁jaun₂, jaun₂ le₃jín₃ dsa₂ i₂jme₁tián' ₄ 'lióng₂ juig₂ ja₁tén₄ Asia
 ca₂nág₂ jág₁ quió' ₅ Te₁gui' ₅₄ Jesús lia' ₂ dsa₂ judíos lia' ₂ dsa₂ griegos né₃.
¹¹ Jaun₂ 'lióng₂ léi₄ jué' ₂ ca₂jmo₃ Diú₄ të₂le₃ quian' ₅₄ Pa₄, ¹² le₂jio₅
 ni₁tsin' ₅₄ dsa₂, o₃ pe₁guí₄ 'e₂ a₂qui₂ca₂ní' ₃ quió' ₅, jme₁qui₂dsi₂con₃ dsa₂
 ja₁con₂ dsa₂ dso' ₅₄, qui₂ca₂'lón₂ dsa₂ 'e₂ caun₂ dso₄ niog₅ lín₅,
 qui₂ca₂'uín₂ jme₂dsí₂ 'lín' ₅₄ quió' ₅ dsa₂ né₃.

¹³ La₁ i₂lín₅₄ dsa₂ judíos i₂jme₁i₂nio₄ jmo₂₃ 'uín' ₂ jme₂dsí₂ 'lín' ₅₄ quió' ₅
 dsa₂,^w dsa₂ 'éi₂ jme₁'nio₃ jme₁'iín₃ Te₁gui' ₅₄ Jesús jui₁lia' ₂ jë₁'uín' ₂
 jme₂dsí₂ 'lín' ₅₄, ca₂juá' ₂ tsí' ₅ jme₂dsí₂ 'lín' ₅₄:

—Éi' ₃ jmo₅ jniá₂ quian' ₅₄ bí₂ 'éi' ₃ quió' ₅ Jesús i₂'in₅ Pa₄ në₅, 'uín' ₂
 'nia' ₂.

¹⁴ Le₂jaun₂ jme₁jmo₅ ta₁guion₃ chi' ₂ ja₁ni' ₅₄ jan₂ dsa₂ judío i₂chen₂
 Esceva, i₂jme₁lín₄ jan₂ juig₅₄ jme₂dsa₂. ¹⁵ La₁ jme₁ca₂jmo₃ le₂jaun₂, jaun₂
 ca₂ngag₃ jme₂dsí₂ 'lín' ₅₄:

—Cuín₅ bá₄ jniá₂ Jesús, ján₃ bá₄ guion₄ bá₄ jniá₂ 'ein₂ 'éi₂ Pa₄. La₁
 'nia' ₂ né₃, 'éi₂ bá₄ 'nia' ₂ jmo' ₂ 'éi' ₃ a₂jú₄ jniá₂?

¹⁶ Jaun₂ dsa₂ i₂jme₁'en₅₄ jme₂dsí₂ 'lín' ₅₄ quió' ₅, ca₂cuë₃ 'nio₅ lín₃
 ca₂cué' ₃ ca₂le₃jín₃ dsa₂ 'éi₂, ca₂lia' ₂ ca₂i₃lein₃ cuing₂₃ le₁cuáin' ₃
 qui₂le₁cuín' ₂ né₃. ¹⁷ Jaun₂ ca₂le₃jín₃ dsa₂ judíos, quian' ₅₄ dsa₂ griegos
 né₃, i₂jme₁tián' ₄ juig₂ Efeso, ca₂rë₃gó' ₅ 'nio₅ lín₃ jme₁ca₂rë₃ni₅. Jaun₂
 ca₂rë₃juin' ₂ Te₁gui' ₅₄ Jesús 'nio₅ lín₃.

¹⁸ Jaun₂ juin₅ dsa₂ i₂ca₂rë₃'én₂, ca₂dsi₃léin₂ ca₂jmo₃ qui₂ni₃ quió' ₅
 ca₂le₃jé₃ a₂'lig' ₅₄ a₂qui₂ma₂jmo₃. ¹⁹ Jaun₂ juin₅ dsa₂ i₂jme₁jmo₅ ta₁
 a₂chan₂ dsí₅ né₃, ca₂i₁quian₅₄ si₂ lia' ₂ quió' ₅, jaun₂ ca₂dsí' ₂ të₃ jág₅ dsa₂.
 Jme₁ca₂chen' ₃ dsa₂ cuenta je₂liá' ₂ dsin₅ 'i₄ 'ma' ₅₄ le₃jé₃ si₂ jaun₂,
 ca₂dsióg₃ con' ₂ të₂láu₃-guiá₂ mei₅ 'éi' ₃ cu₄ tiog₂. ²⁰ Jaun₂ né₃, quian' ₅₄ bí₂
 quió' ₅ Te₁gui' ₅₄ caun₂ ca₂i₃'ág₃ jág₁ quió' ₅, caun₂ ca₂lí' ₃ bá₄.

²¹ Cang₂ jaun₂ ca₂'ág₂ Pa₄ caun₂ dsí₅ a₂dsi₃jág₂ le₂tan₅₄ juig₂ ja₁tén₄
 'uë₃ Macedonia quian' ₅₄ Acaya, lia' ₂ ma₂ño₅ jaun₂ të₂ Jerusalén. Ján₃ bá₄
 ca₂juá' ₂ táng₃, jë₁ma₂ca₂dsióg₃ Jerusalén, a₂tion₅₄ dsó₃ ca₂të₂ Roma ján₃.
²² Jaun₂ ca₂chein₃ on₃ dsa₂ i₂jme₂'o₅₄^x quiáin₅: Timoteo, quian' ₅₄ Erasto,
 a₂dsi₃léin₂ jui₅ Macedonia. Ca₂rë₃'iín₅₄ bá₄ gué₄ 'niog₅, 'uë₃ Asia.

Ca₂nio₃ mi' ₅₄ juig₂ Efeso

²³ Jmig₄ jaun₂, 'nio₅ lín₃ ca₂nio₃ mi' ₅₄ o₄quió' ₄ Jui₅ quió' ₅ Te₁gui' ₅₄.
²⁴ Ia₁ jan₂ dsa₂ i₂chen₂ Demetrio i₂jme₁lín₄ të₅ni₁ cu₄tiog₂, jme₁jmo₂₃

^w13 griego: exorkiston (exorcistas).

^x22 griego: diákonous.

chéi₂ a₂rē₂lag₄ lia'₂ lé₅ guá'₅ ja₁chén'₄ 'io₅₄ diú₄ Diana.^y 'Nio₅ jme₁tiin₂₃
cu₄ quian'₅₄ ta₁ jaun₂ quió'₅, quian'₅₄ tē₅ñí₁ riin'₅₄ i₂jmo₅ ta₁ le₂jaun₂.
²⁵ Jaun₂ Demetrio né₃, ca₂ñí'₂ 'éi₂ quian'₅₄ gué₄ dsa₂ sián'₂ i₂jmo₅ ta₁
le₂jaun₂ ján₃. Jaun₂ ca₂juá'₂:

—'Nia'₂ dsa₂ rin'₅₄ jniog₄, ñi'₅₄ bá₄ 'nia'₂ rē₂, a₂chong₂ jniog₄ dse₃
quian'₅₄ ta₁ quián₂.²⁶ Jaun₂ jág'₂ bá₄ 'nia'₂ a₂jmo₅ Pa₄ ñi₂₃ juá'₂ tsí'₅ dsa₂,
a₂tsá₃ 'e₂ quen₅ diú₄ i₂jmó'₂ dsa₂ mi₂güí₃, ia₁ tsá₃ lín₅ diú₄, juá'₂. Jaun₂
juin₅ dsa₂ i₂ma₂ca₂rē₃ 'én₂ né₃, on₃jua'₅₄ jmá'₃ juig₂ Efeso la₂, mei'₂ tsá₃
le₂tan₅₄ 'uē₃ Asia bá₄.²⁷ Jaun₂ go'₂ tē₂le₃ quián₂ jniog₄, ia₁ dsi₃'én₂ ta₁
quián₂ lé₂. Ján₃ gué'₂ le₂jaun₂, tē₂le₃ quió'₅ guá'₅ quió'₅ diú₄ Diana juin'₂,
go'₂ a₂dsi₃'én₂ ján₃. Ia₁ nē₁jua'₂ tsá₃ ma₂'nio₃ dsa₂, jaun₂ dsi₃'én₂ bá₄ bí₂
quió'₅ a₂lín₅ dsa₂ juin'₂. Ia₁ rē₂né₃ ta₁caun₂ 'uē₃ Asia, ta₁caun₂ mi₂güí₃
né₃ jme₂go₃ dsa₂ a₂jme₂juag'₂.

²⁸ Jme₁ca₂dsan₃ nag₅ dsa₂ le₂nē₅, ca₂rē₃'néi₃ 'ñio₅ lín₃, ca₂tóin'₂
ca₂guió'₃ ca₂juá'₂:

—i'Nio₅ juin'₂ diú₄ Diana quián₅ dsa₂ juig₂ Efeso!

²⁹ Jaun₂ ca₂lē₃ mi'₅₄ quió'₅ ca₂le₃jín₃ dsa₂ juig₂ jaun₂. Jaun₂ le₃on₃ dsa₂
chan₂ Macedonia i₂chen₂ Gayo quian'₅₄ Aristarco i₂jme₁quian'₅₄ Pa₄,
ca₂jñau'₃ ca₂i₃toin'₅₄ co₂dsia₅ ca₂tē₂ ja₁ñi'₂^z dsa₂ juig₂.³⁰ Jaun₂ jme₁'nio₃
Pa₄ jme₁dsó₃ jin₄ dsa₂ juig₂ a₂jme₁dsi₃chi'₅₄ dsa₂. La₁ tsá₃ ca₂cuē₃ jmi₃
riin'₅₄ i₂'én₂.³¹ I₂lín₅₄ dsa₂ dsen₅₄ quián₅ 'uē₃ Asia, i₂lín₅ dsa₂ a₂mei₅₄
quián₅ Pa₄, ján₃ bá₄ ca₂chein₃ jág₁ a₂tsá₃ dsi₂ten₅₄ jua'₅₄ a₂dsi₃'í₂ Pa₄
ja₁jaun₂.³² Tē₁lia'₂ jaun₂ né₃ ja₁tion'₅₄ dsa₂ juig₂ le₁ñi'₂ tioin'₅₄ co₂mi'₅₄,
lé₅ bá₄ qui₂juá'₂ jan₂-jan₂, tsá₃ caun₂ jág₁ 'ei₅, lé₅ gué₄ ca₂dsion₄ dsa₂
jñia'₅₄ tsá₃ ñi₅ 'e₂ lē₃ le₁ñi'₂.³³ La₁ jē₄ jaun₂ jme₁tion'₅₄ bá₄ i₂lín₅₄ dsa₂
i₂ñi₅. Jaun₂ ca₂juá'₂ 'a₂ lia'₂ lé₅ ca₂tsí'₃ jan₂ i₂chen₂ Alejandro
i₂jme₁ca₂'lian'₃ dsa₂ judíos a₂ca₂dsió₃ tē₂ne₄ dsa₂ juig₂. Jaun₂ ca₂jmo₃
Alejandro léi₄ quian'₅₄ gu₂ a₂jme₁mi₂₃ a₂jmo₃ dsa₂ tei₄, ia₁ a₂jme₁'nio₃
juá'₂ jág₁ a₂jme₁tsí'₃ dsa₂ a₂jme₁lióin₂ dsa₂ on₃ i₂ca₂jña'₃ dsa₂ 'éi₂.³⁴ La₁
jme₁ca₂rē₃lí₄ dsa₂ a₂lín₅ Alejandro 'éi₂ jan₂ dsa₂ judío, jaun₂ ca₂tóin'₂
co₂mi'₅₄, con'₂ tin₃ hora qui₂guió'₅ ca₂juá'₂:

—i'Nio₅ juin'₂ diú₄ Diana quián₅ dsa₂ juig₂ Efeso!

³⁵ Jaun₂ dsa₂ i₂lín₅ tē₅sí₃ quián₅ dsa₂ juig₂ jaun₂, ca₂tió'₃ jme₁ca₂tió'₃,
ca₂jmo₃ ca₂i₃lén₂ dsa₂ tei₄. Jaun₂ gué₄ ca₂juá'₂:

—'Nia'₂ dsa₂ chan₂ Efeso, ta₁caun₂ mi₂güí₃ bá₄ le₁ñi₅ dsa₂ a₂ca₂tín₂
dsa₂ juig₂ Efeso jmo₃ 'í₁ guá'₅ quió'₅ diú₄ juin'₂ Diana, ton'₂ jmo₃ 'í₁ nió'₄
quió'₅ a₂ca₂sió₃ guei'₅₄ i₂juí₃.^a ³⁶ 'I₁jan₂ jua'₅₄ le₃juá'₂ a₂tsá₃ ñi₅. Jaun₂
tei₄ jmo₄ 'nia'₂, 'nio'₂ 'nia'₂ 'au'₂ dse₃ né₃ gué₄ a₂jmó'₂ 'e₂ jmó'₂.³⁷ Ia₁
dsa₂ i₂nē₂chan'₂ 'nia'₂, tsá₃ 'ang₂₃ a₂ca₂tín₂ guá'₅, on₃ gué₄ 'iin₂₃ 'lig'₅₄

^y24 griego: Artemis; (Diana chein₂ quian'₅₄ latín, jág₁ jmei₅ romano).

^z29 griego: theatron (co₂'nió'₄ caun₂ estadio a₂lē₅ dso'₂ dsi₂con'₂).

^a35 A₂lin₅₄ chog₅₄ si₂: "a₂ca₂sió₃ ja₁con₂ diú₄ Júpiter."

diú₄ quián₂ jniog₄.³⁸ Chi₂jua'₂ 'nio₃ Demetrio mi₃ dso₄, quiaín'₅₄
 ca₂le₃jín₃ i₂jmo₅ ta₁ quiaín'₅₄, jaun₂ guë'₂ chan₂ dsi₂tan₅₄ ne₄ta₁ja₁lé₂
 dsi₃mi₃ dso₄.³⁹ La₁ në₁jua'₂ a₂mi'₂ 'nia'₂ lé₅ caun₂ dso₄ juë'₂ guë'₄ con'₂
 guë'₄ a₂jaun₂, 'nió'₅ le₃rë₂ ne₄ dsi₂tan₅₄ jë₁ma₂le₁ñi'₂ dsa₂ juig₂.⁴⁰ Ia₁ go'₂
 quián₂ jniog₄ a₂jmo'₂ 'nia'₂ le₂në₅, në₁jua'₂ ca₂'nag₃ dsa₂ a₂ñí₄ lë₃ 'niog₂
 mi'₅₄, jui₁lia'₂ mi'₅₄ a₂ca₂lë₃ në₃. Ia₁ në₁jua'₂ ca₂ñag₃ dsa₂ 'e₂ 'uig₅₄ ca₂lë₃
 mi'₅₄ la₂, tsá₃ 'e₂ cha₂ le₃ñag₄.

⁴¹ Jme₁ma₂ca₂dsan₃ juá'₂ le₂në₅, ca₂jme₃dsiain₂₃ bá₄ jág₁ a₂le₁ñi'₂ dsa₂.
 Jaun₂ ca₂dsiáin'₂ bá₄ dsa₂, qui₂ca₂i₃lein₃ quió'₅.

Ca₂ñó₃ Pablo 'uë₃ Macedonia quian'₅₄ Grecia

20 ¹ Jme₁ca₂dsan₃ mi'₅₄ jaun₂, qui₂ca₂té'₃ Pa₄ le₃jín₃ dsa₂ 'én₂,
 qui₂ca₂cué'₃ bí₂. Jme₁ca₂lë₃ jaun₂, qui₂ca₂'ág'₃ jág₁ riin'₅₄.
 Jaun₂ guë'₄ ca₂ñó₃ jui₅ Macedonia. ² Jaun₂ qui₂i₁jag₅₄ le₂tan₅₄ juig₂ te₁'i₁
 ja₁jaun₂. Quian'₅₄ jág₁ quió'₅ qui₂i₁cué'₂ bí₂ riin'₅₄. Cang₂ guë'₄ jaun₂
 ca₂ñó₃ táng₃ jui₅ Grecia. ³ Ja₁jaun₂ ca₂'í₃ 'ni₅ tsi'₂. Jme₁ma₂'ein₅₄ jui₅ 'í₂
 ni₁barco a₂dsó₃ jui₅ Siria, jme₁ca₂rë₃ñi₅ a₂ma₂jmo₅ dsa₂ judíos caun₂ jág₁
 a₂tsáun'₂. Jaun₂ co₂ñei'₅₄ tsá₃ ma₃ca₂ñái'₃ jui₅ jaun₂. Ca₂ñái'₃ bá₄ táng₃
 jui₅ 'uë₃ ca₂ñí₃ Macedonia. ⁴ Jaun₂ ca₂jme₃quiong'₅₄ dsa₂ le₂'i₄ jui₅
 i₂chen₂ Sópater ja₁ñi'₅₄ Pirro,^b i₂chan₂ Berea, Aristarco quian'₅₄ Segundo
 i₂chan₂ Tesalónica, Gayo i₂chan₂ Derbe; Timoteo, Tíquico quian'₅₄
 Trófimo né₃ i₂chan₂ juig₂ gu'₂ ja₁tén₄ 'uë₃ Asia. ⁵ Jaun₂ né₃, rin'₅₄ jniog₄
 'éi₂ ca₂i₃jñiá'₄ ca₂i₁jñiog₁₂ juig₂ Troas. ⁶ Cang₂ jme₁ca₂gú'₃ jmi₄guë'₅
 dsa₂ i₁ñí'₄ a₂tsá₃ levadura quian'₅₄, jaun₂ ca₂tió'₄ jnia'₅₄ ni₁barco ca₂'uag₂
 Filipos. A₂'ñiá₂ jmi₄guë'₄ jaun₂, ca₂join₃ jnia'₅₄ juig₂ Troas. Ja₁jaun₂ ca₂jñia₄
 jnia'₅₄ guio₃ jmi₄guë'₄.

'En₅₄ Pablo juig₂ Troas

⁷ Jmi₄guë'₄ jë₁le₂'uig₅₄ semana, ca₂ñag'₂ jnia'₅₄ a₂ca₂dsi₄ i₁ñí'₄. Jaun₂
 tē₃jë₄ jaun₂ ca₂jme₃tag₅ Pa₄ ca₂jme₃tiin₂₃ dsa₂. Caun₂ ca₂ton₃ jág₁ ca₂lia'₂
 ca₂té₂ dsi₃nei₅, ia₁ a₂ma₂'ein₅₄ jui₅ dsáin'₃ jë₁ma₂jnia₃ jaun₂. ⁸ Jme₁tio'₅₄
 jnia'₅₄ le₁ñag'₂ caun₂ dsi₂néi₂ ja₁lë₄ guei'₅₄. 'Lióng₂ tsí₅ jme₁le₁'ág₄
 le₁guí'₂ si₂. ⁹ Jan₂ guë'₂ dsó₂ jme₁guá₄ caun₂ o₄'né₄ tau₂ quei₂
 i₂jme₁chen₂ Eutico. Ia₁ a₂ñí₄ lë₃ uë'₂ qui₂ca₂dsia₃ Pa₄ jág₁, jaun₂ tsá₃
 ma₃ca₂tió'₃ 'éi₂ a₂i₁güfín₃. Jme₁ma₂rë₂güfín₃ tsá₃ ma₃lí'₄ jme₁ca₂táin'₂
 ca₂të₂ ja₁lë₄ 'ni₅ juín₃ guei'₅₄. Ma₂join₂₃ jme₁ca₂i₁cho'₄ dsa₂. ¹⁰ Jaun₂
 ca₂sión₃ Pa₄ ján₃, ca₂jñai'₃ 'lag₄ ca₂quiog₂ ne₄ quió'₅, jaun₂ ca₂juá'₂
 ca₂tsí'₃ riin'₅₄.

—Tsá₃ lë₁jmo₂ 'nia'₂ gang'₃, ia₁ 'i₄ bá₄ jme₂dsí₂ quió'₅ chi'₂.

¹¹ Jaun₂ né₃ ca₂uig₂ táng₃ Pa₄ guei'₅₄. Jaun₂ ca₂dsi₄ i₁ñí'₄, ca₂guë'₃
 bá₄ jaun₂ né₃. Caun₂ ca₂dsia₃ bá₄ guë'₄ Pa₄ jág₁ ca₂lia'₂ ca₂jnia₃. Ca₂ñái'₃

^b4 A₂lin₅₄ chog₅₄ si₂ tsá₃ chi₁ton₅ “ja₁ñi'₅₄ Pirro.”

bá₄ jaun₂ né₃. ¹² La₁ dsó₂ 'éi₂ né₃, jéin'₃ bá₄ ca₂tág₃ dsa₂, jmo₅ dsa₂ 'io'₂ ca₂le₃jín₃.

Ca₂'uin₂ dsa₂ Troas, ca₂i₃léin₂ táng₃ jui₅ Mileto

¹³ Ca₂i₃jnióg₄ bá₄ jnia'₅₄ i₂náu₅ quian'₅₄ ni₁barco ca₂tē₂ Asón ca₂i₁te₁ Pa₄, ia₁ jme₁ma₂lé₅ jág₁ a₂'nio₃ dsó₃ 'niog₅ jui₅ tag₅₄.

¹⁴ Jme₁ca₂rē₃quian'₅₄ jnia'₅₄ juig₂ Asón, ca₂'í₃ ni₁barco quian'₅₄ jnia'₅₄ a₂ca₂i₃náu₅ jui₅ Mitilene. ¹⁵ Ca₂'uag₂ jnia'₅₄ ja₁jaun₂. Jme₁jnia₃ jaun₂, ca₂ηag₅₄ cau₅ ja₁tē₂ dsa₂ Quío, (a₂niog₅ jē₄ jmi₁ñí'₄). Caun₂ jmig₄ cang₂ jaun₂, ca₂dsi₃náu₅ jnia'₅₄ 'o₄ jmi₁ñí'₄ ja₁chei₂ Samos. [Jaun₂ ca₂jnia₁ jnia'₅₄ juig₂ Trogilio].^c Jme₁jnia₃ jaun₂ gué₄ ca₂dsi₃náu₅ jnia'₅₄ tē₂ juig₂ Mileto. ¹⁶ Jaun₂ le₂nē₅ ca₂lē₃, ia₁ tsá₃ 'nio₃ Pa₄ 'í₂ uē₂ 'uē₃ Asia, tsá₃ ma₃ca₂ñei₅₄ jui₅ Efeso. Ia₁ 'nio₃ dsáin'₄ ñi'₅₄ ta₁ jui₅ Jerusalén, a₂'nio₃ ñii₅ ja₁jaun₂ Jmig₄ Tē₂láu₃-guiá₂ nē₁jua'₂ ca₂lē₃.

Ca₂ton₃ Pablo jág₁ jin₄ dsa₂ can'₅₄ quián₅ riin'₅₄ chan₂ Efeso

¹⁷ 'En₅₄ Pa₄ juig₂ Mileto, jaun₂ ca₂ñí'₂ ca₂le₃jín₃ dsi₂gui'₅₄ can'₅₄ quián₅ riin'₅₄ i₂chan₂ Efeso. ¹⁸ Jme₁ca₂dsi₃lén₂ dsa₂, jaun₂ ca₂juá'₂ Pa₄: —Ñi'₅₄ bá₄ 'nia'₂ 'a₂ lia'₂ ma₂jmo₃ jniá₂ ca₂le₃ guang₃ le₂'uig₅₄ 'uē₃ Asia. ¹⁹ Ca₂le₃jé₃ jmig₄ bá₄ lia'₂ con'₂ ca₂'ú₃ jin'₄ 'nia'₂, ca₂jme₁ti₁₂ ta₁ ne₄ Te₁gui'₅₄. Tsá₃ ca₂jme₁juing'₂ 'nió₃. Tsá₃ caun₂ ca₂i₃ñig₂ 'uig₅₄ ca₂le₃jé₃ a₂jme₁'nio₃ dsa₂ judíos jme₁jmo₃'₂. ²⁰ La₁ on₃jua'₅₄ jaun₂ tsá₃ ma₃ca₂jme₁tin₅ jniá₂ 'nia'₂ a₂dse₃ quián'₂ 'nia'₂, ca₂i₁'é₄ jin₄ dsa₂, ca₂ηeg₅₄ tē₂ dsi₂néi₂ quián'₂ 'nia'₂ né₃. ²¹ Lia'₂ dsa₂ lín₅ judíos lia'₂ dsa₂ griegos né₃, qui₂ma₂juig₂ jniá₂ a₂'nió₅ jme₃tsín₃ dsa₂ dsí₅ ne₄ Diú₄, a₂le₃'éin₂ tē₂le₃ quió'₅ Te₁gui'₅₄ Jesucristo quián₂ jniog₄. ²² Jaun₂ né₃, ma₂'eng₅₄ jui₅ nei₅₄ jui₅ Jerusalén, ia₁ chi₂quióng₂ jmig₄ Jme₂dsí₂ quián₅ Diú₄. Tsá₃ a₂jaun₂ guion₅₄ 'e₂ dsi₃ñig₂ ja₁jaun₂. ²³ Jnia'₅₄ lia'₂ jaun₂ bá₄ guion₅₄, ia₁ le₂caun₂ le₂caun₂ juig₂ ja₁ma₂ηeg₅₄, ma₂'é₂ jág₁ Jme₂dsí₂ Jñi₅ a₂i₁ηag₁₂ uig₅, a₂to'₂ dsa₂ 'né₅ 'má₃ né₃. ²⁴ La₁ tsá₃ a₂jaun₂ 'i₅ dsi₃ jniá₂, o₁jnia'₅₄ ca₂quín₂ 'mú₃ quió₃, ia₁jaun₂ bá₄ le₃tei₅₄ jniá₂ ta₁ a₂ma₂chei'₃ Te₁gui'₅₄ Jesús a₂jmo₅₄, a₂jme₁ting₅ dsa₂ jág₁ dse₃ a₂'ua₁ dsí₅ Diú₄.

²⁵ 'Jaun₂ né₃ dsón'₂ lín₂ jniá₂, 'nia'₂ rin'₅₄ jniog₄ i₂ma₂nei'₂ jág₁ a₂ma₂qui₂ma₂'é₃ jniá₂ ñi₂₃, o₁líg'₂ jmig₄ tsá₃ ma₃jag'₅₄ 'nia'₂ jniá₂ táng₃. ²⁶ Jaun₂ lē₃ juig₂ jniá₂ 'nia'₂ tsá₃ ma₃'e₂ rē₂cán'₄ jniá₂ ja₁con₂ ca₂le₃jín₃ dsa₂, ²⁷ ia₁ ma₂ca₂juig₂ bá₄ jniá₂ 'nia'₂ lia'₂ con'₂ lé₅ dsi₂jio₅ dsí₅ Diú₄ jmo₃, tsá₃ 'e₂ ca₂'ma₃ jniá₂ ja₁con'₂ 'nia'₂. ²⁸ Jaun₂ né₃, jmo₄ 'nia'₂ 'í₁ guiong'₅₄, jmo₄ 'í₁ ca₂le₃jín₃ dsa₂ ríng'₂ i₂én₂ né₃. Ia₁ o₄gog'₂ 'nia'₂ bá₄ ma₂dsiog₃ Jme₂dsí₂ Jñi₅ a₂jmo₃'₂ 'í₁ dsa₂ i₂lín₅ guá'₅ quián₅ Diú₄

^c15 A₂lin₅₄ chog₅₄ si₂ tsá₃ le₁ton₅ jág₁ nē₅.

^d28 griego: (ma₂chei'₃ Jme₂dsí₂ Jñi₅ a₂lén₂ 'nia'₂) epískopos (dsa₂ i₂con₂ 'í₁).

i₂'lian'₅₄ tē₂le₃ quian'₅₄ jmi₂'an₅₄ 'ñiog₅ ja₁ñi'₅₄.²⁹ Guion₄ bá₄ jniá₂
a₂ja₃lén₂ dsa₂ sián'₂ jē₁ma₂ñág'₅, a₂'nio₃ 'éin₂ 'nia'₂ ca₂le₃jín₃, a₂jmo₃
jui₁lia'₂ jmo₅ dsi₂ji'₅₄ náu₂ tsau₂ dsí₅, jme₂dsiain₂₃ jui₁lia'₂ já'₂ cha'₂.

³⁰ Náu₃ jē₄ quián'₂ 'nia'₂ guiong'₅₄ dsa₂ i₂jme₃tag₅ le₃jen₅ ia₁jaun₂ 'ein₃
jui₅ quió'₅ 'éi₂ jui₁lia'₂ dsa₂ i₂ma₂'én₂ jág₁ dse₃.³¹ Jaun₂ rē₂ján'₁ 'nia'₂,
dsá₂ 'au'₂ 'nia'₂ jmo₄, ia₁ 'ni₅ ñi₂ ca₂dsin₃ ca₂cué₃ 'nia'₂ jág₁ lia'₂ 'uē₂-
jmi₂, ca₂le₃jé₃ ca₂'o₃.

³² 'Jaun₂ nē₃ rin'₅₄ jniog₄, dsián₄ jniá₂ 'nia'₂ o₄gú₃ Diú₄, ne₄ jág₁ dse₃
quió'₅ a₂'ua₁ dsí₅, a₂lé₂ jmo₃ a₂'uan'₂ 'nia'₂, a₂lé₂ jmo₃ a₂tin'₅₄ 'nia'₂
a₂dse₃ a₂cha₂ quió'₅, jui₁lia'₂ a₂tin₅₄ ca₂le₃jín₃ dsa₂ i₂lé₅ 'í₁ quiáin₅.³³ Tsá₃
'e₂ ma₂ca₂rē₃'ín₂ dsi₃ a₂jmo₅₄ quió'₃, jui₁lia'₂ a₂cha₂ quió'₅ i₂sián'₂, on₃
guē'₂ cu₄nióg₄, on₃ guē'₂ cu₄tio₂, on₃ guē'₂ tsin'₅₄ nē₃.³⁴ Ñi'₅₄ bá₄ 'nia'₂
rē₂, tē₂le₃ ma₂jmo₃ bá₄ ta₁ 'ñióg₃ quian'₅₄ gu₂-tag₃ ma₂'no₃ a₂'nió'₅
dsi₃ñíg₂ quian'₅₄ i₂quiang'₅₄.³⁵ Ca₂le₃o₃ jmi₄ bá₄ ma₂'é₃ 'nia'₂ 'a₂ lia'₂
'nió'₅ jmo₃ dsa₂ ta₁, a₂'nió'₅ jme₃'on₅₄ dsa₂ dsa₂ i₂'nió'₅ quió'₅. Dsá₂ 'au'₂
'nia'₂ jmo₄ jág₁ quió'₅ Te₁gui'₅₄ Jesús, jme₁ca₂juá'₂: "Ja₂lin₃ gué₄ dse₃ 'ei₅
dsí₅ dsa₂ i₂cuē₅, con'₂ gué₄ dsa₂ i₂gue₅."

³⁶ Jme₁ca₂dsan₃ juá'₂ Pa₄ le₂nē₅, ca₂chi₃jnë₃ quiain'₅₄ ca₂le₃jín₃ dsa₂,
ca₂chi₃lén'₂ Diú₄.³⁷ Ca₂le₃jín₃ qui₂ca₂'o₃, qui₂ca₂ñai'₃ Pa₄, ca₂chen'₃
quió'₅.³⁸ La₁ ja₂lin₃ gué₄ 'lia'₂ dsí₅ dsa₂ ca₂tóin'₂ jme₁ca₂juá'₂ Pa₄, ca₂lia'₂
o₁líg'₂ jmi₄ tsá₃ ma₃jín₂ gué₄ riin'₅₄. Jaun₂ ca₂jme₃quiong'₅₄ dsa₂,
ca₂i₁join₅₄ Pa₄ tē₂ ja₁'ei₅ ni₁barco.

Ca₂ñá'₃ Pa₄ jui₅ Jerusalén

21 ¹ Jme₁ca₂tén'₂ dsi₅ jnia'₅₄ dsa₂ rin'₅₄, jaun₂ ca₂i₃náu₅ jui₅ ne₄
jmi₁ñi'₄ co₂dsau₅ tē₂ Cos (a₂niog₅ jē₄ jmi₁ñi'₄). Jme₁nia₃ jaun₂
táng₃, ca₂ñag₅₄ ja₁chei₂ Rodas, jaun₂ gué₄ dsi₃náu₅ jnia'₅₄ jui₂ Pátara.
² Jui₂ Pátara jaun₂, cane₅₄ táng₃ jnia'₅₄ caun₂ ni₁barco a₂ñó₃ jui₅ 'uē₃
Fenicia, jaun₂ ca₂tió'₄ jnia'₅₄, ca₂i₃náu₅ táng₃.³ Jaun₂ ca₂ñag₅₄ jnia'₅₄
ja₁jniá₂ Chipre tē₂le₃ gu₂ jen₅, jaun₂ ca₂i₃náu₅ jnia'₅₄ tē₂ Siria. Jaun₂
ca₂dsióg₃ ni₁barco jui₂ Tiro, ia₁ i₁con₂ lio₅₄ ja₁jaun₂. Jaun₂ ca₂sió₄
jniá'₅₄ ja₁jaun₂.⁴ Jaun₂ ca₂jen'₂ jnia'₅₄ dsa₂ 'én₂ rin'₅₄ tián'₅ ja₁jaun₂.
Jaun₂ ca₂tió'₄ jnia'₅₄ guio₃ jmi₄ quiain'₅₄. Dsa₂ 'éi₂ nē₃, ca₂'é₂ jág₁
a₂ca₂cuē₃ Jme₂dsí₂ Jñió₅, ca₂tsí'₃ Pa₄ a₂tsá₃ dsi₂ten₅₄ dsó₃ jui₅ Jerusalén.
⁵ Jme₁ca₂dsin₃ guio₃ jmi₄ tio'₅₄ jnia'₅₄ jaun₂, jaun₂ ca₂'uag₂ táng₃. Jaun₂
ca₂le₃jín₃ dsa₂ i₂'én₂, quiain'₅₄ 'io₅₄ quiáin₅, chí'₂ quiáin₅ nē₃,
ca₂jme₃quiong'₅₄ tē₂ 'ni'₂ jui₂, ca₂i₁jo₅₄ tē₂ chei'₅₄ jmi₁ñi'₄. Ja₁jaun₂
ca₂chi₁jne₁ jnia'₅₄ ca₂le₃jág₃, ca₂chi₁len'₄ jnia'₅₄ Diú₄.⁶ Jaun₂
qui₂ca₂chan'₅₄ jnia'₅₄ rin'₅₄ ca₂'ei₅₄ jág₁. Jaun₂ gué₄ ca₂uig₅₄ jnia'₅₄ 'ñióg₃
ni₁barco. 'Éi₂ nē₃ ca₂i₃lein₃ bá₄ quió'₅.

⁷ Jme₁ca₂'uag₂ jnia'₅₄ jui₂ Tiro, ca₂i₃náu₅ jui₅ ne₄ jmi₁ñi'₄ a₂ca₂i₃náu₅
jui₅ Tolemaida. Ca₂cuin₅₄ jnia'₅₄ Diú₄ rin'₅₄ i₂tián'₅ ja₁jaun₂, ca₂jnia₄
jniá'₅₄ co₂jmi₄ quiain'₅₄.⁸ Jme₁nia₃ jaun₂, ca₂le₃jág₃ con'₂ i₂quian'₅₄ Pa₄

ca₂'uag₂ ja₁jaun₂, ca₂dsi₃náu₅ juig₂ Cesarea. Ja₁jaun₂ ca₂i₁náu₄ jnia'₅₄ ja₁quió'₄ Felipe i₂'é₂ jág₁ dse₃, i₂lín₅ jan₂ rin'₅₄ dsa₂ guion₃ i₂jme₂'o₅₄^e i₂ca₂quión'₂ dsa₂ le₂jniá₅.⁹ Felipe 'éi₂ jme₁chan₂ quén₂ ja₁míg₄ on₃jua'₅₄ i₂ma₂jen'₂ gu₂. 'Io₅₄ quén₂ 'éi₂ jme₁'é₂₃ 'é₅ dsa₂ jág₁ a₂cué₅ Diú₄.

¹⁰ Ma₂ne₁ñó₄ ca₂la₂ jmig₄ tio'₅₄ jnia'₅₄ jme₁ca₂dsióg₃ jan₂ dsa₂ i₂té'₂ dsa₂ Agabo, i₂'é₂ jág₁ a₂cué₅ Diú₄, a₂ca₂o₃jag₅₄ jnia'₅₄.¹¹ Jaun₂ jme₁ca₂guan₃ 'éi₂ né₃, ca₂can₃ lau₂ jén'₅ tú'₅ Pa₄, jaun₂ qui₂ca₂'néi₂ mi₂tag₅₄ 'ñiog₅ quian'₅₄ mi₂gu₂ né₃. Jaun₂ ca₂juá'₂:

—Le₂la₂ juá'₂ Jme₂dsí₂ Jñiós₅: “Le₂la₂ jmo₃ dsa₂ judíos jë₄ juig₂ Jerusalén jmái'₂ dsa₂ i₂quió'₅ ni₁lau₂ la₂, jaun₂ jáng'₂ o₄gú₃ dsi₂nau₂.”

¹² Jme₁ca₂néi₁ jnia'₅₄ le₂në₅, jaun₂ ca₂mí₁ jnia'₅₄ quian'₅₄ dsa₂ chan₂ Cesarea ca₂chei₅₄ Pa₄ a₂tsá₃ ma₃dsó₃ Jerusalén.¹³ La₁ jaun₂ ca₂ñag₃ Pa₄:

—¿'E₂ lë₃ qui'₂-au'₂ 'nia'₂, jmo'₂ 'nia'₂ 'ag₅ 'lia'₂ dsi₃? Ia₁ ma₂rë₂ján₁ bá₄ jniá₂, on₃jua'₅₄ jmá'₃ ca₂ne₅₄ a₂'nei₃ dsa₂. Ján₃ bá₄ ma₂'ei₅ caun₂ dsi₃ a₂jóng₂, jñag'₃ dsa₂ juig₂ Jerusalén, o₄quió'₄ Te₁gui'₅₄ Jesús.

¹⁴ Ia₁ tsá₃ jág₁ ca₂can₃ Pa₄ a₂ca₂chei₅₄ jnia'₅₄ a₂tsá₃ dsó₃, jaun₂ ca₂jmó₁ jnia'₅₄ tei₄ jme₁ma₂në₂jua'₅₄:

—Jui₁le₅₄ bá₄ a₂'ñio₂ dsí₅ Te₁gui'₅₄ jaun₂.

¹⁵ Cang₂ jaun₂ ca₂jmó₁ jnia'₅₄ co₂jñia₅₄ quián₂, ca₂tió'₄ jui₅ i₃náu₅ jui₅ Jerusalén.¹⁶ I₂lín₅₄ dsa₂ 'én₂ i₂chan₂ Cesarea ca₂jme₃quiong'₅₄. Jë₄ jaun₂ ñó₃ jan₂ dsa₂ i₂chen₂ Mnasón i₂chan₂ Chipre. Ma₂líg'₂ bá₄ ma₂já₅ dsa₂ 'éi₂ a₂lín₅ dsa₂ i₂'én₂. Ja₁quió'₄ 'éi₂ ca₂i₁jñia₄ jnia'₅₄ Jerusalén.

Ca₂i₁jñi₁ Pa₄ Jacobo

¹⁷ Jme₁ca₂dsi₃náu₅ jnia'₅₄ juig₂ Jerusalén, jaun₂ rin'₅₄ i₂tián'₅ ja₁jaun₂ ca₂guei₃ ca₂lia'₂ 'io'₂ jén'₅.¹⁸ Jme₁jñia₃ jaun₂, ñó₃ Pa₄ quian'₅₄ jnia'₅₄ a₂ca₂i₁jñi₁ jnia'₅₄ Jacobo. Ja₁quió'₄ 'éi₂ jme₁tion'₅₄ jñi₂ gui'₅₄ can'₅₄.^f
¹⁹ Jaun₂ qui₂ca₂cuag₃ Pa₄ Diú₄. Jaun₂ ca₂dsia₃ Pa₄ ca₂le₃jé₃ 'e₂ a₂ma₂jmo₃ Diú₄ jñi₄ dsi₂nau₂ të₂le₃ quian'₅₄ 'éi₂.²⁰ Jme₁ca₂nág₂ dsa₂ jág₁, jaun₂ ca₂jme₃juin'₂ Diú₄. Jaun₂ ca₂juá'₂ ca₂tsí'₃ Pa₄:

—Dse₃ jaun₂ rin'₅₄ jniog₄, la₁ ñi'₅₄ bá₄ 'ne₂, të₂le₃ mei₅ bá₄ dsa₂ judíos i₂ma₂'én₂. Ca₂le₃jín₃ 'éi₂ né₃, dsen₅₄ dsí₅ le₃quió'₅ 'Éi'₃ Juá'₅.²¹ Jaun₂ ma₂juá'₂ dsa₂ a₂ñi'₂ 'ne₂ jme₂tíng'₁ dsa₂ judíos i₂tián'₅ go₄ dsi₂nau₂, a₂tsá₃ ma₃tón'₂ jui₅, tsá₃ ma₃jme₃ti₃ 'éi'₃ ca₂jmo₃ Moisés, a₂tsá₃ ma₃ti₃ dsa₂ ni₁lo₁ chi'₂ dsa₂ ñe'₂ quiáin₅, on₃ gué'₂ jmo₃ jui₁lia'₂ tag₄ chí'₅ quián₂ jniog₄.²² ¿'E₂ lé₂ né₃? Ia₁ tion₅₄ ja₃lén₂ dsa₂ a₂ñi'₂ jë₁ma₂ca₂rë₃ñi₅ a₂'eng'₅₄ ja₁lá₃.^g²³ Co₂ñei'₅₄ gué'₄ dse₃ jmó'₂ a₂jua'₅₄ jnia'₅₄ la₂: Chan₂ jë₄ la₂ quián₂ jnia'₅₄ quén₂ dsa₂ i₂tion₅₄ niog₅ jme₃ti₃ caun₂ jág₁ quió'₅ a₂ma₂cué'₃ Diú₄.²⁴ Jñiai₅ jui₁dsi₂lén₂ quian'₅₄ 'ne₂, jmo₄ le₁jé₃ quiáng'₂

^e8 dsa₂ guion₃ i₂jme₂'o₅₄: 'Nio'₂ ja₁ton₅ Hechos 6:1-7; Filipenses 1:1.

^f18 griego: presbíteros.

^g22 A₂lín₅₄ chog₅₄ si₂: “Ia₁ tion₅₄ bá₄ le₃ñi₅ dsa₂ a₂'eng'₅₄ ja₁lá₃.”

quai⁵⁴. Jaun₂ 'ne₂ bá₄ qui⁵⁴ 'lia⁵⁴ ia₁jaun₂ ma₂lé₂ jme₃ti₃ a₂chéi₃ jñi₂
 dsi⁵⁴, ia₁jaun₂ ca₂le₃jín₃ bá₄ dsa₂ le₃lí⁴ a₂tsá₃ dsau₅ jág₁ a₂dsia₅ dsa₂
 a₂'iin₂₃ 'ne₂. Jaun₂ le₃ñi₅ dsa₂ a₂jme₂ti⁵⁴ bá₄ 'ne₂ ján₃ con² lé₅ 'Éi³ Juá⁵
 quió⁵ Moisés.^{h 25} La₁ ma₂ca₂chen⁵⁴ bá₄ jnia⁵⁴ si₂ ne₄ dsi₂nau₂,
 a₂ca₂chei⁵⁴ jnia⁵⁴ a₂tsá₃ lín₄ jmo₃ o₂i₁ dsi₅ quian⁵⁴ 'Éi³ Juá⁵,ⁱ a₂jñia⁵⁴
 lia² tsá₃ quíg³ ñi₄ já² i₂ma₂cuin₃ dsa₂ diú₄ lag₄, on₃ guë² gué³ jmi₂, on₃
 guë² ñi₄ já² i₂güí³ dsa₂ dsi₂lag₄, tsá₃ nió³ jág₁ quian⁵⁴ dsa₂ i₂tsá₃ lín₅
 dsi₂i₂gu₂ né³.

Ca₂jña³ dsa₂ Pa₄ i₁dsi₅ guá⁵ templo

²⁶ Jaun₂ ca₂jñia₃ bá₄ Pa₄ dsa₂ quén₂ 'éi₂. Jme₁jñia₃ jaun₂ né³, Pa₄
 quai⁵⁴ dsa₂ quén₂ 'éi₂ ca₂jmo₃ le₁jé³ quió⁵. Jaun₂ ca₂'í₃ i₁dsi₅ guá⁵
 templo ca₂i₁'é₄ jág₁ i₂líg² dsian₅ ta₁guio₃ jmi₄ a₂jmo₂₃ le₁jé³ quió⁵,
 jë₁ma₂té₂ rë₁dsín² dsa₂ já² ne₄ ne₄chei₂ o₄quió⁴ le₂jain₂ le₂jain₂.^j

²⁷ La₁ jme₁ja₂quián₃ dsin⁵⁴ ta₁guio₃ jmi₄ jaun₂, jan₂-on₃ dsa₂ judíos
 i₂chan₂ 'uë₃ Asia ca₂o₃lén₂, jaun₂ ca₂jñin₂ Pa₄ i₁dsi₅ guá⁵. I₂'éi₂ ca₂jmo₃
 ca₂tón² dsa₂ co₂mi⁵⁴, jaun₂ ca₂jña³ dsa₂ Pa₄. ²⁸ Jaun₂ qui₂ca₂tóin²
 ca₂guió³ ca₂juá²:

—i'Nia² dsa₂ juig₂ Israel, jme₁'o₁ jnia⁵⁴! I₂la₂ bá₄ dsa₂ i₂ñí₄ lë₃ ñi₅
 ca₂le₃jé³ juig₂ jme₂tiin₂₃ dsa₂ jág₁ 'lig⁵⁴ ja₁con₂ juig₂ go₄ jniog₄,
 a₂jme₂tiin₂₃ dsa₂ a₂tsá₃ jme₃ti₃ dsa₂ 'Éi³ Juá⁵ quió⁵ Moisés, a₂tsá₃ 'e₂
 quen₅ guá⁵ templo la₂ quián₂ jniog₄. Në₃ né³, ma₂në₂tióin² i₂lín₅₄ dsa₂
 griegos i₁dsi₅ guá⁵ templo, a₂ma₂në₂jme₂'ióg₃ ja₁jñiós₅ la₂.

²⁹ Juá² le₂në₅, ia₁ ma₂jág₂ dsa₂ le₂jñiá₅ ma₂jñin₂ Trófimo i₂chan₂ Efeso
 a₂i₂ñi⁵⁴ quai⁵⁴ Pa₄ jë₄ juig₂ Jerusalén, jaun₂ lín₂ a₂ma₂jñia₃ Pa₄ 'éi₂
 i₁dsi₅ guá⁵.

³⁰ Ta₁caun₂ juig₂ ca₂tón² dsa₂ co₂mi⁵⁴, jaun₂ ca₂o₃lén₂ dsa₂ co₂chi⁵⁴.
 Jaun₂ ca₂jña³ dsa₂ Pa₄ qui₂ca₂tsag² tē₂le₃ ca₁'né₄ i₁dsi₅ guá⁵, jaun₂
 ca₂jnéi₃ dsa₂ dsi₂jui₅ o₄'né₄. ³¹ Jme₁ma₂'nio₃ jme₁jñii³ bá₄ Pa₄
 jme₁ca₂dsióg₃ jág₁ ca₂rë₃ñi₅ juig⁵⁴ 'lióg₂ dsen⁵⁴, ca₂le₃jín₃ bá₄ dsa₂ juig₂
 Jerusalén tióin⁵⁴ co₂mi⁵⁴. ³² Dsi₂jui₅ jaun₂ ca₂ñí² juig⁵⁴ 'lióg₂ quian⁵⁴
 ca₂le₃jín₃ 'lióg₂ quiáin₅, ca₂i₃lén₂ co₂'ei₅ ja₁tion⁵⁴ dsa₂ co₂mi⁵⁴. Jaun₂
 dsi₂jui₅ jme₁ca₂jág₃ dsa₂ dsi₃lén₂ 'lióg₂ quai⁵⁴ juig⁵⁴ 'lióg₂ dsen⁵⁴, jaun₂
 ca₂téin₂ bá₄ Pa₄, ia₁ jme₁tióin⁵⁴ cuë₂₃. ³³ Jaun₂ jme₁ca₂dsióg₃ juig⁵⁴ 'lióg₂
 dsen⁵⁴, ca₂jñai³ Pa₄ ca₂jmo₃ 'éi³ ca₂'néi₂ 'lióg₂ quian⁵⁴ tin₃ jí₁ cadenas.
 Jaun₂ gué⁴ ca₂ñí³ dsa₂ 'ein₂ 'éi₂ Pa₄, 'e₂ ca₂jmo₃. ³⁴ Jaun₂ jma₃quén₅
 qui₂ca₂guió³ dsa₂ juig₂ le₂jain₂ le₂jain₂. Ca₂lia² jñia⁵⁴ tsá₃ ca₂ñí² juig⁵⁴
 'lióg₂, ia₁ a₂ñí₄ chí⁵ co₂mi⁵⁴. Jaun₂ ca₂jmo₃ 'éi³ ca₂tág₃ dsa₂ Pa₄ jui₅
 'né₅ ja₁tion⁵⁴ 'lióg₂. ³⁵ Jme₁ja₂quián₃ dsi₁len₃ dsa₂ ja₁lé₄ ni₁ta₅ 'né₅

^h24 'Í₂ Números 6. 'Nio² ja₁ton₅ Hechos 18:18.

ⁱ25 A₂lín₅₄ chog₅₄ si₂ tsá₃ chi₁ton₅ "a₂tsá₃ lín₄ jmo₃ o₂i₁ dsi₅ quian⁵⁴ 'Éi³ Juá⁵."

^j26 'Í₂ Números 6.

ja₁tion'₅₄ 'lióg₂, jaun₂ ca₂jio₃ 'lióg₂ ca₂jñai₃ Pa₄ jui₅ guei'₅₄ ia₁ a₂ñí₄
 'ñio₅ lín₃ 'ne₂ dsa₂ juig₂.³⁶ Ia₁ ca₂le₃jín₃ bá₄ dsa₂ juig₂ jme₁ja₂lén₂
 chi₁co'₅₄ qui₂guió'₅ qui₂juá'₂:
 —iJui₁jon₅₄ i₂ně₅!

Ca₂ton₃ Pa₄ jág₁ a₂lión₂ 'ñiog₅ ne₄ dsa₂ juig₂

³⁷ Jē₁jme₁ma₂to'₂ 'lióg₂ toin'₂ Pa₄ dsi₂néi₂ ne₄ta₁ quió'₅, jaun₂ ca₂juá'₂
 Pa₄ ca₂tsí'₃ juig₅₄ 'lióg₂ dsen₅₄:

—¿Lé₂ le₃juá'₄ jniá₂ ca₂jon₄ jág₁?

Jaun₂ ca₂ñag₃ juig₅₄ 'lióg₂:

—¿Tin'₂ 'ne₂ dsiá'₁ jág₁ jmei₅ griego? ³⁸ Jaun₂, ¿on₃juá'₅₄ 'ne₂ líng'₅
 dsa₂ egipcio i₂ca₂jmo₃ mī'₅₄ qui₂ca₂tsi₂jain₃ dsa₂ ma₂i₁jaun₃, ca₂'uín'₂
 quén₂ mei₅ dsa₂ i₂ma₂ca₂jme₃dsian₅ dsa₂ jui₅ 'uě₃ quein₂?

³⁹ Jaun₂ ca₂juá'₂ táng₃ Pa₄:

—Dsa₂ judío bá₄ lín₅ jniá₂, i₂chan₂ juig₂ Tarso, caun₂ juig₂ dsen₅₄ tén₅
 'uě₃ Cilicia. La₁ jmo₄ dse₃ 'au'₂ cué'₁ jmig₄ a₂juig₅₄ jniá₂ dsa₂ juig₂ jág₁.

⁴⁰ Ca₂cué₃ bá₄ jmig₄ jaun₂ ně₃. Jaun₂ ca₂nau₂ Pa₄ ne₄ ni₁ta₅ jaun₂.
 Jaun₂ ca₂jmo₃ léi₄ quian'₅₄ gu₂ ca₂tsí'₃ dsa₂ a₂jmo₃ tei₄. Jme₁ma₂chí'₅
 tei₄, jaun₂ ca₂jme₃lióg₃ ca₂juá'₂ jág₁ quian'₅₄ jág₁ jmei₅ hebreo, a ca₂tsí'₃
 dsa₂:

22 ¹ —'Nia'₂ dsa₂ go₂ rin'₅₄ jniog₄, gui'₅₄ can'₅₄ ně₃, nei₂ de'₂ 'nia'₂
 a₂juá'₄ jniá₂ juig₅₄ 'nia'₂ a₂jang'₄ jág₁ dsau₅ quió₃.

² Tē₂le₃ tei₄ gué₄ ca₂i₃lén₂ dsa₂ jme₁ca₂nág₂ a₂juá'₂ Pa₄ quian'₅₄ jág₁
 jmei₅ hebreo.^k Jaun₂ caun₂ ca₂juá'₂ bá₄ 'éi₂:

³ —Dsa₂ judío bá₄ lín₅ jniá₂. Juig₂ Tarso bá₄ chang₂, ja₁tén₄ 'uě₃
 Cilicia. La₁ Jerusalén la₂ bá₄ ca₂i₃juing'₂. Ca₂i₃ jniá₂ si₂ a₂ca₂jme₃tag₅ tē₅
 Gamaliel. Co₂rē₂ bá₄ ca₂jme₃tag₂₃ con'₂ lé₅ Si₂ 'Éi'₃ quió'₅ dsa₂ quián₂
 jniog₄ ma₂líg'₂. A₂dsen₅₄ dsi₃ jme₁lín₄ le₃quió'₅ Diú₄, jui₁lia'₂ jmo'₂
 'nia'₂ ca₂le₃jíng'₃ rē₂ně₃. ⁴ Qui₂ca₂co₃'én₃ jniá₂ dsa₂ i₂tion'₅₄ Jui₅ quió'₅
 Te₁gui'₅₄ le₂jñiá₅, ca₂lia'₂ ca₂quín₂ 'mú₃ quió'₅. Qui₂ca₂toin'₂ 'né₅ 'má₃
 lia'₂ dsa₂ ñe'₂ lia'₂ dsa₂ mí₂. ⁵ Lé₂ bá₄ jáng'₃ jág₁ dsau₅ jme₂dsa₂ dsen₅₄,
 ca₂le₃jín₃ gué₄ dsi₂gui'₅₄ can'₅₄ ně₃, ia₁ guioin₅₄ bá₄ ca₂jáng'₃ si₂ jniá₂
 a₂ca₂chein₃ ne₄ riin'₅₄ i₂tián'₅ Damasco, ca₂jmo₃ 'éi'₃ a₂jme₁i₁chán'₃ jniá₂
 ríng'₃ i₂tián'₅ ja₁jaun₂, a₂jme₁tē₁₂ le₁'ñei'₅₄ ia₁jaun₂ gue₃ uig₅ jē₄ juig₂
 Jerusalén la₂.

Ca₂dsia₃ Pa₄ 'a₂ lia'₂ jme₁ca₂jéin'₃ ca₂rē₃'éin₂ jág₁ dse₃ (Hechos 9:1-19; 26:12-18)

⁶ 'La₁ia₁ lia'₂ con'₂ jme₁ñó₃ jniá₂ le₂'i₄ jui₅ né₃ a₂dsióg₄ juig₂ Damasco,
 con'₂ dsi₂ñí'₃, con'₂ tsá₃ jáng₅ jme₁ca₂téng₃ caun₂ si₂ tág₅ jmá'₅ a₂já₃ jui₅
 guei'₅₄ i₂juíg₃. ⁷ Jaun₂ i₃líng₃ 'uě₃. Dsi₂jui₅ le₂jaun₂ ca₂nag₃ jág₁ a₂juá'₂:

^k40,2 o₃, arameo.

“Saulo, Saulo, ¿'e₂ lë₃ co₂'éin'₅ jniá'₂?”⁸ Jaun₂ ca₂ηag₄ jniá'₂: “¿'Ein₂ 'ne₂ gui'₅₄?” Jaun₂ ca₂juá'₂ tság₅ jniá'₂: “Jesús chan₂ Nazaret bá₄ jniá'₂ i₂co₂'én'₅ 'ne₂.”⁹ Ján₃ bá₄ ca₂jág₃ dsa₂ i₂jme₁quian'₅₄ jniá'₂ si₂ jaun₂, jaun₂ ca₂rë₃gó'₅. La₁ tsá₃ ca₂nág₂ jág₁ quió'₅ i₂ca₂juá'₂ ca₂tság₃ jniá'₂.¹⁰ Jaun₂ ca₂ηag₄ jniá'₂ jaun₂ né₃: “Te₁gui'₅₄, ¿'e₂ 'nió'₅ jmo₅₄ jniá'₂?” Jaun₂ ca₂juá'₂ Te₁gui'₅₄: “Nau₂, gua₂ jui₅ juig₂ Damasco. Ja₁jaun₂ juá'₂ dsa₂ ca₂le₃jé₃ 'e₂ 'nió'₅ jmó'₂.”¹¹ Ia₁ co₂dsia₅ ca₂téng₂ bá₄ quian'₅₄ si₂, jaun₂ dsa₂ i₂quiang'₅₄ bá₄ ca₂jio₃ le₁chan'₂ gu₃ a₂ca₂dsióg₃ të₂ Damasco.¹² Ja₁jaun₂ jme₁guá'₄ jan₂ dsa₂ chen₂ Ananías, i₂jme₁jme₂ti₃ con'₂ lé₅ Si₂ 'Éi'₃ Juá'₅ quió'₅ Moisés, jaun₂ ca₂le₃jín₃ dsa₂ judíos i₂tián'₅ Damasco ca₂juá'₂ dse₃ 'iin₂₃ 'éi₂.¹³ Jaun₂ ca₂dsióg₃ Ananías i₁jag₅₄ ja₁jme₁'eng₅₄. Jme₁ca₂dsióg₃, ca₂juá'₂: “Saulo rin'₅₄ jniog₄, guei'₅₄ táng₃ jme₁ne'₄.” Dsi₂jui₅ jaun₂ bá₄ ca₂lág₃ táng₃ míg₂ ne₃, jaun₂ ca₂jin₅₄ jaun₂ né₃.¹⁴ Jaun₂ ca₂tság₃ táng₃ jniá'₂: “Diú₄ quián₅ dsa₂ can'₅₄ quián₂ jniog₄ ma₂ca₂quióin'₂ 'ne₂ le₂jñiá'₅, ia₁jaun₂ le₃cuíng'₂ 'e₂ jaun₂ a₂'ñio₂ dsí₅, ia₁jaun₂ jing'₅₄ i₂qui₂dsi₅ 'éi'₃ rë₂ quiáin₅, ia₁jaun₂ nág'₁ jág₁ quió'₅ 'ñiog₅ a₂tio'₅₄ mi₂'o₅₄.¹⁵ Jaun₂ 'ne₂ gog'₅₄ a₂chi₂o₁'ín'₃ o₁dsia'₄ o₁chei'₄ ca₂le₃jín₃ dsa₂ ca₂le₃jé₃ 'e₂ ma₂jag'₅₄ 'e₂ qui₂ma₂nei'₂ né₃.¹⁶ Jaun₂ né₃, tsá₃ ma₃jme₁'ag₁₂. Nau₂, o₂chon₅₄ jmig₂, mi₄ ne₄ 'éi₂, ia₁jaun₂ jñí₃ dsáu'₂.”

Ca₂dsia₃ Pa₄ 'a₂ lia'₂ ca₂lë₃ a₂chein₅₄ ηei₅₄ ja₁con₂ dsi₂nau₂

¹⁷ 'Jme₁ca₂guáng'₃ Jerusalén, ηeg₅₄ guá'₅ templo i₂chi₁leng'₄ Diú₄. Jaun₂ a₂lë₁ca₂jéin₃ ca₂jág₃,¹⁸ ca₂jing₅₄ Te₁gui'₅₄, jaun₂ ca₂juá'₂: “I₂ñáu'₂ jú₅ të₂le₃ dséi₂ juig₂ Jerusalén, ia₁ tsá₃ tón'₂ dsa₂ jui₅ jág₁ a₂juig'₅₄ a₂'ág'₄ jniá'₂.”¹⁹ Jaun₂ ca₂ηag₄ jniá'₂ ca₂juíg₂: “Te₁gui'₅₄, ca₂le₃jín₃ bá₄ dsa₂ 'éi₂ le₁ñi₅ a₂jme₁ñi₅ jniá'₂ a₂jme₁nei₂₃ ca₂le₃jé₃ guá'₅ sinagogas a₂co₂'éng₅ qui₂cué₅ ca₂le₃jín₃ dsa₂ i₂'én₂ jág₁ dse₃ quiáng'₂, a₂jme₁i₂tioin'₂ 'né₅ 'má₃.²⁰ Jme₁ca₂jñi'₃ dsa₂ Esteban, dsa₂ i₂jme₁jáng'₅ jág₁ dsau₅ quiáng'₂, jaun₂ bá₄ jme₁chén'₄ jniá'₂ ján₃, ia₁ jme₁lé₄ caun₂ jág₁ quió₃ quian'₅₄ dsa₂ i₂ca₂jñi'₃ 'éi₂. Jaun₂ ca₂jmo₃ jniá'₂ 'Í₁ ni₁tsin'₅₄ dsa₂ i₂ca₂jñag'₃.²¹ La₁ jaun₂ ca₂juá'₂ Te₁gui'₅₄ ca₂tság₃ jniá'₂: “La₁ gua₂, ia₁ tsag₅₄ jniá'₂ uíng₂ quiáng'₂, a₂o₁'é₃ jág₁ ja₁con₂ dsi₂nau₂.”

Ma₂niog₅ ne₄ juig₅₄ 'lióg₂ bá₄ Pablo

²² Co₂jaun₂ bá₄ ca₂nág₂ dsa₂ juig₂. Jaun₂ ca₂jme₃lióg₃ ca₂tóin'₂ co₂mi'₅₄ ca₂guió'₃ ca₂juá'₂:
—iJui₁jón₅₄ i₂në₅! iTsá₃ ma₃'nió'₅ le₃chain₂ gué₄!
²³ Jaun₂ dsa₂ juig₂ né₃, caun₂ qui₂ca₂të₂ca₂'oin'₂ bá₄ Pa₄, qui₂ca₂gág₃ tsin'₅₄ tioin'₅₄,¹ qui₂ca₂cho₃ dsa₂ 'liog₂ jui₅ guei'₅₄.²⁴ Jaun₂ ca₂jmo₃ juig₅₄ 'lióg₂ dsen₅₄ 'éi'₃ ca₂tóin'₂ Pa₄ dsi₂néi₂ ja₁tion'₅₄ dsi₂'lióg₂. Jaun₂ ca₂jmo₃

¹23 ca₂gág₃ tsin'₅₄: Le₂jaun₂ jme₁jmo₅ dsa₂ léi₄ chi₂jua'₂ 'e₂ tsá₃ të₅ dsí₅.

'éi'₃ a₂báin₂ Pa₄ ia₁jaun₂ jmo₃ jág₁ 'e₂ dso₄ riin₂, 'e₂ 'uig₅₄ ca₂rë₃'né₃ dsa₂ juig₂ quiong'₅₄. ²⁵ La₁ jme₁ma₂rë₂'nei'₅₄ a₂jme₁ma₂bóg₂ dsa₂, ca₂juá'₂ Pa₄ ca₂tsí'₃ jan₂ juig₅₄ 'lióg₂ i₂chén'₅ cau₅:

—¿Ca₂tín'₂ 'nia'₂ báng'₄ jan₂ dsa₂ i₂tén₅ Roma të₃ tsá₃ ma₂në₂quion'₂ 'nia'₂ jág₁ dsau₅ quió'₅?

²⁶ Jme₁ca₂nág₂ juig₅₄ 'lióg₂ a₂në₅, jaun₂ ca₂nei₅₄ i₁chi'₂ juig₅₄ dsen₅₄ quiáin₅ ca₂juá'₂:

—Të₃ñi'₅₄ quiáng'₂ në₁jua'₂ 'e₂ ca₂jmag'₅₄ dsa₂ në₅, ia₁ dsa₂ tén₅ Roma bá₄ në₅.

²⁷ Jaun₂ ca₂jme₃quián₃ juig₅₄ 'lióg₂ dsen₅₄ ja₁'en₅₄ Pa₄, jaun₂ ca₂ṇag₃:

—¿Dsón'₂ lín'₅ 'ne₂ dsa₂ tén₅ Roma?

Jaun₂ ca₂ṇag₃ táng₃ Pa₄:

—Ján₅.

²⁸ Jaun₂ ca₂juá'₂ juig₅₄ 'lióg₂ jaun₂ në₃:

—'Lióng₂ cu₄ ca₂quín₂ quió₃ a₂ca₂ling₃ dsa₂ tén₅ Roma.

Jaun₂ ca₂juá'₂ táng₃ Pa₄:

—La₁ jniá₂ në₃, a₂ma₂lín₅ bá₄ jniá₂ lia'₂ con'₂ ca₂rë₃cháng₃.

²⁹ Dsi₂jui₅ jme₁ca₂nág₂ dsa₂ i₂jme₁bán₂ Pa₄, jaun₂ ca₂i₃lén₂ cau₅, ján₃ bá₄ le₂jaun₂ juig₅₄ 'lióg₂ dsen₅₄ në₃. Ia₁ jme₁ca₂rë₃ñi₅ a₂lín₅ Pa₄ dsa₂ tén₅ Roma, ca₂rë₃gó'₅ bá₄ jaun₂ në₃ ia₁ a₂ca₂'nei'₂ Pa₄.

Ma₂chén'₅ Pa₄ ne₄ dsi₂tan₅₄ quián₅ dsa₂ judíos

³⁰ Jme₁jnia₃ jaun₂, jme₁'nio₃ le₃ñi₅ juig₅₄ 'lióg₂ dsen₅₄ 'e₂ 'uig₅₄ jme₁cué'₅ dsa₂ judíos dso₄ Pa₄. Jaun₂ ca₂chéin'₂ 'éi₂ ia₁ a₂jme₁chi₁'nei'₅₄ quian'₅₄ ni₁ñí₁ cadenas. Jaun₂ ca₂jmo₃ 'éi'₃ a₂ñi'₂ juig₅₄ jme₂dsa₂ quian'₅₄ ca₂le₃jín₃ dsi₂tan₅₄ quián₅ dsa₂ judíos. Jaun₂ gué₄ ca₂dsein₂₃ Pa₄ ca₂chei'₃ ne₄ dsa₂ 'éi₂.

23

¹ Jme₁ma₂chén'₅ Pa₄ ne₄ dsi₂tan₅₄ quián₅ dsa₂ judíos, jaun₂ ca₂jín₂ ca₂le₃jín₃ dsa₂ can'₅₄ 'éi₂, jaun₂ ca₂juá'₂:

—Rin'₅₄ jniog₄, tei₄ bá₄ 'ei₅ dsi₃ ma₂guio₃, chang₂ të₂ jmig₄ në₃, ne₄ Diú₄.

² Jaun₂ Ananías, i₂lín₅ jme₂dsa₂ dsen₅₄, ca₂tsí'₃ dsa₂ i₂jme₁tión₂ cau₅ quió'₅ Pa₄, a₂jnáu₃ mi₂'o₄ 'éi₂. ³ Jaun₂ ca₂ṇag₃ Pa₄ ca₂tsí'₃ jme₂dsa₂ dsen₅₄ 'éi₂:

—iDiú₄ jnáu₃ quiáng'₂ 'ñiag'₂, 'ne₂ i₂lín'₅ lia'₂ lé₅ caun₂ ni₁'ia'₂ a₂ñia'₅₄ jniá₂ tiog₂ të₂le₃ co'₅₄. ^m ¿'Néi'₂ 'ne₂ ja₁në₅ qui₂dsí'₁ 'éi'₃ ja₁con₂ jniá₂ con'₂ lé₅ Si₂ 'Éi'₃? ¿Jaun₂ 'e₂ lë₃ jmo'₂ 'éi'₃ a₂cué₃ dsa₂ jniá₂, ton'₂ tsá₃ le₂jaun₂ ta₁ quí'₅ Si₂ 'Éi'₃?

⁴ Jaun₂ ca₂ṇag₃ dsa₂ i₂tion'₅₄ gué₄ ja₁jaun₂:

—¿'E₂ lë₃ ṇag'₅₄ le₂në₅ ne₄ jme₂dsa₂ dsen₅₄ quián₅ Diú₄?

⁵ Ca₂ṇag₃ táng₃ Pa₄:

^m3 ni₁'ia'₂ tiog₂: 'Nio'₂ ja₁ton₅ Mateo 23:27.

—Rin'₅₄ jniog₄, tsá₃ jaun₂ guion₅₄ a₂lín₅ jme₂dsa₂ dsen₅₄. Ia₁ juá'₂ ne₄ Si₂ quió'₅ Diú₄: “Tsá₃ chi₁ 'íng'₄ 'lig'₅₄ dsi₂tan₅₄ juig₂ go'₅₄.”ⁿ

⁶ Jaun₂ ca₂rë₃lí'₄ Pa₄, i₂lín₅₄ dsa₂ 'éi₂ lín₅ dsa₂ saduceos, i₂lín₅₄ guè'₂ lín₅ dsa₂ fariseos. Jaun₂ gué₄ ca₂juá'₂ Pa₄ tiá₂, ca₂tsí'₃ dsa₂:

—Rin'₅₄ jniog₄, dsa₂ fariseo bá₄ lín₅ jniá₂. Fariseos bá₄ jme₁lín₄ dsa₂ can'₅₄ quiáng₃ né₃. 'Uig₅₄ ia₁ a₂'éng₂ jág₁ a₂jen'₅₄ táng₃ 'lag₄ bá₄ a₂'iog₅₄ dsa₂, a₂con₂ dsa₂ jág₁ dsau₅ chéng'₅ la₂.

⁷ Jme₁ca₂juá'₂ Pa₄ le₂në₅, dsa₂ i₂lín₅ fariseos, quian'₅₄ dsa₂ i₂lín₅ saduceos né₃, ca₂jme₃lióg₃ qui₂ca₂tsín₂ guioin₅₄, ca₂lë₃ le₁dsoin'₅₄. ⁸ Ia₁ dsa₂ saduceos, tsá₃ 'e₂ 'éin₂ a₂jen'₅₄ dsa₂ jë₁ma₂dsain₃, on₃ guè'₂ 'éin₂ a₂chan₂ ángeles, on₃ guè'₂ 'éin₂ a₂chan₂ jme₂dsí₂. La₁ dsa₂ fariseos guè'₂ né₃, 'éin₂ bá₄ ca₂le₃jé₃ a₂jaun₂. ⁹ Jaun₂ ca₂tóin'₂ ca₂tsín₂ co₂mi'₅₄. Jaun₂ i₂lín₅₄ dsa₂ i₂lín₅ të₅juá'₅ i₂tió₂ të₂le₃ quió'₅ dsa₂ fariseos, ca₂nau₂ ca₂juá'₂:

—'I₁caun₂ 'lig'₅₄ tsá₃ 'e₂ ma₂jmo₃ dsa₂ në₅. 'E₂ lé₂ chi₂juá'₂ dsón'₂ bá₄ ca₂juá'₂ jan₂ ángel, o₃ jan₂ jme₂dsí₂ 'e₂, ca₂tsí'₃ i₂në₅?

¹⁰ Jaun₂ 'nio₅ ca₂tón'₂ dsa₂ ca₂tsín₂, ca₂lia'₂ ca₂rë₃gó'₅ juig₅₄ 'lióg₂ dsen₅₄ jme₁ca₂jág₃. Ia₁ në₅ tsá₃ ma₂jmo₃ dsa₂ jma₃quén₅ quió'₅ Pa₄, lín₂. Jaun₂ ca₂jmo₃ 'éi'₃ ca₂o₃lén₂ 'lióg₂ ca₂dsein₂₃ Pa₄ jë₄ quió'₅ dsa₂, ca₂tág₃ jui₅ ne₄ta₁ ja₁tion'₅₄ 'lióg₂.

¹¹ Jme₁ca₂të₂ tin₃ nei₅ 'en₅₄ Pa₄ ja₁jaun₂,^o ca₂jme₃jnia₅ Te₁gui'₅₄ ne₅₄, jaun₂ ca₂juá'₂:

—Quen'₂ bí₂, Pa₄, ia₁ jui₁lia'₂ ma₂në₂jang'₅₄ jág₁ dsau₅ në₂'ag'₅₄ jniá₂ jë₄ juig₂ Jerusalén la₂, le₂në₅ bá₄ o₁jang'₁ jág₁ dsau₅ o₁'ág'₃ jniá₂ jë₄ juig₂ Roma ján₃.

Ca₂jmo₃ dsa₂ judíos jág₁ a₂jme₁jñi'₃ Pa₄

¹² Jme₁jnia₃ jaun₂, ca₂jmo₃ jág₁ i₂lín₅₄ dsa₂ judíos a₂jñi'₃ Pa₄. Ca₂'iin₃ Diú₄ a₂ca₂juá'₂ a₂tsá₃ 'e₂ gué'₃, a₂tsá₃ 'e₂ 'ín'₂ né₃, ca₂lia'₂ ca₂lë₃ a₂niog₅ dsí₅ jmo₃. ¹³ Jme₁lé₂ lé₅ gué₄ con'₂ të₂lón₃ dsa₂ i₂jme₁ma₂lí'₅ jág₁ jmo₃ le₂jaun₂. ¹⁴ Jaun₂ ca₂i₁lein₅₄ i₁jñin₅₄ juig₅₄ jme₂dsa₂, ca₂le₃jín₃ gué₄ gui'₅₄ can'₅₄ quián₅ dsa₂ judíos né₃, a₂ca₂i₁juá'₁:

—Jnia'₅₄ ma₂'lín₃ Diú₄ a₂tsá₃ 'e₂ tí₄ 'o₄, ca₂lia'₂ ma₂në₂jñí'₄ jnia'₅₄ Pa₄.

¹⁵ Jaun₂ 'nia'₂ né₃, quian'₅₄ dsi₂tan₅₄ quián₅ guá'₅, o₂chei'₅₄ 'nia'₂ juig₅₄ 'lióg₂ a₂ja₂jñiai₃ Pa₄ ne'₅₄ 'nia'₂ 'ióg₃. A₂lë₁juig'₅₄ bá₄ 'nia'₂ a₂caun'₅₄ jág₁ dsau₅ co₂rë₂ quió'₅, ia₁jaun₂ bá₄ ja₃jio₃. Jaun₂ jnia'₅₄ guè'₂ né₃, ma₂lág₅ co₂jñia₅₄ a₂jñí'₄ né₃ a₂guáin₂ të₂la₂.

¹⁶ La₁ ja₁jñi'₅₄ 'io₅₄ rin'₅₄ Pa₄ ca₂rë₃jñi₅ jág₁ jaun₂. Jaun₂ ca₂nei₅₄ ne₄ta₁ quió'₅ 'lióg₂ ca₂i₁'é₄ jág₁ ne₄ Pa₄. ¹⁷ Jaun₂ Pa₄ né₃ ca₂të'₃ jan₂ juig₅₄ 'lióg₂, jaun₂ ca₂juá'₂:

ⁿ5 Éxodo 22:28.

^o11 o₃, “A₂'uë₂ jmig₄ jaun₂.”

—Jñia₅ chi'₂ la₂ ne₄ juig'₂ 'nia'₂, ia₁ cha₂ jág₁ quian₅ dsi₃'é₃.

¹⁸ Jaun₂ ca₂ne₄ 'éi₂ ca₂i₁jñiai₃ chi'₂, jaun₂ ca₂juá'₂:

—Pa₄ i₂lé₅ 'í₁ quián₅ 'lióg₂ ně₂té₂ jniá₂ a₂ně₂mi₃ a₂i₁jñiag₂ chi'₂ la₂, ia₁ cha₂ jág₁ quian₅ a₂'é₂ ne'₅₄.

¹⁹ Jaun₂ ca₂jña'₃ juig'₅₄ 'lióg₂ dsen₅₄ 'éi₂ mi₂gu₂ chi'₂ 'éi₂, con'₂ ca₂jio₃ cau₅, jaun₂ ca₂ñag₃:

—¿E₂ jág₁ quian'₅₄ juig'₅₄ jniá₂?

²⁰ Jaun₂ ca₂ñag₃ chi'₂ 'éi₂:

—Ma₂ně₂jmo₃ dsa₂ judíos caun₂ jág₁ a₂mi₃ ne'₅₄ a₂o₁jñiag'₂ Pa₄ 'ióg₃ ne₄ dsi₂tan₅₄ quián₅ dsa₂ judíos. A₂'nio₃ jme₃gain₂₃ 'ne₂ jmo₃ ně₂jag₄ bá₄ a₂con₂ dsi₂tan₅₄ jág₁ dsau₅ quió'₅ 'éi₂. ²¹ La₁ tsá₃ o₁'eng'₅₄, ia₁ lé₅ gué₄ tē₂lón₃ dsa₂ quián₅ ma₂le₁'mai₅₄ cau₅ jui₅ le₁jñiog₂₃. Ma₂'iin₃ Diú₄ a₂tsá₃ 'e₂ gué₃, 'ín'₂, ca₂lia'₂ ca₂jñi'₃ Pa₄. Jñia'₅₄ lia'₂ a₂jaun₂ bá₄ le₁jñia₂₃ chi₂jua'₂ 'e₂ jág₁ juig'₅₄ 'ne₂.

²² Jaun₂ ca₂'ág'₃ jág₁ juig'₅₄ dsen₅₄ 'éi₂, ca₂juá'₂ a₂tsá₃ 'ein₂ tsí'₃ jág₁ a₂ca₂dsia₃ jaun₂.

Ca₂dsián'₂ dsa₂ Pa₄ ne₄ Dsi₄má'₂ Félix

²³ Jaun₂ ca₂tē'₃ juig'₅₄ 'lióg₂ dsen₅₄ on₃ juig'₅₄ 'lióg₂ quián₅, ca₂jmo₃ 'éi'₃ a₂jmo₃ 'éi₂ co₂jñia₅₄ tin₃ 'ñiá₂-lón₂ 'lióg₂ a₂dsi₃lén₂ jui₅ tag₅₄; 'nag'₂ ne₂guión₂ rē₂dsí₂ guian₃ guē'₂ (70) dsi₃lén₂ co₁dsin₅₄ cua₁, tin₃ 'ñia₂-lón₂ guē'₂ i₂cán₂ ñí₁ chen'₂, a₂dsi₃lén₂ jui₅ Cesarea con'₂ hora ñí₁ ñi₃ le₃ca₂nei₂.^p ²⁴ Jaun₂ ca₂chein₃ jág₁ a₂jmo₃ dsa₂ co₂jñia₅₄ cua₁ i₂co₃dsin₅₄ Pa₄. Ca₂jmo₃ 'éi'₃ a₂jmo₃ dsa₂ 'í₁, dsi₃jóin₂ 'éi₂ o₄gú₃ Dsi₄má'₂ Félix tē₂dsein₃ jéin'₃ le₂jaun₂. ²⁵ Jaun₂ quian'₅₄ dsa₂ i₂i₁jon₅₄ Pa₄, ca₂chen₃ juig'₅₄ dsen₅₄ si₂ la₂ a₂juá'₂:

²⁶ Jniá₂, Claudio Lisias, tsíng₂ si₂ la₂ ne'₅₄ 'ne₂, gui'₅₄ Dsi₄má'₂ juin'₂ Fé₁. Cuíng₅ Diú₄ 'ne₂. ²⁷ Ca₂jñau'₃ dsa₂ judíos ca₂jñai'₃ dsa₂ ně₅, a₂jme₁jñag'₃. La₁ jme₁ca₂rē₃guion₅₄ a₂lín₅ dsa₂ tén₅ Roma, jaun₂ ca₂ñeg₅₄ i₁lioin₁₂ quian'₅₄ 'lióg₂ quiáng₃. ²⁸ Ia₁ jme₁'nio₃ le₃guion₅₄ 'e₂ 'uig'₅₄ 'nag₅ dsa₂, jaun₂ ca₂i₁jñiá₂ ne₄ dsi₂tan₅₄ quián₅. ²⁹ Jaun₂ ca₂rē₃léi₄ jniá₂, 'uig'₅₄ quió'₅ Si₂ 'Éi'₃ quió'₅ guion₅₄ bá₄ dsa₂, cué'₅ i₂ně₅ dso₄. Jaun₂ tsá₃ cha₂ 'e₂ lē₃ jua'₅₄ a₂'i₄ 'éi'₃ a₂jñag'₃ dsa₂, on₃ guē'₂ dsi₂ten₅₄ jua'₅₄ a₂'í₂ 'né₅ 'má₃ né₃. ³⁰ Jaun₂ jme₁ca₂rē₃guion₅₄ a₂ma₂jmo₃ dsa₂ judíos caun₂ jág₁ a₂jñag'₃, jaun₂ bá₄ lē₃ dsiain'₄ jniá₂ o₄gog'₂ 'ne₂. Jaun₂ ma₂juíg₂ bá₄ jniá₂ ján₃, dsa₂ i₂'nag₅ 'ni₅ i₂ně₅, a₂dsi₃lén₂ ne'₅₄ 'ne₂, a₂dsi₃can₅ dso₄ a₂bóin'₂ i₂ně₅. Co₂ně₅ bá₄.

³¹ Jaun₂ 'lióg₂ né₃, con'₂ lé₅ 'éi'₃ ma₂jñi₂, ca₂dsein₂₃ Pa₄ ca₂tág₃ tē₃ 'uē₂ ca₂dsi₃lén₂ tē₂ juig₂ Antípatris. ³² Jme₁jñia₃ jaun₂, 'lióg₂ i₂i₃lén₂ jui₅ tag₄ ca₂jéin'₃ táng₃ jui₅, ja₂lein₃ táng₃. Jmá'₃ 'lióg₂ i₂co₁dsin₅₄ cua₁ bá₄ ca₂i₃lén₂ i₃jón₂ gué₄ Pa₄. ³³ Jme₁ca₂dsi₃lén₂ tē₂ juig₂ Cesarea, jaun₂

^p23 lit. "hora 'ni₅ a₂'uē₂." 'Nio'₂ ja₁ton₅ Apéndice B.

ca₂jín'₃ dsi₄má'₂ si₂ carta a₂quian₅. Ca₂jín'₂ Pa₄ né₃.³⁴ Jme₁ma₂nē₂í₂ dsi₄má'₂ si₂, jaun₂ ca₂ñí'₃ Pa₄ a₂já'₄ chain₂. Jme₁ca₂rē₃ñi₅ a₂chan₂ 'éi₂ 'uē₃ Cilicia,³⁵ jaun₂ ca₂juá'₂:

—Nē₅ nag₅₄ jág₁ quiáng'₂ jē₁ma₂o₂lén₂ dsa₂ i₂'nag₅ quiáng'₂.

Jaun₂ ca₂jmo₃ dsi₄má'₂ 'éi'₃ a₂jmo₃ 'lióg₂ 'í₁ Pa₄ dsi₂néi₂ ne₄ta₁ palacio quió'₅ Rag₅₄ Herodes.

Ca₂jáng'₃ Pa₄ jág₁ dsau₅ a₂lióin₂ 'ñiog₅ ne₄ Dsi₄má'₂ Fé₁

24¹ A₂'ñiá₂ jmi_g₄ cang₂ jaun₂, ca₂dsióg₃ Ananías i₂lín₅ jme₂dsa₂ dsen₅₄, quiaín'₅₄ i₂lín₅₄ gui'₅₄ can'₅₄ né₃, quiaín'₅₄ Tértulo i₂lín₅ i₂chén'₅ ne₄ jág₁ quiaín₅, ca₂dsi₃lén₂ Cesarea. Jaun₂ ca₂dsi₃lén₂ ne₄ dsi₄má'₂ a₂'nii₃ Pa₄.² Jme₁ca₂i₁quian₅₄ dsa₂ Pa₄, jaun₂ ca₂jme₃lióg₃ Tértulo ca₂tsí'₃ dsi₄má'₂ a₂'nii₂₃ Pa₄, ca₂juá'₂:

—Ti₁'mag'₄ 'ne₂, tei₄ bá₄ 'ei₅ tio'₅₄ jnia'₅₄, jaun₂ dse₃ bá₄ lia'₂ con'₂ lē₅ 'éi'₃ quiáng'₂ a₂tíng'₂.³ Jaun₂ con'₂ lē₅ 'éi'₃ quí'₂ 'ne₂ bá₄ qui₂jmo₅ dsa₂, a₂jmo₂ jnia'₅₄ ján₃. Jaun₂ cuē₂ jnia'₅₄ ti₁'mag'₄ 'ne₂, Fé₁ juín'₂.⁴ La₁ jaun₂ tsá₃ uē₂ jme₁'ag₁₂ jnia'₅₄ quiáng'₂, mi₂ jnia'₅₄ jmó'₂ dse₃ 'au'₂ a₂nág'₁ jág₁ quián₂ jnia'₅₄ a₂jua'₅₄.⁵ Ma₂ne₅₄ jnia'₅₄ ca₂le₃jé₃ 'e₂ 'lig'₅₄ jmo₅ dsa₂ nē₅, ñi₂₃ ca₂le₃jé₃ juig₂ qui₂dsiain₂₃ mi'₅₄ dsa₂ judíos qui₂jmo₃ le₁dson'₅₄ dsa₂. Jaun₂ i₂nē₅ bá₄ lín₅ jan₂ dsa₂ i₂quian₅ ne₄ jui₅ quió'₅ co₂nió'₃ dsa₂ i₂té'₂ dsa₂ nazarenos.⁶ Jme₁'nio₃ jme₁jme₂'ióg₃ guá'₅ templo quián₂ jnia'₅₄. Jaun₂ bá₄ lē₃ ca₂chain'₅₄ jnia'₅₄, [jme₁'niog₂ jme₁qui₂dsi₂ 'éi'₃ con'₂ lē₅ Si₂ 'Éi'₃ quián₂ jnia'₅₄.⁷ La₁ jme₁ca₂í₃ juig₅₄ 'lióg₂ Lisias, ca₂ñiái'₂ Pa₄ jin₄ jnia'₅₄ quian'₅₄ bí₂ quió'₅ 'lióg₂ quiaín₅, a₂ca₂tág₃.⁸ Ca₂juá'₂ Lisias 'éi₂ a₂'nió'₅ ja₃lén₂ dsa₂ i₂'nag₅ ne'₅₄ 'ne₂.]^q Dse₃ ñag'₅₄ 'ne₂ 'ñiag'₂ ia₁jaun₂ le₃ñi'₅₄ lia'₂ tí₅ jág₁ 'e₂ lē₃ 'nii₅ jnia'₅₄.

⁹ Jaun₂ ca₂le₃jín₃ gué₄ dsa₂ judíos i₂jme₁tió₂ ja₁jaun₂ ca₂juá'₂ a₂dsón'₂ dsau₅ bá₄ jág₁ nē₅.¹⁰ Jaun₂ ca₂jmo₃ léi₄ dsi₄má'₂ ca₂tsí'₃ Pa₄ a₂juá'₂ 'éi₂ jág₁. Jaun₂ ca₂juá'₂ 'éi₂ jaun₂ né₃:

—A₂'ñio₂ dsi₃ jáng'₄ jág₁ dsau₅ a₂long₅₄ 'ñió₃ ne'₅₄ 'ne₂, ia₁ guion₅₄ bá₄ jaun₂ a₂lín₅ dsi₂tan₅₄ ma₂ne₁ñó₄ ñi₂ a₂qui₂dsí'₁ 'éi'₃ quió'₅ ta₁caun₂ 'uē₃ la₂.¹¹ Lé₂ bá₄ le₃caun'₅₄ jág₁ dsau₅, mei'₂ tsá₃ guia₃-tín₂ jmi_g₄ bá₄ ma₂té₂ a₂guang₃ Jerusalén a₂chi₁leng'₄ Diú₄.¹² Tsá₃ jua'₅₄ ca₂jio₃ dsa₂ a₂tsíng₂ quian'₅₄ dsa₂, on₃ guē'₂ jua'₅₄ a₂qui₂dsia₂₃ mi'₅₄ i₁dsi₅ guá'₅ templo, on₃ guē'₂ dsi₂néi₂ guá'₅ sinagogas, on₃ guē'₂ jē₄ juig₂.¹³ Tsá₃ qui'₅₄ jmi_g₄ i₂nē₅ jme₃jniai₂₃ ca₂le₃jé₃ a₂'nag₂₃.¹⁴ La₁ a₂juá'₅ jniá₂ ne'₅₄, a₂jme₂ti₅₄ ne₄ Diú₄ quián₅ dsa₂ can'₅₄, con'₂ lē₅ Jui₅ a₂juá'₂ i₂nē₅ a₂tsá₃ dsau₅. Ia₁ 'éng₂ ca₂le₃jé₃ a₂tio'₅₄ ne₄ Si₂ 'Éi'₃ quian'₅₄ Si₂ quió'₅ dsa₂ i₂jme₁ 'é₂ jág₁ quián₅ Diú₄ né₃.¹⁵ Le₂jaun₂ bá₄ 'éng₂ le₃quió'₅ Diú₄, jui₁lia'₂ 'éin₂ guioin₅₄ bá₄ ján₃, ia₁ 'éng₂ a₂qui₂jen'₅₄ 'lag₄, lia'₂ dsa₂ dsen₃ lia'₂ dsa₂ 'lín₅₄ né₃.

^q6-8 A₂lin₅₄ chog₅₄ si₂ tsá₃ le₁ton₅ jág₁ a₂tio'₅₄ 'ñió'₃ corchetes [le₂la₂].

¹⁶ 'Uig₅₄ jaun₂, le₃jé₃ jmi₄ bá₄ quín₅ jniá₂ bí₂ a₂tsá₃ 'e₂ dsi₃jni₅ dsi₃, lia₂ ne₄ Diú₄ lia₂ ne₄ dsa₂ mi₂güí₃ né₃.

¹⁷ 'Jme₁ca₂dsin₃ tin₃-ni₅ ni₂ a₂ni₂₃ juig₂ siá₂, ca₂guáng₃ táng₃ Jerusalén a₂jme₁ong₁₂ dsa₂ te₂né₂, a₂dsing₄ já₂ ne₄ ne₄chei₂ né₃.

¹⁸ A₂jaun₂ bá₄ 'eng₅₄ jmo₂₃ i₁dsi₅ guá₅ templo jme₁ma₂nē₂jmo₃ le₁jé₃ quió₃ lia₂ con₂ lé₅ tag₄ chí₅ quián₂ jniá₅₄. La₁ on₃jua₅₄ a₂jme₁tion₅₄ dsa₂ juin₅, on₃ guē₂ jua₅₄ ca₂dsia₃ jniá₂ mi₅₄. Jaun₂ ca₂dsi₃lén₂ i₂lin₅₄ dsa₂ judíos i₂ja₂lén₂ juig₂ siá₂ ja₁tén₄ 'uē₃ Asia. I₂'éi₂ bá₄ ca₂jo₃ 'eng₅₄ i₁dsi₅ guá₅ templo. ¹⁹ I₂'éi₂ bá₄ 'nió₅ ja₃lén₂ ja₁lá₃ ia₁jaun₂ 'nag₃ chi₂jua₂ cha₂ a₂'nag₃ jniá₂. ²⁰ Nē₁jua₂ tsá₃ a₂cha₂ 'nag₃ 'éi₂, jaun₂ jui₁'nag₅₄ i₂tión₂ nē₅ chi₂jua₂ cha₂ dso₄ ca₂'no₃ ja₁con₂ dsi₂tan₅₄ quián₅ dsa₂ judíos. ²¹ O₃ 'uig₅₄ jaun₂ 'e₂, ia₁ a₂'én₂ jniá₂ a₂jen₅₄ 'lag₄, jui₁lia₂ ca₂juá₃ jniá₂ tiá₂ ca₂juí₂ 'éi₂ lia₂ con₂ jme₁'eng₅₄ jē₄ quió₅, ca₂juí₂: “A₂cáun₂ 'nia₂ jág₁ dsau₅ quió₃ jniá₂, ia₁ a₂'éng₂ a₂jen₅₄ 'lag₄.”

²² Jme₁ca₂nag₂ gui₅₄ Dsi₄má₂ Fé₁ le₂nē₅, jaun₂ tsá₃ ma₃'e₂ ca₂jme₃rē₃. Ia₁ jme₁ma₂ni₅ rē₂ bá₄ i₂'e₂ jaun₂ a₂tē₂ dsa₂ “Jui₅”. Jaun₂ ca₂juá₂:

—Nē₅ bá₄ jme₁rē₂ jniá₂ jág₁ nē₅ quián₂ 'nia₂, jē₁ma₂guan₅ juig₅₄ 'lióg₂ dsen₅₄ Lisias.

²³ Jaun₂ ca₂jmo₃ gui₅₄ dsi₄má₂ 'éi₃ ca₂tsí₃ juig₅₄ 'lióg₂ quián₅ a₂toin₂ Pa₄ né₃ 'má₃. La₁ ca₂cuē₃ bá₄ jmi₄ lé₂ bá₄ dsi₃jag₅₄ a₂mei₅₄ quián₅ Pa₄ a₂jme₃'o₅₄ nē₁jua₂ 'e₂ ca₂rē₃'nió₅ quió₅.

²⁴ Jme₁ca₂dsin₃ tin₃-ni₅ jmi₄ cang₂ jaun₂, ca₂dsióg₃ táng₃ Fé₁ quiain₅₄ 'io₅₄ quián₅ i₂chen₂ Drusila, i₂lín₅ judía. Jaun₂ ca₂jmo₃ Fé₁ 'éi₃ ca₂i₁quian₅₄ dsa₂ Pa₄, jaun₂ ca₂nág₂ tē₁lia₂ ca₂dsia₃ 'éi₂ jui₁lia₂ 'a₂ lia₂ lé₅ a₂'éin₂ tē₂le₃ quió₅ Cristo Jesús. ²⁵ La₁ jme₁ca₂dsia₃ Pa₄ a₂'nió₅ cán₂ dsa₂ caun₂ jui₅ co₂dsau₅, a₂'nió₅ jme₃'uán₂ dsa₂ dsí₅ 'niog₅; jme₁ca₂dsia₃ Pa₄ a₂já₅ caun₂ jmi₄ a₂con₂ Diú₄ jág₁ dsau₅ quió₅ le₂jan₂ le₂jan₂ dsa₂, jaun₂ gué₄ ca₂rē₃gó₅ gui₅₄ Fé₁. Jaun₂ ca₂juá₂:

—Dse₃ bá₄ guang₂ táng₃ ja₁jme₁'eng₅₄. Nē₅ bá₄ tē₄ táng₃ jmi₄ siá₂ jē₁ma₂jing₅₄.

²⁶ Jme₁'ín₂ dsí₅ Fé₁ a₂jme₁jén₃ Pa₄ cu₄ ia₁jaun₂ jme₁lió₂. Jaun₂ 'lióng₂ ráun₂ jme₁ca₂tē₃ a₂dsia₂₃ jág₁ quiong₅₄. ²⁷ Tin₃ ni₂ ca₂ni₂ le₂jaun₂ jme₁ca₂o₃'ín₃ gui₅₄ Fé₁ ta₁ a₂jme₁lín₄, a₂ca₂'í₃ táng₃ Porcio Festo. Jaun₂ lia₂ ma₂'en₅₄ jaun₂ bá₄ Pa₄ né₃ 'má₃ ca₂jmo₃ Fé₁, ia₁jaun₂ tē₃tsiin₅₄ dse₃ quian₅₄ dsa₂ judíos.

Ca₂ne₄ Pa₄ ne₄ Dsi₄má₂ Festo

25 ¹ Ma₂'ni₅ jmi₄ a₂ca₂gue₃ Festo ta₁ dsi₄má₂, ca₂'uiin₂ juig₂ Cesarea ca₂uí₂ juig₂ Jerusalén. ² Ja₁jaun₂ ca₂jmo₃ jme₂dsa₂ dsen₅₄ quiain₅₄ ca₂le₃jín₃ juig₅₄ jme₂dsa₂ quián₅ dsa₂ judíos, ca₂mi₃ dso₄ ne₄ Festo a₂'nii₂₃ Pa₄. ³ Ján₃ bá₄ ca₂mi₃ a₂jmo₃ 'éi₂ dse₃ dsí₅, a₂jmo₃ 'éi₃ a₂dsi₃quián₂ dsa₂ Pa₄ a₂dsi₃jó₂ juig₂ Jerusalén. Ia₁ a₂jme₁ma₂li₅₄ jág₁

a₂jme₁jñii' ₃ Pa₄ le₂i₄ jui₅. ⁴ La₁ jaun₂ ca₂ñag₃ Festo a₂'ein₅₄ jui₅ dsáin' ₃ ñi' ₅₄ ta₁ të₂ juig₂ Cesarea ja₁'en₅₄ Pa₄ né' ₃ 'má₃. ⁵ Jaun₂ ca₂juá' ₂:

—Jui₁ja₂lén₂ dsa₂ i₂lín₅ ta₁ quián' ₂ 'nia' ₂ quian' ₅₄ jniá₂ jui₅ Cesarea, jui₁'nag₁₂ ja₁jaun₂ chi₂jua' ₂ cha₂ a₂riin₂.

⁶ Jñia' ₅₄ con' ₂ jñia₃ o₃ guia₃ jmig₄ bá₄ ca₂'í₃ Festo Jerusalén, jaun₂ ca₂ñái' ₃ Cesarea. Jme₁jñia₃ táng₃ jaun₂, ca₂i₁gua₂ ne₄ta₁ ja₁qui₂dsi₂₃ 'éi' ₃, jaun₂ ca₂jmo₃ 'éi' ₃ a₂ca₂i₁quian₅₄ dsa₂ Pa₄. ⁷ Jme₁ca₂'í₃ Pa₄ dsi₂néi₂ ne₄ta₁, jaun₂ ca₂jme₃quián₃ dsa₂ judíos i₂ja₂lén₂ juig₂ Jerusalén. Jaun₂ 'lióng₂ ne₅₄ dso₄ jué' ₂ qui₂ca₂bóin' ₂ Pa₄. La₁ tsá₃ ca₂tió' ₃ jme₃jñiai₂₃ a₂dsón' ₂ dsau₅ ca₂le₃jé₃ dso₄ a₂bóg' ₂ jaun₂. ⁸ Jaun₂ ca₂jáng' ₃ Pa₄ jág₁ dsau₅ a₂lióin₂ 'ñiog₅, ca₂juá' ₂:

—I₁caun₂ dso₄ në₅ tsá₃ ma₂'no₃ jniá₂, on₃ guë' ₂ jua' ₅₄ a₂tsá₃ ma₂ca₂rë₃tei₅₄ con' ₂ lé₅ Si₂ 'Éi' ₃ quió' ₅ dsa₂ judíos, on₃ guë' ₂ le₃quió' ₅ guá' ₅ templo jua' ₅₄ a₂ma₂'no₃ dso₄, on₃ guë' ₂ jua' ₅₄ a₂cha₂ dso₄ ma₂ca₂táng' ₂ ja₁con₂ gui' ₅₄ emperador romano.

⁹ La₁ia₁ jme₁'nio₃ Festo të₃tsiin' ₅₄ rë₂ quian' ₅₄ dsa₂ judíos, jaun₂ ca₂ñí' ₃ Pa₄:

—¿'Niog' ₂ guang' ₅₄ të₂ juig₂ Jerusalén ia₁jaun₂ ja₁jaun₂ jme₁rë₂ jniá₂ quiáng' ₂?

¹⁰ Jaun₂ ca₂ñag₃ Pa₄:

—Jaun₂ guë' ₂ ma₂chén' ₅ jniá₂ ja₁lá₃ caun₂ ne₄ta₁ ja₁tén₄ gui' ₅₄ emperador romano ja₁dsi₂ten₅₄ qui₃dsi₅ dsa₂ 'éi' ₃ quió₃. Ia₁ rë₂ bá₄ ñi' ₅₄ 'ne₂, tsá₃ 'e₂ dso₄ rin₂ jniá₂ ja₁con₂ dsa₂ judíos. ¹¹ Chi₂jua' ₂ cha₂ guë' ₂ dso₄ a₂ma₂'no₃, a₂ca₂tíng₂ jóng₂, jaun₂ guén₄ bá₄ jniá₂ 'mú₃ quió₃. La₁ chi₂jua' ₂ tsá₃ dsau₅ dso₄ a₂bóg' ₂ dsa₂ në₅, jaun₂ 'i₁jan₂ tsá₃ 'ein₂ ca₂tín₂ jua' ₅₄ a₂jáng' ₂ jniá₂ o₄gú₃ dsa₂ 'éi₂. Jaun₂ mi₅ jniá₂ nég' ₄ ne₄ gui' ₅₄ emperador, ia₁jaun₂ 'éi₂ qui₃dsi₅ 'éi' ₃ ja₁cong₂.

¹² Jme₁ca₂lë₃ dsia₅ Festo jág₁ quian' ₅₄ dsa₂ i₂to' ₂ jág₁ dse₃ quiáin₅, jaun₂ ca₂juá' ₂ ca₂tsí' ₃ Pa₄:

—Ia₁ ma₂në₂mi' ₅₄ guang' ₅₄ ne₄ gui' ₅₄ emperador, ne₄ 'éi₂ guang' ₅₄ guë' ₂ jaun₂.

Ma₂chén' ₅ Pa₄ ne₄ Rag₅₄ Agripa

¹³ Tin₃-ni₅ jmig₄ cang₂ jaun₂, ca₂dsióg₃ Rag₅₄ Agripa quiaín' ₅₄ Berenice ca₂i₁lein₅₄ juig₂ Cesarea i₁cuin₃ Diú₄ Festo. ¹⁴ Ca₂tóin' ₂ bá₄ tin₃-ni₅ jmig₄ ja₁jaun₂, jaun₂ ca₂dsia₃ Festo ca₂tsí' ₃ Rag₅₄ Agripa jág₁ jaun₂ quió' ₅ Pa₄. Jaun₂ ca₂juá' ₂:

—'En₅₄ jan₂ dsa₂ 'né₅ 'má₃ ja₁lá₃, i₂ca₂ton' ₂ Fé₁. ¹⁵ Lia' ₂ con' ₂ jme₁'en₅₄ jniá₂ juig₂ Jerusalén, ca₂mi₃ dso₄ ne₃ jniá₂ juig₅₄ jme₂dsa₂ quián₅ dsa₂ judíos, dsa₂ can' ₅₄ quiáin₅ né₃, a₂'ni₂₃ dsa₂ 'éi₂, a₂jme₁mi₂₃ jme₁qui₁dsi₅ jniá₂ 'éi' ₃ quió' ₅, a₂'é₄ uig₅ né₃. ¹⁶ Jaun₂ bá₄ lë₃ ca₂ñag₄ jniá₂ ca₂juíg₂: “Tsá₃ le₂jaun₂ tin₂ quió' ₅ dsi₂tan₅₄ romano jua' ₅₄ qui₃dsi₅ 'éi' ₃ quió' ₅ jan₂ dsa₂, të₃ tsá₃ ma₂në₂jíin₂ dsa₂ i₂qui₂'nag₅ quió' ₅, të₃ tsá₃ ma₂cuin₅ jmig₄

lióin₃ 'e₂ dso₄ bó₂g' dsa₂.¹⁷ Jaun₂ lë₃, jme₁ca₂o₃lén₂ ja₁lá₃, dsi₂jui₅ bá₄ ca₂i₁gua₂ ne₄ta₁ quió₃ jme₁jnia₃ jaun₂, jaun₂ ca₂jmo₃ 'éi'₃ ca₂i₁quian₅₄ dsa₂ dsa₂ 'éi'₂.¹⁸ La₁ jme₁ca₂o₃lén₂ dsa₂ i₂'nag₅, tsá₃ 'e₂ dso₄ ca₂bó₂g' dsa₂ jui₁lia'₂ dso₄ jme₁lín₂ jniá₂ a₂jme₁bó₂g' dsa₂.¹⁹ Jñia'₅₄ lia'₂ a₂jaun₂ bá₄ 'nii₂₃ 'éi'₂ lia'₂ con'₂ lë₅ 'Éi'₃ Juá'₅ quió'₅, ia₁ a₂juá'₂ 'iin₂₃ jan₂ i₂chen₂ Jesús i₂ca₂jon₃, jaun₂ juá'₂ Pa₄ i₂chan₂ bá₄ 'éi'₂.²⁰ Ia₁ tsá₃ guion₅₄ 'a₂ lia'₂ jme₁rë₂ jág₁ jaun₂, jaun₂ bá₄ lë₃ ca₂juíg₂ Pa₄ chi₂jua'₂ 'nio₃ dsó₃ jui₅ Jerusalén, ia₁jaun₂ qui₃dsi₅ dsa₂ 'éi'₃ ja₁jaun₂.²¹ La₁ 'ñiog₅ né₃ ca₂mi₃ a₂qui₃dsi₅ 'éi'₃ gui'₅₄ emperador Augusto, jaun₂ bá₄ lë₃ ca₂jmo₃ jniá₂ 'éi'₃ lia'₂ ma₂'ein₅₄ nē₅ 'né₅ 'má₃, ca₂lia'₂ ca₂cuin₃ jmig₄ a₂tsiin₅₄ ne₄ gui'₅₄ emperador.

²² Jaun₂ ca₂juá'₂ gui'₅₄ Agripa ca₂tsí'₃ Festo:

—Ján₃ bá₄ 'nio₃ jniá₂ nag₅₄ jág₁ quió'₅ dsa₂ 'éi'₂.

Jaun₂ ca₂ñag₃ táng₃ Festo:

—'Ióg₃ nág'₁ jág₁ quió'₅.

²³ Jaun₂ jme₁jnia₃ jaun₂, ca₂dsióg₃ gui'₅₄ Agripa quian'₅₄ Berenice. 'Ñio₅ lin₃ jlá'₁ ca₂i₃toin'₅₄ dsi₂néi'₂. Ca₂dsi₃lén₂ juig₅₄ 'lióg₂ dsen₅₄, ca₂le₃jín₃ dsa₂ dsen₅₄ quián₅ juig₂ ca₂dsi₃lén₂. Jaun₂ ca₂jmo₃ Festo 'éi'₃ a₂ca₂i₁quian₅₄ dsa₂ Pa₄.²⁴ Jaun₂ ca₂juá'₂:

—'Ne₂ Rag₅₄ Agripa, ca₂le₃jín'₃ 'nia'₂ dsa₂ i₂le₁ñi'₂ ja₁lá₃ quian'₅₄ jnia'₅₄, la₂ chén'₅ dsa₂ la₂. Juin₅ dsa₂ judíos i₂chan₂ juig₂ Jerusalén, dsa₂ chan₂ juig₂ Cesarea ja₁lá₃ né₃, 'nii₂₃ dsa₂ la₂. Jaun₂ ca₂le₃jé₃ jmig₄ tsá₃ cán₂ jág₁, a₂mi₂₃ jón₂ i₂nē₅.²⁵ La₁ con'₂ lín₂ jniá₂, tsá₃ 'e₂ dso₄ riin₂ jua'₅₄ a₂dsi₂ten₅₄ jóin₂. Ton'₂ mi₂₃ táng₃ 'ñiog₅ a₂dsáin'₃ ne₄ gui'₅₄ emperador Augusto, jaun₂ lë₃ ma₂i₂jio₅ dsi₃ dsiain'₅₄ co₂ñei'₅₄ ne₄ 'éi'₂.²⁶ Ia₁ tsá₃ guion₅₄ 'e₂ jág₁ dsón'₂ tó'₄ ne₄ si₂ a₂juig₅₄ gui'₅₄ emperador a₂'nig₄ i₂nē₅. Jaun₂ bá₄ lë₃ i₂jñiái₂ ne'₅₄ 'nia'₂, la₁ 'ñio₅ dsen₅₄ gué₄ le₂'uig₅₄ ne'₅₄ 'ne₂ gui'₅₄ Rag₅₄ Agripa, ia₁jaun₂ caun'₅₄ jág₁ dsau₅ quió'₅, ia₁jaun₂ cha₂ a₂tó'₄ ne₄ si₂ 'e₂ a₂rë₂cáin'₂.²⁷ Ia₁ tsá₃ dse₃ jniá₂, lín₂ jniá₂, jua'₅₄ a₂dsiang'₅₄ jan₂ dsa₂ chi₁'ñei'₅₄ jua'₅₄ a₂tsá₃ juig₅₄ 'e₂ lë₃ 'nag₅ dsa₂.

Ca₂jáng'₃ Pablo jág₁ dsau₅ quió'₅ ne₄ Rag₅₄ Agripa

26

¹ Jaun₂ ca₂juá'₂ Rag₅₄ Agripa ca₂tsí'₃ Pa₄:

—Lé₂ bá₄ jua'₅₄ jág₁ a₂jang'₅₄ jág₁ dsau₅ o₄quiáng'₂ 'ñiag'₂. Jaun₂ ca₂chóg'₃ Pa₄ gu₂ ca₂jme₃lióg₃ ca₂juá'₂ le₂la₂:

² —Jmo₅ jniá₂ dsi₃, 'e₂ bá₄ dsen₃ jniá₂, a₂ma₂chéng'₅ ne'₅₄ 'ne₂ Rag₅₄ Agripa, a₂long₅₄, juig₅₄ 'ne₂ 'a₂ lia'₂ lë₅ ca₂le₃jé₃ dso₄ a₂bó₂g' dsa₂ judíos jniá₂.³ Ia₁ ma₂ñi'₅₄ bá₄ 'ne₂ co₂rë₂ 'a₂ lia'₂ lë₅ tag₄ a₂chí'₅ quián₂ jnia'₅₄ dsa₂ judíos, quian'₅₄ jág₁ a₂tság₂ jnia'₅₄ jin₄ rin'₅₄ né₃. Jaun₂ lë₃ mi₅ jniá₂ ne'₅₄ a₂jmó'₂ juin'₂ 'au'₂ a₂nág'₁ jág₁ quió₃.

Ca₂dsia₃ Pablo, le₂la₂ bá₄ jme₁lín₄ né₃ a₂jéin₃ le₃quíó₅ Te₁gui₅₄

⁴ 'Ca₂le₃jín₃ bá₄ dsa₂ judíos le₁ñi₅ 'a₂ lia₂ jme₁jmo₅ jniá₂ juig₂ go₃ quian₅₄ jë₄ juig₂ Jerusalén né₃. Jaun₂ le₁ñi₅ bá₄ dsa₂ 'a₂ lia₂ jme₁ñi₅ jniá₂ lia₂ bing₅₄. ⁵ Le₁ñi₅ 'éi₂ ján₃, jaun₂ lé₂ bá₄ jáng₃ jág₁ dsau₅ në₁jua₂ 'nio₃, lia₂ con₂ jme₁i₃juing₂ bá₄, ma₂lín₅ bá₄ jniá₂ dsa₂ fariseo. Jaun₂ jnia₅₄ i₂jme₁lág₄ fariseos jme₁jme₂tí₁ gué₄ 'ñio₅ lín₃ juá₅ quián₂. ⁶ Ia₁ a₂'éng₂ a₂jme₃jen₅₄ Diú₄ 'lag₄, jui₁lia₂ lé₅ jág₁ quió₅ ca₂cué₃ gui₅₄ can₅₄ quián₂ jnia₅₄ ma₂líg₂, 'uig₅₄ jaun₂ bá₄ a₂chéng₅ ja₁lá₃, a₂con₂ dsa₂ jág₁ dsau₅ quió₃. ⁷ Ta₁guia₃-tín₂ bá₄ cho₅₄ tsi₁jon₂ dsa₂ juig₂ jnia₅₄ jme₂juin₂ Diú₄, jaun₂ lia₂ 'uë₂-jmi₂ bá₄ jme₂tí₃ ta₁ ne₄ Diú₄ ia₁ le₁ín₂ dsí₅ a₂jme₂tí₃ Diú₄ jág₁ jaun₂ quió₅ ca₂cuë₃. 'Uig₅₄ jaun₂ bá₄ né₃, 'ne₂ gui₅₄ Rag₅₄ Agripa, 'uig₅₄ ia₁ a₂ín₂ dsi₃ jniá₂ le₂jaun₂ bá₄, a₂'nag₅ dsa₂ judíos jniá₂. ⁸ 'E₂ 'uig₅₄ jmo₂ 'nia₂ 'au₂ a₂tsá₃ qui₅₄ Diú₄ jmi₄ jme₃jein₅₄ 'lag₄?

Ca₂dsia₃ Pa₄ 'a₂ lia₂ qui₂ca₂co₃'ein₃ quió₅ dsa₂ quián₅ Jesús

⁹ 'Jniá₂ 'ñio₃, jme₁dsi₂jio₅ dsi₃ le₂jniá₅ jme₁jmo₅₄ 'lióng₂ ne₅₄ cosas a₂jme₁jmag₅₄ dsa₂ quián₅ Jesús chan₂ Nazaret. ¹⁰ Jaun₂ le₂në₅ ca₂jmo₃ jë₄ juig₂ Jerusalén. Quian₅₄ 'éi₃ ca₂cuë₃ juig₅₄ jme₂dsa₂, qui₂ca₂tong₂ 'né₅ 'má₃ juin₅ lín₃ dsa₂ 'én₂.^r Caun₂ bá₄ jág₁ jme₁lé₄ quió₃ quian₅₄ dsa₂ i₂ca₂jme₃dsian₅ i₂lín₅₄ dsa₂ i₂én₂ 'éi₂. ¹¹ 'Lióng₂ ráun₂ qui₂ca₂'é₃ jniá₂ uig₅, ia₁jaun₂ jmo₃ tion₅₄ a₂tí₂ a₂'éin₂. Le₂jaun₂ bá₄ qui₂ca₂jmo₃ jniá₂ le₂tan₅₄ guá₅ sinagogas, ca₂lia₂ ca₂i₁'éin₄ le₂tan₅₄ juig₂ go₄ dsa₂ sián₂ né₃, ia₁ 'ñio₅ lín₃ jme₁ñiai₅₄ jniá₂.

Ca₂dsia₃ táng₃ Pa₄ 'a₂ lia₂ ca₂lë₃ a₂ca₂jéin₃

(Hechos 9:1-19; 22:6-16)

¹² 'Ta₁ jaun₂ jme₁ñó₃ jniá₂ jui₅ Damasco ca₂chei₃ dsa₂ quian₅₄ bí₂ 'éi₃ ca₂cuë₃ juig₅₄ jme₂dsa₂ a₂jme₁i₂cháng₃ dsa₂ 'én₂ i₂jme₁tion₅₄ ja₁jaun₂. ¹³ La₁ lia₂ con₂ jme₁ñó₃ le₂i₄ jui₅, 'ne₂ gui₅₄ rag₅₄, con₂ dsi₃ñí₃ bá₄ jaun₂, ca₂jág₃ jniá₂ caun₂ si₂ a₂já₃ jui₅ guei₅₄ i₂juig₃, ca₂tág₃ le₃lág₃ quió₃, quian₅₄ dsa₂ i₂jme₁quiang₅₄. 'Ñio₅ lín₃ gué₄ tág₅ con₂ gué₄ 'iog₂. ¹⁴ Jaun₂ ca₂le₃jág₃ bá₄ jnia₅₄ i₂gau₅₄ 'uë₃ dsi₂jui₅ le₂jaun₂. Jaun₂ ca₂nag₃ caun₂ jág₁ ca₂juá₂ dsa₂ quian₅₄ jág₁ jmei₅ hebreo:^s “Saulo, Saulo, 'e₂ lë₃ co₂'éin₅ jniá₂? A₂jnia₅₄ jmag₅₄ uig₅ 'ñiag₂ bá₄, jmo₂ jui₁lia₂ jmo₅ ca₁jui₅ quia₂ 'uë₃ a₂jnaú₅ nei₅₄ ni₁'ma₂ chen₂.” ¹⁵ Jaun₂ ca₂ñag₄ jniá₂: “'E₂in₂ bá₄ 'ne₂, gui₅₄?” Jaun₂ ca₂ñag₃ táng₃: “Jesús bá₄ jniá₂ i₂co₂'én₅ 'ne₂. ¹⁶ La₁ nau₂, chí₂ tag₅₄, ia₁ në₂jme₁jniag₅ ne₅₄ 'ne₂, ia₁ 'nio₃ jme₁tí₄ ta₁ ne₃, ia₁jaun₂ jang₅₄ jág₁ dsau₅ 'e₂ në₂jag₅₄ në₃, quian₅₄ a₂jag₅₄ gué₄

^r10 lit. “juin₅ lín₃ dsa₂ jñio₅.”

^s14 o₃, arameo.

cang₂ a₂jme₁jnia₅ jniá₂.¹⁷ Tsin₅₄ jniá₂ 'ne₂, jaun₂ gog'₅₄ ja₁con₂ dsi₂nau₂, jaun₂ jmo₅₄ bá₄ jniá₂ 'í₁ 'ne₂ ia₁jaun₂ tsá₃ jmóg'₂ dsa₂ juig₂, on₃ gué'₂ dsi₂nau₂ ně₃.¹⁸ Jaun₂ jui₅ ja₁con₂ dsa₂ 'éi₂ tsin₅₄ jniá₂ 'ne₂, ia₁jaun₂ le₃jnio₂ ne₄ dsa₂, ia₁jaun₂ 'uín₃ jē₄ qui₁né'₃, qui₃jéin'₃ ne₅₄ ja₁tág₅ si₂; ia₁jaun₂ tsá₃ lē₅ jua'₅₄ tioen'₅₄ gué'₄ 'éi'₃ quió'₅ Satanás, ia₁jaun₂ dsi₁lein₃ ja₁con₂ Diú₄, dsi₃'én₂ bá₄ dsáu₁, ia₁jaun₂ gue₃ jui₁lia'₂ a₂ca₂tín₂ dsa₂ i₂lē₅ 'í₁ quián₅ Diú₄, 'uig₅₄ ia₁ a₂'éin₂ le₃quió₃ jniá₂."

Ca₂jme₃ti₃ Pa₄ a₂ca₂jág₃ jaun₂

¹⁹ 'Jaun₂ le₂nē₅ bá₄, 'ne₂ gui'₅₄ Rag₅₄ Agripa, tsá₃ jua'₅₄ a₂tsá₃ ca₂jme₁ti₁₂ con'₂ lē₅ a₂ca₂jág₃ a₂jág₃ guei'₅₄.²⁰ Jaun₂ lē₃, jē₄ juig₂ Damasco ca₂'é₃ le₂'uig₅₄ jág₁ dse₃. Jaun₂ gué'₄ ca₂neg₅₄ jui₅ Jerusalén, le₂tan₅₄ juig₂ ja₁tén₄ 'uē₃ Judea ně₃. Ján₃ bá₄ ca₂neg₅₄ jin₄ dsi₂nau₂, ca₂i₁chei₁₂ a₂'nió'₅ dsi₃quén'₅ dsí₅, jéin'₃ le₃quió'₅ Diú₄, a₂jme₃li₅₄ a₂ma₂ca₂rē₃tsín₃ dsí₅ tē₂le₃ quian'₅₄ ca₂le₃jē₃ a₂jmo₂₃.²¹ 'Uig₅₄ jaun₂ bá₄ a₂ca₂jñau'₃ dsa₂ judíos jniá₂ i₁dsi₅ guá'₅ templo a₂jme₁'nio₃ jme₁jñag'₃.²² La₁ Diú₄ bá₄ jme₂'o₅₄ cué₂₃ bí₂ a₂chan'₅₄ tiá₂ jág₁ quió'₅ ca₂tē₂ jmig₄ ně₃, qui₂jáng'₅ jág₁ dsau₅ a₂juig₂ lia'₂ dsa₂ dsen₅₄ lia'₂ dsa₂ lē₁dsa₂ ně₃. 'I₁caun₂ jág₁ siá'₂ tsá₃ juig₂ jniá₂ dsa₂, jñia'₅₄ con'₂ lē₅ jág₁ ca₂juá'₂ dsa₂ i₂jme₁'é₂ jág₁ quián₅ Diú₄ ma₂líg'₂, quian'₅₄ a₂ca₂juá'₂ Moisés, jme₁ca₂juá'₂ ca₂le₃jē₃ 'e₂ niog₅ lē₂,²³ co₂'nió'₄ a₂tion₅₄ 'nió'₅ nág₃ uig₅ I₂rē₂'ín₁ quián₅ Diú₄; jaun₂ 'éi₂ bá₄ lén₂ i₂le₂'uig₅₄ i₂jen'₅₄ jin₄ 'lag₄, ia₁jaun₂ dsi₃'é₃ jág₁ dse₃ a₂lión₂ dsa₂, jui₁lia'₂ caun₂ si₂ a₂tág₅ lia'₂ jin₄ dsa₂ juig₂ quián₂ jnia'₅₄, lia'₂ jin₄ dsi₂nau₂ ně₃.

Ca₂jmo₃ Pa₄ bí₂ a₂jme₁le₂'én₂ Rag₅₄ Agripa tē₂le₃ quió'₅ Jesús

²⁴ Jme₁ca₂juá'₂ Pa₄ jág₁ jaun₂ a₂jme₁lióin₂ 'ñiog₅ ne₄ dsi₂tan₅₄, jaun₂ ca₂guió'₃ Dsi₄má'₂ Festo ca₂juá'₂:

—iA₂lē₁tē₂'i'₂ bá₄ 'ne₂, Pa₄! Ia₁ a₂ñí₄ lē₃ 'i'₂ si₂, jaun₂ ma₂ca₂rē₃jág'₅.

²⁵ Jaun₂ ca₂ñag₃ táng₃ Pa₄:

—Tsá₃ nág₅ jniá₂, 'ne₂ gui'₅₄ Dsi₄má'₂ Festo. Jág₁ dsau₅ dsón'₂ bá₄ a₂juá'₅ jniá₂ la₂.²⁶ La₂ bá₄ guá₅ gui'₅₄ Rag₅₄ Agripa i₂cuí'₅ dse₃ 'a₂ lia'₂ lē₅ jág₁ ně₅. A₂jaun₂ bá₄ lē₃ tiá₂ dsi₃ a₂juá'₅ ne₅₄, ia₁ dsón'₂ ñi₅ ca₂le₃jē₃ jág₁ ně₅, ia₁ on₃jua'₅₄ a₂ca₂lē₃ caun₂ ja₁quióng₄ con'₂ tē₃co'₅₄.²⁷ 'Én'₂ 'ne₂ gui'₅₄ Rag₅₄ Agripa jág₁ a₂ca₂juá'₂ dsa₂ i₂jme₁'é₂ jág₁ quián₅ Diú₄? Guion₄ bá₄ jniá₂ a₂'én'₂ 'ne₂.

²⁸ Jaun₂ ca₂ñag₃ Rag₅₄ Agripa:

—Ca₂juig₄ mei'₂ tsá₃ jme₂'uang'₅₄ dsi₃ a₂lég₂ jan₂ dsa₂ cristiano.

²⁹ Jaun₂ ca₂juá'₂ táng₃ Pa₄:

—Chi₂jua'₂ ca₂juig₄ o₃ tsá₃ ca₂juig₄ 'e₂, 'e₂ gué₄ dse₃ ně₁jua'₂ jmo₃ Diú₄ on₃jua'₅₄ jmá'₃ 'ne₂, ján₃ bá₄ le₂jaun₂ ca₂le₃jín₃ dsa₂ i₂nag₅ jág₁ quió₃ ně₃, a₂lén₂ jui₁lia'₂ lín₅ jniá₂, o₁jñia'₅₄ gué₄ on₃jua'₅₄ quian'₅₄ ñi₁ñí₁ cadena jui₁lia'₂ chén'₅ jniá₂ la₂.

³⁰ Jme₁ma₂ca₂lë₃ juá'₂ Pa₄ le₂jaun₂, ca₂nau₂ Rag₅₄ Agripa quian'₅₄ Dsi₄má'₂ Festo, 'io₅₄ Berenice né₃, ca₂'uiin₂ co₂lë₅ quian'₅₄ ca₂le₃jín₃ gué₄ dsa₂ i₂jme₁tion'₅₄. ³¹ Con'₂ ca₂i₃lëin₂ cau₅, ca₂i₁dsia₂ 'a₂ lia'₂ jmo₃ jág₁ jaun₂ quió'₅ Pa₄, jaun₂ ca₂juá'₂ ca₂tsí'₃ riin'₅₄:

—'I₁ca₂juig₄ tsá₃ 'e₂ ma₂jmo₃ dsa₂ në₅, jua'₅₄ a₂ca₂tín₂ 'i₄ 'éi'₃ jóin₂, on₃ gué'₂ jua'₅₄ a₂dsi₂ten₅₄ 'ein₅₄ né₃ 'má₃ né₃.

³² Jaun₂ ca₂juá'₂ Rag₅₄ Agripa ca₂tsí'₃ Dsi₄má'₂ Festo:

—Jme₁lé₂ bá₄ jme₁lión₂ dsa₂ në₅, jua'₅₄ mei'₂ gué₃ tsá₃ ca₂mi₃ 'ñiog₅ a₂jme₃rë₃ gui'₅₄ emperador jág₁ quió'₅.

Ca₂dsián'₂ dsa₂ Pa₄ jui₅ Roma

27 ¹ Jme₁ca₂jmo₃ dsa₂ jág₁ a₂chei₃ jnia'₅₄ jui₅ 'uë₃ Italia, jaun₂ Pa₄ quian'₅₄ gué₄ dsa₂ i₂le₁'ñe'₅₄ riin'₅₄ ca₂jáng'₂ dsa₂ o₄gú₃ jan₂ juig₅₄ 'lióg₂ i₂chen₂ Julio, i₂tén₅ të₂le₃ quió'₅ co₂nió'₃ 'lióg₂ i₂të'₂ dsa₂ quián₅ Augusto. ² Jaun₂ ca₂tió'₄ jnia'₅₄ caun₂ ni₁barco a₂já₃ jui₅ 'o₄ jmi₁ñí'₄ ja₁chei₂ Adramitio a₂jme₁ma₂chí'₅ dsáu'₃ jui₅ 'o₄ jmi₁ñí'₄ a₂niog₅ 'uë₃ Asia. Jme₁quian'₅₄ jnia'₅₄ Aristarco dsa₂ chan₂ Tesalónica, juig₂ tén₅ 'uë₃ Macedonia. ³ Jme₁jnia₃ táng₃ jaun₂, ca₂dsi₃náu₅ jnia'₅₄ 'o₄ jmi₁ñí'₄ juig₂ Sidón. Ja₁jaun₂ ca₂dsia₃ néi₂ dsí₅ Julio ja₁con₂ Pa₄, ca₂cuë₃ bá₄ jmi₄ca₂i₁jiin₁₂ a₂mei₅₄ quián₅, ia₁jaun₂ jme₃'o₅₄ 'éi₂ 'e₂ a₂'nió'₅ quió'₅. ⁴ Jme₁ca₂'uag₂ jnia'₅₄ juig₂ Sidón, ca₂i₃náu₅ jnia'₅₄ jui₅ ja₁jniá₂ Chipre të₂le₃ gu₂ jen₅, ia₁ të₂le₃ siá'₂ bá₄ jme₁'ei₅ dsí₂. ⁵ Jaun₂ ca₂ñag₅₄ jnia'₅₄ jmi₁ñí'₄ chei'₅₄ 'uë₃ Cilicia quian'₅₄ Panfilia. Jaun₂ dsi₃náu₅ jnia'₅₄ ja₁chei₂ Mira, juig₂ tén₅ 'uë₃ Licia.

⁶ Ja₁jaun₂ ca₂dsó'₂ juig₅₄ 'lióg₂ caun₂ ni₁barco já₃ juig₂ Alejandría, a₂ma₂'i₄ jui₅ dsáu'₅ jui₅ Italia. Jaun₂ ca₂jmo₃ 'éi'₃ ca₂tió'₄ jnia'₅₄ ni₁barco, jaun₂ ca₂i₃náu₅ táng₃. ⁷ 'Lióng₂ jmi₄ca₂tió'₄ jnia'₅₄ ni₁barco, ia₁ a₂i₃náu₅ të₂'ua₁. Jaun₂ të₃ quian₅ ta₁ le₂jaun₂ bá₄ dsi₃náu₅ ja₁chei₂ Gnido. Ia₁ lia'₂ ma₂'ei₅ jaun₂ bá₄ dsí₂ le₃siá'₂, jaun₂ ca₂ñag₅₄ jnia'₅₄ cau₅ ja₁chei₂ Salmón, ca₂i₁jein'₅₄ le₃ja₁chei₂ Creta, 'uë₃ 'i₄ jë₄ jmi₁ñí'₄. ⁸ Jaun₂ të₃ quian₅ ta₁ le₂jaun₂ bá₄ ca₂dsi₃náu₅ jnia'₅₄ ja₁të'₂ dsa₂ 'O₄ Jmi₁ñí'₄ Dse₃, ja₁ma₂quián₅ juig₂ Lasea.

⁹ 'Lióng₂ jmi₄ca₂rë₃'ag₄ jnia'₅₄. Ma₂të₂ jein₂ a₂ma₂go'₂ i₃nio₄ dsa₂ jui₅ ne₄ jmi₁ñí'₄, ia₁ a₂ma₂ja₂quián₃ jein₂ güí₂. Jaun₂ lë₃, jme₁ca₂juá'₂ Pa₄ ca₂tsí'₃ dsa₂:

¹⁰ —'Nia'₂ dsa₂, jág₅ jniá₂ 'ñio₅ ma₂go'₂ quián₂ jniog₄ të₂le₃ ja₁dsau₅₄ në₅, ia₁ dsi₃'én₂ ni₁barco, lio₅₄ në₃, ca₂të₂ guio₅₄ jniog₄ go'₂ dsióg₃ në₁jua'₂ 'e₂ ca₂lë₃.

¹¹ La₁ juig₅₄ 'lióg₂ në₃, tsá₃ jui₅ ca₂tón'₃ jág₁ jaun₂ quió'₅ Pa₄. Ca₂tón'₃ bá₄ jui₅ jág₁ quió'₅ dsa₂ juig₅₄ ni₁barco quian'₅₄ dsa₂ i₂quian₄ ni₁barco në₃. ¹² Ia₁ tsá₃ dse₃ 'o₄ jmi₁ñí'₄ jaun₂ jua'₅₄ a₂jnia₃ dsa₂ jein₂ güí₂ ja₁jaun₂, jaun₂ mei'₂ tsá₃ ca₂le₃jín₃ dsa₂ ca₂jmo₃ jág₁ a₂jme₁dsi₁náu₄ jui₅ ja₁tág'₄ juig₂ Fenice, caun₂ 'o₄ jmi₁ñí'₄ quió'₅ Creta ja₁jniá₂ të₂le₃

noroeste quian'₅₄ të₂le₃ suroeste, ia₁jaun₂ dsi₁jñia₁ jnia'₅₄ ja₁jaun₂ të₁lia'₂ ñag₅ jein₂ gü₂g₂.

Ca₂'ág₂ dsí₂ tiá₂ lin₃ ne₄ jmi₁ñí'₄

¹³ Jaun₂ ca₂jme₃lióg₃ ca₂'ág₂ dsí₂ 'ua₁ a₂já₃ të₂le₃ sur. Jaun₂ caun₂ lé₂ dsi₃lén₂ bá₄ lín₂. Jaun₂ ca₂'uñ₂ jaun₂ ně₃, ca₂i₃lén₂ jui₅ ma₂quían₅ chei'₅₄ 'uě₃ Creta. ¹⁴ La₁ jme₁co₂lág₂ jaun₂, ca₂já₃ dsí₂ tiá₂ lin₃ a₂chei₂ Nordecte ca₂tě₂ ni₁barco. ¹⁵ Jaun₂ ca₂jio₃ dsí₂ le₃siá'₂ quió'₅ ni₁barco, ia₁ tsá₃ ma₃lé₂ jua'₅₄ dsau₅₄ jnia'₅₄ co₂dsau₅, jaun₂ co₂ñei'₅₄ ca₂cué₁ jnia'₅₄ jmi₄ a₂jio₃ dsí₂. ¹⁶ Jaun₂ ca₂ñag₅₄ jnia'₅₄ le₃co'₅₄ caun₂ 'uě₃ pí'₁ ja₁chei₂ Cauda^t a₂nio₅ jě₄ jmi₁ñí'₄. Ja₁jaun₂ tsá₃ lin₄ ma₃'ei₅ dsí₂ tiá₂, jaun₂ të₃ quian₅ ta₁ le₂jaun₂, ja₂lag₃ bá₄ ca₂tián₃ jnia'₅₄ a₂ca₂quiong₅₄ táng₃ tsi₁mu₅ a₂jme₁le₁ 'in₁ le₃chi₁co'₅₄. ¹⁷ Jme₁ca₂lě₃ ca₂tó'₂ dsa₂ tsi₁mu₅ guei'₅₄ 'ñió'₃ ni₁barco, jaun₂ qui₂ca₂'néi₂ dsa₂ dse₃ ni₁barco quian'₅₄ tsi₁'nei₅₄ ia₁jaun₂ jmo₃ bén₂ gué₄. Jaun₂ ia₁ jme₁gó'₅ dsa₂ a₂'í₂ ni₁barco ne₄ ti₁tsag₁ ja₁tě'₂ dsa₂ Sirte, jaun₂ ca₂sió₂ tsi₁'mí'₂ quió'₅ ni₁barco, jaun₂ ca₂cuě₃ jmi₄ a₂jio₃ dsí₂. ¹⁸ Jme₁jñia₃ jaun₂, ia₁ tiá₂ bá₄ gué₄ 'ei₅ dsí₂, jaun₂ ca₂jme₃lióg₃ qui₂ca₂tó'₂ lio₅₄ ne₄ jmi₁ñí'₄. ¹⁹ Jme₁ca₂tě₂ 'ni₅ jmi₄, jaun₂ guio₅₄ jnia'₅₄ quian'₅₄ gu₂ qui₂ca₂tio'₅₄ dsi₂jmi₂ le₂jio₅ a₂jmo'₂ ta₁ ni₁barco 'ñiog₅. ²⁰ 'Lióng₂ jmi₄ tsá₃ ma₃ca₂jñia₃ 'iog₂, on₃ guě'₂ nei₅ ně₃. Tsá₃ ma₃lág₂ jnia'₅₄ jua'₅₄ a₂tág'₄ gué₄, ia₁ a₂ñí₄ lě₃ tiá₂ jme₁'ei₅ dsí₂.

²¹ Ia₁ ma₂ne₁ñó₄ 'lióng₂ jmi₄ tsá₃ ma₃'ein₂ jnia'₅₄ gué'₅, jaun₂ ca₂nau₂ Pa₄ jě₄ quió'₅ dsa₂ 'éi₂, jaun₂ ca₂juá'₂:

—'Nia'₂ dsa₂, dse₃ jua'₅₄ co₂ñei'₅₄ ca₂tion'₂ bá₄ 'nia'₂ jui₅ jág₁ quió₃ a₂tsá₃ jme₁'uág₃ Creta. Jñia'₅₄ ca₂i₃'én₂ bá₄ quían₂, ton'₂ ca₂ñag₅₄ rě'₂ uig₅ ně₃. ²² La₁ ně₃ ně₃, quen'₂ 'nia'₂ bí₂, ia₁ 'i₁jan'₂ 'nia'₂ tsá₃ 'ein₂ dsián₃, o₁jñia'₅₄ dsi₃'én₂ ni₁barco. ²³ Ia₁ a₂'uě₂ la₂ ně₂jme₃jñia₅ jan₂ ángel ne₃, i₂chen₄ quían₅ Diú₄ i₂jme₂tí₁ jniá₂ ne₅₄. ²⁴ Jaun₂ ně₂juá'₂ ángel ně₂chéi₃ jniá₂: “Tsá₃ lě₁jmo₂ gang'₃ Pa₄, ia₁ tion₅₄ niog₅ bá₄ gog'₅₄ a₂jme₁jñiag'₂ ne₄ gui'₅₄ emperador romano. 'Uig₅₄ quían'₂ 'ne₂ bá₄ a₂lión₂ Diú₄ ca₂le₃jín₃ dsa₂ i₂quiang'₅₄ 'ñió'₃ barco, tsá₃ ma₃dsián₃.”

²⁵ Jaun₂ lě₃, 'nia'₂ rin'₅₄ jniog₄, quen'₂ 'nia'₂ bí₂, tsá₃ jmo₂ 'nia'₂ o₂i₁ dsi₅. Ia₁ dsón'₂ bá₄ 'én₂ jniá₂ të₂le₃ quió'₅ Diú₄ a₂tion₅₄ jmo₃ con'₂ lě₅ jág₁ a₂ně₂juá'₂ ángel ně₂chéi₂ jniá₂. ²⁶ La₁ tion₅₄ niog₅ dsi₁tió'₄ bá₄ jniog₄ caun₂ 'uě₃ dsi₂jo₂ jmi₁ñí'₄.

²⁷ Caun₂ 'uě₂ jme₁ma₂tě₂ tin₃ semanas a₂tio'₅₄ jnia'₅₄ jui₅, lia'₂ ma₂jio₅ jaun₂ bá₄ dsí₂ ne₄ Jmi₁ñí'₄ Adria,^u jme₁ca₂rě₃lí'₄ dsa₂ i₂quian₅ ni₁barco con'₂ dsi₃nei₅ jaun₂, a₂ja₂quían₃ dsi₁lén₂ 'uě₃. ²⁸ Jaun₂ ca₂can₃ dsa₂ 'éi'₃ 'a₂ con'₂ jì'₂ gué₄ jmi₂. Jme₁ca₂jág₃ dsa₂, con'₂ guióg₂-guiá₂-jñéi₂ (36) metros bá₄ jì'₂ gué₄. Ca₂juig₄ gué₄ le₃cau₅ jaun₂ ca₂can₃ táng₃ dsa₂ 'éi'₃.

^t16 A₂lin₅₄ chog₅₄ si₂: “Clauda.”

^u27 o₃, “Jmi₁ñí'₄ Mediterráneo.”

Jme₁ca₂jág₃ táng₃, guióg₂-guio₃ (27) metros bá₄ tí₅ gué₄ jì₂. ²⁹ Ia₁ a₂gó₅ dsa₂ jná₃ nì₁ barco con₂ tiá₂ dso₂ nì₁ cang₁ 'lau₂, jaun₂ ca₂sió₂ le₃chi₁co₅₄ nì₁ barco quén₂ nì₁ nì₁ 'lá₁ guei₂ quian₅₄ tsi₁ 'nei₅₄ jui₅ né₃ jmi₁ nì₁ 'lá₁. Të₃ tion₅₄ dsa₂ gó₅ le₂ jaun₂, qui₂ca₂chi₃lén₂ Diú₄ a₂jnia₃. ³⁰ Të₁ lia₂ jaun₂, jme₁ma₂dsi₂jio₅ dsí₅ dsa₂ i₂quian₅ nì₁ barco a₂jme₁cuíng₃. Qui₂ca₂sió₂ tsi₁mu₅ ne₄ jmi₁ nì₁ 'lá₁, a₂jmo₂₃ jui₁lia₂ a₂tioin₅₄ tó₅ nì₁ nì₁ guei₂ të₂le₃ ne₄ nì₁ barco. ³¹ La₁ jaun₂ ca₂juá₂ Pa₄ ca₂tsí₃ jui₅₄ 'lióg₂ quian₅₄ ca₂le₃jín₃ gué₄ 'lióg₂ né₃, ca₂juá₂:
 —Në₁jua₂ tsá₃ jnia₅ i₂në₅ 'nìó₃ nì₁ barco, tsá₃ jaun₂ líón₂ 'nia₂.
³² Jaun₂ qui₂ca₂ti₃ 'lióg₂ 'nei₅₄ a₂jme₁chi₁quian₅ tsi₁mu₅, ca₂tá₂ jaun₂ né₃ ne₄ jmi₂.
³³ Të₂ o₃'iog₂ lín₃, ca₂juá₂ Pa₄ ca₂tsí₃ ca₂le₃jín₃ dsa₂ a₂'nió₅ gué₃.
 Jaun₂ ca₂juá₂:
 —Ma₂të₂ tìn₃ semanas a₂tsá₃ ma₂güin₂ 'nia₂ on₃ gué₂ ma₂quë₂.
³⁴ Jaun₂ lë₃ juá₅ jniá₂, qué₂ 'nia₂ ca₂la₂. Tion₅₄ 'nió₅ quë₅₄ 'nia₂ ia₁jaun₂ bá₄ líón₂ 'nia₂. 'I₁jan₂ jniog₄ tsá₃ 'ein₂ dsi₂'én₂ ja₁lá₃. Ca₂lia₂ jnia₅₄ ca₂mi₂ jni₂ dsi₄ jniog₄ tsá₃ 'e₂ dsi₃'én₂.
³⁵ Dsi₂jui₅ jme₁ca₂juá₂ Pa₄ le₂në₅, ca₂can₃ i₁nì₁ jaun₂ ca₂cué₃ ti₁'mag₄ Diú₄ të₃ jág₅ dsa₂ ca₂le₃jín₃. Jaun₂ ca₂dsion₃ Pa₄ i₁nì₁ ca₂gué₃ jaun₂ né₃. ³⁶ Jaun₂ ca₂le₃jín₃ dsa₂ ca₂tín₃ táng₃ bí₂ jme₁ma₂në₂gué₃.
³⁷ Ca₂le₃jág₃ jnia₅₄ con₂ jme₁tio₅₄ nì₁ barco jme₁téi₄ tìn₃ 'niá₂-lón₂ rë₂dsí₂ 'nag₂ co₂ne₂guióg₂ rë₂dsí₂ guia₃-jñé₂ (276) dsa₂. ³⁸ Jme₁ca₂lí₃ gué₅ dsa₂ con₂ jme₁'nio₃, jaun₂ ca₂guia₃ lio₅₄ trigo ne₄ jmi₁ nì₁ 'lá₁ ia₁jaun₂ sión₂ gué₄ guei₂ nì₁ barco.

Ca₂i₃guen₅₄ nì₁ barco né₃ jmi₁ nì₁ 'lá₁

³⁹ Jme₁jnia₃ jaun₂, dsa₂ i₂quian₅ nì₁ barco tsá₃ ca₂rë₃cuí₅ 'uë₃ jaun₂. La₁ jaun₂ ca₂jág₃ caun₂ dsio₅ jmi₁ nì₁ 'lá₁ a₂nio₅ jë₄ 'uë₃, ja₁'ei₅ tei₄ gué₄ jmi₂. Chei₅₄ jaun₂ tio₅₄ 'lióng₂ ti₁tsag₁ ja₁lë₄ jo₂ gué₄. Jaun₂ ca₂'náu₃ dsí₅ chi₂jua₂ lé₂ jnióg₃ nì₁ barco ca₂të₂ jaun₂. ⁴⁰ Jaun₂ ca₂ti₃ 'nei₅₄ a₂jme₁le₁quian₅ nì₁ nì₁ 'lá₁. Né₃ jmi₁ nì₁ 'lá₁ jaun₂ bá₄ ca₂tí₂ dsa₂ nì₁ nì₁ jaun₂. Qui₂ca₂jiá₂ dsa₂ 'ma₂ a₂jmo₅ dsó₃ nì₁ barco 'a₂ jui₅ 'nio₃ dsa₂. Jaun₂ ca₂chóg₃ tsi₁'mì₂ le₃ne₄ jui₅ quió₅ nì₁ barco, ia₁jaun₂ të₃ dsí₂. Jaun₂ dsi₂jui₅ bá₄ ca₂jme₃lióg₃ ca₂ni₃ nì₁ barco ca₂jme₃quián₃ le₃chei₅₄ 'uë₃ ja₁lë₄ ti₁tsag₁. ⁴¹ La₁ jui₅ ja₁nó₃ nì₁ barco jaun₂ ca₂dsi₃quén₅ caun₂ ja₁lë₄ tìn₃ ne₅₄ la₅₄ ja₁'ei₅ tiá₂ jmi₂. Të₂le₃ ja₁lë₄ le₃ne₄ jui₅ quió₅ nì₁ barco ca₂i₃'ó₅ jë₄ ti₁tsag₁, ca₂quí₃ tiá₂ lín₃, ca₂lia₂ tsá₃ ma₃ca₂tió₃ dsa₂ dsí₃. Jaun₂ le₃ja₁lë₄ le₃chi₁co₅₄, qui₂ca₂juín₃, ia₁ a₂nì₁ lë₃ tiá₂ qui₂jná₅ jmi₁ nì₁ 'lá₁. ⁴² Jme₁'nio₃ 'lióg₂ jme₃dsiain₂₃ dsa₂ i₂nio₅ gu₂ 'éi₂ ia₁jaun₂ tsá₃ lióin₂ jë₁ma₂qui₂ca₂'ain₂ jmi₂. ⁴³ La₁ tsá₃ ca₂cuë₃ jmi₂ jui₅₄, ia₁ 'nio₃ lióin₂ Pa₄. Jaun₂ ca₂jmo₃ 'éi₃ ca₂tsí₃ ca₂le₃jín₃ dsa₂ i₂tín₂ qui₃dsi₅ jmi₂, jui₁tioin₅₄ jmi₂ le₂'uig₅₄ ia₁jaun₂ tñín₄ 'uë₃; ⁴⁴ dsa₂ sián₂

gué₄ né₃, jui₁'ain₅₄ jmi₂ le₁chan'₂ jau₅₄ 'ma₂, o₃ ni₁'nau₅₄ quió'₅ ni₁barco
'e₂. Le₂jaun₂ bá₄ ca₂lë₃ qui₂ca₂ló₂ jnia'₅₄ a₂ca₂tág'₃ táng₃ 'uë₃.

'En₅₄ Pablo 'uë₃ Malta a₂nio₅ jë₄ jmi₁ñí'₄

28 ¹ Jme₁ma₂ca₂ló₂ jnia'₅₄ ca₂le₃jág₃, jaun₂ gué₄ ca₂rë₃ne₄ jnia'₅₄
a₂chei₂ Malta 'uë₃ jaun₂, a₂nio₅ jë₄ jmi₁ñí'₄. ² Dsa₂ chan₂
ja₁jaun₂ ca₂jmo₃ bá₄ dse₃ dsí₅ ja₁con₂ jnia'₅₄. Ca₂dsia₃ dsa₂ si₂ pa₁ jaun₂
ca₂të₃ jnia'₅₄ a₂jme₁dsion'₂, ia₁ a₂ñí₄ lë₃ güí₂, dsó₅ jmi₅ né₃. ³ Pa₄ gué'₂
né₃ qui₂ca₂cág'₃ ni₁'ma₂ quein₂. Lia'₂ con'₂ jme₁'ein₅₄ tó'₅ dsi₂si₂, con'₂
tsá₃ jáin₅ ca₂o₃'ín₃ jan₂ dsi₂mi'₂ a₂cuíng₂₃ jme₁ca₂'é'₂ dséi₂ quió'₅,
ca₂chi₃dséin₂ mi₂gu₂ Pa₄. ⁴ Jme₁ca₂jág₃ dsa₂ chan₂ ja₁jaun₂ 'en₅₄ dsi₂mi'₂
chi₁dsein₅₄ mi₂gu₂ 'éi₂, qui₂ca₂dsia₃ jág₁ guioin₅₄ qui₂ca₂tsí'₃ riin'₅₄:

—I₂ma₂jñi'₃ dsa₂ bá₄ dsa₂ në₅. O₁jñia'₅₄ la₂ ca₂lón₂ ne₄ jmi₁ñí'₄, la₁
tsá₃ 'i₄ 'éi'₃ a₂le₃chain₂ gué₄.

⁵ La₁ qui₂ca₂bí₂ Pa₄ mi₂gu₂ jaun₂ né₃, ca₂tán'₂ dsi₂mi'₂ dsi₂si₂. La₁ tsá₃
'e₂ ca₂jén'₃ Pa₄ 'i₁ca₂juig₄. ⁶ Ca₂le₃jín₃ dsa₂ jme₁le₁jñia₂₃ guióng₃ dsi₂jui₅
quió'₅ Pa₄, o₃ jme₁dsi₃'iin₅ 'e₂, jón₂ dsi₂jui₅. La₁ jme₁co₂lág₂ jaun₂, ia₁
ca₂jág₃ tsá₃ 'e₂ i₁jén'₄ gué'₂ Pa₄, jaun₂ ca₂i₃jio₅ dsí₅ të₂le₃ siá'₂,
qui₂ca₂tsí'₃ riin'₅₄ a₂lín₅ Pa₄ jan₂ diú₄.

⁷ Cau₅ jaun₂ jme₁ron₅ 'uë₃ quió'₅ dsa₂ dsen₅₄ quián₅ dsa₂ chan₂
ja₁jaun₂, dsa₂ i₂chen₂ Publio. Ca₂jmo₃ dse₃ dsí₅ ca₂ag'₃ jnia'₅₄, 'ni₅ jmi₂g₄
ca₂tág₃ jnia'₅₄ ja₁quió'₄. ⁸ Jme₁ Publio 'éi₂ jme₁ron₅ dso'₅₄ 'i₄ dséi₂,
a₂tag₂₃ jmi₂ né₃. Pa₄ né₃ ca₂ñei₅₄ ca₂i₁jñin₁₂ dsa₂ dso'₅₄ 'éi₂.
Jme₁ma₂në₂chi₃lén'₂ Diú₄, jaun₂ gué₄ ca₂quiog₂ gu₂ ne₄ quió'₅ dsa₂
dso'₅₄, ca₂jme₃'lió₂. ⁹ Jme₁ca₂lë₃ le₂jaun₂, caun₂ ca₂dsi₃lén₂ bá₄ dsa₂
dso'₅₄ sián'₂ i₂chan₂ 'uë₃ jaun₂, caun₂ ca₂jme₃'lió₂ bá₄ gué'₂ Pa₄. ¹⁰ 'Io'₂
ca₂jmo₃ dsa₂ quian'₅₄ jnia'₅₄. Jaun₂ ca₂cuë₃ dsa₂ ca₂le₃jé₃ 'e₂ 'nió'₅ quián₂
jnia'₅₄ jë₁ma₂të₂ rë₁tió'₄ táng₃ jnia'₅₄ jui₅.

Ca₂dsió₃ Pa₄ jë₄ juig₂ Roma

¹¹ Cang₂ jme₁ma₂ca₂ñí₂ 'ni₅ tsi'₂, jaun₂ ca₂tió'₄ táng₃ jnia'₅₄ caun₂
ni₁barco a₂jme₁chí'₄ ja₁jaun₂ të₁lia'₂ jein₂ güí₂. Ni₁barco jaun₂ ca₂já₃
juig₂ Alejandría. Guei'₅₄ ni₁barco jaun₂ jme₁tióng₂ nió'₅ quió'₅ diú₄
Cástor quian'₅₄ diú₄ Pólux.^v ¹² Ca₂dsi₃náu₅ jnia'₅₄ 'o₄ jmi₁ñí'₄ juig₂ chei₂
Siracusa. Ja₁jaun₂ ca₂jñia₄ jnia'₅₄ 'ni₅ jmi₂g₄. ¹³ Ca₂'uag₂ jnia'₅₄ ja₁jaun₂,
ca₂i₁ñag₅₄ jnia'₅₄ quián₅ chei'₅₄ 'uë₃ ca₂lia'₂ ca₂dsi₃náu₅ të₂ ja₁chei₂
Regio. Jme₁jñia₃ jaun₂, ca₂'ág₂ dsí₂ a₂já₅ të₂le₃ sur. Jë₁ca₂të₂ tin₃ jmi₂g₄
gué₄ ca₂dsi₃náu₅ jnia'₅₄ ca₂të₂ juig₂ Puteoli. ¹⁴ Ja₁jaun₂ ca₂jen'₂ jnia'₅₄
i₂lín₅₄ dsa₂ rin'₅₄ i₂'én₂. I₂'éi₂ ca₂të₃ jnia'₅₄ ca₂i₁jñia₁ jë₄ quió'₅ caun₂
semana. Jaun₂ gué₄ ca₂i₃náu₅ jnia'₅₄ jui₅ Roma. ¹⁵ Ca₂le₃jín₃ dsa₂ rin'₅₄

^v11 griego: Dioskouri, co₂'nió'₄ le₃jua'₅₄ on₃ dsa₂ tsin'₅₄ i₂lín₅ ja₁ñi'₅₄ diú₄ Zeus quian'₅₄
Leda. Co₂'nió'₄ diú₄ patrón quián₅ ni₁barco.

i₂tíán'₅ Roma jme₁ma₂le₁ñi₅ a₂dsi₁náu₅ jnia'₅₄. Jaun₂ i₁lein₅₄ i₁jniog₁₂ le₂i₄ jui₅ ca₂të₂ ja₁chei₂ Foro de Apio quian'₅₄ ja₁të'₂ dsa₂ Las Tres Tabernas. Jme₁ca₂jág₃ Pa₄ ca₂jín₂ dsa₂ 'éi₂, jaun₂ ca₂cué'₃ ti₁'mag'₄ Diú₄ ca₂tín₂ táng₃ bí₂ ca₂lág₃ dsí₅.¹⁶ Jme₁ca₂dsi₃náu₅ jnia'₅₄ Roma, [ja₁jaun₂ gué'₄ ca₂jáng'₂ juig₅₄ 'lióg₂ ca₂jín'₂ ne₄ juig₅₄ 'lióg₂ i₂jmo₅ 'í₁ ja₁jaun₂ ca₂le₃jín₃ dsa₂ i₂jñiai₂₃ i₂niog₅ gu₂. La₁]'' Pa₄ né₃ ca₂cué₃ juig₅₄ 'lióg₂ jmig₄ a₂guá₃ 'éi₂ ja₁siá'₂ con'₂ 'ñiog₅ quian'₅₄ jan₂ 'lióg₂ i₂jmo₃ 'í₁ quió'₅.

Ca₂'é₂ Pa₄ jág₁ dse₃ juig₂ Roma

¹⁷ 'Ni₅ jmig₄ cang₂ jme₁ca₂dsióg₃ Pa₄ juig₂ Roma, ca₂të'₃ ca₂le₃jín₃ dsa₂ dsen₅₄ quián₅ dsa₂ judíos juig₂ jaun₂. Jme₁ma₂le₁ñi'₂ dsa₂, jaun₂ ca₂juá'₂ Pa₄:

—Rin'₅₄ jniog₄, o₁jñia'₅₄ gué'₄ tsá₃ 'e₂ ma₂ca₂jmo₃ jniá₂ ja₁con₂ dsa₂ judíos, on₃ gué'₂ jua'₅₄ cha₂ a₂ma₂ca₂jmo₃ quian'₅₄ tag₄ chí'₅ quió'₅ dsa₂ quián₂ jniog₄ ma₂líg'₂, tion₅₄ bá₄ a₂lë₁ca₂jáng'₂ dsa₂ jniá₂ chi₁'ñeg₂₃ o₄gú₃ dsa₂ romanos.¹⁸ Jaun₂ jme₁ca₂ñag₃ dsa₂, tsá₃ 'e₂ dsáu₅ jniá₂ ca₂dsó'₂, jua'₅₄ a₂'i₄ 'éi'₃ jóng₂. Jaun₂ jme₁'nio₃ jme₁lió₂.¹⁹ La₁ dsa₂ judíos tsá₃ cán₂ jág₁. Jaun₂ bá₄ lë₃ ca₂mi₃ jniá₂ a₂'nio₃ jme₃rë₃ gui'₅₄ emperador, on₃jua'₅₄ ia₁ a₂cha₂ dso₄ jme₂cán'₂ jniá₂ dsa₂ go₃.²⁰ 'Uig₅₄ jaun₂ bá₄ në₂të₃ jniá₂, ia₁ a₂'nio₃ jing₅₄ 'nia'₂, a₂'nio₃ dsia₅₄ jág₁ quian'₅₄ 'nia'₂. Ia₁ 'uig₅₄ jág₁ quió'₅ Diú₄ a₂'éin₂ jniog₄ con'₂ dsa₂ lág₅ israelitas, 'uig₅₄ a₂'ín₂ dsi₅ jniog₄ a₂jme₃ti₃ Diú₄ jág₁ quió'₅ a₂ma₂cué₃, 'uig₅₄ jaun₂ bá₄ chi₁'ñe'₅₄ jniá₂ ni₁ñí₁ cadena la₂.

²¹ Jaun₂ ca₂ñag₃ dsa₂ ca₂tsí'₃ Pa₄:

—Tsá₃ 'e₂ si₂ ma₂ca₂gú'₃ ne₄ jnia'₅₄, quió'₅ dsa₂ chan₂ Judea, a₂'iin₂₃ 'ne₂. On₃ gué'₂ 'i₁jan₂ dsa₂ rin'₅₄ jniog₄ dsa₂ judíos i₂ja₂lén₂ ja₁jaun₂ jua'₅₄ a₂ma₂juá'₂ 'iin₂₃ 'ne₂ 'líg'₅₄.²² 'Niog₂ jnia'₅₄ néi₁ 'a₂ gué'₂ lia'₂ lë₅ jág₁ quián'₂ 'ne₂ chi₂jua'₂ 'a₂ lia'₂ líng'₂. Ia₁ ne₄ bá₄ jnia'₅₄ jág₁, ta₁caun₂ mi₂güí₃ bá₄ dsia₅ dsa₂ tsá₃ të₅ dsí₅ jág₁ 'mí₂ në₅ a₂'én'₂ 'nia'₂.

²³ Jaun₂ né₃, ca₂jmo₃ dsa₂ jág₁ ca₂tióng₃ caun₂ jmig₄. Jmí₄ jaun₂ né₃ ca₂dsi₃lén₂ juín₅ dsa₂ ja₁'en₅₄ Pa₄. Jaun₂ ca₂jme₂lióg₃ ca₂'é'₃ dsa₂ të₃ o₃'iog₂ jág₁ jui₁lia'₂ ja₁gon₂ Diú₄, qui₂ca₂dsia₃ ca₂lia'₂ ca₂jen₃ 'iog₂ të₂le₃ ca₂'láu₂. Të₂le₃ quian'₅₄ 'Éi'₃ Juá'₅ quió'₅ Moisés, quian'₅₄ ca₂le₃jé₃ gué'₄ Si₂ quió'₅ dsa₂ i₂jme₁'é₂ jág₁ quián₅ Diú₄ né₃, qui₂ca₂cué'₃ dsa₂ jág₁ dsau₅ ia₁jaun₂ le₃'én₂ dsa₂ 'éi₂ të₂le₃ quió'₅ Jesús.²⁴ I₂lin₅₄ dsa₂ ca₂gue₃ bá₄ jág₁ a₂ca₂juá'₂ Pa₄ jaun₂, ca₂rë₃'éin₂ bá₄. I₂lin₅₄ gué'₂ tsá₃ ca₂rë₃'én₂, tsá₃ 'nio₃.²⁵ Ia₁ tsá₃ caun₂ jág₁ 'ei₅ quió'₅, i₂lin₅₄ ca₂jme₃lióg₃ ca₂'uiin₂ bá₄ i₃lein₃. Jaun₂ ca₂juá'₂ Pa₄ ca₂tsí'₃ dsa₂ 'éi₂:

—Rë₂ bá₄ jui₁lia'₂ ca₂juá'₂ Jme₂dsí₂ Jñió₅ ca₂tsí'₃ dsa₂ quián₂ jniog₄ ma₂líg'₂ të₂le₃ quian'₅₄ Isaías, i₂jme₁'é₂ jág₁ o₄quió'₄ Diú₄, jme₁ca₂juá'₂:

²⁶ Gua₂ o₂chei'₅₄ dsa₂ juig₂ në₅ le₂la₂:

^w16 A₂lin₅₄ chog₅₄ si₂ tsá₃ le₁ton₅ jág₁ a₂tio'₅₄ 'ñió'₃ corchetes [le₂la₂].

“Dsón'₂ qui₁nág'₁ bá₄ 'nia'₂,
 la₁ tsá₃ le₃ñí'₂ 'nia'₂.
 Jag'₅₄ bá₄ 'nia'₂,
 la₁ tsá₃ le₃len'₄ 'nia'₂.”
²⁷ Ia₁ a₂ma₂'ua'₂ dsí₅ bá₄ dsa₂ la₂,
 ja₂lag₃ bá₄ nag₂₃,
 në₂jag₄ bá₄ i₂ma₂rë₂jni₅ rë₂gua₄;
 ján₃ bá₄ le₂në₅, në₂jag₄ bá₄ a₂tsá₃ jniá₂ mi₂ne₅₄,
 ia₁jaun₂ tsá₃ jág₃ quian'₅₄ mi₂ne₅₄,
 on₃ guë'₂ nag₃ quian'₅₄ rë₂gua₅₄,
 on₃ gué'₄ le₃ñí'₂ dsí₅,
 ia₁jaun₂ tsá₃ jéin'₃ dsí₅ ja₁con₂ jniá₂
 ia₁jaun₂ jme₁'lioin₁₂ jniá₂.^x
²⁸ 'Dsá₂ 'au'₂ 'nia'₂ jmo₄ —ca₂juá'₂ Pa₄—, jág₁ dse₃ la₂ a₂lión₂ dsa₂,
 a₂jén'₂ Diú₄ le₃ne₄ jui₅ quió'₅ dsi₂nau₂. 'Éi₂ né₃, tón'₃ bá₄ jui₅.
²⁹ Jme₁ca₂lë₃ juá'₂ Pa₄ le₂në₅, ca₂i₃len₃ dsa₂ judíos tsiin₂₃ 'ñio₅ lin₃
 quiaín'₅₄ riín'₅₄.^y
³⁰ Tìn₃ ñi₂ lia'₂ tí₅ ca₂guá₂ Pa₄ 'né₅ ja₁quí₅ 'lia'₅₄. Ja₁jaun₂ ca₂guein₃
 ca₂le₃jín₃ dsa₂ i₂jme₁dsi₂lén₂ dsi₂jag₅₄.³¹ Jaun₂ ca₂jme₃tiin₂₃ dsa₂
 qui₂ca₂'é₂ jág₁ 'a₂ lia'₂ lë₅ ja₁gon₂ Diú₄. Ca₂jme₃tiin₂₃ bá₄ dsa₂ jág₁ quió'₅
 Te₁gui'₅₄ Jesucristo. Ja₁jaun₂ ca₂'í₃ tei₄, tsá₃ 'ein₂ ca₂jné₃ jui₅ a₂'é₂ Pa₄
 jág₁ dse₃.
 Co₂në₅.

^x26-27 Isaías 6:9-10.

^y29 A₂lin₅₄ chog₅₄ si₂ tsá₃ chi₁ton₅ versículo 29.